

ლიტერატურული, სამეცნიერო-პოპულარული  
და საზოგადოებრივი ჟურნალი

ჟურნალის გამოსხვა

სამწევ-კავახეთის

სახელმწიფო

უნივერსიტეტი

არა

8

2016

**რედაქტორი - მერაბ ბერიძე**

**მოადგილე - მაკა კაჭკაჭიშვილი-ბერიძე**

**სარედაქციო საბჭო: გიორგი ბუცხრიკიძე**

ლია ზაზაშვილი  
ვახტანგ ინაური  
მალხაზ ლომსაძე  
ვასილ მამულაშვილი  
ლერი ნოზაძე  
ირინა ჯიშვარიანი

ირაკლი ვაშაყმაძე, თბილისი  
რეზო შეროზია, ზუგდიდი  
ზაირა კელოშვილი, ათენი

**უცხოეთთან თანამშრომლობის  
ბიურო: ლალი ბერიძე**  
მაია ქუეჩიშვილი

**მხატვრები: ნანა ყორანაშვილი  
თამარ თამარაძე**


**მდივანი - ზაირა გელაძე**

**საგამომცემლო ჯგუფი: ლია ზედგინიძე  
ლარისა გურგენიძე**

# პოვიტი

## ემზარ კვიტაიშვილი

დაიბადა თბილისში. 1959 წელს დაამთავრა თბილისის სახელმწიფო უნივერსიტეტის ფილო-ლოგიის ფაკულტეტი. მისი პირველი ლექსები დაიბეჭდა 1957 წელს „ცისკარსა“ და „პირველ სხივში“. 1963 წელს გამოქვეყნდა მისი პირველი კრებული - „გზაში ნათქვამი სიმღერა“. 1956-1960 წლებში მუშაობდა საქართველოს კომუნისტური პარტიის ცენტრალური კომიტეტის გამომცემლობის კადრების უფროს ინსპექტორად, 1960-1961 წნ. ამავე გამომცემლობის რედაქტორად, 1963 წლიდან უურნალ „ცისკრის“ ლიტერატურული მუშაკი იყო, ხოლო შემდეგ შოთა რუსთაველის ლიტერატურის ინსტიტუტის ახალი ქართული ლიტერატურის განყოფილების მეცნიერ-მუშაკი. კრებული „სიზმარი ვნახე“ 1975 წელს გამოიცა, ხოლო კრებული „ნაშუადლევი“ - 1999 წელს.



## შემოდგომის მიზურულზე ნათქვაში (მოკრძალებული ავტოპორტრეტი)

ადრე არ ვარ ნამყოფი, სად ცის ლურჯი გობია,  
ჭრელ ფოთლებში გახვევას არაფერი ჯობია.  
მებრალვიან – ჩემებრი ოხრები და ტივლები,  
მონუნუნეს მიზეზიც ბევრი მაქვს დაჩივლების.  
მორჩილ მოდგმას ვეუთვნი მონანიე მგვემართა,  
არასდროს დამვიწნია – ვისი და რა მემართა.  
ზოგჯერ ისე მექცევა, ვითომ არცკი ვყოლოდე,  
ვის ხელშიც ვარ, ეტყობა, არ მიმეტებს ბოლომდე,  
თავის მოსანინარი, გვყვანდნენ მამა-პაპანი,  
სხვა რამეს არ ვჩემულობ, ლექსში არ ვარ ჯაბანი.

## გაუთავებელი

ქარ-წვიმის, შლეგის, გავექეც შლიგინს,  
ვერსად ვაპოვე მყუდრო სანავე...  
მიჯობს დავწყნარდე, ჯერ შემრჩეს იგი,  
უფსკრულის თავზე რაც ვიქანავე.  
უძირო, უხსოვარი დროიდან  
მედება ხავსი, დავალ დამფრთხალი;  
წინასწარ ვიცი, ამას მოიტანს –  
არყოფნათ შორის ჩემი ფართხალი.  
აწითლებული, რას ყივის ყია,  
ცა გაუთენრად ჩანს ყიამეთად;  
ვის დავუტოვო ჭრილობა ღია,  
ასე გადაბმა – დღეთა, ღამეთა?!

## ასე არ ხდება თასვლა (გზა)

ზმანების თაღი ვერვინ გაზომა, გადამტკავლა;  
გზა დავინახე, კაცის ენატრებოდა გავლა.

ხეები იდგნენ მეჩირად, იმ გზის იქით და აქეთ;  
ზურგი არ ჰქონდა ზეგნის და ვერც ჩათვლიდი ვაკედ.

შავად მორკალულს, შიშველს, კლდეს აელესა ეშვი;  
დაღმართსაც მოვკარ თვალი, ძირს ეშვებოდა, ხევში.

დაიკეცა და გაქრა, როგორც კი შევეთვისე...  
მოვძებნი, დავადგები, თუ მომელანდა ისევ.

აგზნებულს გულმა მითხრა, გაელვებულმა გზამო,  
მიგაგნებინოს იქნებ – ადგილი, სამუდამო.

\*\*\*

რა არ გადავიტანე, მიტევს ქორო ჭირთა...  
თავს ვიჭერდი და მაინც – გული ამიტირდა.

სვე არ მწყალობს, ვერ ვიტყვი – ვიყო ენამჭევრი...  
დაღვრემილად ყოფნისა, მაქვს მიზეზი ბევრი.

ცის მაცქერალს, რაღა არ მძერებია ლახვრად,  
სისხლის, სასონარკვეთილს, კვლავ მომინევს დაღვრა.

იოლად არ მთელდება მოტეხილი მხარი,  
ნელშიც მოხროლს ცოტა რამ დამრჩა გასახარი.

სულიც გასძვრეს, შავ ბედთან ვინც რო შემატყუპა,  
სხვა არსად ჩანს საშველი – მივენდობი უფალს.

## სიბარეს სეულებანი ემატება

იმ ძველი ტვირთის არ გავხარ მზიდავს,  
ჭირნახულიც ვერ დააბინავე,  
გაირიყები სიცოცხლის ზღვიდან,  
ნელ-ნელა გითრევს მკვდართა მდინარე.

მეტის უფლებას არ გაძლევს ჯიში,  
ნაცრობი, რიალებენ ლანდები;  
უინმორეულთა შორდები ყიუინს,  
არავინ იცის, სად გაქანდები.

ჭირ-ლხინში გისვამს ჯამით და ჭიქით,  
საქები, ანი, სხვაგან იქება;  
ვერავინ გეტყვის, რა ხდება იქით,  
აუცდენელთან ჭირს შერიგება.

## **მთვარის ყვავილაზე განისვევება** (რეზო ჭეიშვილი მახსენდება)

წლევანდელ ღვინის ვერ შეხვდი სეზონს,  
ვერ ვამხელ იმედს – შეგხვდები როდის...  
ორმოცი გადაგიხადეს, რეზო,  
გულზე გათლილი დაგადეს ლოდი.

მოდებულია ხავსი და ბაო,  
მოგვეწყონდა, ამინდებიც ცუდია...  
კარგს აღარაფერს მოველით, ძმაო,  
უშენოდ ვუცდით ვარსკვლავს, კუდიანს.

### **ადრიანი დილა**

სულს ავსებენ სურათები, გაფენილნი ზღაპრებად,  
დავინახე კისერგანვდილ იხვების გადაფრენა.

გადიფრინონ, ოღონდაც კი თოფი ნუ გაქუხდება,  
შემოდგომის ცას მათსავით არაფერი უხდება.

რა შორსაა დარჩენილი ტაო - ოშეკი, ოპიზა...  
ვნატრობდი და მოტრიალდა ჟამი ნადირობისა.

ტანში მზარავს, გავურბივარ ხმაურს – ზრიალს,  
ამაზრზენს...  
დაგცალდეს და ამის მეტი ნურც გინდა სილამაზე.

ზღვარს გადასცდი, მინას, უძლებს, ეზომება მხარ-ტანი...  
არა უჭირს, ჭრელ ფოთლებში თუ მოილე ზღართანი.

## კვლავაც გაირდები (ზაფხულის მადლი)

შლამში ვერ ვტოვებ მარგალიტს,  
ცოდვა ვარ, ჯერ ნუ დამშლი,  
რას გარგებს ქება უთქმელი,  
არ მინდა, დაგრჩე ვალში.

ხმა, საგალობლის, ჩახმება,  
სუნთქვა თუ შემიჩერა,  
შენ ოღონდ გამაღვიძე და  
რასაც ვიქმ, ნახავ მერე.

## თამარაშვილის კორპუსთან ჩამოვლისას (ვიგონებ ფრიდონ ხალვაშს)

მედგა ნედლი ლობიო, ფრიდონის შეკმაზული...  
შორს არიან იმისი ძე და ორი ასული.

დავსხდებოდით, ვყვებოდით იმ მთისას და ამ მთისას,  
უფროს ძმისგან სიკვდილმა, ულმობელმა, გამთიშა.

კარგად მახსოვს, ქედაში, მასპინძლობა, თავაზი,  
გემოც არ მავიწყდება – მსხალის, კაცისთავასი.

დღეს ტკივილი, ათასი, გულს მეყრება დანებად...  
დაღლილს, მომაცოცხლებდა მასთან შეხმიანება.

## ფიქრის გორილან ვებვები

მსგავსად თონისა, ხურს ტროტუარი,  
ლელვსა და თუთას ვხედავ დაგლესილს,  
მზე ილიმება, ცეცხლად მღუარი,  
მალენჩებს სიცხე, უსაძაგლესი.

ვიწყებ წუხილის ღეჭვას და ლიჭინს,  
ალესილია ჯავრი დანებად;  
ცალფა ნაბიჯის გადადგმაც მიჭირს,  
სახლამდე სულის მწაფს მიტანება.

## საქაიზო ადგილი სანაპიროზე (პურიმჭამელთა მოსაზიდავად)

გამორჩეული რესტორნებს შორის,  
ხეთა ჩრდილებში ჩანს „თაღლაურა“;  
ვერაფერს აკლებს სეტყვა და თქორი,  
გადამთერავი, აკრავს აურა.

იქვე, თაღლართან, ბოლავს მაყალი,  
მაგილავ, უხვო, ვგრძნობ, იძურნები,  
ნაირნაირი, ახალთახალი,  
მადის აღმძვრელი მოაქვთ კერძები.

სამაგალითო მომსახურება,  
არც თაღლითობა და არც ხმაური,  
მოუბეზრებელ ხედის ყურება,  
ქება ამადაც ვთქვი „თაღლაურის“.

## **ქილი თამართვა (მუსიკის სასწაულები)**

ღამიდან გათენებამდე, „მეცოს“  
ჯაზის გამოჰყავს რა ანსამბლები;  
არაფერს ზოგავს, გულები ლენოს,  
წელში გამწყვეტი დაგცეს დამბლები.

რა გამებს, რა სიმს, რა ბაგეს სწყდება  
ამდენი ტონი – წმინდა, „საგრადა“,  
აღარ ილევა წყება და წყება,  
კვნესა უთვალავ ხმათა, საკრავთა.

### **ვერის პალი**

ფიჭვებში, ჭადრის გამხმარ ტოტებში,  
დაშრიალებენ ზამთრის ქარები;  
ციკვთა და შორთა, ყოველთვის მშურდა –  
სიმაღლე ლალი, მიუკარები.

ციდან დაძრულებს, უყვართ ზეცავე,  
ვერ ელევიან ქროლვას, ვნებიანს;  
მოხეტიალე ღრუბლებს წენავენ,  
გათოშილ მინას რომ გასცდებიან.

\*\*\*

ბოგანო, დასაბუგავ გულში,  
რაც შენ გინდოდა, ის თესია,  
არაფერი მაქვს უკეთესი,  
ცრემლებიც, ლოცვაც ქრისტესია.

აღარ მელევა საზრუნავი,  
ჩუმად ზრიალებს, დნება ზრუნი...  
მიმობნეული, ბაგეთაგან,  
არავისია დასაწუნი.

მადევარს რალას გავექცევი –  
გრძელი ნახტომით, კამარათა;  
სვე-ბედმა, აქნილს, მწუხარება,  
არ იქნა, აღარ ამარიდა.

## გაცყდეს, საცა წვრილია (ზაფხულის სიშმაგე)

სამკაულს არ დავეძებ,  
ოლონდ იყოს სამკალი,  
რაა, თუ არ გადაგდო  
ლექსმა ურჟოლა, კანკალი,  
მთქმელად თუ ვერ გამოვდექ,  
კაკლის ძირას დამფალი.

დაბერებას არ ვჩივი,  
არც გამოცლილ არაქათს,  
არ ჩანს, გაქრა, ამდენი  
ვინც რო მალაპარაკა,  
ბაწარს დანა ვარჩიე,  
შემიწიროს ზვარაკად.

## 6-იავერევით

ღამესა და სიჩუმეს არ დატოვებს მარტოს,  
თვითონ იცის ბუნებამ, როდის და რა ჩართოს.

ყანას მორწყავს წყაროზე გადებული ღარი,  
ვერ ვიჯერებ, არ მოხდეს – რამე გასახარი.

ზაფხულიდან გავიგებთ ჭრიჭინების ჭახჭახს,  
ბრონეულად გახჩება – ვარსკვლავების თახჩა.

მაჭრის ჩხრიალს, დამბანგველს, გაიგონებს ყური,  
ცაში ფრთებმოკანკალე იფრენს მოლალური.

დღეები კვლავ წარვლიან, ფარას ებმის არვე,  
აცივებას მუხლები იგრძნობს წინასწარვე.

მომიშორებს, მიმაგდებს – საზრუნავი ჩემი,  
ზამთრის ძილსაც, დაღლილი, მალე მივეცემი.

## შვილიშვილის გვერდით

თეთრი ტანი. ლისის ტბაზე შრიალებენ ვერხვები,  
ჩვილს ვეჩვევი, აჩაჩული, იმათ ჩურჩულს ვერ ვყვები.

ნეტა საით მისრიალებს გასროლილი ისარი?!  
სხვას ვერავის დავუმადლებ, ეს წყალობა ცის არი.

დაექანა, მზემ გორმახებს სხივი გადაამტვრია,  
ლურჯ, საგორავ ეტლში მიზის უფლისწული ანდრია.

სხვებსაც დაასეირნებენ, ნიავის გაყოლებით;  
აგვივლიან, ჩაგვივლიან – მისი თანატოლები.

სად არ დაგვიღვრია სისხლი, გვეყო სადარდუბალო,  
საქართველო გაამრავლე, გავედრები, უფალო!

## შემანანა გასაქრობად

ვინ დასწევია გასროლილ ისარს,  
ბოლო ერთია – დამშლი თუ შემშლი;  
დაუფლეთელო ნათელო დღისა,  
რაგინდ დაბნელდე, დარჩები ჩემში.

დრო იყო, მყუდრო მფარავდა ჭერი,  
მეხვია, არ მელეოდა ხვავი...  
აალებული მზის მიყვარს ფერი,  
ბრონეულისას ვიტოვებ ყვავილს.

# ��როზი

## კლარა გელაშვილი

დავიბადე ახალციხის რაიონის სოფელ საყუნეთში. ლექსებს ენერ ათი წლის ასაკიდან. „ვიბეჭდები“ 1990 წლიდან. ვარ აეტორი ორი წელისა. ვთანამშრომლობ როგორც ადგილობრივ, ისე რესპუბლიკურ პრესასთან (კრიტიკა, პუბლიცისტიკა, მეცნიერული ნაშრომები, კვლევები...). ვარ საქართველოს მწერალთა კავშირის წევრი, პროფესიით - ფილოლიოგი. ვმუშაობ დიმიტრი ყიფიანის სახლ-მუზეუმში (ფონდების მცველად). ვცხოვრობ ქვემსმხეთში.



## საპედისცერო ჯვრისცერა

წირვაზე მისულმა ტაძარი ჩქარა დატოვა. აფორიაქებულმა გულმა ჯერ ყურადღება გაუფანტა, მერე კი, იძულებული გახადა, სუფთა ჰაერზე გამოსულიყო. იქვე, ფიჭვების ძირში, გრძელ სკამზე ჩამოჯდა.

როგორც ყველაფერს, ამ ტაძარსაც დასტყობია კარგი მოძღვრის ხელი! მერე როგორ ჰქოვს თავისი ბედ-ილბლით ეს პატარა ეკლესია საქართველოს! მასაც ასე სჭირდება კარგი გალავანი... რეინის კარი... ერთგული მრევლი და კარგი მოძღვარი... სჭირდება, ნამდვილად სჭირდება, და მერე როგორ, მერე რა დროულად!

გელამ ხელი გულზე დაიდო და ღრმად ამოისუნთქა. რა უნდა ამ გულს, რას სთხოვს, რას ერჩის, ყველგან ეშმაკი როგორაა ჩასაფრებული?! — ქუჩაში, სახლში... ტაძარშიც კი... ღმერთო, ნუთუ შენი კალთის ქვეშაც არა ჩემი სიმშვიდე შესაძლებელი?!

ველარც სკამზე გაჩერდა, ნამოდგა და ზურგით გალავანს მიეყრდნო.

— რამდენი კეთილი საქმე მოუსწრია ამ მოკლე დროში მამა ანდრიას! ერობაშიც კეთილსინდისიერი კაცი იყო, უდალატო, მართალი და აქაც კარგად აუწყვია თავისი საქმე!... თუმცა, სწორედ ასეთი ადამიანები ვერ ეგუებიან ამქვეყნიურ ქაოსს და შეძლებისგვა-

რად განერიდებიან ხოლმე... ნეტარ არიან ისინი, ვინც ლვთის კალ-  
თის ქვეშ პოულობენ სიმშვიდეს...

ახლა ასე ფიქრობდა, მაშინ კი... როცა გაიგო, მისმა ბავშვობის  
მეგობარმა ერისკაცობაზე უარი თქვა და შეიმოსა, ხომ არ გა-  
გიუდაო, ისეთი ხმით შეჰყვირა, თითქოს მისი ეკლესიაში წასვლა კი  
არა, დალუბვა გაეგოს! ებრალებოდა მეგობარი და მერე, როგორ!  
ნუთუ რწმენაში ყოფნა არ იყო საკმარისი?! ვერ წარმოედგინა,  
ახალგაზრდა კაცს მთელი ცხოვრება ანაფორაში დაეღამებინა, გა-  
მოკლებოდა ყველას და ყველაფერს, ელოცა მხოლოდ სხვათა ცოდ-  
ვების გამოსასყიდად და დიდხანს, დიდხანს დატანჯულიყო ურწმუ-  
ნოთა გამჭოლი, ეჭვიანი, ქურდული მზერით!

რამდენჯერ გაუჩნდა მისი მონახულების სურვილი, მაგრამ...  
ვაითუ, მეგობრის თვალებში სულიერი ტანჯვა წავიკითხოო და, ალ-  
ბათ მაშინაც საკუთარ გულს გაუფრთხილდა!

გადიოდა დრო და ქარს მოჰქონდა ცნობები მეგობრის შესახებ:  
გადააქციაო ტაძარი სულიერების სავანედ. რწმენისა და პირუთვ-  
ნელობის ასპარეზად აქციაო იგი! დანგრეული გალავნის კედლებში  
რწმენა და სიყვარული ჩაატანაო... მრევლს ველარ იტევსო ეკლე-  
სია...

სადღა იყო ძველი ერისკაცი! ველარც კი იცნო!.. ამქეცენიურ  
ცოდვებს გარიდებული, ძაძით შემოსილი მოძღვარი იდგა მის წინ!  
ხოლო ის ერთი ნაბიჯი კი, რომელიც მათ აშორებდა, იმ ხიდის მო-  
ლოდიში გატრუნულიყო, რომელსაც ორი, ჯერ კიდევ ამოუცნობი  
სამყარო უნდა დაეკავშირებინა. მოძღვრის მშვიდმა, იმედითა და  
რწმენით სავსე თვალებმა არა მარტო სულიერი კავშირი ალადგინა,  
არამედ მის სამყაროში უფრო ღრმად შეღწევის სურვილი დაბადა...  
დღე არ გავიდოდა, მასზე არ ეფიქრა... თუმცა კარგად იცოდა, რაც  
ეწეოდა მისკენ... მტკიცანი სული ეძებდა ნავსაყუდარს, სიმშვიდესა  
თუ გამოსავალს... ნირვაზე დასწრება გაუჭირდა, გონება ეფანტე-  
ბოდა, მუხლი ეკვეთებოდა, სამაგიეროდ, ქადაგების დროს არ გამო-  
პარვია არცერთი სიტყვა, იმდენი რამ ენიშნა! თითქოს მის გულსა  
და გრძნობებში აფათურებულიყო... ოჯახი, ჯვარი, მოთმინება...  
თითქოს თავდაყირა დადგა ყველაფერი! ჰმ, მოთმინებაო!.. კი, იცის,  
საუკეთესო წამალია სულისთვის, მაგრამ... მიუხედავად შინაგანი  
ბრძოლისა, ბოლოს მაინც დარწმუნდა, რომ მისი ბავშვობის მეგო-  
ბარი არასოდეს ინანებდა, რომ უფალს შეუდგა! რამდენ რწმენაშე-  
რყეულს ესაჭიროებოდა მისი წამალი!

სულ რამდენიმე თვე და, სადღა იყო შავი ფიქრები ანაფორაზე, ფიზიკურ თავისუფლებაზე, ტოლ-სწორებში გამოწყვეტაზე... ახლა თვითონაც დაუნანებლად გაიხდიდა ძვირადლირებულ პიჯაკს და სადმე სანაგვეზე დაუნანებლად მოისვრიდა, ოლონდ ცხოვრების ბინძური თამაშისათვის თავი როგორმე დაელნია და სულის სიმშვიდე ეპოვნა... რაც მეტი გაიბრძოლა, მეტად ნაგვემი აღმოჩნდა. ის კი, ვისაც არჩევანი დაუწუნა და ასგზის განიკითხა კიდეც, უფალს ისე-თი მადლით დაეჯილდოლებინა, რომელიც ახლა ისე ესაჭიროებოდა, რომ ველარც სული და ველარც სხეული ველარსად გაექცეოდა...

გულმა დატვირთვას ველარ გაუძლო, ჯიბიდან ნიტროგლიცერინის ჰატარა აბი ამოილო და ვიდრე ენის ქვეშ დაიდებდა, წამით დახედა:

— ჰმ, აბით შეჩერებული! — გელამ გულზე ხელი ისე მიიჭირა, თითქოს უნდოდა, გადმოვარდნილი გული მუჭში მოექცია, რათა მინაზე დაცემისაგან გადაერჩინა. ეკლესის ეზოდან ფრთხოლად გავიდა, მანქანის კარი გამოალო და უკანა სალონში ფრთხოლად წამოწვა.

მღვდელი ღვთისმსახურებას განაგრძობდა, გელა — ფიქრს...

პირველად, როცა სიყრმის მეგობარს სულიერ შვილად წარუდგა და აწ უკვე მოძღვრის წინაშე საწყაული დააპირქვავა, შვებით ამოისუნთქა!

ბავშვობა, ყრმობა, სიჭაბუკე... რა კარგად ახსენდება ყველაფერი! მეათე კლასში იგრძნო გულის უცნაური ფორიაქი. ამისი მიზეზი კი, თანასკოლელი თათია იყო. ან კი აქამდე როგორ ვერ მიხვდა?! თათიას გამოხედვა, აფარკლული დაწვები, კრძალვა... ყოველივე ეს თათიას მის დანახვაზე ემართებოდა... ცოტა ხანიც და სენი მის სულსა და გულშიც გადმობარგდა და აქამდე შეუცნობი რამ აგრძნობინა. თუმცა, შეძლო, გრძნობები შეენიღბა. საღამოობით მეგობრებთან ერთად მის სახლთან გაივლიდა. ხან იქვე, ხის სკამზე ჩამოსხდებოდნენ, ხან გაისეირნებდნენ, მაგრამ ვერ იქნა და ხმა ვერ ამოილო, თითქოს მომერტს ელოდა, თათიასთვის ეთქვა, რასაც გრძნობდა, რასაც ფიქრობდა... არც მეგობრებს არ გამოპარვიათ მათი შორით დაგვა... უკვე აღარავინ ახსენებდა მათ სახელებს ცალ-ცალკე. თათიას ბევრი აღმერთებდა, მაგრამ იცოდნენ, მისი გული სხვას ეკუთვნოდა. ეს „სხვა“ კი, ვერა და ვერ ახერხებდა, მისთვის ორიოდე ისეთი სიტყვა ეთქვა, რომელსაც თათია ასე მოუთმენლად ელოდა...

ამასობაში სკოლაც დაამთავრა და სტუდენტიც გახდა. არც იქ დავიწყებია თათია. თბილისიდან ჩამოსული მაშინვე მის მოსანა-სულებლად გარბოდა, მაგრამ მოკითხვის შემდეგ რატომძაც სასაუ-ბრო თემას ვეღარ პოულობდა, პირველკლასელივით იბნეოდა და ისევ და ისევ მონატრებას ამხელდა, სიყვარულს — ვერა!..

ასე ილალებოდნენ დღეები, კვირები, თვეები და თან მიჰქონდათ ულამაზესი შანსი ბედნიერების მოპოვებისა!.. ეს ის პერიოდია, რო-დესაც ადამიანს წამის მარადიულობა სწავლა. როდესაც ჰგონია, რომ ცხოვრების სადავებს იმორჩილებს და როცა უნდა და რაც უნდა, ყველაფერს ისე წარმართავს! სწორედ ამ დროს უშვებს ადამიანი ყველაზე დიდ, გამოუსწორებელ შეცდომას! ასე დაემართა გელა-საც... სტუმრად წასული თათია შემთხვევით გაცნობილმა „ტიპმა“ მოიტაცა!..

ეს იყო პირველი ცხოვრებისეული დარტყმა, რომელმაც 19 წლის გელა დააჩინქა!

გელა მიხვდა, რომ უდიდესი შეცდომა დაუშვა. დუმილით დაკარ-გა ის, ვისზე ფიქრშიც ლამეებს ათევდა! ამას ვერ წარმოიდგენდა, არა, მაინც რატომ არ შეიძლებოდა რომ დაეკარგა, რა დაიფარავდა მათ გრძნობას, ფიქრი?..

რამდენიმე თვე აგონიაში ჩავარდნილი გელა სოფელშიც არ ჩამო-სულა. სხვა მის ადგილზე როგორმე მოახერხებდა, ხმა მიეწვდინა, რაიმე აქსნა... თუმცა, რალა აზრი ჰქონდა. მით უმეტეს გაიგო, რომ თათია თვითონვე არ გამოჰყოლია უკან მშობლებს...

რა დაავიწყებს გახაფხულის იმ დღეს, როცა გათხოვილ თათიას პირველად შეხვდა!..

თათიას გათხოვების შემდეგ არა თუ მევობრებს, საკუთარ თავ-საც გაურბოდა. ადრე თუ მათ გარეშე ნაბიჯს არ გადადგამდა, ახლა მარტოობაში ეძებდა სიმშვიდეს...

მაშინ დაბა სურამის ებრაელები განთქმულნი იყვნენ გასაყიდი საქონლის მრავალფეროვნებით. რა გინდოდა, სულო და გულო! საიდან ალარ მოდიოდნენ მყიდველნი! განსაკუთრებით საპატარ-ძლოები და პატარძლები მოჰყავდათ საყიდლებზე. სხვაგან ვერსად ნახავდით ასეთ საქონელს! ებრაელებში უნდა გეპოვნა შენი გემოვ-ნების სამოსი — ფეხიდან დაწყებული თავსაბურავით დამთავრებუ-ლი!.. და აი, გელამაც ფეხსაცმლის შესაძენად სურამის ებრაელებს მიაშურა.

„სურამულას“ ბოგირს რომ გადასცდა, ხელმარჯვნივ, მესამე სახლიდან ახალგაზრდა კაცი გამოვიდა და: — ხომ არაფერი გინდა ბიძიკონ? — მერე წინ გაუძლვა და სახლში შეიყვანა, — შეარჩიე, მოიზომე და მოვრიგდებითო... რომც არ გდომოდა, თვალი მაინც გადარბოდა საქონლიდან საქონელზე... ქალის ფეხსაცმელი უფრო სჭარბობდა. ერთი ლამაზი საზაფხულო ფეხსაცმელი აიღო ხელში. რამდენჯერმე შეატრიალ—შემოატრიალა და ამოიხვენეშა. ებრაელი, რომელსაც მიშად უხმობდნენ, თითქოს რაღაცას მიხვდაო, მივიდა, თვალებში შეხედა და: „მოგწონს? თუ ფული არ გეყოფა, გენდობი, წაიღე!“ — თან ხელი ისე აიქნია, თითქოს იმისი თქმა უნდოდა, მეჩემსას ვაკეთებ და ... კაცობაში მაგასაც შეველევიო ... რა იცოდა, რა აკვენესებდა გელას ... რა იცოდა, რომ თათიას გახსენებამ აუნენა ფიქრი!.. გელას ისე ესიამოვნა ებრაელი მიშას მომენტალური თანაგრძნობა, რომ კინაღამ გულის გადასაშლელად მოემზადა!..

სამსაფეხურიანი ხის კიბე, რომელიც ეზოდან სავაჭრო ოთახს აკავშირებდა, ახალი კლიენტის შემოსვლას სულ ჭრიალ-ჭრიალით ეხმაურებოდა. ამჯერად კიბე კი არ აჭრიალდა, აპაკუნდა! აშკარა იყო, ქალის მაღალქუსლიანი ფეხსაცმელი ეხებოდა და ახმაურებდა. გელამ უნებურად გახედა კარს. საშუალო ასაკისა და სიმაღლის ქალს, რომლის ფეხსაცმელიც ასე პაკუნობდა, უკან ახალგაზრდა გოგონა მოყვებოდა...

— თათია! ნუთუ?! კი, ნამდვილად თათია ახლდა გადაპრანჭულ ქალს!.. გელამ თვალმოუშორებლად გადადგა რამდენიმე ნაბიჯი და ღანკვებაფარკლულ თათიას დაბნებული სახით მიუახლოვდა. თათიამ დიდი თაფლისფერი თვალები შეანათა და ხელი გაუწოდა.

— გილოცავ! — ძლივს ამოღერლა გელამ მხოლოდ იმიტომ, რომ რაღაცა უნდა ეთქვა... მარტონიც ხომ არ იყვნენ! თავდახრილმა თათიამ მადლობა გადაუხადა და აუცილებლობის გამო დედამთილი და თანასოფლელი ერთმანეთს წარუდგინა.

— სასიამოვნოამ, - ჩაილაპარაკა ქალმა და მაშინვე ტანსაცმელს მიაშურა... გელას თითქოს ცივი წყალი შეასხესო, უცებ გამოფხიზლდა. მიხვდა, სულ რაღაც წამი რჩებოდა თათიასთან პირისპირ დასარჩენად და დრო არ დაკარგა: „ბედნიერი ხარ?“ — გელას ხმაში საკუთარ თავზე გამწყრალი კაცის ტონი უღერდა. თუმცა, თამამი იყო, გაბედული!.. სურვილი კლავდა ამ პანაწინა წუთში ამოეთქვა ის, რისი თქმაც ადრე უნდა მოეხერხებინა. თათიამ ისევ იმ ღიმილით შეხედა, ბედნიერების მილოცვისას რომ გაქრთა მის ჭკვიან,

ნაღვლიან თვალებში... „თათი, იცი, როგორ მიყვარხარ?“ — გელამ თავი დაკარგა. მისი ბეჭდიანი ხელი ხელში მოიქცია და ისეთი სახით შეხედა, თითქოს ადამიანი კი არა, მტაცებელი ცხოველი იყო, რომელიც ნადავლის დაკარგვის შიშით ყველაფერს ჩაიდენდა!..

— დაიგვიანე! — თათიამ მწარედ გაიღიმა და ხელი გაითავისუფლა. ცრემლით სავსე თვალებში წყრომა გაკრთა და ზურგი აქცია, თუმცა კარგად გაიგონა უკან მიდევნებული სიტყვები: „არც ახლაა გვიან!“

გელას სუნთქვა შეეკრა. არასოდეს ყოფილა ასე განადგურებული... ასე დამარცხებული... ასე შერცხვენილი...

„დაიგვიანე!!!“ — აბა, რა გეგონა, რა პასუხს ელოდი, გელა ბიჭო?! რა კარგ დროს ამოლერლე სათქმელი! მაინც რას ელოდი წესიერი ქალისგან? გეგონა, ხელს ჩაგჭიდებდა და სამყაროს დასალიერამდე გდევდა უკან მიდევნებული სირცხვილით?! იქნებ, საყვედურიც შეგებედა, — რად არ მიერთგულეო?!

გელა ბოგირზე შეჩერდა და „სურამულას“ პატარა ტალღებს დააჩერდა.

— ცხოვრებაში ერთადერთხელ გაბედე, გეთქვა, რასაც ფიქრობდი და მერე როდის?! როცა თვითონაც კარგად იცოდი, რა პასუხს მიიღებდი! ეს რა ჩაიდინე, გიხდოდა, თავი დაგერწმუნებინა, რომ ლაჩარი არ ხარ?! ნუთუ ამდენი ხანი იმისთვის დუმდი, რომ მერე გათხოვილი ქალისთვის აგეხსნა სიყვარული?! არადა, ერთადერთხელ რომ მაინც გეთქვა, თათია იქ დამრჩენი არ იყო!.. იცი შენ ეს, იცი, რადგან სწორედ ახლა წაიკითხე თათიას თვალებში!.. რა ქენი, ბიჭო, ვინ გადაატარე გულზე, ვინ?! ვიღაც ვიგინდარა, რომელმაც ყოველგვარი გრძნობის გარეშე ცოლად დაისუა შენი სიყვარული!!! მისთვის თათია მხოლოდ ცოლია, ჩემთვის კი... გაჯობა! უნდა აღიარო, რომ გაჯობა! თავში რომ თქმა სჯობდა დუმილს და თქმით რომ ყველაფერს ეშველებოდა, ეს უნდა გცოდნოდა, ბიჭო!

მუნჯი იყავი და ვერ ამოთქვი, ბრმა იყავი და მომავალი საფრთხე ვერ დაინახე. ყრუ იყავი და ვერ გაიგონე მისი გულის ხმა! დღეს ამოიდგი ენა, მაგრამ ნეტავ არაფერი გაგეგონა! ერთ წუთში მოინდომე შეცდომის გამოსწორება, ერთ წუთში!...

საკმაოდ დიდხანს რცხვენოდა საკუთარი თავის და როგორც ხშირად ემართებათ ხოლმე ამ ასაკში და ამ მდგომარეობაში მყოფ ახალგაზრდებს, მასაც ეგონა, რომ ყოველივე დამთავრდა!..

სასწავლებლის დამთავრებისთანავე მეორე, გამოუსწორებელი შეცდომა დაუშვა — ცოლად ისეთი გოგონა მოიყვანა, ვისთანაც არანაირი გრძნობა არ აკავშირებდა. მით უმეტეს, არც ფიზიკურად მოსწონდა. გოგომ იაქტიურა და ნასვამ მდგომარეობაში მყოფ, გულგატებილ გელას „აეკიდა“.

ადვილად შეეძლო ეს შეცდომა მაინც გამოესწორებინა, მაგრამ არც უცდია. ახლა სულ ერთი იყო, ვინ იქნებოდა მისი ცოლი... თავისი გაუაზრებელი ნაბიჯით დედასაც გული ატკინა და დასაც: „ცივი თვალები აქვს და სულიც ასეთივე რომ აღმოაჩნდეს, დავიღუპებითო!..“

სამწუხაროდ, მართალნი აღმოჩნდნენ! უკვე ორჯერ ჩახედა სიკვდილს თვალებში! ორჯერ იწვა სასიკვდილო სარეცელზე და, ალბათ ერთადერთი იყო ამ მდგომარეობაში მყოფთაგან, ვინც ღმერთს გადარჩნას არ ემუდარებოდა...

რა არ იღონა, როგორ არ სცადა, მაგრამ ამ ქალის სულში ერთი სანთელიც ვერ აანთო! უსიყვარულოდ ბევრი ოჯახი შექმნილა, მაგრამ შემდგომი ურთიერთობებით და ერთი ულლის წევით მეუღლები ერთ სულ და ერთ ხორც ქცეულან. მათ უბეში დაფრთიანებულ ბარტყებს კი, ბედნიერება გაპყოლიათ მეგზურად!...

არავინ უწყოდა, თუ რა ხდებოდა ბუტაფორიული ბედნიერების მიღმა... იქნებ ხედავდნენ და გრძნობდნენ კიდეც, მაგრამ მთავარი ის იყო, რომ გელა იტანდა „უხმოდ“. განსაკუთრებით შვილებისადმი მისი დამოკიდებულება ანუსებდა. ანგელოზებს ჰევანდნენ ბავშვები, მაგრამ რა... გასაოცარი ყინული გაწოლილიყო დედასა და შვილებს შორის! თითქოს, სხვისი თბლები ჰყავდა სამადლოდ შეფარებული...

ისევ შეცდა! პირველი შეცდომა დაგვიანებით დაუშვა, მეორე - აჩქარებით. ეჩვენებოდა, თითქოს მთელი მისი ცხოვრება შეცდომა იყო...

...პირველი ინფარქტის მიღებისას მკურნალმა ექიმმა მის ქალვაჟს რომ შეხედა, რა უნდა მოგერიოს ამათ მამას, შენი თვალები ამათი ყურებით არ უნდა დაიღალონო... რა იცოდა ექიმმა, რომ სწორედ მათ გამო სტკიოდა გული. რა იცოდა, რომ კერიის გამათბობელი ბუხარი იყო ჩანაცრული და საშინელი სიცივე დანავარდობდა სულში... სხეულში... ამათი დედის გული კი, სისხლის იმ რაოდენობას ატარებდა, რაც მხოლოდ სასიცოცხლოდ ესაჭიროებოდა. არც ერთი წვეთით მეტი, თორემ იქნებ ოდესმე დაბადებოდა სურვილი ოჯახის გაბედნიერებისა!...

მხოლოდ სოფელში ჩასული გრძნობდა თავს მშვიდად. დედის სითბო და სურნელი ბავშვურ უდარდელობას უბრუნებდა. მშვიდად ეძინა და ისეთ ლამაზ სიზმრებში დაცურავდა, გამოლვიძებულს თვალის გახელა და რეალობაში დაბრუნება აღარ უნდოდა... თუმცა, ხშირად ჩასვლას მაინც ვერ ახერხებდა...

ერთბაშად ყველაფერი შეიცვალა. გელამ სოფელში სიარულს მოუხშირა. ამბობდნენ, მეორე ინფარქტის შემდეგ სუფთა ჰაერი ურჩიაო ეკიმბა. შედეგიც სახეზე იყო — გელა გახალისდა, ჭაბუკივით აუციმციმდა თვალები... მართლაც, იმედის სხივი შემოჭრილიყო მის ცხოვრებაში. ჭაბუკური შემართება დაბრუნებოდა გულდაკოდილს... რა იყო ეს, რას ებლაუჭებოდა ჩასაძირად გამეტებული იმედი?

ერთხელ, სოფელში ჩასულს ახალი ამბები დახვდა: ლევანტოს თათიას დაენგრაო ოჯახი!.. გელასთვის ეს იმდენად მოულოდნელი იყო, რომ ძარღვებში სისხლის გაყინვა იგრძნო. აივანზე, ტახტზე გულალმა მწოლიარეს მოეჩვენა, რომ ცა თათიას სახემ დაფარა. სხვა არც ვინ და არც აღარაფერი არ ჩანდა ირგვლივ...

— ჩაულაგებია თავისი ნივთები და წამოსულა... არც ჩეუბი, არც არაფერი, გაგიჟდება კაცი! — ეს გელას დედა იყო ასე აღშფოთებული.

— იქნებ უშვილობის გამო გაჩნდა პრობლემა და ველარ აიტანა...  
- თავისი აზრი ახლა გელას დამ გამოთქვა.

— არაო, არაფერი უგრძნობინებიათ, მე თვითონ მივიღე ასეთი გადაწყვეტილებაო...

„თათია! ჩემი ტკივილი და სიხარული! ახლა ის აქაა, ოდნავ მოშორებით...“ გელას ვერ გაერკვია, რა ერქვა იმ გრძნობას, რაც ახლა დაეუფლა — თათიას უბედურებით გამოწვეული ტკივილი თუ... თუმცა, რატომ უბედურება? ეს ხომ მისი არჩევანია! იქნებ პირიქით, სწორედ უბედურებას გამოექცა? უსიყვარულოდ ვერ იცხოვრა და... იმიტომ! იცნობს გელა თათიას! თათია სპეტაკია, მას არ შეუძლია თამაში... არც სხვისი მოტყუება! სწორედ ამიტომ მიიღებდა ასეთ გადაწყვეტილებას! მით უფრო, რომ შვილი არ ჰყავდა... ეჰ, თათია, არც შენ შეგხვედრია სულიერი, თორემ ამდენი წელი თავს როგორ ვერ შეგაყვარებდა!..

მას შემდეგ სოფელში ჩასულს სუნთქვა აღარ უჭირდა, რადგან გრძნობდა, ჰაერი თათიას სურნელით იყო გაჟღენილი... ველარ გარკვეულიყო, რა ერქვა იმ გრძნობას, გაბზნილი გულით რომ თათიასკენ მიაქანებდა — სიყვარული? კი, იყო, მაგრამ გელა გრძნობ-

და, რომ რაღაც სხვაც იყო, იქნებ მარტოობიდან გასაქცევ გზას უერთდებოდა თათიასკენ მიმავალი გზა? მაგრამ ყველაზე მთავარი ის იყო, თუ რას ფიქრობდა თვითონ თათია!

გაზაფხულის ერთ თბილ საღამოს, სეირნობისას, დღისა და ღამის გაყრის უამი სწორედ თათიას ჭიშკართან წამოეწია... იქამდე როგორ მივიდა, არ ახსოვს! ფიქრმა წაიყვანა, ფიქრმა... გზად კი გული გამოიყენა, გულზე გაიარა საკუთარი ფეხით და, უნდებლიერ მივიდა იქ, სადაც არ უნდა მისულიყო! არ უნდა მისულიყო არა იმიტომ, რომ არ უნდოდა, არა, თათია წრფელი გულით უყვარდა დღემდე და ამ სისპეტაკისთვის უნდა ეცა პატივი — ღირსებისთვის, რომელიც ორივეს გააჩნდა... თათიას სიყვარულს ვერ გაუფრთხილდა და ახლა, სამაგიეროდ, მის სახელს უნდა გაუფრთხილდეს!.. უნდოდა, უხმოდ გასცლოდა იქაურობას, მაგრამ თვალი მაინც იმ სინათლისკენ გაექცა, რომელიც უზარმაზარ, მწვანე ეზოში ჩადგმული ოდის ფანჯრიდან გამოკრთოდა. თათია, თათია, რა ახლოსა ხარ და მაინც რამხელა მანძილი გვაშორებს!.. ახლა მარტოა, სულ მარტო. ობოლი, მიუსაფარი... მისი უბედურების საწყისად საკუთარი თავი მიაჩნდა და ვინ იცის, უკვე მერამდენედ ეტკინა გული... ეზოდან წყლის ხმა მოესმა. ონკანთან თათიას სილუეტი იკვეთებოდა.

— ალბათ წყალს ავსებს!.. ჭიშკართან ძედგა. რა ქნას, წავიდეს?.. უნდა, წავიდეს, მაგრამ ფეხი არ გაჰყვა! გულს დაეკითხა, მაგრამ... დაიბნა, აფორიაქდა და ჭიშკარი შეალო... მხოლოდ შეხედოს, მისი სიახლოვე იგრძნოს და მერე არ დაეძებს. დაე, თუნდაც სამუდამოდ გამოთხოვოს... ჩაახველა...

თათია ზურგით იდგა და წყლის ხმაურში იქნებ ვერც ჭიშკრის ხმა გაიგონა და ვერც მისი მიახლოება იგრძნო. გელა მიუახლოვდა. თავი ვერ შეიკავა და მარჯვენა ხელი წელზე, მარცხენა კი მხარზე მოხვია და ლოყით თავზე დაეყრდნო...

— თათია! — მხოლოდ ეს თქვა და იგრძნო, რომ წამის მარადიულობას ეზიარა... ეს იყო ის, რისთვისაც სიცოცხლის გაცემაზეც დათანხმდებოდა.... ალარც წინ ჩანდა რამე უკეთესი და არც უკან. აწმყოც ეს იყო და წარსულიც... მომავალზე კი წარმოდგენაც არ ჰქონდა, რა იქნებოდა. ნუთუ ის, რაც ამდენმა წელმა დაშალა, ამ პანაწინა წუთს უნდა მინდობოდა ასაშენებლად!..

თათია თითქოს ელოდაო, წამიერად გაირინდა. იქნებ ისიც, როგორც გელა, ბედნიერების ძიებაში დალლილი ქალი, სიყვარულის საყრდენს ეძებდა და გელასთან შეხვედრაზე ოცნებობდა, მაგრამ....

— წადი! — თითქოს თავის თავს ესაუბრებაო, ისე ჩაილაპარაკა  
და გელას ხელი წელიდან ფრთხილად მოიცილა...

— თათია, მე ვერ ვარ კარგად! — გელას ხმაში მუდარამ გაიუ-  
ღერა...

— ვიცი, ვიცი....მაგრამ შენ შვილები გყავს, გელა!.. წადი!..

— ვიცი... მაგდებ?

— ჯერჯერობით!.. ასე სჯობია!..

ჯერჯერობით!.. ასე სჯობია!.. — დიდხანს ესმოდა ეს სიტყვები.  
იმედის ჭია აუფუსფუსდა გულსა და სულში. იმედს იტოვდა, რომ  
ერთ დღესაც, როცა შვილები აღარ დაისაჭიროებდნენ, უსათუოდ  
შეაღებდა იმ კარს, საიდანაც კი არ დაითხოვეს, არამედ მხოლოდ  
დაემშვიდობდნენ!..

...და, ასე, შორეული სინათლის გზაზე მიმავალმა ეკლესიის კარ-  
იც შეაღო! არც ერთი წამალი არ ყოფილა ასეთი ეფექტური, არსად  
უბოვნია ასეთი სიმშვიდე... ნაბიჯ-ნაბიჯ შემოღიოდა მასში რწმენა.  
თუმცა ხვდებოდა, რომ როგორც ყველგან, აქაც დაიგვიანა.... იქნებ  
მერე, აღარც გული გაბზარვოდა!..

ერთ-ერთი წირვის შემდეგ, ქადაგებაში, ჯვარდაუწერელი ქორწი-  
ნების ცოდვაზე ისაუბრა მამა ანდრიამ. ასეთ ქორწინებაში გაჩენი-  
ლი ბავშვები ცოდვის შვილებად ითვლებიახო... მერე გელასაც რამ-  
დენჯერმე ურჩია, ამოეყვანა იჯახი ამ ცოდვიდან, ჯვარი დაეწერა  
შვილების დედაზე... ხელახლა აფორიაქდა გელას გული! დღემდე  
შეცდომად თვლიდა ამ ქორწინებას და ახლა? ახლა, ახალ  
მსხვერპლს სთხოვდა უფალი!... კავშირის განახლება ქალთან, რო-  
მელსაც დღეს-ხვალ უნდა დაემშვიდობოს?! მერე ასეთი იძულებითი  
ჯვრისწერის მომზრეა უფალი?.. მან უკვე გასცა გასაცემი! დაზარ-  
და, გზაზე დააყენა შვილები და თითებზე დასათვლელი დღეები  
დარჩა ბორკილის შეხსნამდე... აი, კიდევ, რა! თურმე, ცოდვის შვი-  
ლებიც ყოფილან მისი შვილები და აქედანაც მამამ უნდა დაიხსნას!  
თან მერე როგორ! უნდა დაუჩიოქოს შვილების დედას, რომ იქნებ  
როგორმე დაარწმუნოს ჯვრისწერის აუცილებლობაში!.. ბედის ირო-  
ნია და, თანაც ასეთი?!.. და თუკი ასე აუცილებელია უფლის გვირგ-  
ვინი, გელა შეძლებს ასე იოლად უგულველყოს? მერე რა უთხრას  
ღმერთს, რომელსაც ასე მიუახლოვდა!.. დაე, მიეცეს კეისარს კეი-  
სრისა!..

ჯვრისწერამ რადიკალურად შეცვალა მისი გეგმები. მორჩა, გა-  
თავდა, დასრულდა ყველაფერი! საკუთარ თავს თათიაზე ფიქრიც კი

აუკრძალა... ასე დაისაჯა თავი და ეს იყო ყველაზე დიდი სასჯელი იმ შეცდომებისთვის, რაც კი ოდესმე დაუშვია! არადა, რა ახლოს იყო სინათლე... იმედი...

მანქანის სალონში წამოწოლილი გელა ნაცრისფერი ცხოვრების ბურუსში გაეხვა. გულის კუნთზე ხელმიჭერილმა კიდევ ერთი აბი მიიღო, მაგრამ... მიხვდა, მოახლოებოდა ის, ვისაც ასე შესაბრალისი არ უნდა ჩაბარებოდა... არა, აქ არა, იქნებ ერთხელ მაინც... უკანასკნელად...

ეკლესიის მინიან ნიშზე ჩიტი გამალებით ურტყამდა ნისკარტს... ისმოდა გალობა: „... იქსო, ღმერთო გულისა ჩემისაო, მოველ და შემაერთე შენთანა, საუკუნოდ...“

პანაშვიდზე დიდი თეთრი თაიგულით მივიღა თათია. არავის გაჰკვირვებია მისგან ბავშვობის მეგობრის გულწრფელი დატირება...



მხატვარი - ნანა ყორანაშვილი

— შენ მას ძალიან უყვარდი!.. — მამა ანდრიამ ვერ შესძლო უხმოდ გაეცილებია ეზოდან...


— ვიცი!... — თვალი ვერ გაუსწორა მოძღვარს თათიამ.

— ილოცე მისთვის!.. — უკან დაანია სიტყვები მოკვდავს, რომელიც სულ ჩქარა უფლის მხევალი უნდა გამხდარიყო!..

# თბილისი

## ქემალ ბილბაშვილი (1910-1983)

ცნობილი თურქი მწერალი არაერთი მოთხოვნის, კრებულისა და რომანის ავტორია. იგი სხავლობდა ანკარის ლაზის სახელობის განათლების ინსტიტუტში ისტორიის სპეციალობით (1932-1935). სხვადასხვა დროს მუშაობდა თერძისა და ფეხსაცმლით მოვაჭრის მოსამსახურედ, გაზეთებს დამტარებლად. 1935-1961 წლებში ქ. ნაზილისა და ქ. იზმირის სკოლებში ისტორიის მასწავლებლი იყო. 1961 წლიდან აქტიურ ღიატერატურულ საქმიანობას ეწეოდა. კრიტიკოსთა და მეცნიერებლთა განსაკუთრებული ყურადღება მიიპყრო რომანი „ჯემო“, რომელიც 1967 წელს თურქული საენათმეცნიერო საზოგადოების პრესტიული პრიზით დაჯილდოვდა. ხსენებული რომანი ამავე სახელწოდების წარმატებულ კინოფილმს დაედო საფუძვლად. 1968 წელს ქემალ ბილბაშვილის წანარმოებმა „მწვანე ჩრდილი“ მიიღო „მათ-ს პრიზი საუკეთესო რომანისათვის“.



## ცვრილების პატრონი

მუნიციპალიტეტის ინსპექტორი სალიშ თოქვოზი წყაროსთან, დაბის განაპირას რომ მოედინებოდა, მეზუთეჯერ იბანდა ხელ-პირს და ჩერქეზის იწმენდდა. აქ ვილაუთისაკენ<sup>1</sup> მიმავალი მეურმები საქონელს არწყულებდნენ, სატვირთო ავტომანქანები კი წყალს იღებდნენ. წალბურლარის<sup>2</sup> სატვირთო მანქანა ჯერ არ ჩანდა.

ტანმორჩილი, სქელი კაცი იყო. როგორც მსმელ ადამიანებს ახასიათებთ ხოლმე, მასაც ჩასისხლიანებული თვალები და წითელი სახე ჰქონდა. ლოყებსა და ცხვირზე ლურჯი ძარღვები ეტყობოდა. ქერა წამნამები და ჩამოწეული უღვაშები ამ ჩასისხლიანებულ თვალებში დასადგურებულ მრისხანებას დაუნდობელ გულცივობას მატებდა.

<sup>1</sup> ადმინისტრაციული ერთეულის ძეველი სახელწოდება, დღეს ეწოდება „ილი“.

გვივეა, რაც გუბერნია.

<sup>2</sup> ადგილის სახელწოდება.

ცხვირსახოცით სახე რომ შეიმშრალა, დაინახა, დაბიდან წყარო-საკენ სახედრით ერთი გლეხი მიემართებოდა. მუნიციპალიტეტის ინსპექტორი გლეხმაც შენიშნა და პირუტყვს კისერში კეტი ისე სდრუზა, საწყალს წყლის დალევის სურვილი დაეკარგა. შეშინებულ გლეხს უნდოდა, მისალმებოდა და თავისი გზა გაეგრძელებინა, მა-გრამ მუნიციპალიტეტის ინსპექტორმა ჩვეულებისამებრ ჰკითხა:

— ეი, შენ, რა გაქვს მაგ კალათებში? საკვები მიგაქვს?

მუნიციპალიტეტის ინსპექტორმა გლეხისაგან, რომელსაც დაბი-დან სოფელში პური კონტრაბანდით მიჰქონდა, ქრთამი — სამი ლი-რა — აიღო.

როგორც კი ნალბურლარის სატეირო მანქანამ წყაროსთან ჩაიარა და მტკვრის კორიანტელი დააყენა, მუნიციპალიტეტის ინ-სპექტორის სალიპ თოქგოზის სასტევნის ხმაც გაისმა. მანქანამ სიჩ-ქარე ვერ შეამცირა, ცოტა წინ გაჩერდა. მანქანა სავსე იყო ფუთე-ბით, კალათებითა და ბიდონებით. ერთ დიდ გალიაში ქათმები ჩაეს-ვათ. ერთმანეთზე იდგნენ, თავები გარეთ ჰქონდათ გამოყოფილი. როგორც კი მანქანა გაჩერდა, აკრიახდნენ. მგზავრები, როგორც ყოველთვის, ერთმანეთის მუხლებზე ისხდნენ. ზოგიერთს ფანჯრი-დან თავი ისე გადმოეყო, როგორც ქათმებს გალიიდან. ისინიც აყ-ვირდნენ და ლანძლვას მოჰყვნენ, როცა მანქანა გაჩერდა. მძლოლმა ფანჯრიდან გადმოიხედა, მხოლოდ თავისი თანაშემწის გასაგონად ჩუმად თქვა:

— ვერ იქნა, ამ ყეყეჩის თავი ვერ დავალნიეთ. მგზავრი თანახმაა, სივიწროვე იყოს, ოლონდ კი გაემგზავროს და ამათ რაღა უნდათ? აიღე ეგ ხუთი ქალალდის ფული და ნაულე, ვითომ მოწყალება გა-ვიღე... ღვთის მადლით, ექიმს მისცეს ეგება...

თანაშემწეს კონვერტი გაუწოდა. ის ძირს ჩამოხტა:

— რა ხდება, ძმაო?.. — შეეხმიანა მუნიციპალიტეტის ინსპექტორს.

— კიდევ რა უნდა მოხდეს? — დაუყვირა სალიპ თოქგოზმა. — სასტ-ვენით განიშნე. იმის ნაცვლად, რომ მანქანა ათ მეტრში გაგე-ჩერებინათ, 30 მეტრში ძლიერ შეძელით გაჩერება. ეს კი იმას ნიშნავს, რომ თქვენი მუხრუჭები არ იჭერს. ესეც კი კმარა იმისათვის, რომ სა-ბუთები ჩამოგართვათ. თანაც სატეირო მანქანა სადლესასწაულო მანქანისთვის დაგიმსგავსებიათ... ყოველ შემთხვევაში, კიდევ თუ შეეცდებით და ერთ ჯერზე ორმოცდაათ ადამიანს ნაიყვანთ...

მძლოლის თანაშემწე მიუახლოვდა და უთხრა:

– მუხრუჭები ახალი გამოცვლილია, ძმაო. შემოწმების საბუთიც აგერაა. ოცდახუთი მგზავრის ნაცვლად ოცდაათი ავიყვანეთ. ხუთი კაცით მტეტი, აბა, რას იზამს? მატარებლებში ადამიანები ისე მგზავრობენ, ლამის ერთმანეთს ასხედან. ამ ხუთი კაციდან სამი უანდარმერიამ ჩაგვისვა. საჯარისო გადაზიდვებიდან ყოფილან... კონტროლის გადაზიდვებს არ ნახავთ? – ჰეკითხა და თვალი ჩაუკრა.

მუნიციპალიტეტის ინსპექტორმა საბუთი აიღო, გადაშალა, იქიდან კონვერტი ამოილო. ცოტა ხანი უყურა, ხუთლირიანი ნახა, აიღო და მუჭმი დამალა.

– ეს ცოტაა... – ჩაიჩურჩულა. – კარგი, ამ ჯერზე ასე იყოს!

საბუთი როცა დაუბრუნა, მძღოლს დაუყვირა:

– ეი, მემედ... უანდარმერიაზე ილოცე... ამჯერად არ გერჩი... რადგან საჯარისო გადაზიდვებია... კარგი... მაგრამ თვალი უნდა გაახილო... სხვა დროს მანქანას ისევ თუ აავსებ, დაისჯები... შენს მექანიკოსს უთხარი! მუხრუჭებს კარგად მოუჭიროს... თორემ, საბუთებს ჩამოგართმევ და, სულ ცოტა, ერთი კვირა სამსახურში ვეღარ წახვალ... ნალბურლარი შენს გაკეთებულ ამ საქმეს ძვირად გადაგახდევინებს.

მძღოლმა ძრავა აამუშავა. გულში კი შეიგინა, მაგრამ ნაძალადევად გაიღიმა და უთხრა:

– ჯანმრთელად იყავი, ძმაო!.. შენ რომ არა, ჩვენი საქმე ცუდად იქნებოდა... აბა, ბედნიერად!

მანქანა დაძრა. თავისთვის კი გაიფიქრა, „რომ არ შემზევედროდა მაგ ხუთ ლირა ქრთამს ვაჩვენებდი და ჯიბეში ჩავიდებდი“. მძღოლის თანაშემწე დაძრულ მანქანას გაეკიდა და შეახტა.

– ნახვამდის, თოქვოზ, ძმაო! – შესძახა და ხელი დაუქნია.

– ბედნიერად! – უპასუხა სალიჭ თოქვოზმა და ხელი ასწია.

ეს ძლიერთა სალამი იყო, რათა თავი თავაზიანად დაელწიათ. როცა მანქანა გზის ქვედა მხარეს ხეებს შორის გაუჩინარდა, კონვერტიდან ხუთი ლირა ამოილო. კონვერტი დაჭმუჭნა და გადააგდო. გლეხის მოცემული ფულიც შუაში ჩადო და კიტელის ზედა ჯიბეში შეინახა. „მოკლე დღის სარგებელი“ – ღიმილით გაიფიქრა. შემდეგ სტვენა-სტვენით დაბისაკენ გაემართა.

\* \* \*

რაიფ ეფე, რომელიც მზა ხალათებს, შარვლებს, პერანგებს ყიდდა, მთელი საათი კარების წინ მუნიციპალიტეტის ინსპექტორ თოქ-

გოზს ელოდა. რაიფ ეფე ერთი ხანობა მთაში გავიდა ყაჩალად, მერე, ეროვნულ-განმათავისუფლებელი ბრძოლის წლებში, პარტიზანულ მოძრაობაში ჩაერთო, რესპუბლიკის ამნისტია შეეხო, შეგროვებული ფულით მიწის დამუშავების საქმეები წამოიწყო, მძღოლობაც სცადა, კონტრაბანდისტობაც... ქაჩალი, უსახური კაცი იყო. ამ უთვალტანადო სხეულის მაცქერალი ადამიანი იფიქრებდა, რომ სახელი „ეფე“<sup>3</sup> ხუმრობით შეარქევს. რაიფ ეფე, მას შემდეგ, რაც ომი დაიწყო, ისევ მრუდე გზას დაადგა — შავ ბირჟაზე ტრიალებდა. თავისი ხალხის საშუალებით ქალაქში მცხოვრები ლარიბებისაგან, ფეხმძიმე ცოლებისა და მოხელეებისაგან შეგროვებული ჩითით, ფარაჯის ქსოვილის ნაჭრებიდან ხალათებს, შარვლებს, პერანგებს, აკერინებდა. კვირაობით თავის დუქანში გლეხებზე თავად ყიდდა, სხვა დღეებში მეწვრილმანე ქალების ხელით უგზავნიდა.

ორი საათის წინ მუნიციპალიტეტის ინსპექტორი სალიპ თოქები დუქანში მივიდა. სიტყვაც არ უთქვამს ისე, წერილი დატოვა და წავიდა. ბარათი რომ წაიკითხა, რაიფ ეფეს ოფლმა დაასხა. თუმცა ერთი წინადადების გარდა მასში არაფერი ეწერა: „ყურადღება, თვალყურს გადევნებენ“. რთული საქმეებით დაკავებულ ადამიანს ესეც ეყოფა და მეტი მოუვა კიდეც...

რაიფ ეფე ფიქრობდა, „თოქები ჩემს დაცვას ცდილობსო“, ამიტომ ინსპექტორის წერილს მისთვის გამართული წვეულებების გამო მადლიერების გამოხატულებად მიიჩნევდა. ყოველ შემთხვევაში, უნდა მორიგებულიყვნენ. დაინახა, რომ სალიპ თოქები დაბის ქვედა მხრიდან ბაზარში მოვიდა.

მაგრამ თოქები ეფესნაირი სულსწრაფი კაცი არ იყო. დაინახავდა მეწვრილმანეს, რომელიც შიგნით შერბოდა და შორიდან შეემიანებოდა:

— გამარჯობა იბრაჟიმ ეფენდი, როდის აქეთა ხარ გაბრაზებული? მისალმება გენანება და გარბიხარ, თუ ვალი გაქვს?

შეიძლებოდა ამგვარადაც მიემართა:

— გამარჯობა, ჰავი ბაბა<sup>4</sup>, ნუ გარბიხარ რა! შესამოწმებლად არ მოვდივარ. ყველა მოხელე ამბობს, მას შემდეგ, რაც შენ ის ჰაირი აიყვანე, შენი სერვიზიცა და კერძებიც ძალიან სუფთაა. ხორციც სასაკლაოდან მოგაქვს, ხომ?... რატომ გეშინია? შენს ნისის დავ-

<sup>3</sup> 1) ვაჟაცი, მამაცი; მოყმე. 2) ისტ. პარტიზანი.

<sup>4</sup> მიმართვის ფორმა, რომელსაც ასაკოვანი, პატივსაცემი პიროვნების მისამართით იყენებენ

თრებს არ ვიცნობ, მათი შემოწმება ჩემს უფლებამოსილებას სცილ-დება... აბა, ნახვამდის...

მათ აიძულებდა, გარეთ გაეყვანათ და ეპირფერათ.

როცა დუქანს მიუახლოვდა, რაიფ ეფემ უთხრა:

— გამარჯობა, ინსპექტორო, დიდი ხანია, ერთმანეთი არ გვინახავს, მობრძანდი, ჩემი ყავა დალიე.

— კარგი, კარგი... — უპასუხა თოქებოზმა, — მაგრამ მოსამსახურე ბიჭმა მერე არა თქვას, ყავა მე უნდა დამეღლიაო. ვნახოთ ერთი, ინსპექტორი აპმედი თავის მუშტრებს ყავას ასმევს, ქერს, თუ მუშუდოს.

— საოცარია! შენ გაგიმარჯოს, ჩემი ინსპექტორი, მეჩვენება, რომ ტყუილუბრალოდ ვწუხდებით. ინსპექტორი აპმედი მუნიციპალიტეტის სუნს ხუთასი ნაბიჯიდან გრძნობს ხოლმე, — გაეცინა რაიფ ეფეს.

როცა მუნიციპალიტეტის ინსპექტორი შიგნით შევიდა და სკამზე დაჯდა, რაიფ ეფეს უთხრა:

— მხოლოდ ინსპექტორი აპმედი არა, ყველა მოვაჭრეც! შენ ნუ ჯავრობ.

რაიფ ეფემ მოსამსახურე ბიჭს დაუძახა:

— ჩვენთვის ორი დიდი ყავა შეუკვეთე, ჰასან.

როგორც კი ის გაუშვა, საკითხი გაარკვია:

— გმადლობთ, ინსპექტორო სალიპ. ძველი მეგობარი მტერი ვერ იქნებაო, ნათქვამია. შენს ამ სიკეთეს არ დავივიზებ...

— შეეშვი ჩემს სიკეთეს... ბოლოს და ბოლოს შენი გაფრთხილება მინდობა, ჭკუაში ჩავარდება-მეთქი. უანდარმერიასა და პოლიციაში საქმეს მიხვდნენ. პოლიციელმა რეჯეფმა ამ დილას თქვა. შენ დანაშაულზე უნდა დაგიჭირონ და სასამართლოს გადაგცენ. მოახერხებენ, მამაძალლები...

ინსპექტორ სალიპს თუ დავეყრდნობით, ვერაფერს გააკეთებენ,— გაიფიქრა რაიფ ეფემ და ქვედა ტუჩი მოიკვნიტა.

ინსპექტორს ხელკავი გაუკეთა, სალიპმა ხელით ფული ანიშნა და უთხრა:

— შენ ამ დალოცვილს თუ თავს ანდობ, უკეთესი იქნება.

რაიფ ეფეს შუბლზე ძარღვები დაებერა:

— ისინი ბევრი არიან... რომელ ერთს ვაჭამო განა?!

სალიპმა მხრები აიჩეჩა:

— საზიდარში შებმული ცხენებიდან უფრო სუსტი ტვირთის სიმიმესაც ეწევა და გამათრახებულიც რჩება. თუ ღონიერი ცხოველია,

„აბა, ჩემო ლომო; აბა, მიდი, ბიქო, ვნახო ერთი, რა შეგიძლია...“ ელაქუცებიან და პირფერობენ. გაიგე, რა გითხარი? თუ გინდა, შეუამავალი ვიქენები.

რაიც ეფეს ძარღვები დაუცხრა, თვალები გაუპრწყინდა და უთხრა:

— დღეგრძელობას გისურვებ, მეც შენთვის ეს უნდა მეთხოვა. გული გულის წილ, — ჯიბიდან ორი ხუთლირიანი ამოილო და ჰკითხა:

— ეს ეყოფა?

სალიპმა ტუჩები მოკუმა.

— ყოფნით ეყოფა, მაგრამ ყოველი შემთხვევისათვის, ხუთი ქალალდის ფული დაამატე. იქნებ სხვების პირებისათვის ერთი პატარა ძვლის გადაგდება გახდეს საჭირო.

რაიც ეფემ ორი ხუთლირიანი ისევ ამოილო. ერთი რომ მისცა, უთხრა:

— ამით შენი ფეხის მტვერი გაიწმინდე, — მერე მეორე ხუთლირიანი გაუწოდა.

ყავასანის პატრონის მოსამსახურე ბიჭმა სინით სათითაოდ თეფშით თავდახურული ყავა ფრიალ-ფრიალით მოიტანა. მისი მთავარი საზრუნავი იყო, სინი მთელ გზაზე ისე ეტრიალებინა, რომ ყავის ერთი წევეთი არ დაღვრილიყო. ამით თავი ძალიან მოჰქონდა.

— ყავა მოვიდა, დიდი ჭიქებით! — დაიძახა და დუქანში შევიდა. ჭიქები დახლზე რომ დააწყო, სალიპს მიმართა:

— სალიპ, ძმაო, წელან ყავასანაში ინსპექტორმა ჰალილმა შემოიარა, გეძებდა.

— მექებოს, თუ საქმე არა აქვს. აუცილებლად მიპოვის, — თქვა სალიპმა, რადგან იცოდა, რომ ინსპექტორი ჰალილი მარტოხელა, შრომისუუნარო მხდალი ახალგაზრდა იყო. ყავა მოხვრიპა. მოსამსახურე ბიჭმა ჰკითხა, წყალს დალევდა თუ არა და უარყოფითი პასუხი რომ მიიღო, წასკლა დააპირა.

— ალბათ მუნიციპალიტეტიდან უნდოდათ... მერმა... ლაპარაკი გავიგონე, მაგრამ არ ვიცი...

(...)

— შენ ამ საქმეზე არ იდარდო! როგორც კი მუნიციპალიტეტიდან გამოვალ, საჭირო ადგილას აუცილებლად წავალ... აბა, ბედნიერად!.

— თქვა სალიპმა.

რაიც ეფემ კარისკენ ტაბურეტი ისროლა და სიგარეტი სიამოვნებით მოსწია.

მუნიციპალიტეტის ინსპექტორი სამიკუთნოში შევიდა, სამი თასი ღვინო დალია, ფული არ გადაიხადა. მერე მუნიციპალიტეტისკენ გაემართა.

\* \* \*

მუნიციპალიტეტის დამლაგებელმა უთხრა, რომ უფროსს, ბატონ სადეთინს, მისი ნახვა სურდა. ზევით როცა ადიოდა, მიაძახა:

— ერთი თქვენგანის ხელფასი გაიზრდება, მაგრამ ვნახოთ, ვისი... თუ შენი მომატებს, ორმოცდაცხრიანი მინდა...

სალიპი ხელფასის ზრდის ამბით კმაყოფილი დარჩა. ფიქრობდა: „ეჱ, ამხანაგებში ჩემ გარდა ვრმე ხელფასის მომატების ღირსი არის? დილიდან საღამომდე დავწანალებ... ყველაზე მეტ ჯარიმის ქვითარს მე ვწერ... ბატონი სადეთინისათვის ზოგჯერ წილს მოვიხელებ და გულის გახარების საშუალებას ვპოულობ... მაგრამ ეგ ქსოვილი რომ დაარიგეს, მაინცდამაინც ის უნდოდა, რომელიც ჩემს წილად მოდიოდა და ვერ მივეცი... იქნებ ამის მერეა ცოტა ჩემზე ნაწყენი?.. შემდეგ, დაიცა, გავიხეხო, ერთი გლეხის ნაჩუქარი მეწველი მალტიური თხა მთხოვა. „ვერა“-მეთქი, „არ გამოვა“... ნამდვილად! ოჯახი, წვრილშვილი ხომ მეც მყავს... მაგრამ ეს ალბათ დაიმახსოვრა... „გულლრძოაო“, ამბობენ, ვინ იცის? ხოო... ჩვენ შორის ჭის საკითხიცაა... თავის ბაღში წითელი სატოლმე წიწაკა დაუთესვინებია... ჩვენს ჭასთან ტუმბო დაუყენებია და წყალი უნდა რომ წაიღოს. ასე როგორ შეიძლება? პატარა ჭას რა ძალა აქვს ამდენი? „უწყლოდ გვტოვებ“-მეთქი. ყველაზე მეტად ამაზე გაბრაზდა. იქნებ ჩემთვის ამ დანამატის მოცემა სულაც არ მოუნდეს... სქელ სალიმთან უკეთესი ურთიერთობა აქვს... რომ გადაწყვიტოს და მას მისცეს?.. მაგრამ სქელ სალიმს ჩემზე მეტი სამსახურებრივი სტაუი არა აქვს... მუნიციპალიტეტში ყველაზე უფროსი და სტაუიანი ინსპექტორი მე ვარ... შეუპოვრობის გამოჩენა ვიცი....“

თუმცა მის კარზე ეწერა „დააკაკუნე, არ გაჩერდე, შემოდი!“ იცოდა, ბატონი სადეთინი ბრაზდებოდა, როცა მასთან ისე შედიოდნენ, რომ „შემოდი“ სიტყვის თქმასაც არ აცლიდნენ. კარზე დააკაკუნა. იქიდან მკვეთრმა ხმამ დაუყვირა: „შემოდი“. სალიპმა ქუდი მოიხადა, შევიდა. ერთობ ზრდილობიან ადამიანად გადაიცა. იმ ქედმაღალი კაცის ნაცვლად, ცოტა ხნის წინ მოვაჭრეს რომ ესაუბრებოდა, მორიდებული, წყნარი ადამიანი გამოჩნდა.

როცა ინსპექტორი სალიპი დაინახა, ბატონ სადეთინს სახეზე ღიმილი აღებეჭდა. მისი ეს ღიმილი თითქოს ფარულ მიზნებს ისახავდა.

— აქეთ გამოდი, დაჯექი, ინსპექტორო სალიჳ, — უთხრა და ადგილზე მიუთითა.

— ეს სიკეთის მომასწავლებელი ნიშანი არ არის, — გაიფიქრა სალიჳმა.

ბატონი სადეთინი ქაღალდებით იყო დაკავებული, მერე მიუბრუნდა და უთხრა:

— პირადი შემადგენლობისათვის 20 ლირის ოდენობის ერთი ახალი ინსპექტორის დაფინანსება გვაქვს, სალიჳ ეფე. ახლა ვფიქრობთ, ვის მივცეთ ეს თანხა.

სალიჳ თოქებობა ქუდი ხელში გადაატრიალ-გადმოატრიალა და თქვა:

— თქვენ, ცხადია, უკეთ იცით, ვინ არის ამის ღირსი. ჩემი ინსპექტორი ამხანაგები — ყველანი — ძალიან მშრომელი ადამიანები არიან. თავიანთი მოვალეობები იციან. მაგრამ უპირატესობა მაინც იმას უნდა მიეცეს, ვისაც ოჯახი ჰყავს... შემდეგ სტაჟის საკითხიც არსებობს. თუმცა თქვენ უკეთ იცით...

— დიახ, ჩვენც ამგვარადვე ვფიქრობდით... — გაუღიმა ბატონმა სადეთინმა. — აი, ჩვენ ვთქვით: „უპირატესობა მივცეთ მათ, ვისაც ცოლ-შვილი ჰყავს“. მაგრამ ისნპექტორი სალიმიცა და შენც წვრილ-შვილის პატონები ხართ... შენ კარგ საკითხს შეეხე. სტაჟი საქმეს გადაწყვეტს. თუ არ ვცდები, შენ ისა ხარ, ვინც ყველაზე მეტი შრომა გასწია... არა? რამდენი წელია, რაც ინსპექტორად მუშაობ?

— თორმეტი წელია...

— ხედავ, რამდენი გიშრომია? შენ ამ ხელფასზე ყველაზე მეტი უფლება გქონია...

„ბატონი სადეთინის ცოდვა სულ ტყუილუბრალოდ დავიდე. ის მხარს მე მიჭერს, დამიჭერს უსათუოდ... ადამიანმა თავისი ინტერესები უნდა გაითვალისწინოს“, გულში გაიფიქრა სალიჳ თოქებობა. შემდეგ ბატონ სადეთინს მიმართა:

— ღმერთმა დიდხანს გაცოცხლოთ, ჩემო ბატონო!

— დიახ, დიახ, ჩინზე ახლავე უნდა ნარგადგინოთ. ქალაქის თავი როგორც კი მოვა, დავამოწმებინებ. თორმეტი წელი ცოტა არ არის. მთელი დღე დუქან-დუქან იარე, ბაზრობის ადგილები შემოიარე, უპნები შეამოწმე, ნაგავი ყრია თუ არა... მართლაც, ცოტას კი არ დაიღლებოდი...

ინსპექტორმა სალიმმა ბედნიერი პატარა მოხელის გამომეტყველება მიიღო, რომელმაც მოწონება დაიმსახურა:

— ასეთი დაღლილობის შემდეგ მუნიციპალიტეტში, ცალკე ერთ ოთახში სავარძელში მოხერხებულად მოკალათება — ალბათ დასას-ვენებლად — ურიგო არ იქნება. ბაზარსა და დუქან-დუქან ხეტიალს თავს დაალწევ... .

ამას როცა ამბობდა, თვალებში სიხარული უკრთოდა იმ ადამიანის მსგავსად, შურისძიების წყურვილი რომ მოიკლა...

სალიშ თოქებზე სახეზე ნაცრისფერი დაედო. „ღმერთო ჩემო, მახეში გამაბა ამ ღორმა... ასეთ ხათრიან კაცად განგებ მომაჩვენა თავი...“ კბილი კბილს დააჭირა. ახლა ოსტატურად რაიმე ხრიკი უნდა გამოეყენებინა, თორემ დაიღუპებოდა. ერთი ხელფასით როგორ იარსებებენ?

— ისა... ღმერთმა დიდხანს გაცოცხლოთ, ჩემო ბატონო. დიდად გმადლობთ, ჩემზე ასე რომ ზრუნავთ, მაგრამ პატივი დამდეთ და მომიტევეთ. ჩვენს სქელ სელიმს ყოველ ზამთარს რევმატიზმი ანუ-ხებს. დასვენებისათვის მას უფრო მეტი ესაჭიროება. მისი სტაჟი ჩემსაზე ნაკლები არ არის... ჩვენ შორის განსხვავება დაახლოებით ექვსი თვეა. თქვენ ხომ უკეთ იცით, არა? იმ კაცის ხელწერა, რომელიც მაგიდის თავში უნდა დაჯდეს, ლამაზი უნდა იყოს. ინსპექტორ პალილის ხელწერა ყველა ჩვენგანისას სჯობს. ის ჩვენზე ახალგაზრდაა... ცხონებულმა მამაჩემმა, ღმერთმა ნათელში ამყოფოს, ჩვენს განათლებას ცოტა ხელი შეუშალა. თუ ამ სიკეთეს ჩემს ამხანაგებს გაუკეთებთ, ორივე მხარისათვის კარგი იქნება.

ბატონი სადეთინი მისი ამ ტანჯვის საპასუხოდ უფრო კარგ ხასიათზე დგებოდა.

— ჩემო ძვირფასო, დღეში ორ გვერდს ან დაწერ ან ვერ დაწერ. ცუდია? ხელწერასაც გამართავ. მაინც კარგი იქნება, ხელფასიც გაგეზრდება. ერთი მე ეგ ნარდგინება დავწერო...

კალამი აიღო და წერას შეუდგა. სალიში ნამოდგა, მაგიდას მიუახლოვდა:

— ღვთის გულისათვის, ბატონო სადეთინ, თქვენი ყმა ვიქნები; მე ერთი გაჭირვებული კაცი ვარ. მაგიდას თუ მივუჯექი, გავგიუდები. მოდი, რა, ამ საქმეს მე ნუ დამავალებ... დროდადრო მიწყენინებია შენთვის, მაგრამ სულ ვნანობდი. საკასტუმე ქსოვილი ვერ შევაკერინე, ვერც შევაკერინებ... თუ გინდა, მოგცემ, მისი ფერი მოგეწონა...

ბატონმა სადეთინმა ერთი წამით წერა შეწყვიტა. სალიშ თვალებში დიდხანს უცქირა, არაფერი უთქვაშს, წერა გააგრძელა. ინ-

სპექტორმა სალიპმა იგრძნო, რომ საქმე მხოლოდ საკოსტუმე ნაჭრით არ დამთავრდებოდა.

- ჩვენს მეწველ თხას მაძღრისად ვერ ვკვებავთ. ცოლი ყოველ დღე გულს მიწვრილებს, საიდანაც მოიყვანე, იქ წამიყვანეო. ღვთის წაყლობით, დღეში ოთხ ლიტრ რძეს იწველება... თუ გნებავთ, თხას ამ საღამოს გამოგიგზავნით.

ყელში რაღაც გაეჩირა, ყლაპვა გაუჭირდა. ბატონი სადეთინი არ წერდა. მაგრამ კალამი ისევ ხელში ეჭირა.

- ჭის წყალმა, ღმერთია მონამე, მოიმატა, თქვენც გეყოფათ, ჩვენც. დაუყოვნებლივ დავაყენოთ ტუმბო, ბატონ სადეთინ!

- ბატონმა სადეთინმა კალამი დადო, სალიპმა შუბლიდან ოფლი მოიწმინდა, უკან დაიხია და მის სკამთან დაიჩრეა:

- ძალიან გთხოვთ, ბატონო სადეთინ, სამსახურში დაწინაურება არ მინდა. დამანებე თავი. ვინანნალებ ასე ბაზარში, დუქან-დუქან... თუ ღმერთი გწამს... წვრილშვილის პატრონი ვარ, ბატონო სადეთინ, წვრილშვილის პატრონი!...

### თურქულიდან თარგმნა მარინე შონიაძე



მხატვარი – თამარ თამარაძე

# იმპიტორაზე პოეზია

## ხათუნა შავგულიძე, ინგლისი, ლონდონი

დავიბადე თბილისში 1962 წელს. 1985 წელს დავამთავრე თსუ უცხო ენების ფაკულტეტი ინგლისური ენის განხრით. 2000 წლიდან ვცხოვრობ ლონდონში. მეუღლესთან და შვილებთან ერთად. ვასწავლიდი ქართულ საშაბათო სკოლაში პატარა ქართველებს საქართველოს ისტორიას. გამოცემული მაქვს ორი კრებული: „ფიქრის რაშები“ და „ჩვენ დავბრუნდებით“, ამჟამად ვმუშაობ მესამეზე. დანარჩენს ლექსები იტყვიან.



### ერთხელ, პოდგოვი...

ერთხელ, ბოლდებში ვნახე მერცხალი,  
ნინოს ტაძარში შემოფრთხიალდა  
და გულისპირი მისი ფერმკრთალი,  
ტაძარში უფრო ფერმკრთალი ჩანდა.  
იყო აგვისტო, უკვე გვიანი...  
გულს განმორების ფიქრები ღლიდა  
და წმინდა ნინოს სახე-ლვთიანი,  
განსაცვიფრებელ სიმშვიდეს მგვრიდა.  
ტაძრად სანთლების ნათება თოვდა,  
სარკმელთან იჯდა შავი მერცხალი,  
პატარა ფრთები, მეჩვენა, თრთოდა  
და გულისპირიც ჰქონდა ფერმკრთალი...  
უცებ, შეუილით გაკრთა ფრთიანი,  
მოძებნა კარი, შემდეგ - ცისკიდე,  
თან გაიყოლა მადლი - ლვთიანი  
და წმინდა ნინოს მზერის სიმშვიდე.  
ბას მთები ჰქონდა გადასავალი,  
მკრთალ გულისპირზე დარდმა ითოვა...  
ალბათ ტაძრიდან, როგორც საგზალი,  
პატარა ფრთებით მადლი ითხოვა.

27.11.2014

## სულპი გენახული საქართველო (ისტორიული)

მაშინ მარტყოფის ცას სისხლი წასკდა,  
ლამის წაილეკა საქართველო.  
ყველა შაპის ხმალი ჩვენზე გატყდა,  
ჩვენზე დაილენა, სანატრელო...  
მაშინ ქართლ-კახეთი აიყარა,  
ფუძემ გლოვის ცეცხლი წაიკიდა,  
მაშინ ძმათა გზები გაიყარა,  
მაშინ გენი გროშად გაიყიდა...  
ტყვეთ წინ გზა გოლგოთად ალიმართა,  
ო, რა მძიმე იყო უფლის ჯვარი...  
ირგვლივ ცოდვის როკვა გაიმართა,  
განა ვინმე იყო განმკითხავი?..  
უცხოობის ძრნოლა გაიარეს,  
ზიდეს ქართველებმა დროთა ტვირთი,  
სულში საქართველო ჩაიხატეს  
და არ შორდებოდათ მასზე ფიქრი -  
ცისარტყელის გაღმა რომ გაშლილა,  
სადაც გული მძევლად დარჩენიათ,  
ნენეს თმები, მკერდზე ჩამოშლილი,  
სიზმრებს ტკბილ სურნელად შერჩენია...  
ჰოდა, დაიხსომე, სანატრელო,  
დღესაც ქართველებად იზრდებიან -  
სულში შენახული საქართველო  
ყველა დამპყრობელზე ძლიერია!

2015

## „ის ერთი“

ძვირფასო, მითხარ, რომ შენთვის ვარ „ის ერთი“  
სულსაც რომ მიანდობ, სიცოცხლე გიხარის...  
ვიცოდე, არასდროს, ვიცოდე - არცერთი  
შენს გულში სულ მცირე ფიქრადაც არა ღირს.  
მინდა, რომ გხიბლავდე და კრძალვით მკითხავდე:  
„მითხარი, გამენდე, ხომ ისევ ჩემი ხარ?“  
რომ მძლავრი ხელებით მაგ მკერდზე მიკრავდე,  
ვიცოდე, რომ ჩემთვის შეშლილი, შლეგი ხარ!  
რომ ყველა მიჯნური - მითიურ-ღვთიური,  
მაგ შენი თვალების ალებში სახლობდეს  
და ყველა გრძნობები არამქვეყნიური  
შენს სულში ღვიოდეს და ჩემთვის მთვრალობდეს.  
ძარღვებში აღირული ღვთიური ხანძარი  
იმ ძალით იწვოდეს, დელგმაც ვერ აქრობდეს  
და შენი თითები იმ ძარღვით გამთბარი  
მხოლოდ მე, მხოლოდ მე, მხოლოდ მე მათბობდეს!  
გეძინოს? მე ვიყო ზმანება - ზღაპრული,  
რომ გამოღვიძებას გმობდე და ნანობდე...  
გეღვიძეს? მე ვიყო ის ტურფა ასული,  
ვის გამოც ოცნებას აროდეს არ თმობდე.  
და ბოლოს, როს დაგვძლევს სიბერე — ტიალი,  
ლიმილით გამცნობ, რომ ცხოვრება გავიდა...  
შემომხვევ მაგ ხელებს უზომო ტრფიალით  
და ვიგრძნობთ სიცოცხლე ამ წუთად რომ ღირდა...  
მერე კი, ანაზდად ჩრდილები დათოვენ,  
მსურს, ვიყო ის კვალი, ბარდნარს რომ მარგლიდა...  
შენ ეპიტაფიად ამ სიტყვებს დატოვებ:  
„აქ არის ის ქალი, ცხოვრებად რომ ღირდა!“

## ამ ქუჩის გადაღება (ემიგრანტული)

ამ ქუჩის გადაღმა ისეთ ბალია,  
ფოთლები კრთებიან ნიმფების სინაზით....  
აქ შეყვარებულთა ხეივნის თაღია,  
სევდისფრად ნაფერი სიზმრებით სეზანის.  
კენკავდნენ მტრედები ნამს,  
ცრემლთან ნაზავებს და  
მარტოსულობდა გვიანი მაისი...  
აქ, ალბათ ებრძოდნენ ღამეებს - ნამთვრალევს  
და შლიდნენ მოლბერტებს მონე და მატისი.  
და განა ეს ბალი მართლაც ჰგავს ერმიტაჟს?  
სად მომცრო სკვერი და სად დიდი მატისი...  
უბრალოდ, ყოველდღე აქ ვანმე ემიგრანტს  
ფურცლებით დაჰჭონდა ოცნება თავისი....

8.4.2016

## გზეო

გაზაფხულო, რად მაქციე ზურგი?  
საით წახველ, საით წახველ, მზეო?..  
ცაო, ნუ ხარ მოქუფრული, მუქი,  
იაპრილე, გთხოვ, აპრილის თვეო...  
დავიღალე ამ ქარების ქროლვით,  
სულს მოსწყინდა ნამქერებით ძრწოლვა,  
მარტოსულს და ზამთრისაგან ლტოლვილს  
მენატრება ნუშის ფიფქის თოვა...  
ახლა თბილისს თუ დასცქერი, მზეო,  
უთხარ, ამ გულს იმედებით ვმოსავ...  
უთხარ, რომ კვლავ მისი ფესვით ვზეობ  
და მის ყველა კუთხე-კუნჯულს ვლოცავ.  
უთხარ, უთხარ, როცა წვიმა აწვიმს,  
ერთი წვეთი, ვინძლო, ჩემს ცრემლს ჰგავდეს  
და როდესაც თმას სხივებად გაშლი,  
მის ერთ ღერძი ჩემი გული ჩავდე...

- 36 -

„ორიანი“, 2016, 8

მაგრამ ცივა, ძლიერ ცივა ამ სულს,  
თუმცა ფესვი კვლავ ქართულად ზეობს...  
გთხოვ, თბილისში ოქროს წვიმად მოსულს,  
ერთი სხივი მეც მაჩუქე, მზეო...

9.04.2016

## გახსოვს?..

განა, რა წლები გადამავიწყებს  
მიმოქარგული ველების ამბავს?  
შენ ჩემთვის კრეფდი მინდვრის ყვავილებს,  
მე შენთვის მეცვა ცისფერი კაბა.  
მნათობი ფეხქვეშ გვიფენდა ალეპს  
და მერცხლებს ჰქონდათ თვალები ღილის...  
შენ მხოლოდ ჩემთვის ინთებდი თვალებს,  
მე უსასრულოდ გჩუქნიდი ღიმილს...  
და გვაოცებდა: „რალამ გაგვყაროს?..“  
ღრუბლებზე იწვა ოცნება ჩვენი...  
შენ ჩემთვის გსურდა მთელი სამყარო,  
მე შენთვის მსურდა სიცოცხლეც ჩემი.  
და განა, წლები დაიყვავილებს  
ველთა ნაამბობ იმ ტრფობის ამბავს?  
მახსოვს, მიკრეფდი ცისფერ ყვავილებს...  
გახსოვს? მე მეცვა ცისფერი კაბა...  
2016

## როცა ნამოველ

როცა წამოველ, ვარდი ყვაოდა,  
უკმევდა გუნდრუეს სანატრელ თბილისს,  
ღია სარკმელთან ჩიტი გალობდა  
და უნებურად მტაცებდა ღიმილს...  
უძილო ღამე, ასე ჩვეული,  
არას შველოდა იარას გულის  
და მთვარე - მთვრალი, ჩემებრ ეული,  
მტკვარში ახრჩობდა იდუმალ სურვილს...

ჩემი ქალაქი ჯერ ისევ თვლემდა  
და თან ჰყვარობდა ლაშვარდს - ამომსვლელს...  
მტკვარი თვის სუნთქვას ჯებირებს ჰფენდა,  
ვარდი ჰყვაოდა, როცა წამოველ...

30.05.2014

## ლადო ასათიანს

რად ვეტრფი იმ დროს... თბილისის იმ მზეს,  
ან იმ წარსულზე რისთვისლა ვდარდობ?  
როს რუსთაველზე ჭადრების მნკრივებს  
მიუყვებოდა ჭაბუკი ლადო.  
როცა დაქრიოდა ნოემბრის ქარი,  
როცა აწვიმდა ქაშვეთის გუმბათს  
და ის შავთვალა თავადის ქალი  
სდევდა ჭაბუკის ფიქრსა და გუმანს...  
ივლისის ხვატი ქუჩებს თენთავდა  
და მთანმინდაზე გრილოდა უფრო...  
პოეტის გულიც იქვე ფეთქავდა  
და დაფრინავდა ღრუბლებში უფრთოდ...  
ჰოდა, ოცნებაც გამლიდა აფრას  
და ჰე... მარაბდის მოჩანდა ველი...  
ქარად მქროლავი თეთრონის ფაფარს  
სისხლით ლებავდა გმირი ქართველი!..  
გაზაფხულზე კი, აკვირტებული  
ტყემლები ურცხვად იხსნიდნენ უბეს...  
ყაყაჩი, ახლად გალვიძებული,  
ვეღარ მალავდა ალისფერ ტუჩებს.  
თოვდა ლექსებად ლადოს ფიქრები  
და უამებდა სხეულს, ნაავდრალს,  
და მონატრების თეთრი ფიფქები  
დასტრიალებდა თავზე „ბარდნალას“.  
მე ვეტრფი პოეტს, ლექსებად დაღვრილს,  
დადიანივით რომ გრძნობდა მამულს,  
ვეტრფი უილბლო, უაბჯრო რაინდს  
და საქართველოს ერთგულ ტრუბადურს!

8.01.2015

## ქალის სევდა – შემოდგომის სევდა...

აი, უკვე მერამდენე შემოდგომა  
მეპარება ცბიერ ფერთა მღელვარებით...  
მის დაშაქრულ ფერებს ახლავს ჩუმი კვდომა -  
კვდომა ყვითელ ფოთლის ჟამთა ელვარების...  
ყვითელ ფოთლის, ჩურჩულით რომ მესალმება,  
ყოველ დილით რაღაც ახალს რომ მიამბობს,  
თითქოს ჩქარობს და შრიალით მევედრება,  
კიდევ ერთხელ ყურადღება რომ მივაპყრო...  
რადგან იცის, რადგან ელის, დაპბერს ქარი,  
სუსტ კუნწულას მოაცლის და დააცილებს...  
გაიღება სხვა სამყაროს ცივი კარი  
და მის უთქმელ ამბავს ვერვინ დაასრულებს...  
ხომ გინახავთ, გადაწვერილ ნათლის ჩრდილი,  
ქალბატონის ცისფერ თვალებს როგორ ფარავს?  
უხმო, უტყვი სინანული და ჩიგილი  
მის კდემას და მიხრა-მოხრას თან რომ ახლავს?..  
ახალგაზრდულ ციალებს და ფერთა ელვას  
არ აბრუნებს არც ლოცვა და არც ვედრება...  
სილამაზეშემოძარცვულ ქალის სევდას  
შემოდგომის სევდა როგორ შეედრება?  
მაგრამ მაინც... ფერთა კვდომის ეს მოტივი  
ქალბატონს და ყვითელ ფოთოლს ერთად არხევს...  
გადაწვერილ ნათლის ჩრდილით შემოსილი  
მოუთხრობელ ლამაზ ამბავს მომაგონებს...

1.09.2014

# იმპიტორანტული პოეზია

## მარიამ (ცარო) ხიტალიშვილი, საბერძნეთი, ათენი

დაგიბადე და გავიზარდე დუშეთის რაიონის  
სოფელ არანისში (ყინვალთან ახლოს). ჩვეულე-  
ბრივი, სხვებისგან არაფრთი გამორჩეული ბავშ-  
ვობა მქონდა... ხან მიღინდა, ხან მიჭირდა, ხან  
მტკიოდა და ხანაც მიხაროდა.... საბერძნეთში ნა-  
მოსვლამდე (და თითქმის მთელი სიცოცხლე)  
ქართულ ხელოვნებას და კულტურას ვემსახ-  
ურებოდა. მეგონა, ჩემი სიყვარული სანუკვარი  
საქმისადმი არასოდეს დასრულდებოდა, მა-  
გრამ... საქართველოში შექმნილმა ეკონომიკურ-  
მა სუსმა მეც, ასიათასობით ქართველთან ერ-  
თად, ემიგრანტობას მაზიარა... ათენში 2007  
წელს ჩამოვედი... უკვე ცხრა წელია, რაც აქ  
ვარ, მაგრამ დღესაც ისე მიჭირს აქ ყოფნა, რო-  
გორც ჩამოსვლის პირველ დღეებში... ემიგრა-  
ციაში ყოფნის დროს დაიბეჭდა ჩემი ორი წიგნი. უფლის რწმენით და იმედით  
მჯერა, უკან სამშობლოში დაბრუნებასაც შევძლებ!



### „ღმერთო, სამშობლო მიცოცხლე“ ვაჟა-ფშაველა

ღ-მერთო, მიცოცხლე სამშობლო,  
მ-უდამ ამაყად მდგარი,  
ე-რი, ბერი და ქვეყანა,  
რ-ოგორც ბერმუხა მძღავრი.  
თ-ბილისს ფარავდეს სიონი,  
ო-შკის, ხახულის ჯვარი!  
ს-ამება ყოვლადწმინდისა,  
ა-მლერებული ზარი,  
მ-რევლი შეკრული ერთ მუშტად,  
შ-იშით უფალთან მდგარი,  
ო-ლონდაც ვნახო სამშობლო,  
ბ-ედნიერი და წყნარი,  
ღ-ამაზი ჩემი ქვეყნისა,  
ო-ლონდ არ მქონდეს ჯავრი.  
მ-ცხეთას სდიოდეს მირონი,  
ი-ესოს ლოცავს ჯვარი,  
ც-რემლი შეაშრეთ დედებსა,

ო-ლონდ არ დაშრეს მტკვარი,  
ც-ა იყოს მუდამ ულრუბლო,  
ხ-ალხი მშვიდი და წყნარი,  
ლ-ოცავს სამშობლოს მიწა-წყალს  
ე-რთი უბრალო ქალი...

5.01.2013

## აღარასოდეს

თუ უფლის ნებით დაბრუნების ოცნება ახდა,  
იმ დიდ ტკივილებს აქ დავტოვებ, რაც გულში მახლდა...  
გზას გავუყვები სიხარულით სახლისკენ სავალს...  
თან გავიყოლებ სამშობლოსათვის სანთელს და საგზალს.  
თუ მელირსა და ფეხი დავადგი სამშობლოს საზღვარს,  
აღარასოდეს არ ვიფიქრებ მე არსად წასვლას...

28. 11. 2015

## გამაძლებინე

უფალო, ღმერთო, გევედრები, გამაძლებინე!  
მძიმე წუთების, დღეების, თვეების დამთავრება შემაძლებინე!  
დავიჩოქე და ფეხზე ადგომა შემაძლებინე!  
უხმო ტკივილის მოთმინება გამაძლებინე!  
არაფერს არ გთხოვ, ტკივილის დროს გაღიმება შემაძლებინე!  
სამშობლოს გარეთ, უცხო მიწაზე გამაძლებინე!  
ჩემი ცრუმლებით ატირება შემაძლებინე!  
მარტოდ დარჩენილს უამრავ ხალხში გამაძლებინე!  
შენი რწმენით და შენი იმედით  
უფალო, ღმერთო, გევედრები, შემაძლებინე,  
მოთმინება შემაძლებინე...

27 08 2013

# 105 წელი

## ბელ კაუფმანი (1911-2014)

დაიბადა ბერლინში, გერმანიაში 1911 წლის 10 მაისს. ის იყო დიდი ებრაული მწერლის, შოლე მალეი-ჩემის შვილიშვილი. მან ბავშვობა გაატარა ოდესასა და მოსკოვში. 1923 წელს მის იჯახი საცხოვრებლად გადავიდა ამერიკის შეერთებულ შტატებში. მაშინ ბელი 12 წლის იყო. ბელ კაუფმანმა ნარმატებით დაამთავრა კოლუმბიის უნივერსიტეტი მაგისტრის ხარისხით ლიტერატურაში. კაუფმანი წერდა მოკლე მოთხრობებს. არის მრავალი ჯილდოს მფლობელი. გარდაიცვალა 2014 წელს.



## პარკში

შუადღე გადასული იყო. მზე ანათებდა. თბილოდა. ქალაქის ხმაური ხეების გამო პარკამდე ვერ აღწევდა. ქალმა წიგნი სკამზე დადო, მზის სათვალე მოიხსნა და კმაყოფილებით ამოისუნთქა. მორტონს ცალი მკლავი ცოლისთვის შემოეხვია და ჟურნალ „ტაიმს“ კითხულობდა; მათი სამი წლის ვაჟი, ლერი, სილაში თამაშობდა. სუსტი ნიავი ქროდა და ლოყებზე თმები ნაზად ელამუწებოდა. კვირას, ექვსის ნახევარზე, პარკის კუთხეში მიმალული პატარა სათამაშო მოედანი თითქმის ცარიელი იყო. არც საქანელები და აინონა-დაინონა ირხეოდა. სასრიალოც ცარიელი იყო. მხოლოდ ორი ბავშვი ჩაცუცქულიყო სილაში ერთმანეთის გვერდით. რა კარგია, გაიფიქრა ქალმა და კმაყოფილებით გაიღიმა. მზეზე უფრო ხშირად უნდა გასულიყვნენ. მორტონს ქალაქის ფერი ედო სახეზე, კვირამობით იყო გამოკეტილი უნივერსიტეტში. ცოლმა ქმარს ხელი ნაზად მოუჭირა და კმაყოფილმა ლერის დაძაბულ სახეს შეავლო თვალი, რომელიც სილაში გვირაბს თხრიდა. მოულოდნელად მეორე ბიჭი ნამოდგა და ფუნთუშა მკლავის ერთი მოქნევით სწრაფად გადააყარა ლერის სილით საგსე ნიჩაბი თავზე, მაგრამ ოდნავ ასცდა. ლერიმ თხრა განაგრძო; ბიჭი კი იდგა, ნიჩაბალმართული, ზანტად და მშვიდად.

„აბა, აბა, პატარავ!“ - ქალმა თითო დაუქნია მას და თვალებით ბიჭის დედას ან ძიძას დაუწყო ძებნა, - „სილა არ უნდა შევაყაროთ

ერთმანეთს. შეიძლება ვინმეს თვალში ჩაუცვიდეს და დაზიანოს. ამ მშვენიერ სილაში ლამაზად უნდა ვითამაშოთ“. ბიჭი თვალის დაუხამაშებლად შეჰყურებდა ქალს. ის დაახლოებით ლერის ასაკის იყო, მაგრამ შესაძლოა ათი გირვანქით უფრო მძიმე. ის იყო პატარა, ახოვანი და ძლიერი. მას არც ლერის სიმარჯვე და არც მასავით მგრძნობიარე სახე ჰქონდა. სად იყო დედა? ერთი ქალი და გორგოლაჭებზე შემდგარი გოგონა პარკის გასასვლელისაკენ მიდიოდნენ, რამდენიმე ნაბიჯის მოშორებით მაღალ კაცს მთელი სკამი დაეკავებინა და კვირის ვულგარული უურნალი სახესთან ახლოს მიეტანა. ქალის აზრით, ის ბავშვის მამა უნდა ყოფილიყო. მაგრამ კაცს მისთვის არც კი შეუხედავს, ქალმა მზერა მოაცილა.

ამ დროს, ისევე სწრაფად, როგორც უწინ, პატარა ჩასუქებულმა ბიჭმა სილით სავსე ნიჩაბი ლერის ამჯერად თმასა და შუბლზე გადააყარა. ლერიმ დედას ახედა. მისგან მოელოდა რეაქციას, არ იცოდა, ეტირა თუ არა. ქალს დედობრივმა ინსტინქტმა უკარნახა, ნამომხტარიყო, შვილთან მისულიყო, ჩამოეფერთხა შვილისთვის სილა თმიდან და დაესაჯა მეორე ბიჭი, მაგრამ თავი შეიკავა. ყოველთვის უნდოდა, ლერის თავი თვითონ დაეცვა.

„პატარავ, ასე ნუ იქცევი, - უთხრა მან ბიჭს მკაცრად და სკამზე გადაიხარა, - სილა არ უნდა შეაყარო“.

სკამზე მჯდომმა კაცმა პირი ისე აამოძრავა, თითქოს უნდა გადაეფურთხებინა, მაგრამ ნაცვლად ამისა ალაპარაკდა. ქალისთვის არც კი შეუხედავს, მხოლოდ შვილს მიმართა ხმამალლა: „სწორი ხარ, ჯო, რაც გინდა, ის გააკეთე, ეს სილა ყველასია“.

ქალმა მუხლებში უეცარი სისუსტე იგრძნო და ქმარს შეხედა. მორტონი მიხვდა, რაც ხდებოდა. ფრთხილად დაიდო „ტაიმსი“ მუხლებზე და თავისი ლამაზი, გამხდარი სახე უცხო მამაკაცისაკენ მიაბრუნა. მორცხვად, ბოდიშის მოხდით გაუღიმა, ისე, როგორც ალპათ სტუდენტს შეუსწორებდა შეცდომას და ჩვეული კეთილგონიერებით დაილაპარაკა.

„მართალი ბრძანდებით, - თავაზიანად მიმართა, - მაგრამ სწორედ იმის გამო, რომ ეს სილა ყველას ეკუთვნის...“

კაცმა იუმორისტული უურნალი დაბლა დასწინა და მორტონს შეხედა, თავიდან ფეხებამდე ნელა, დაუინებით შეათვალიერა. „ხო?“ - მის ქედმაღლურ ხმაში მუქარა გაისმა: „ჩემს პატარას ისეთივე უფლება აქვს, როგორიც თქვენსას და თუ მას უნდა მიმოფარგოს სილა, ის ამას გააკეთებს. და თუ თქვენ ეს არ მოგწონთ, მაშინ ჯან-

დაბამდის გზა ჰქონია თქვენს პატარას“. ბავშვები თვალებდაჭყუ-  
ტილები და პირდაღებულნი უსმენდნენ, პატარა ხელებით ნიჩებეს  
ჩაბლაუჭებოდნენ. ქალმა შეამჩნია, მორტონს ყბაზე კუნთი დაეჭიმა.  
ის იმვიათად ბრაზდებოდა და ძნელად გამოდიოდა წონასწორობი-  
დან. ქალს ცრემლებით აევსო თვალები ქმრის უსასოობისა და უმ-  
ნეო გააფთორების გამო, რომელიც მორტონისათვის უცხო იყო.

„ერთი წუთით, - მორტონმა თავაზიანად მიშართა კაცს, - თქვენ  
უნდა გაიგოთ...“

„ოჟ, მოკეტე!“ - უთხრა კაცმა.

ქალს გულმა ძალუმად დაუწყო ცემა. მორტონი ნახევრად წამოი-  
ნია, ტაიმსი მინაზე ჩაცურდა. მეორე კაციც ნელ-ნელა წამოდგა,  
რამდენიმე ნაბიჯი გადადგა მორტონისაკენ და შეჩერდა. უშველე-  
ბელი ხელები გულზე დაიწყო და დაელოდა. ქალმა მოცახცახე  
მუხლები ერთმანეთს მიადო. რისი გაკეთება შეეძლო მათ შესაჩე-  
რებლად? სურდა, ქმარი სახელოთი მოექაჩა და შეეჩერებინა, მა-  
გრამ რაღაც მიზეზის გამო ეს არ გააკეთა. მორტონმა სათვალე  
მოირგო. ძალინ ფერმკრთალი იყო. „სასაცილოა, - თქვა ყოყმანით, -  
უნდა გთხოვოთ...“

„ხო?“ - თქვა კაცმა, რომელსაც ფართოდ გაეშალა ფეხები, ნელა ირ-  
წეოდა და აშკარა ზიზღით უყურებდა მარტონს: „შენ და კიდევ ვინ?“

ერთი წუთით ორივემ გამომწვევად გადახედა ერთმანეთს, შემ-  
დეგ მორტონმა ზურგი შეაქცია კაცს და მშვიდად უთხრა ცოლს:  
„მოდი, წავიდეთ აქედან!“ უხერხულად, თითქოს კოჭლობით გაიარა  
სილაში, შემდეგ შეჩერდა, ლერი ხელში აიყვანა და ნიჩაბი აიღო.

და უცებ ლერის სიცოცხლე დაუბრუნდა. გაოცებული გამომეტყ-  
ველება სადღაც გაქრა, ნიხლების სროლა და ტირილი დაიწყო. გაბ-  
მულად ყვიროდა: „არ მინდა სახლში წასვლა, თამაში მინდა, არ  
მინდა ვახშამი, არ მინდა ჭამა“. ცოლ-ქმარი ბავშვს გასასვლელისა-  
კენ მიათრევდა. გასასვლელთან რომ მისულიყვნენ, იმ სკამთან უნ-  
და ჩაევლოთ, სადაც ის უცნობი მამაკაცი გაშელართული იჯდა.  
ქალი ფრთხილობდა, არ შეეხედა მისთვის, რომ არ გამოეწვია. ერთი  
ხელით ქალს ლერის სილიანი, გაოფლიანებული ხელი ეჭირა, ხოლო  
მეორეთი კი მორტონს ექაჩებოდა. მან ქმართან და ბავშვთან ერთად  
თავაწეულმა ჩაუარა სათამაში მოედანს.

ქალმა შვება იგრძნო, რომ შეტაკება თავიდან აიცილეს, რომ  
არავინ დაშავდა, მაგრამ გულის სილრმეში, რაღაც მძიმე გრძნობა  
დარჩა და იგრძნო, რომ ეს უფრო მეტი იყო, ვიდრე ის შემთხვევა,

სადაც ისინი დამარცხდნენ. ქვეცნობიერად მიხვდა, რომ ამ რაღაცამ მეტად პირადული, ნაცნობი და მნიშვნელოვანი შეცვალა მასსა და მორტონის ურთიერთობაში. უცებ მორტონმა დაილაპარაკა: „ეს არაფერს დაამტკიცებდა“.

„რაა?“ - იყითხა ქალმა. „ჩხუბი, ეს ჩხუბი ხაზს გაუსვამდა იმ ფაქტს, რომ ის ჩემზე დიდია“.

„მხოლოდ მოსალოდნელი შედეგი, - გააგრძელა კაცმა, - იქნებოდა რაა? გატეხილი სათვალე, გაცდენილი ორი სამუშაო დღე და რისთვის? სამართლიანობისთვის, ჭეშმარიტებისთვის?“

„რა თქმა უნდა“, - დაუდასტურა ცოლმა. მან ნაბიჯს აუჩქარა. ერთადერთი, რაც სურდა, ეს იყო სახლში მისულიყვნენ და ჩვეული სამუშაოთი დაკავებულიყო, თუმცა ამ შემთხვევაში მძიმე გრძნობა, რომელიც გულზე დასწოლოდა, აიძულებდა, უფრო მაგრად ჩასჭიდებოდა ლერის ხელს. ბავშვი კვლავ ტიროდა. აქამდე ქალს ყოველთვის ებრალებოდა ქმარი დაუცველი სხეულის, სუსტი მკლავების, ვიწრო, მოგრძო ფრთის მსგავსი ბრტყელი მხრების, უსუსური და სუსტი ფეხების გამო, მაგრამ ახლა ქალს სახეზე გულისწყრომა აღბეჭვდოდა.

„მორჩი ტირილს, - უთხრა შვილს მკვახედ, - შენს გამო მრცხვენია!“ ისეთი გრძნობა ჰქონდა, თითქოს სამივე ტალაზის კვალს ტოვებდა ქუჩაში. ბავშვი უფრო ხმამაღლა ატირდა. რომ ჩარეულიყო, რაღაცისთვის რომ ებრძოლა... - ფიქრობდა ქალი, - კიდევ რისი გაკეთება შეეძლო? ქმარი მიეშვა და ის კაცი ეცემა? ან ყველაფერი ელოზა და კაცისთვის რამე შეეგნებინებინა? პოლიციისთვის ეხმო? „ოფიცერო, პარკში ერთი კაცი თავის შვილს აქეზებს და ჩემსას სილას აყრის...“ ყველაფერი სისულელე იყო და არ ლირდა საფიქრელად.

„ღვთის გულისთვის, გააჩერე ბავშვი“, - სთხოვა გაღიზიანებულმა მორტონმა ცოლს. „როგორ ფიქრობ, რას ვცდილობ?“ - უპასუხა ქალმა. ლერიმ უკან დაიწია, ფეხი აითრია.

„თუ შენ არ შეგიძლია ბავშვის დასჯა, მაშინ ამას მე გავაკეთებ“, - მორტონმა ნაჩქარევი გადაწყვეტილება მიიღო და ლერისკენ გადადგა ნაბიჯი. მაგრამ ის ცოლის ხმამ შეაჩერა. არასასიამოვნო, ცივმა და ზიზლით სავსე ხმამ, რომელმაც თავად ქალიც კი შეძრა: „მართლა? - გაიგონა თავისი ნათქვამი, - შენ უნდა დასაჯო, შენ და კიდევ ვინ?“

## ინგლისურიდან თარგმნა თამილა თელიაშვილმა



მხატვარი – ნანა ყორანაშვილი

# თბილისი

## ფრედერიკ ბრაუნი (1906 – 1972)

ამერიკელი მწერალი, დაიბადა ქალაქ ცინცი-ნატში, ოპაიოს შტატში, ამერიკის შეერთებულ შტატებში. ცნობილია, როგორც მისატიური, დე-ტექტიური, ფანტასტიკური, მეცნიერული და მოკლე, 1-3-გვერდიანი მოთხრობების ავტორი. მის მოთხრობებს გასდევს იუმორი და პისტო-დერნული მსოფლმხედველობა. მას ეკუთვნის ასევე გასართობი და პროვოკაციული მოთხრო-ბები, მათ შორისაა მოთხრობა „სოლიფსისტი“.



## სოლიფსისტი

ვოლტერ ბ. იეჰოვა, ვისი ხსენებისთვისაც ბოდიშის მოხდას არ ვაპირებ, რადგან ეს მართლაც მისი სახელია, მთელი თავისი ცხოვ-რების მანძილზე სოლიფსისტი იყო.

სოლიფსისტი, იმ შემთხვევაში, თუ არ იცით ამ სიტყვის მნიშვნე-ლობას, არის პიროვნება, რომელსაც სწამს, რომ ის ერთადერთია, დანარჩენი ადამიანები და მთლიანად მთელი სამყარო კი ზოგადად მხოლოდ მის წარმოდგენაში არსებობს.

ერთ დღეს ვოლტერ ბ. იეჰოვა პრატიკოსი სოლიფსისტი გახდა. სულ რაღაც ერთი კვირის განმავლობაში მისი ცოლი სხვა კაცთან ერთად გაიქცა, მან სამსახური დაკარგა და მაშინ, როცა შეეცადა შავ კატას მისთვის გზა არ გადაეჭრა, ფეხი მოიტეხა.


საავადმყოფოში წოლისას ვილტერმა გადაწყვიტა, ყველაფრისთ-ვის წერტილი დაესვა. ფანჯრიდან დაჟინებით უყურა ვარსკვლა-ვებს. ჯერ მათი გაქრობა მოისურვა, მერე კი მის გარშემო მყოფი ადამიანების. გამოუვიდა! ვარსკვლავები გაქრნენ. საავადმყოფო კი მისთვის უჩვეულო სიჩუმემ მოიცვა. შემდეგ მსოფლიოს ჯერიც დადგა და იგრძნო, როგორ დაფრინავდა სივრცეში. მან საკუთარ სხეულს ისე იოლად დააღწია თავი, რომ გადაწყვიტა, საბოლოო ნა-

ბიჯი გადაედგა და არსებობა შეეწყვიტა. არ გამოუვიდა! გაიფიქრა, ნუთუ არსებობს რამე წინააღმდეგობა სოლიფსისტისთვის?

- დიახ! – უპასუხა ხმამ.
- შენ ვინ ხარ? – იკითხა ვოლტერ ბ. იეჰოვამ.
- მე ის ვარ, რომელმაც შექმნა სამყარო და რომლის არსებობის შეწყვეტაც შენ ზუსტად ახლა მოისურვე. ახლა კი, როცა შენ ჩემი ადგილის დაკავება გინდა, – ამოიხრა ხმამ, – მე შემიძლია შევწყვიტო არსებობა, მოვიპოვო სიმშვიდე და ნება მოგცე, შენს თავზე აიღო ყველაფერი.
- შენ იცი, როგორ უნდა შეწყვიტო არსებობა? მეც ზუსტად ამის გაკეთებას ვცდილობ!
- დიახ, ვიცი, – თქვა ხმამ, – შენ ისე უნდა მოიქცე, როგორც მე. შექმენი სამყარო, დაელოდე სანამ ვინმე ნამდვილად არ ინამებს, რისიც შენ გწამდა. ყოველივე ამის შემდეგ შეგიძლია, გადადგე და შენი საქმე სხვას გადააბარო, ახლა კი, მშვიდობით! – თქვა ხმამ და გაქრა. ვოლტერ ბ. იეჰოვა მარტო დარჩა სამყაროში, მან მხოლოდ ერთი რამის გაკეთება შეძლო. შექმნა ზეცა და დედამიწა!

ამას შვიდი დღე მოანდომა.

#### ინგლისურიდან თარგმნა თამარ ლონდარიძემ



მხატვარი – ნანა ყორანაშვილი

# ლიტერატურული უთიივობობის ისტორიის

## ირინა ჯიშვარიანი

ფილოლოგიის მეცნიერებათა კანდიდატი, დაამთა-  
ვრა თბილისის ა.ს. პუშკინის სახელობის სახელმწიფო  
პედაგოგიური ინსტიტუტის რუსული ფილოლოგიის ფა-  
კულტური. მუშაობდა ამავე ინსტიტუტის რუსული ლი-  
ტერატურის ისტორიის კათედრის უფროს მასწავლებ-  
ლიად. 2009 წლიდან მუშაობს სამცხე-ჯავახეთის სახელმ-  
წიფო უნივერსიტეტში.

## პორტს პასტერნაკი და საქართველო

რუსულ პოეზიაში საქართველომ განსაკუთრებული ადგილი  
დაიმკვიდრა. ჩვენი ქვეყანა რუს პოეტებს პირველ რიგში იზიდავდა  
თავისი გასაოცარი თქმულებებითა და ლეგენდებით, საუკუნოვანი  
ტრადიციებით, წარმტაცი და განუმეორებელი ბუნებით და, რა თქმა  
უნდა, სტუმართმოყვარეობით.

საქართველო და კავკასია რუსული ლიტერატურისათვის ალექ-  
სანდრე პუშკინმა აღმოაჩინა, შემდეგი მისი ტრადიციები მიხეილ  
ლერმონტოვმა გააგრძელა. საქართველოს თემა რუსულ პოეზიაში  
ამ კორიფეთა შემდეგაც გაგრძელდა და შემდგომი განვითარება XX  
საუკუნეშიც ჰპოვა ანდრეი ბელის, კონსტანტინე ბალმონტის, ბორის  
პასტერნაკის, ნიკოლაი ზაბოლოვკის და სხვათა შემოქმედებაში.  
დღეს თქვენს ყურადღებას ბორის პასტერნაკზე შევაჩერებთ.

დიდი რუსი პოეტი, მწერალი და მთარგმნელი, ლიტერატურის  
დარგში ნობელის პრემიის ლაურეატი ბორის პასტერნაკი განსა-  
კუთრებული გრძელი 1931 წლის „ზაფხულში ჩამოვიდა თბილისში. პაოლო იაშ-  
ვილის სახლში შეხვდა და გაიცნო „ცისფერყანწელები“ — ტიციან  
ტაბიოს, გიორგი ლეონიძე, სიმონ ჩიქოვანი, ნიკოლოზ მინძვილი,  
ვალერიან გაფრინდაშვილი, კოლაუ ნადირაძე და ქართული ხელოვ-  
ნების სხვა მოღვაწენი, მათ შორის ლადო გუდიაშვილი.

მომდევნო დღეებში სტუმარ-მსაპინძლები ესტუმრნენ ქალაქის  
გარეუბნებს, მცხეთას და ჯვრის მონასტერს. მთებს შორის მოქცე-

ულმა თბილისმა დიდი შთაბეჭდილება მოახდინა რუს პოეტზე, რის შედეგადაც შეიქმნა ლექსი „სალამოვდებოდა...“. აგვისტო პასტერნაკმა კოჯორში გაატარა. აქ მუშაოდა ახალი ლექსების კრებულის ხელნაწერზე, რომელშიც შევიდა კოჯორში დაწერილი ორი ლექსი.

ამავე წლის სექტემბერში, აბასთუმნის, ბორჯომისა და ბაკურიანის შემდეგ პასტერნაკი ოჯახთან და პაოლო იაშვილთან ერთად ქობულეთში გაემგზავრა. სიმონ ჩიქევანი იხსენებდა: „ბორის ლეონიდის ძე და ზინაიდა ნიკოლაევნა თავის ვაჟთან ერთად პაოლო იაშვილმა ჩამოიყვანა. სასტუმროში მოაწყო, სადაც მე და ბესო უღერნტი ვცხოვრობდით. პოეტი, რომელსაც მე უკვე მაშინ ვთვლიდი უდიდეს ლირიკოსად, აღმოჩნდა უაღრესად მომხიბლავი და პოეტური ბუნების მქონე ადამიანი... პასტერნაკები სამთავრობო სასადილოს მიამაგრეს, ხოლო მე და ბესო დავდიოდით დამსცენებლებისათვის განკუთვნილ დარბაზში. კვების საკითხი მაშინ რთულად იყო. ბორის ლეონიდის ძე მაშინვე მიხვდა ამას, და ყოველ დღე, როდესაც სასადილოდან ბრუნდებოდა, ჩემთვის და ბესოსთვის პური მოჰქონდა. თუ ვერ გვნახვდა, ფანჯრის რაფაზე ტოვებდა. ეს წესად იქცა... მთელი თვე ერთად ვიყავით. პაოლო თბილისში დაბრუნდა, ჩვენ დავრჩით... ის (პასტერნაკი) დიდ ნაწარმოებზე მუშაობდა, როგორც შემდგომ აღმოჩნდა, ეს იყო პოემა „ტალღები“...

თბილისში ერთად ვპრუნდებოდით ... სადგურზე ერთმანეთს დავცილდით. ამის შემდეგ დიდხანს არ შევხვედრივართ ერთმანეთს“.

მოსკოვში გამგზავრებამდე ერთი დღით ადრე გამომცემლობა „ზაკნიგნში“ პასტერნაკმა მიიტანა ლექსების ხელნაწერი სათაურით - „ახალი ლექსები“. აქედან სამი ლექსი საერთო სათაურით - „თბილისი“, დაბეჭდა თბილისის ერთ-ერთ გაზიეთში, მათ შორის „სანამ კავკასიონს ვებლატებით“.

1932 წელს, როდესაც პასტერნაკი ოჯახთან ერთად სვერდლოვსკის მახლობლად ისვენებდა, პაოლო იაშვილისთვის მიწერილ წერილში იგი აღნიშნავდა: „აქ ჩვენ კიდევ ერთხელ თავიდან განვიცადეთ თქვენთან ერთად გატარებული ზაფხული... ჩვენ არაფერს არ ვადარებდით ერთმანეთს, არც ბუნებას, არც ხალხს. მაგრამ, თითქოს მოლაპარაკებულები ვიყავით, ერთხმად დავასახელეთ კოჯორი. ... და მერე ვისხენებდით თბილისს, ოქროყანას, ქობულეთს, წალვერს და ბაკურიანს ... იმიტომ, რომ ეს არ არის მხოლოდ სამხრეთი და კავკასია, ყოველთვის დაუშრეტელი და განსაცვიფრებლად ლამაზი, არ არის მხოლოდ ტიციანი და შანშიაშვილი, ნადირაძე და მი-

წიშვილი, გაფრინდაშვილი და ლეონიძე — შესანიშნავი და შეუდარებელი ადამიანები. ეს რაღაც უფრო მეტია, და თანაც ისეთი, რაც ამ ქვეყანაზე იშვიათად გხვდება“.

საქართველოში სამთვიანი ყოფნის შედეგად მიღებულმა შტაბეჭდილებებმა, ქართულ თვითმყოფად კულტურასა და ისტორიასთან მჭიდროდ შეხებამ მნიშვნელოვანი კვალი დატოვა პასტერნაკის ცხოვრებაში. 1932 წლის 6 აპრილს მისი თაოსნობით მოსკოვში ჩატარდა ქართული პოეზიისადმი მიძღვნილი ლიტერატურული სალამო. ამით მან გამოხატა თავისი პატივისცემა ქართველი პოეტების — ნიკოლოზ ბარათაშვილის, პაოლო იაშვილის, ტიციან ტაბიძის და სხვათა მიმართ. 30 ივნისს პასტერნაკი წერდა პაოლო იაშვილს: „რაც არ უნდა ჩავითქმიქრო, უახლოეს მომავალში საქართველოს გვერდს ვერ ავუვლი“.

„საქართველომ პასტერნაკი მოხიბლა არა მხოლოდ თავისი ეგზოტიკურობით და აღმოსავლური კოლორიტით, არამედ მაღალი სულიერებითა და ღრმა ორგანულობით, რომლის ფესვები იკვეთება ეროვნული კულტურის თავისებურებებში. პასტერნაკმა საქართველოს თვითმყოფადობა და განსაკუთრებულობა დაინახა არა იმდენად მისი ლამაზ ბუნებასა და ქართველი პოეტების განუმეორებელ ნიჭიერებაში, რამდენადაც მის ორგანულ კავშირში მმობლიურ, ხალხურ ნიადაგთან და ქვეყნის ისტორიასთან. პაოლო იაშვილისადმი 1932 წლის 30 ივლისს მიწერილ წერილში პოეტი იძლევა საქართველოს ახალ ფილოსოფიურ ხედვას როგორც ქვეყნისა, რომელმაც ეროვნული და ისტორიული ტრადიცია დაუკავშირა დღევანდელობას, ლეგენდა და მითი — რეალობას, პოეზია - პროზა... საქართველო პასტერნაკისთვის გახდა ერთ-ერთი ჰიპოსტასი მისი სულისა... მისი პოეზიის ერთ-ერთი მთავარი თემა, რომელმაც დიდი გავლენა იქონია მის პოეტურ ბედზე“, - წერს ქართულ-რუსული ურთიერთობების მკლევარი მ. ქშონდზერი.

საქართველოს თემა პასტერნაკის შემოქმედებაში პირველად 1917 წელს გაჩნდა ნიგნში „ჩემი და - ცხოვრება“ („Сестра моя – жизнь“). ამაზე მეტყველებს ნიგნის ლერმონტოვისადმი მიძღვნა და ლექსი „დემონის სხოვნას“. პირველად საქართველოს ასეთი გაცნობა ბევრ რუს პოეტს ახასიათებს და რუსულ ლიტერატურაში საქართველოს აღქმის კიდევ ერთ ტრადიციას ნარმოადგენს.

1932 წელს პასტერნაკმა გამოქვეყნა ნიგნი „მეორედ დაბადება“, სადაც შევიდა არაერთი ნაწარმოები, საქართველოში მოგზაურობის

შედეგად რომ შეიქმნა, მათ შორის ციკლი „ტალღები“. მაგრამ ქართული თემა პასტერნაკის შემოქმედებაში ამით არ ამოწურულა. 1936 წელს მან შექმნა კიდევ ორი პოეტური ნაწარმოები — „მხატვარი“ და „მგზავრის ჩანახატები“. ეს უკანასკნელი მან „თბილისელ მეგობრებს“ - ტიციან ტაბიძეს და პაოლო იაშვილს მიუძღვნა.

მეორედ დიდი რუსი პოეტი 1933 წელს ჩამოვიდა საქართველოში, ამჯერად საბჭოთა მწერალთა პირველი ყრილობის მოსამზადებელი საორგანიზაციო კომიტეტის შემადგენლობაში. მასთან ერთად ჩამოვიდნენ ნიკოლაი ტიხონოვი, იური ტინიანოვი, ოლგა ფორში, პეტრე ბავლენკო და ვიქტორ გოლცევი. მაგრამ პასტერნაკის ჩამოსვლის მიზეზი სხვა იყო. 1933 წლის ზაფხულში პასტერნაკმა გააფორმა ხელშეკრულება ქართველ პოეტთა ლექსების თარგმანის გამოცემაზე. მაგრამ მანამდე იგი თარგმნიდა მისთვის ნაცნობი ევროპული ენებიდან. ამჯერად კი სრულიად უცხო ენასთან ალმოჩნდა პირის-პირ. ქართული ენის შესწავლამ, რომელიც მან 1931 წელს დაიწყო, მხოლოდ ზოგადი წარმოდგენა მისცა ქართული გრამატიკის შესახებ, უნარი წაეკითხა და გაეგო, მაგრამ ენის იმ დონეზე ცოდნა, რომელიც საჭირო იყო იმისათვის, რათა ლექსი რუსულად ეთარგმნა, მას არ გააჩნდა. ტიციან ტაბიძისა და პაოლო იაშვილის რამდენიმე ლექსი, მათ მიერვე წაკითხული, მან ჯერ კიდევ 1931 წელს ჩაიწერა და 1933 წლის ოქტომბერში გააგზავნა ჟურნალში „ამიერკავკასიის ლიტერატურა და ხელოვნება“.

პასტერნაკს სჭირდებოდა ახალი საავტორო პწკარედების მოპოვება, და სწორედ ამ მიზნით ჩამოვიდა იგი თბილისში 1933 წლის ნოემბერში. მეგობრებთან შეხვედრამ, საქართველოში მოგზაურობამ, ნიკოლაი ტიხონოვთან ურთიერთობამ, რომელთან ერთადაც ცხოვრიბდა სასტუმროში, გიორგი ლეონიძის ოჯახში მასპინძლობამ დიდი ბედნიერება მოუტანა რუს პოეტს. მაგრამ, ამავე დროს, მისთვის შეუქმნეველი არ დარჩენილა, რომ მისი მეგობრები ტაბიძე და იაშვილი დაუმსახურებლად განიცდიდნენ შევიწროებას და არ აღმოჩნდნენ იმ ავტორთა შორის, რომლებსაც ოფიციალური მხარდაჭერა ჰქონდათ. „მით უფრო საჭირო იქნება მათვის ჩემი მხარდაჭერა“, — წერდა პასტერნაკი ერთ-ერთ წერილში.

მეგობრებისადმი მხარდაჭერამაც არ დააყოვნა. 1934 წლის დასაწყისში პასტერნაკმა პაოლო იაშვილისა და ნიკოლოზ მინიშვილისგან მიიღო მათ მიერ სტალინისადმი მიძღვნილი ლექსების პწკარედები. ამ ლექსების თარგმანი იმავე წლის მარტში დაიბეჭდა ჟურნალებში

„Новый мир“ და „Красная новь“. ამავე წელს პასტერნაკის მიერ თარგმნილი ქართული პოეზია დაიბეჭდა უურნალებში «30 дней» (N 1), «Молодая гвардия» (N 2), გაზეთებში «Литературная газета» და «Известия», ასევე ვაჟა-ფშაველას „გველისმჭამელის“ თარგმანი. კრებული „საქართველოს პოეტები“ 1935 წელს გამოვიდა თბილისში, ხოლო მოსკოვში კრებული - „საქართველოს ლირიკოსები“. 1935 წლის თებერვალში მოსკოვში ჩატარდა კონფერენცია „საბჭოთა საქართველოს პოეტები“, რომელშიც მონაწილეობა მიიღეს ქართველმა პოეტებმა. პასტერნაკმა თავისი თარგმანები წაიკითხა.

1937 წლის 22 ივნისს თავი მოიკლა პასტერნაკის უახლოესმა მეგობარმა პაოლო იაშვილმა. იმავე წლის აგვისტოში პასტერნაკი წერდა მის ქვრივს: „თამარა გეორგიევნა, ჩემო კარგო, საბრალო, ძვირფასო, ეს რა ხდება!.. ნუთუ ვერასოდეს ვერ ვნახავ ამ საოცარ სახეს, მის მაღალ ზეშთაგონებულ შუბლს ... ვერ ვეზიარები მის ნიჭს, მის განუმეორებელ ალლოს, რომელიც ასეთი იშვიათი და ძვირფასია ყველა დროში, და არა მხოლოდ ქართულ ლიტერატურაში. რარიგაც არ უნდა მიჭირდეს ამ ბოლო დროს არსებობა, თქვენი გულისითვის შეუძლებელს შევძლება...“

იმავე წელს დააპატიმრეს პასტერნაკის კიდევ ერთი მეგობარი — ტიციან ტაბიძე. პასტერნაკი მის ოჯახს მრავალი წლის განმავლობაში უნდა მატერიალურ და მორალურ მხარდაჭერას. ასევე რეპრესირებული იქნა მისი კიდევ ერთი ქართველი მეგობარი, პოეტი ნიკოლოზ მიწიშვილი. მიუხედავად ამ სახელების ირგვლივ შექმნილი ვაკუუმისა, პასტერნაკი ბოლომდე დარჩა თავისი მეგობრების ერთგული.

1937 წლის დეკემბერში პასტერნაკი თბილისში მიიწვიეს. აქ ტარდებოდა მწერალთა კავშირის გამგეობის მორიგი პლენუმი, რომელიც შოთა რუსთაველის იუბილეს დაუკავშირეს, მაგრამ პასტერნაკმა მონაწილეობაზე უარი განაცხადა. „როგორ შემეძლო საქართველოში წასვლა, როდესაც იქ ტიციანი არ იყო? მე ის ისე მიყვარდა“, — უთქვამს ანატოლი ტარასენკოვისთვის, რუსი პოეტისა და კრიტიკოსისთვის.

მესამედ პასტერნაკი საქართველოში ჩამოვიდა სიმონ ჩიქოვანის მიწვევით 1945 წლის 19 ოქტომბერს ნიკოლოზ ბარათაშვილის გარდაცვალებიდან 150 წლისთავის აღსანიშნავ ღონისძიებებში მონაწილეობის მისაღებად. სიტყვით გამოვიდა რუსთაველის სახელობის თეატრში და წაიკითხა თავისი თარგმანები. ბორის პასტერნაკის ვა-

უი თავის წიგნში წერდა: „ნინა ტაბიძე იხსენებდა, რომ იუბილეში მონაწილეობის მიღების წინაპირობად პასტერნაკმა მისი (ნინას) დარბაზში ყოფნა დაასახელა. ტიციანის დაპატიმრების შემდეგ იგი პირველად გამოჩნდა ხალხში. პასტერნაკი კითხულობდა და განსაკუთრებულად ხაზგასმით მიმართავდა მას... განშორებისას ნინა ტაბიძემ აჩუქა მშვენიერი საჟერბო ქაღალდის მოზრდილი დასტა, რომელიც ტიციანის შემდეგ დარჩა. მასზე დაიწერა „დოქტორ ჟივაგოს“ თეთრად გადაწერილი ხელნაწერი... მოგვიანებით პასტერნაკს არაერთხელ უთქვამს, რომ ეს ნინას რომანია“.

1946 წელს პასტერნაკმა დაწერა ორი სტატია „ნიკოლოზ ბარათაშვილი“ და „რამდენიმე სიტყვა ახალი ქართული პოეზიის შესახებ“. ამ უკანასკნელში მას არაფერი უთქვამს პ. იაშვილისა და ტ. ტაბიძის შესახებ, ვინაიდან მათი სახელების ხსენება აკრძალული იყო, მაგრამ მან მოგვცა მათი შესანიშნავი ფსიქოლოგიური პორტრეტები 1956 წელს დაწერილ ნარკვევში „ადამიანები და გარემოებანი“, რომელიც მხოლოდ 1967 წელს დაიბეჭდა უურნალში „Новый мир“. 1953 წლის 7 აგვისტოს პასტერნაკი წერდა ნინა ტაბიძეს: „ჩემო ძვირფასო მეგობარო! თქვენ იცით, მე უკვე დიდი ხანია, აღარ მჯერა, რომ ტიციანი ცოცხალია. ის იყო ისეთი განსაკუთრებით დიდი, განსაკუთრებით თავისებური და ნათელი ადამიანი, რომ მისი არსებობის დამალვა შეუძლებელი იქნებოდა... თქვენმა კვლავ გაცოცხლებულმა იმედმა, რომ ჩვენ შეიძლება ის კვლავ გვენახა, ერთი წესით ჩემს გულშიც დაბადა იმედის ნაპერნკალი. თუ ის ცოცხალია, აუცილებლად დაბრუნდება ჩემსა და თქვენს ცხოვრებაში...“

ბოლოს პასტერნაკი საქართველოში 1959 წლის თებერვლის ბოლოს ჩამოვიდა. აქ მან 10 დღე დაყო. ეს მეტად რთული პერიოდი იყო რუსი პოეტისა და მწერლის ცხოვრებაში. პასტერნაკზე ძალიან დიდი ზენოლა ხორციელდებოდა. მიზეზი ამისა იყო 1957 წელს საზღვარგარეთ, კერძოდ კი იტალიაში, გამოქვეყნებული რომანი „ექიმი ჟივაგო“ (საბჭოთა კავშირში ეს წიგნი დაბეჭდვამდე აკრძალეს). ამ ფაქტმა საბჭოთა პრესის მწვავე კრიტიკა გამოიწვია. პასტერნაკს სპეციალურად გამართულ სხდომებზე აკრიტიკებდნენ, იუდას, კაცთმოძულეს, ცინიკოსს, ცილისმწამებელს, მოლალატეს უწოდებდნენ. იგი აიძულეს, უარი ეთქვა ნობელის პრემიაზე და „პრავდაში“ გამოაქვეყნებინეს მოსანანიებელი წერილი, რომელშიც მას მხოლოდ ერთი პატარა აბზაცი ეკუთვნოდა. „ექიმი ჟივაგო“ საბჭოთა კავშირში მხოლოდ 1988 წელს გამოვიდა. 1989 წელს კი

სტოკოლმში გარდაცვლილი ავტორის კუთვნილი დიპლომი და მე-დალი ნობელიანტის შვილს გადაეცა.

1958 წლის 29 ოქტომბერს თბილისშიც გაიმართა მწერალთა სხდომა, რომელზეც სიტყვით გამოვიდნენ ირაკლი აბაშიძე, ალიო მირცხულავა, ბესარიონ უდენტი, შალვა დადიანი, კარლო კალაძე, კონსტანტინე ლორთქიფანიძე, გრიგოლ აბაშიძე, რევაზ მარგიანი, იოსებ ნონეშვილი, გიორგი ნატროშვილი, კომპოზიტორები: ანდრია ბალანჩივაძე, ალექსი მაჭავარიანი. პოეტის საქციელი დაგმეს (ალ-ბათ, აიძულეს, დაეგმოთ) მისმა მეგობრებმაც, სიმონ ჩიქოვანმა და გიორგი ლეონიძემ და მხარი დაუჭირეს პასტერნაკის მწერალთა კავშირიდან გარიცხვას.

ამ დროისათვის მას საქართველოში, და არა მხოლოდ საქართველოში, ყველა ჰონორარი შეუჩერეს, მათ შორის ერთი წლის წინ გამოცემული წიგნისთვის „ლექსები საქართველოზე, ქართველი პოეტები“.

ამის მიუხედავად, 1959 წლის თებერვლის ბოლოს იგი მაინც ჩამოვიდა საქართველოში. მას კვლავ სურდა ახალგაზრდული წლების გახსენება, სურდა, მისულიყო იმ სახლებში, სადაც ადრე მისი ან დალუპული მეგობრები ცხოვრობდნენ. თვითონ ცხოვრობდა ტიციან ტაბიძის ქვრივის ბინაში. პასტერნაკის თხოვნით, ნინა ტაბიძე ცდილობდა, საიდუმლოდ შეენახა მისი ჩამოსვლა. მხოლოდ ლადო გუდიაშვილის სახლში მოუწყვეს მას შეხვედრა, რომელსაც ესწრებოდა მეგობართა ვიწრო წრე.

ლადო გუდიაშვილი იხსენებდა: „პასტერნაკი ჩემთან ადრეც ყოფილა, მაგრამ იმ დღეს მან პირველად წამიკითხა ბარათაშვილის მისული თარგმანები... „საყურე“ და „ცისა ფერს“. ძალიან ამაღლვებელი იყო. არანაკლებ ლელავდა თვითონ პასტერნაკიც... რამდენი ასეთი, პოეტური შთაგონებით სავსე საათები მახსოვს პასტერნაკთან დაკავშირებით! როცა თბილისში ჩამოდიოდა, ჩემთანაც უსათუოდ მოვიდოდა ხოლმე. ჩემი ერთი კეთილი მეგობარი ისიც იყო.

იგი ხომ მთელი თავისი ცხოვრებითა და პოეზიითაა დაკავშირებული საქართველოსთან... ეს კარგად ჩანს მარტო იმ პირად წერილებშიც კი, რომლებიც მას ქართველი მეგობრებისათვის გამოუზავნია... რაც შეეხება მის შემოქმედებას... მან ხომ ამ მხრივაც ძალინ ბევრი გააკეთა ქართული კულტურისათვის... იგი ერთი პირველთაგანი იყო, ვინც ქართველ პოეტებს თარგმნიდა... ამ თარგმანებმა კიდევ უფრო გააღვივეს სხვა ერების ინტერესი და პატივის-

ცემა ქართული პოეზიისადმი, საქართველოსადმი. მახსოვს, ბოლო შეხვედრის დროს მითხრა: საქართველო იმიტომ არსებობს, რომ ადამიანებმა სიხარულის შეცნობა შეძლონ... ყველაზე მეტად სა-ქართველოში და ქართველ მეგობართა შორის მიყვარს ყოფნაო.

ისე, როგორც ყველა შეხვედრა, ეს დღეც დაუვიწყარი დარჩა ჩემთვის: წინასწარ დამირეკა. მოვალ, თუ ჩემი ანენილი ბედით არა-ფერს დაგიშავებო. ევგენი ევტუშენკოსთან ერთად იყო... კარგა ხანს ისხდნენ... ბორისი კითხულობდა ლექსებს, ლაპარაკობდა პოეზიაზე, მხატვრობაზე, იხსენებდა გარდასულ დღეებს, ოციანი და ოცდაათია-ნი წლების თბილის. ტიციანს, პალლოს... დალოილი, ნალვლიანი სახე ჰქონდა. აღარ მგონია, რომ ოდესმე კიდევ მომიხდეს აქ ჩამოსვლაო, — ამბობდა... მართლაც, მალე გარდაიცვალა...“ - იხსენებდა ლადო გუდიაშვილი. როდესაც სამშობლოში ბრუნდებოდა და მატარებლის კიბეზე იდგა, მას ნინა ტაბიძისთვის სხმამალლა უთქვამს: „ნინა! თქვენს სახლში მომძებნეთ. მე იქ დავრჩი!“

ქართველი ხელოვნების მოღვაწეებთან 30-იან წლებში დაწყე-ბულმა მეგობრობამ, ურთიერთობამ და მიმოწერამ 30 წელს გასტა-ნა, საქართველო კი მისი მეორე სამშობლო გახდა. იგი წერდა ნინა ტაბიძეს: „როცა მე აღარ ვიქნები, რა დარჩება? ჩემი ცხოვრება... და რა იყო მასში მთავარი? მუსიკისა და სკრიაბინისადმი სიყვარული, ორი-სამი ახალი ნოტი ჩემს შემოქმედებაში, რუსულ სოფელში გა-თეული დამე, რევოლუცია, საქართველო...“

ეს ხანმოკლე ათდღიანი შესვენება პასტერნაკისთვის შვებისმომ-გვრელი აღმოჩნდა. ქალაქში სეირნობის დროს მას დაებადა ახალი წიგნის დაწერის იდეა, რომლის მთავარი თემა წმინდა ნინოს დროინდელი საქართველო უნდა ყოფილიყო. მაგრამ ეს ჩანაფიქრი განუხორციელებელი დარჩა.

ბორის პასტერნაკი პოეტური თარგმანის დიდოსტატი იყო. პოე-ტური თარგმანი მისი შემოქმედების მნიშვნელოვან ნაწილს წარ-მოადგენდა. მისი აზრით, თარგმანი დამოუკიდებელ მხატვრულ ნა-წარმოებს უნდა წარმოადგენდეს. ორიგინალთან მსგავსება მას არ იზიდავდა. „ასეთი თარგმანები, — წერდა იგი, იმედებს არ ამართ-ლებს“. ქართველი სიმბოლისტი პოეტი ვალერიან გაფრინდაშვილი ამასთან დაკავშირებით აღნიშნავდა: „პასტერნაკი ასლს კი არა, ორიგინალის პორტრეტს ქმნის. თქვენ თითქოს საკუთარ ორეულს ხედავთ, რომელიც გაოცებთ იმით, რომ მასში საკუთარ თვისებებს ამჩნევთ. რა თქმა უნდა, უცხო ენამ, მისმა მელოდიურობამ სრუ-

ლიად შეცვალა იგი, მაგრამ თქვენ მაინც იმ ჯადოქრის მაფლიერი ხართ, რომელმაც სხვა სამოსში გამოწყობილი რუსული პოეზიის მდიდარ სამყაროს გაზიარათ“.

ქართული პოეზიის თარგმნა პასტერნაკმა 1933 წლიდან დაიწყო, როდესაც მეორედ ეწვია საქართველოს. ამ დროიდან 50-იანი წლების მიწურულამდე პასტერნაკმა თარგმნა ვაჟა-ფშაველას „გველის-მჭამელი“ (1934), ნიკოლოზ ბარათაშვილის, აკაკი წერეთლის, ტიციან ტაბიძის, პაოლო იაშვილის, ვალერიან გაფურინდაშვილის, ალექსანდრე აბაშელის, იაკობ გოგებაშვილის, კოლაუ ნადირაძის, გიორგი ლეონიძის, სიმონ ჩიქოვანის, ნიკოლოზ მინიშვილის, ირაკლი აბაშიძის ლექსები, რომლებიც ორი კრებულის სახით 1935 წელს გამოვიდა მოსკოვსა და თბილისში. ესენია „ქართველი ლირიკოსები“ და „საქართველოს პოეტები“ (ნ. ტიხონოვთან ერთად). თარგმანების მომზადებისას პასტერნაკს ეხმარებოდნენ მისი ქართველი მეგობრები, რომლებიც სავტორო პწკარედებს აწვდიდნენ მას. ტიციან ტაბიძე წერდა: „თანამედროვე ქართველი პოეტების პასტერნაკისულ თარგმანებს შინაარსობრივი სიზუსტე ახლავს, თითქმის შენარჩუნებულია ყველა სახე და სიტყვათა განლაგება და, რაც მთავარია, მასში ისმის მელოდია. საოცარია, რომ ყველაფერ ამას მან მიაღწია ისე, რომ ქართული ენა არ იცოდა“.

პოეზია სრულყოფილად არ ითარგმნება, ამიტომაცაა, რომ იშვიათია დენდის შესატყვისი პოეტური თარგმანები. ტიციან ტაბიძისადმი მიწერილ ერთ წერილში ბორის პასტერნაკი წერდა: „მართლა მოგეწონათ? მე კი მეტვება: ყოველგვარი თარგმანი, უხეროც და კარგიც, ერთგვარი ძალადობაა დედნის მიმართ. ჩემი თარგმანი პირველთა რიგს უფრო მიეკუთვნება. ალბათ, დაგიმახინჯეთ ლექსები“.

განსაკუთრებული ალნიშვნის ღირსია პასტერნაკის მიერ თარგმნილი ბარათაშვილი. რუსი პოეტი, პროზაიკოსი და მთარგმნელი იური ლიფშიცი სტატიაში „ნიკოლოზ ბარათაშვილის ლექსი „ცისა ფერს“ (2009) ბორის პასტერნაკის თარგმანში“ წერს: „ლექსი „ცისა ფერს“, რომელიც ნ. ბარათაშვილმა დაწერა 1841 წელს, ხოლო ბ. პასტერნაკმა თარგმნა არა უგვიანეს 1938 წლისა, დიდი ხანია, რუსეთში გენიალური ქართველი პოეტის სავიზიტო ბარათად იქცა. მასზე გაფიქრებისას, მეხსიერებაში უნებლივთ ამოტივტივდება სტრიქონები: «Цвет небесный, синий цвет / Полюбил я с малых лет...». ბარათაშვილის სხვა ლექსები რუსეთში ნაკლებად ახსოვთ, მაგრამ „ცისა ფერს“ რუსული პოეზიის თითქმის ყველა თაყვანისმ-

ცემელმა იცის... დღემდე არც ერთ რუს კრიტიკოსს აზრადაც არ მოსვლია ორიგინალის შედარება მის თარგმანთან. ამის სამი მიზეზი არსებობს. პირველი — პასტერნაკის გენიალური ტექსტია... მეორე ისაა, რომ პროფესიონალ ლიტერატურათმცოდნებს არ სურთ, საკუთარი რეპუტაციის შელახვა რუსი კლასიკოსის კრიტიკით... მესამე მიზეზი კი შეიძლება იყოს ის, რომ პასტერნაკის არქივებში შეიძლება არ ინახებოდეს სწორედ ის პწკარედი, რომლიდანაც თარგმნა რუსმა პოეტმა ქართველი პოეტის ლექსი". სტატიაში იური ლიფშიცმა სწორედ ეს მიზანი დაისახა და, უნდა ითქვას, არც თუ ურიგოდ გაართვა თავი.

პასტერნაკს გაუმართლა ქართველ მთარგმნელებშიც. მისი რომანი „ექიმი უივაგო“ ორჯერაა თარგმნილი ქართულად აკაკი ბრეგაძისა და ნოდარ ნონიაშვილის მიერ. სხვადასხვა დროს პასტერნაკის ლექსები თარგმნეს სიმონ ჩიქოვანმა, თამაზ ჩხერიმა, მორის ფოცხიშვილმა, ვახუშტი კოტეტიშვილმა („სანამ კავკასიონს ვებლატებით“), ირაკლი სურგულაძემ, თედო ბექიშვილმა, ტარიელ ჭანტურიამ, ჯემალ აჯიაშვილმა, ანდრო ბუაჩიძემ, ბათუ დანელიამ, ესმა ონიანმა („ბარდნიდა, ბარდნიდა მთელს დედამიწაზე“), სერგო წურწუმიამ („იყო ცნობილი, არ არის კარგი“) და სხვებმა. პასტერნაკის, რილკესა და ცვეტაევას მიმოწერა ნაირა გელაშვილმა გადმოაქართულა, მისი „ადამიანები და გარემოებანი“ კი - გიორგი მარგველაშვილმა.

ბორის პასტერნაკის შემოქმედება დღესაც პოპულარულია საქართველოში, რომელიც მან მთელი გულითა და სულით შეიყვარა და რომელიც მისთვის მეორე სამშობლოდ იქცა. ორენოვან გარემოში გაზრდილი უფროსი თაობისა და მის აფასებენ, როგორც XX საუკუნის უდიდეს პოეტს. სხვები მას ქართველი ხალხის ერთგულ მეგობრად და რუსულ-ქართული კულტურული ტრადიციების ღირსეულ გამგრძელებლად მიიჩნევენ. ის, თუ როგორ ეხმარებოდა იგი რეპრესირებული მეგობრების ოჯახებს, დაუკინარია. „ქართველი პოეტების (იაშვილი და ტაბიძე) ბედი, — წერდა იგი, — ცვეტაევას ბედთან ერთად ჩემთვის ყველაზე დიდი უბედურება იყო“. ეს მხოლოდ ლიტონი სიტყვები არ არის.

# სახილმძღვანო მნის სტაციონარული მომსახურების დანერგვის

## ნათელა ნაცვლიშვილი-ბერიძე

1966 წელს დაამთავრა საგარეჯოს №1 საშუალო სკოლა, 1972 წელს - ივ. ჯავახიშვილის სახელობის თბილისის სახელმწიფო უნივერსიტეტის ფილოლოგიის ფაკულტეტის კავკასიოლოგიის განყოფილება. 1986-1994 წლებში მუშაობდა თსუ აკაკის კაბინეტში. 1992 წლიდან არის სამცხე-ჯავახეთის სახელმწიფო უნივერსიტეტის პრედაგოგი. 2005-2007 წლებში იყო თსუ მესხეთის (ახალციხის) ფილიალის ქართული ენის კაბინეტისა და უცხო ენათა კათედრის გამგე. დღემდე ხელმძღვანელობს ქართულ ენაში მომზადების საგანმანათლებლო პროგრამას.



## პირისა და პირის ნიშანთა სრულების თანამდევრობა

ზმნა ქართული ენის მორფოლოგიის ყველაზე რთული ნაწილია. ქართული ენის სწავლებისას ზმნური ფორმების წარმოება არაქართველთათვის მთავარ სიძნელეს წარმოადგენს.

„ქართულ ენას რომ სწავლობდა, ცნობილმა ლინგვისტმა ჟუგო შუხარდტმა აღიარა, რომ ვინც ქართული ზმნა იცის, მან თითქმის იცის ქართული ენაო“. თუ რა მნიშვლება აქვს ზმნას ქრთულ ენაში, მან შესანიშნავად გამოხატა შემდეგი სიტყვებით - „ზმნა ქართული ენის სულიაო“ (დ. მელიქიშვილი, „ქართული ზმნის ულლების სისტემა“, 2001, გვ. 5).

ქართული ზმნის მორფოლოგიური სტრუქტურა ძირითადად აგლუტინაციური ბუნებისაა: ყოველ გრამატიკულ კატეგორიას თავისი მორფოლოგიური ნიშანი შეესაბამება. ამის გამო ფორმა ადვილად იშლება გამჭირვალე მნიშვნელობის მქონე მორფებად, თვით ძირეულ მორფებამდე (მაგ: გადა-მ-ა-ტან-ინ-ებ-დ-ე-ს). ეს თითქოს უნდა აადვილებდეს ზმნის შესწავლას, მაგრამ ზმნის აღწერისა და შესწავლის სირთულეს ქმნის მთელი რიგი გარემოებანი:

„ფლექსიური ტიპის ფაქტები, როგორც არქაული მოვლენების ნაშთები (მაგ. ფუძის ხმოვნის აბლაუტი: ვგრებ-ვგრიხ; S პირის სუფიქსური გამოხატვა და დიფერენცირება დრო-კილოთა ფორმების მიხედვით, ასევე, S-ში მრავლობითი რიცხვის ნიშანთა განსხვავებულობა: წერ-ს; წერ-ა; წერ-ენ; წერ-ეს; ინოვაციები (მაგ. პასივის მოდელის საბოლოო ფორმირება აწმყოში S-ა სუფიქსით (შენდებ-ა, თბებ-ა ნაცვლად ძველი -ს სუფიქსისა - შენდები-ს, თბები-ს, რომელიც არ განსხვავდებოდა გვარების მიხედვით), ასევე აბლაუტიან ზმნებში ფლექსიური ტიპის ზმნებიდან თანდათან სუფიქსურ სისტემაზე გადასვლის ტენდენცია (გლეჯ-ს, გლიჯ-ავ-ს, გლი-ჯა)“ (დ. მელიქიშვილი, დასახ. ნაშრომი, გვ. 6).

ქართული ზმნის სწავლებისას სირთულეს ქმნის, ასევე, ზმნის პირის გამოხატვის სისტემაც. სუბიექტური პირის გარდა ზმნაში გამოიხატება ობიექტური პირიც. პოლიპერსონალიზმი, თავის მხრივ ინვევს ქართული სინტაქსური სტრუქტურა-მექანიზმის (სახელსა და ზმნსა შორის პირისა და პრონონების მიხედვით მართვისა და რიცხვში შეთანხმების მექანიზმის) განსხვავებას სხვა ოჯახის ენების ზმნისა და სახელის სინტაქსურ-მორფოლოგიური ურთიერთობების სტრუქტურა-მექანიზმებისგან...

ასევე კონვერსია-ინვერსია. მათი სინტაქსურ-მორფოლოგიური გამოვლინება ერთმანეთისგან განსხვავებული სინტაქსური კონ-სტრუქციებით (დ. მელიქიშვილი, დასახელებული ნაშრომი, გვ. 7).

ქართული ზმნა შეიცავს აზრის გამოხატვის ისეთ მორფოლოგიურ საშუალებებს, რომლებიც უცხოა ევროპული თუ სხვა ენებისათვის (მაგ. დრო, კილო, გვარი, გარდამავლობა). კორელაციები: დესტინაციური რელაცია, ვერსია, ქცევა, კაუზატიური რელაცია (კონტაქტიანი ფორმები), ლოკაციური რელაცია (ადგილ-მდებარეობა); ასევე აქტივისა და პასივის ფორმაცვალებადობა; მიღრეკილება სიმეტრიისაკენ. სისტემის მდგრადობის ძირითადი პირობაა ანალოგის პროცესი, მაგრამ სისტემის შიგნით მოქმედებს საპირისპირო პროცესებიც, რომლებიც არღვევენ სისტემის რგოლებს და ენის განვითარების მანძილზე კვლავ და კვლავ სიმეტრიისკენ მისისწრაფვიან დაუსრულებლად და ასე ხდება სისტემის უნიფიცირება, რღვევა და კვლავ განონასწორება.

ქართული ზმნის მრავალმხრივი ფორმალურ-სემანტიკური გენერაციისა და რეგენერაციის უზარმაზარი პოტენცია ბადებს სემანტიკური ხასიათის აზალ-აზალ ნიუანსებს, რაც თავის მხრივ

ფორმათა გადაზრების (რეინტერპეტაციის) და ფორმანტების ისტორიულად ჩამოყალიბებული ფუნქციების შეცვლას იწვევს: ზოგი კატეგორია იკარგება და მისი ნიშანი სხვა ფუნქციას იძენს (მაგ. ინკლუზივის კატეგორიის გვ/გუ პრეფიქსმა | ობ. პირის მრავლობითი რიცხვის გამოხატვის ფუნქცია შეიძინა) (დ. მელიქიშვილის დასახ. ნაშრომი, გვ. 8). ასევე აქტივისა და პასივის ქონება; III სერიის მწერივთა წარმოება; ინვერსია სისტემის გარეთ დარჩენილ ზმანათა ფორმაცვალებადობა უღლების თავისებურებანი.

ყოველივე ზემოთ ჩამოთვლილი ართულებს ქართული ზმნის უღლებადი ფორმების ერთ მთლიან სისტემაში მოქცევას, მის აღწერას და რა თქმა უნდა, სწავლებასაც.

როგორც ვნახეთ, ქართული ზმნის უღლება ქმნადობის პროცესშია. სხვადასხვა რგოლი ტრანსფორმციას განიცდის, მაგრამ ამ ქაოსში გამოიყოფა მდგრადი და სტაბილური, მყარი და სიმეტრიული ფორმალურ-სემანტიკური სისტემა, რომელზე დაყრდნობითაც შევეცადეთ, შეგვექმნა ჩვენი აზრი ზმნის კატეგორიათა შესწავლის შესახებ.

ზმნის სწავლებისას უნდა გავითვალისწინოთ მოსწავლის ქართული ენის ცოდნის დონე. იგი უნდა ფლობდეს სულ მცირე ცოდნის | საფეხურს, როდესაც მოსწავლემ იცის საკომუნიკაციო მეტყველება, სასაუბრო ენა, კითხულობს ტექსტს და მის ლექსიკურ მარაგს 500-600 სიტყვა შეადგენს. იგებს ან ადვილად ხვდება ტექსტის შინაარსს.

ასეთ შემთხვევაში წინასწარ ვასწავლით გრამატიკის ელემენტებს. კერძოდ, მოსწავლემ იცის, რომ ქართულ ენაში საგანს თავისი სახელი აქვს და მოგვიგებს კითხვებზე - ვინ და რა?. ვინ? კითხვა ადამიანს დაქსმის, დანარჩენს კი - კითხვა რა?. რომ საგანი შეიძლება იყოს ერთი და მრავალი. სიმრავლეს გამოხატავს -ებ სუფიქსი. იციან ადამიანთა სახელები, რომ მათ საკუთარი ჰქვია. ასევე საგანი შეიძლება იყოს პირველი (I), მეორე (II) და მესამე (III). მოსწავლე უკვე ეცნობა არი-ს ფორმას. მაგალითად: ეს მუხა არის. ის თათიას ძმა არის... ეს მუხაა, ის თათიას ძმაა. ეს უკანასკნელი კი გვიბიძგებს, მოსწავლეს მივაწოდოთ ინფორმაცია, რომ „არის“ ფორმა ზმნაა, რომელიც გამოხატავს მოქმედებას და მდგომარეობას და რომ აქვს პირი - I, II და III. I პირს შეესაბამება სიტყვა მე, II პირს - შენ, III პირს -ის (ეს, ეგ, იგი).

აუცილებლად ვუხსნით:

„ის“ გამოხატავს III პირს - საგანს | პირთან მიმართებით, რომ ის არის პირველი პირისგან მოშორებით: „ის არის“.

ეს გამოხატავს III პირს - საგანს, რომელიც | პირთან ახლოს იმყოფება: „ეს არის“.

ეგ გამოხატავს III პირს - საგანს, რომელიც II პირთან ახლოს იმყოფება: „ეგ კაცი“.

იგი გამოხატავს III პირს - საგანს, რომელიც ძალიან შორს იმყოფება.

ასევე ვუხსნით (დაფაზე ვწერთ) მე, შენ, ის (ეს, ეგ, იგი) მრავლობითი რიცხვის ფორმებს:

|     |      |                   |
|-----|------|-------------------|
| I   | პირი | მე-ჩვენ           |
| II  | პირი | შენ-თქვენ         |
| III | პირი | ის -ისინი         |
|     |      | ეს - ესენი        |
|     |      | ეგ - ეგენი        |
|     |      | იგი - იგინი/ისინი |

პირი შეიძლება იყოს მოქმედი ანუ სუბიექტი (სუბიექტური) და სამოქმედო - ობიექტი (ობიექტური).

იგინი ფორმა ლიტერატურული ფორმა არ არის და მის მაგიერი იხმარება „ისინი“. შემდეგ პირის მიხედვით ვცვლით ზმნას მნოლობით და მრავლობით რიცხვში.

|    |          |                  |
|----|----------|------------------|
| I  | მე ვ-არ  | ჩვენ ვ - არ — თ  |
| II | შენ ხ-არ | თქვენ ხ - არ - თ |

|     |     |       |
|-----|-----|-------|
| III | ის  | ისინი |
|     | ეს  | ესენი |
|     | ეგ  | ეგენი |
|     | იგი | ისინი |

არი-ს

ვაძლევთ ინფორმაციას, რომ I პირს **არა მხოლიდ ამ ზმნაში გამოხატავს ვ-** პრეფიქსი მხ. რიცხვში და **ვ-თ აფიქსები მრავლობით რიცხვში;**

II პირს გამოხატავს **ხ-** ჩვენ შემთხვევაში და ასევე **ჰ-** ან **ს-** პრეფიქსი სხვა ზმნებში, ან შეიძლება სულაც არ ჰქონდეს ნიშანი. ვიდრე მოსწავლე კარგად დაეუფლება გრამატიკას, მანამდე მარტივად, მექანიკურად შევასწავლოთ, რომ II პირის ფორმა იგივე | პირის ფორმაა **ვ-** ნიშნის გარეშე.

ვაძლევთ ინფორმაციას, რომ I პირს არა მხოლიდ ამ ზმნაში გამოხატავს ვ- პრეფიქსი მხ. რიცხვში და ვ-თ აფიქსები მრავლობით რიცხვში;

II პირს გამოხატავს ხ- ჩვენ შემთხვევაში და ასევე ჰ- ან ხ- პრეფიქსი სხვა ზმნებში, ან შეიძლება სულაც არ ჰქონდეს ნიშანი. ვიდრე მოსწავლე კარგად დაეუფლება გრამატიკას, მანამდე მარტივად, მექანიკურად შევასწავლოთ, რომ II პირის ფორმა იგივე I პირის ფორმაა ვ- ნიშნის გარეშე. (სქემა №1)

| მხოლობითი რიცხვი       | მრავლობითი რიცხვი             |
|------------------------|-------------------------------|
| I ვ-                   | ვ- ----- -თ                   |
| II ჰ-, ხ-, ს-, 0 ----- | ჰ-, ხ-, ს-, 0 ----- -თ        |
| III ----- -ს, -ა, -ო   | ----- -ნ, -ენ, -ნენ, -ან, -ეს |

### სქემა №1

მიღებული ინფორმაციის გასამტკიცებლად შესასწავლი ტექსტებიდან უნდა მოვაძებნიოთ სავარაუდო ზმნები, რომლებმიც გამოკვეთილი იქნება პირის ნიშნები (მნიშვნელობებს ვუთარგმნით) და ჩავაწერინებთ მათ მიერვე შექმნილ ლექსიკონებში), შეძლებისდაგვარად ვაულლებთ სამივე პირში, მხოლობით და მრავლობით რიცხვში, ვინაიდან ჯერ გრამატიკას, როგორც საგანს, არ ვასწავლით, ამიტომ პირის ნაცვალსახელების პარალელურად გავაცნობთ კუთვნილებით ნაცვალსახელებსაც წარმოდგენილი სქემის მიხედვით (სქემა №2):

|                |                     |
|----------------|---------------------|
| I მე –ჩემი     | ჩვენ – ჩვენი        |
| II შენ – შენი; | თქვენ – თქვენი      |
| III ის – იმისი | ისინი – იმათი       |
| ეს – ამისი     | ესენი – ამათი       |
| ეგ – მაგისი    | ეგენი – მაგათი      |
| იგი – მისი     | ისინი//იგინი – მათი |

### სქემა №2

ახსნილი ახალი მასალის გასამტკიცებლად შევადგენინებთ მარტივ წინადადებებს:

ნანა თათიას დაა | | ნანა თათიას და არის.

მე ფატის ძმა ვარ.

შენ იმედოს სიძე ხარ.

ის ია | | ის ია არის.

ჩვენ სტუდენტები ვართ.

თქვენ სტუდენტები ხართ.

ისინი სტუდენტები არიან.

ვინაიდან მოსწავლემ იცის, რომ ქართულ ენაში საგნის აღმნიშვნელ სიტყვას დაესმის კითხვები - ვინ და რა?, ამიტომ ვასწავლით კითხვითი ფორმითაც; ვმართავთ დიალოგს:

- ნანა თათიას ძმა? - არა, ნანა თათიას ძმა არაა | | ძმა არ არის.
- აბა, ვინ არის ნანა? - ნანა თათიას დაა | | და არის.
- მე ფატის ძმა ვარ? - შენ ფატის ძმა ხარ. ან
- არა, შენ ფატის ძმა არ ხარ.
- შენ იმედოს სიძე ხარ? - დიახ, მე იმედოს სიძე ვარ.

(ამ შემთხვევაში, როცა || პირს მივმართავთ, ვამახვილებინებთ ყურადღებას იმაზე, რომ მან პასუხი | პირის ფორმით უნდა გაგვ-ცეს). კარგ შედეგს იძლევა, როდესაც დიალოგს ვმართავთ ჯგუფში. აუცილებელია ყველა მოსწავლის ჩართულობა.

- ის ია? - არა, ის ია არ არის | | ის ია არაა.
- დიახ, ის ია | | ის ია არი(ს).
- ჩვენ სტუდენტები (ვ)არ(თ)?
- დიახ, თქვენ სტუდენტები (ხ)არ(თ).
- არა, თქვენ სტუდენტები არ (ხ)არ(თ).

აქვე უნდა გაესვას ხაზი, აუცილებლად უნდა ავუხსნათ: როცა || პირს კითხვას დაუსვამს III პირი, ის პასუხს | პირის ფორმით გასცემს.

- თქვენ სტუდენტები ხართ?
- დიახ, ჩვენ სტუდენტები ვართ.
- არა, ჩვენ სტუდენტები არ ვართ.

ზმნის სწავლებისას პირისა და მათი გამოხატვის ფორმის პარალელურად ვაძლევთ ინფორმაციას სახელებში მრავლობითობის -ებ ელემენტის შესახებ და სახელისა და ზმნის დამოკიდებულების ნათელსაყოფად წარმოვუდგენთ სქემას:

### მხ. რიცხვი მრ. რიცხვი

- I. მე გოგო ვ-არ ჩვენ გოგო-ებ-ი ვ-არ- თ
- II. შენ გოგო ხ-არ თქვენ გოგო-ებ-ი ხ-არ-თ
- III. ის გოგო არი-ს ისინი გოგო-ებ-ი არი-ან

პირის ნიშანთა სწავლებისას ვაძლევთ ინფორმაციას უარყოფის გამომხატველ სიტყვებზე: არ, ვერ.. და ვასწავლით, რომ ქართულშიც, ისევე როგორც ყველა ენაში, ზმნას აქვს უნარი, გადმოგვცეს სხვადასხვა შინაარსი - დადებითი, უარყოფითი, ბრძანებითი, კითხვითი ან თხრობითის ფორმებით.

# ტულფურის ძეგლი

თინა იველაშვილი



## შალიკაშვილების ჯვართამაღლების ეკლესია ახალციხეში

ქალაქ ახალციხის რაბათში არსებული ჯვართამაღლების ეკლესია აგებულია შუა საუკუნეების სამხრეთ საქართველოში დაწინაურებული ფეოდალური გვარის – მალიკაშვილების კუთვნილი საქმაოდ დიდი ფართის გალავანშემოვლებული ციხე-სიმაგრის შუა ეზოში. აღნიშნულ ციხე-სიმაგრეს მოსახლეობა სხვადასხვა სახელით — „ურთის ციხე“, „ყულების ციხე“, „ხანდრის გორის ციხე“ – მოიხსენიებს, ხოლო მის ტერიტორიაზე არსებულ სალოცავს, რომელიც სხვადასხვა წყაროში ჯვართამაღლებისა თუ წმინდა ჯვრის სახელზე აგებულად ითვლება, XIX საუკუნის მეორე ნახევარშიც კი, კოკოლას (რადგან მის აგებას კოკოლა შალიკაშვილს მიაწერენ) ეკლესის უწოდებდნენ.

ცნობილია, რომ შალიკაშვილების ფეოდალური გვარი საკმაოდ დაწინაურდა XVII საუკუნის სამხრეთ საქართველოში. მათი ერთ-ერთი წარმომადგენელი, ცნობილი პიროვნება კოკოლა შალიკაშვილი მნიშვნელოვან როლს თამაშობდა იმდროინდელი რეგიონის პოლიტიკურ ცხოვრებაში. სხვადასხვა დროს ათაბაგის კარზე მას მაღალი თანამდებობები ეკავა და საკუთარი ციხე-სიმაგრისა (რომელიც საისტორიო წყაროებში ურთის ციხის სახელითაა ცნობილი) და ეკლესის პატრონიც იყო. ვახუშტი ბაგრატიონი, როცა შაპთამაზის შემოსევებს აღწერს, აღნიშნავს: „მოგვიჩდა კოკოლა, ახჩის ქუაბნი წარგვიხუნა... ამის კოკოლას თვისი ძმისწული გურგაქ უკუდგა და მანუჩარს მიერთო ქაჯისციხითა და ფიცითა დიდითა. არამედ კუალად სტეხა ფიცი და უკუდგა მანუჩარისაგან. მოვიდა მანუჩარ

ზავისათვეს, მან არ ჰყო ზავი და ფოსო დაუწვიათ... ბ~ ოქტომბერს გურგარქ შემორიგდა და ველი მისცა. გავტრუნდით, კოკოლას კერძი ურთის ციხე წავართვით და დავარღვიეთ, სიმაგრე დავწვით და ეკლესია დავტოვეთ<sup>5</sup>.

აღნიშნული სალოცავი კოკოლას ეკლესის სახელით მ. თამარაშვილსაც აქვს დაფიქსირებული. მისი გადმოცემით, როდესაც შაპყულიანმა (ჭილიმუზაშვილმა) მოინდომა დაკეტილი ღვთისმშობლის კათოლიკური (პატრების) ეკლესის მითვისება, მას წინააღმდეგობა გაუწიეს ადგილობრივმა კათოლიკე მღვდელმსახურებმა. ამასთან დაკავშირებით იგი აღნიშნავს: „**შავგულიანმან** ამოგზავნა თავისი ღვდლებთაგანი პირველი პოლიციის კაცებითა, რათა წაიკითხონ ის ქვა სომხურად დაწერილი, რომელიც ატანია აღმოსავლეთის კერძოთ კედელში თქვენს გ~ა პატრებიანთ ეკლესისა ღვთისმშობლის სახელზედ აღშენებულსა, და ოსე ორ სამ გზის ამოსვლითა რათა დაამტკიცონ მათ, რომ ჩვენი არის და არა პატრებისა... ცდილობენ, რათა ამ სახით ხელში გაიტარონ ეკლესია და გააღონ; იმავე ეკლესისათვის ჰქმნა გამოძიება ამავე ალექსოვმან (ამ საქმესთან დაკავშირებით თბილისიდან საგან-გებოდ ჩამოსული გამომძიებელი — თ. ი.) კათოლიკთაგან, სომეხთაგან, და თათრებისგანაც და ამათ გაქი კარგად დაემტკიცებინათ ვ-ც ალიბეგის, და ალიბეგის შეილსა თქმითა, რომ ჩვენ მამაპაპით ვიცით, რომ ეგ ეკლესია პატრებისა ყოფილა ძველთაგანვე და ჩვენც ასე გვინახამს მუდამ პატრების ხელში, რომელთ კარგი მონასტერიც აქუნდათ საყდრის გვერდით ცხრაოდიანი და იქ ცხოვრობდნენ და კიდეც ექიმობდნენ. იმ საყდარს ეტყოდნენ პატრების საყდარს. ზეით **კოკოლას საყდარსა** და ციხეზე ახლოს ბაზრის პირზე მყოფ საყდარს ეტყოდნენ ფრანგების საყდარსა. ღელეში ერთი პატარა საყდარი არის იმას სომხების საყდარს ეტყვიან<sup>6</sup>. ამ ამონარიდიდან ნათლად ჩანს, რომ იმ დროისათვის კათოლიკეებს ორი (პატრებისა და ფრანგების) ეკლესია ჰქონდათ. მათგან პატრების ეკლესია, პატრების არყოფნის გამო, დაკეტილი ყოფილა. რაც შეეხება **ჯვართამალლების ეკლესიას**, მას მისი ამშენებლის, ცნობილი ფეოდალური გვარის წარმომადგენლის კოკოლა შალიკაშვილის სახელის მიხედვით, **კოკოლას**

<sup>5</sup> ვახუშტი ბატონიშვილი, აღწერა სამეფოსა საქართველოსა, თბ., 1973, გვ. 720.

<sup>6</sup> მ. თამარაშვილი, ისტორია კათოლიკობისა საქართველოში თბ., 1902, გვ. 541.

**ეკლესიად** მოიხსენიებენ, რომელიც არც კათოლიკეებს და, მით უმეტეს, სომხებს არ ეკუთვნოდა.

ჯვართამალლების ეკლესიაში კათოლიკური წირვა-ლოცვა, როგორც ჩანს, XIX საუკუნის 80-იანი წლებიდან უნდა დაწყებულიყო. ამის დასტურია მის სამრეკლოზე არსებული წარწერა: „1881 — აღაშენა ესე სამრეკლო ელისაბედ მურვანოვის ასული აზაუროვის ქვრივმა“.

რაბათის ჩრდილო-სამხრეთით ხანძრის გორად წოდებულ სი-მალლეზე მდებარე ციხე-სიმაგრის გალავან-ციტადელი შემორჩენილი იყო გვიანობამდე და მისი მცირეოდენი ნაშთები დღესაც შეიმჩნევა. XIX საუკუნის 80-იან წლებში ერმაკოვის მიერ გადალებულ ფოტოზე ნათლად ჩანს, რომ იმ დროისათვის ჯერ კიდევ შემორჩენილი იყო სამგოდოლიანი საკმაოდ დიდი ტერიტორიის მქონე გალავან-ციტადელი, რომლის შუაშიც საკმაოდ კარგად შენახული ჯვრთამალლების ეკლესია მოჩანს მოგვიანებით სამხრეთით მიშენებული სამრეკლოს გარეშე.

ჯვართამალლების ეკლესია XX საუკუნის 30-იან წლებში მოინახულა გიორგი ბოჭორიძემ და ვრცელი აღწერილობაც დაგვიტოვა. მისი მონაცემებით: „ახალციხის ქართული კათოლიკური ჯვრის ეკლესია განახლებულ-გადაკეთებული შენობაა. მისი აღმოსავლეთი ხანილი ძველია, დასავლეთი ახალი. მთელი ეკლესის ზომა 22,5 X 11,5 მ. ახალი ეკლესია ნაშენია სულ თლილი ქვისაგან. ძველი ეკლესია გუმბათიანი შენობაა. ნანილი თლილი, ნანილი ნატეხი ქვისაგან არის აშენებული. შიგნით იგი საურთხევლად არის ქცეული და მას დასავლეთით მიშენებული აქეს ახალი შენობა, ზომით (გარედან ძველი ეკლესია დღეს ჩანს) 7 X 9,25 მ. მის დასავლეთ ნანილს ფარაეს ახალი შენობა, ძველად უნდა ყოფილიყო 10,25 X 9,25 მ. ნაშენია ნანილი თლილი, ნანილი ნატეხი ქვისაგან. იგი დარღვეულია ყოველ მხარეს. გუმბათის ძირის ნახევარი ძველია, ნაგებია თლილი ქვისა და კირისაგან, ზევითა კი ახალი — ხისაა მრავალი სარკმლით, ძველი ნანილი გარედან გალესილი ყოფილა კირით, რომლის წარწერიანი და ჩუქურთმებიანი ქვებიც დაფარული ყოფილა, ახლა კირი ნანილობრივ მოცლილია, მოჩანს წარწერა და ჩუქურთმები. ჩრდილო-სამხრეთ მხარეს, მაღლა საქარეზე და მის ოდნავ ქვევით, არის ორი ქანდაკება ცხვრის თავის გამოსახულებით. აღმოსავლეთით კი ზევით ერთი შენახულა, მეორე მოტეხილია. ამ მეორე ქვის მარჯვნივ არის ქვა ჯვრების გამოსახულებით, მის ძირს ზედ მიდებით ოდნავ მარჯვნივ სამხრეთით არის ქვა 5-სტრიქონიანი სომხური

წარწერით. ქვედა სარკმელი ყოფილა, ახლა ამოღებულია. სარკმლის დასწვრივ ძირს გარდიგარდმო დადებული საფლავის ქვაა კაცის თავის გამოსახულებით ჩაღრმავებული. ამ ქვის მარჯვნივ, პატარა მანძილზე, ზევით ნაწილობრივ მოჩანს ქვაჯვრის (??) გამოსახულებით და სამხრეთით ერთი სტრიქონი წარწერა, ამავე კედელზე სამხრეთისაკენ მაღლა უდევს ქვა 5-სტრიქონიანი სომხური წარწერით; მის ძირს სამხრეთ კედელთან სხვა წარწერიანი ქვაა, დაფარული კირით, მოჩანს მარტო ერთი სტრიქონი.

გუმბათის გარდა, რომელიც ახლა სულ გადაკეთებულია, ძველ ეპლესის სარკმლები ჰქონია აღმოსავლეთით 1, სამხრეთით 1, ჩრდილოეთით 1, აღმოსავლეთის სარკმელი ახლა აშენებულია. ძველი ეკლესის სამხრეთით მოჩანს ძველი საძირკველი, ეკლესის სამხრეთის კარიბჭე. სამრეკლოს იატაკად დაფენილი მაღლი საფლავის ქვაა წარწერით. ასეთივე ქვები მოწყობილია ამავე მხარეს საძირკველთან ერთ პირად. წარწერებიდან ზოგი დაზიანებულია<sup>7</sup>. აქვე აქვს მას მოტანილი 54 საფლავის ქვების ქართულენოვანი წარწერები დ იმ სიძველეთა სია (ვერცხლის ბარიმი, ხატები, სასანთლე, საცეცხლური, ვერცხლის ჯვარი და სხვა), რომელგბზედაც ქართული წარწერებია<sup>8</sup>.

როგორც ჩანს, მოგვიანებით, უკვე სომხურ ტიპიკონზე გადასული ქართველი კათოლიკების მიერ XIX საუკუნის II ნახევრიდან ხდება ეკლესის რესტავრაცია-გადაკეთება. საინტერესო ის არის, რომ ეკლესის კედლების აღდგენაში ძირითადად ქართულწარწერიანი საფლავის ქვები უხვად აქვთ გამოყენებული (ჩვენ ასეთი 20-ზე მეტი ქვა დავაფიქსირეთ).

მართალია, 1767 წელს ახალციხიდან რომში გაგზავნილ ერთ-ერთ წერილში აღნიშნულია, ჯვართამალლების ეკლესიაში კათოლიკე მღვდელი ატარებს წირვა-ლოცვასო, მაგრამ არ უნდა დაგვავინყდეს, რომ კაპუცინების მოსვლამდე (1733 წელი) ყოვლად წმიდის კათოლიკური ეკლესია მუსლიმებმა გადაწვეს და მის აღდგენას, მრევლის დაკარგვის შიშით, აქ სხვა მოღვაწე პადრეებმა შეუშალეს ხელი<sup>9</sup>, რის გამოც კაპუცინებმა მართლმადიდებლისაგან დაცლილ წმ. ჯვრის ეკლესიაში დროებით დაიდეს ბინა. ამ პერიოდიდან ჩნდება ეკლესის ეზოში სომხურ ტიპიკონზე მდგარი ქართველ კათოლიკეთა ქართულწარწერიანი საფლავები. მართალია, წარწერები - ეპი-

<sup>7</sup>. ბოჭორიძე, მოგზაურობა სამცხე-ჯავახეთში, თბ., 1992, გვ. 166-167.

<sup>8</sup>. ბოჭორიძე, დასახ. ნაშრ. გვ. 177-178.

<sup>9</sup>. მ. თამარაშვილი, დასახ. ნაშრომი, გვ. 416-417.

ტაფიები ქართულ ენაზეა შესრულებული, მაგრამ სახელების უმრავლესობა სომხურადაა გადაკეთებული (ასე, მაგალითად: ტირაცუ აკოფაი, ბალდასარა, კეჩხეუანთ მათეოსას ცოლი, ერეცი ტერიონან, გრიგორ თოქმაჩი, პოლოსას ძე ტირაც, პოლოსას ძე, გასპარა, პეტროზას მეუღლე სარაი, არუთინ მურვანოვის ძე სტეფანე და ა. შ.) მოყვანილი მასალები იმაზე მეტყველებს, რომ **ჯვართამალლების ეკლესია**, როგორც მართლმადიდებლური სალოცავი, აგებული უნდა ყოფილიყო, თუ უფრო ადრე არა, შეა საუკუნეებში მაინც, ფეოდალური გვარის – შალიკაშვილების მიერ.

ჯვართამალლების ეკლესია XIX საუკუნის I ნახევარში კათოლიკური რომ არ იყო, ეს ნათლად ჩანს მისიონერების წერილებიდანაც. 1815 წელს უფროსი პატრი ფილიპე რომში გაგზავნილ წერილში აღნიშნავს: „ახალციხეში გვაქვს ერთი პატარა მონასტერი, რომელიც ევროპის წესისამებრ მოწყობილია. აქაური მისიონისათვის ძალიან საჭიროა, რადგან პატრები, უწინარეს თბილისში მოსვლისა, აქ დგებიან. გვაქვს აგრეთვე პატარა ეკლესია ყოვლად წმიდა მარიამისა”<sup>10</sup>. იგივე პატრი 1830 წელს გაგზავნილ წერილში კვლავ აფიქსირებს: „ახალციხეში გვაქვს ერთი პატარა ლვთისმშობლის ეკლესია. ეხლა კი ეს ეკლესია მეტად დაზიანებული, ერთ გვერდზე ჩამონგრეული და გაშიშვლებულია”<sup>11</sup>. ამ წერილებიდან ნათლად ჩანს, რომ იმ პერიოდისათვის პატრებს მხოლოდ ერთი ე. წ. **პატრების ეკლესია** ჰქონიათ.

ბ. არველაძის შენიშვნით, ახალციხის ჯვართამალლების ეკლესია, „სავარდოსა და იოანე ნათლისმცემლის ეკლესიებთან ერთად, თავიდანვე იყო ქართული... ამ ეკლესის ქტიტორების შესახებ ცნობა არ არის შემონახული, მაგრამ იგი ეკუთვნის ქართული არქიტექტურის კლასიკური პერიოდის ძეგლთა რიცხვს (X-XIII სს.). ახალციხის წმ. ჯვრის ეკლესია არაერთხელ იქნა იავარყოფილი მტრისაგან. მაგრამ მრევლი არასოდეს მოჰკლებია, რადგან სწრაფად აღუდგენიათ”<sup>12</sup>. მისი განახლება მომხდარა 1660 წელს, „განსაკუთრებულათ 1750 წელს. ამ ეკლესიის მრევლმა რიგიანი ველარა მოისაზრა და ძველის აღებულს ეკალესიას ძველადვე მიმატებული მშვენიერი ჩუქურთმიანი ქვებით აღშენებული ეკალესია დაქციეს და მის მაგიერ უბრალო სადა რბილი ქვის ეკალესია აღაგეს, საკურთხეველი და ამის ძველი

<sup>10</sup> მ. თამარაშვილი, დასახ. ნაშრ. გვ. 503.

<sup>11</sup> მ. თამარაშვილი, დასახ ნაშრ. გვ. 516.

<sup>12</sup> ბ. არველაძე, როცა უდაო სადაო ხდება, თბ., 2005, გვ. 173.

გუმბათი კი ძველის ეკულესის არის, რაც მცირედ გადააკეთეს“ - აღნიშნავდა ზ. ჭიჭინაძე<sup>13</sup>.

სომხურმა ეკულესიამ თავისი ქმედებით იმდენი მოახერხა, რომ „XIX საუკუნის II ნახევრიდან, მეფის რუსეთმა ევროპიდან საქართველოში კათოლიკე მისიონერების შემოსვლა აკრძალა და აქ მცხოვრებ ქართველ კათოლიკებს წირვა-ლოცვა სომხურ რიტუე დაუწესა. თამამად შეიძლება ითქვას, რომ ეს იყო არა ანტიკათოლიკური, არამედ ანტიქართული - ერის სულიერი გახლეჩვის მზაკვრული პოლიტიკა“<sup>14</sup>. იმდროინდელი რუსეთის ხელისუფლების მიერ გატარებულმა ამგვარმა შორსგამიზნულმა პოლიტიკამ სომეს მღვდელმსახურებს საშუალება მისცა, ფართოდ გაეშალათ თავიანთი საქმიანობა. კათოლიკობის ნილაბს ამოფარებული სასულიერო პირები, ამ სარწმუნოების გამოყენებით, ქართველ კათოლიკებში მშობლიური ენის, ეროვნული თვითმყოფადობის, ეროვნული თვითშეგნების საბოლოოდ ჩაკვლასა და ძირძველი ქართული ეკლესია-მონასტრების მიტაცება-დაპატრიონებას ცდილობენ<sup>15</sup>.

ჯვართამალლების ეკლესია სომხურ ტიპიკონზე ნაკურთხი ქართველი კათოლიკე მღვდლის პავლე შაჰპულიანის (ჭილიმუზაშვილის) ძალისხმევით, XIX საუკუნის II ნახევრიდან სომხურ ტიპიკონზე მდგარ ქართველ კათოლიკეთა ხელში გადადის და მათ წირვა-ლოცვა უკვე სომხური ტიპიკონით უტარდებოდათ. მიუხედავად ამისა, მრევლი რომ ქართულებინოვანი იყო, ამაზე მეტყველებს 1881 წელს მიშენებული სამრეკლოს ზემოთ მოტანილი წარწერა. ეს ეკლესია სომხურ კათოლიკური ან სომხურ-მონოფიზიტური რომ ყოფილიყო, მაშინ სამრეკლოს ამშენებლის ვინაობა და მისი აშენების თარიღი არა ქართულ, არამედ სომხურ ენაზე იქნებოდა გაკეთებული.

ჯვართამალლების ეკლესია და მის გარშემო არსებული სასაფლაო, თავისი ქართული ეპიტაფიებით, როგორც კულტურის ძეგლი, ავადთუ კარგად მეტ-ნაკლებად დაცული იყო საბჭოთა პერიოდშიც კი (შემოვლებული ღობე, შედგენილი პასპორტი). 1980 წელს შედგენილ პასპორტში (№46) აღნიშნულია: „ეკლესია დიდი ზომისაა. გადა-

<sup>13</sup> ზ. ჭიჭინაძე კათოლიკეთა ეკლესიები საქართველოში, თბ., 1902, გვ. 16.

<sup>14</sup> თ. იველაშვილი, ბ. არველაძე, მარდის იოანე ნათლისმცემლის სახელბბის ეკლესია, თბ., 2009,

<sup>15</sup> თ. იველაშვილი, კათოლიკობა საქართველოში, თბ., 2009.

ხურვა და კამარა ჩაქცეულია, კედლების ზეთავები — მონგრეული. სამხრეთის ფასადის შუაწელში მიდგმულია სამრეკლო.

შიდა სივრცე სწორკუთხა გეგმისაა, დარბაზი საკმაოდ განიერია. აღმოსავლეთის ნაწილს თაღები სამ ტოლ ნაწილად ყოფს, რომელთავან გვერდითები პოსტფორმუმებია, შუა საკურთხეველში გასასვლელი. ეს უკანასკნელი მოდგმულია გარედან ფასადზე და ოდნავ ჩამოუვარდება სიგანით მთელს ფასადს. საკურთხეველი თითქმის მთლიანად დანგრეულია. დარბაზი ძალზე განათებული იყო. ეს ხერხდებოდა ხშირად განლაგებული და განიერი სარკმლების წყალობით.

სამხრეთის და ჩრდილოეთის კედლებს თაღები მოუყვება. ინტერიერის კედლები უხეშად დამუშავებული ქვებითაა ნაშენი და შელესილია.

ფასადები მეტ-ნაკლებად დაზიანებულია. დასავლეთის ფასადს მთლიანად შენარჩუნებული აქვს კარგად დამუშავებული ქვის პერანგი (გარდა ფრონტონის კედლებისა). აქ დეკორატიულ ელემენტებად გვევლინებიან გაერთიანებული სათაურები, რომლებიც რიტ-მულად უვლიან თავს ორ სარკმლს და კარებს, აგრეთვე - პროფილირებული კარნიზი, რომელიც გამოყოფს ფრონტონს და კედელს ერთმანეთისაგან.

სამხრეთის ფასადს ცენტრში მიდგმული აქვს ორსართულიანი სამრეკლო. პირველი საართული წარმოადგენს ოთხ სვეტზე დაყრდნობილ კარიბჭეს, მეორე — რვასვეტიან, კაპიტელებით შემკულ სარკმელს, რომელსაც რვაფერდა ჩარდახოვანი ლორფინებით გადასურული სახურავი აქვს. სამრეკლოზე ჯვრია აღმართული. პერანგი აქაც შენარჩუნებულია. ეკლესიის ჩრდილოეთის ფასადი შედარებით დაზიანებულია: ცენტრალური ნაწილი მთლიანად გაძარცულია პერანგისაგან, სარკმლის ლიობები განგრეულია.

აღმოსავლეთის ფასადი, ფაქტობრივად, არ არსებობს. მასზე მიდგმული საკურთხევლის ნანგრევები გაძარცულია პერანგისაგან.

ეკლესიის მიჯრით, დასავლეთით პირამიდალურ საფეხურებად აღმართული სასულიერო პირის მდიდრულად შემკული აკლდამაა მოთავსებული. აქვე გამოჩენილი ქართველი მოღვაწის მღვდელ ივანე გვარამაძის („ვინმე მესხის“) საფლავის ქვაა<sup>16</sup>.

XXI საუკუნის დასაწყისში ვატიკანიდან შემოგზავნილმა პადრე-ემისრებმა, არა ყოფილი „პადრეებისა“ და „ფრანგების“ კათოლიკური ეკლესიების, არამედ ადრე აშენებული მართლმადიდებლური ჯვართ-

<sup>16</sup> საქართველოს ისტორიის, კულტურისა და პუნქტის ძეგლები, პასპ. №48.

ამაღლების ეკლესიის მიპატრონება სცადეს და არაკანონიერი გზით კიდევ მიაღწიეს მიზანს. პირველ რიგში უნდა აღინიშნოს ის, რომ 2009 წლამდე ეკლესიას და მის გარშემო არსებულ სასაფლაოს ისტორიული ძეგლის სტატუსი ჰქონდა მინიჭებული და შეძლებისდაგვარად დაცულიც იყო. შემოსულმა კათოლიკე პადრიელმა ამ ტაძრის საბოლოო მითვისება გადაწყვიტეს. მათ ამ საქმეში აქტიურ დახმარებას უნდა ქალაქის იმდროინდელი გამგებლი დავით ალთუნაშვილი. მისი უშუალო მონაწილეობითა და დახმარებით გარკვეულმა პირებმა (ვინ, უშუალოდ, მაშინდელ გამგებელს უნდა ჰყითხონ) ეკლესიას, მის გარშემო არსებულ ძველ სასაფლაოს ისტორიული ძეგლის სტატუსი მოუქსნეს და მხოლოდ ივანე გვარამაძის სასაფლაო დატოვეს, როგორც ისტორიული ძეგლი. ამით ხელ-ფეხი გაუხსნეს შემოსულ ემისრებს და მათ 2010 წლის გაზაფხულზე დაიწყეს აღნიშნული ეკლესის გადაკეთებ-გადმოკეთება. მის გარშემო არსებული სასაფლაო, როგორც ისტორიული ძეგლი, მთლიანად გაანადგურეს (ქართულ წარჩერიან საფლავის ქვებს, ცხვრისა და აკვინის ქანდაკებებს ზოგს მიწა გადააყარეს, ზოგი სად წაიღეს ღმერთმა უწყის, ზოგი „შემოემტვრათ“ და ა. შ.) და მასზე სამონასტრო კომპლექსის მშენებლობა დაიწყეს.

საინტერესოა, მათ, თუ მართლა ქრისტიანები არიან და ქრისტიანული მრწამსით მოქმედებენ, რატომ გაანადგურეს სამსაუკუნოვანი ქართულნარწერიანი საფლავის ქვები, რომელთა ისტორიული ღირებულება კომუნისტებმაც კი აღიარეს და ხელი არ ახლეს. ბუნებრივია, ჩნდება კითხვა – რა მიზანი ამოძრავებთ მათ? ზემოთ მოყვანილი მასალებიდან გამომდინარე, ამ საუკუნის დასაწყისში შემოსულ პირებს არა ჯვართამაღლების ეკლესიის, არამედ პატრებისა და ფრანგების ეკლესიებად წოდებულ წმ. მარიამისა და ოთანე ნათლისმცემლის კათოლიკური სალოცავების აღდგენა-განახლებაზე უნდა ეზრუნათ. მაგრამ მათ ეს შეგნებულად არ გააკეთეს, რადგან ეს ეკლესიები გვიან XVIII საუკუნეშია აგებული, ჯვართამაღლებისა კი – XII-XIV საუკუნეებში, ამიტომ მას საქართველოში კათოლიკობის „დაძვლების“ მიზნით მიეპატრონენ.

საქართველოს სახელმწიფო დამოუკიდებლობის აღდგენის შემდეგ ისტორიული ძეგლებისა და კულტურული მემკვიდრეობის დაცვის მიზნით კონსტიტუციაში საგანგებო მუხლია შეტანილი: „საქართველოს ყველა მოქალაქე ვალდებულია, ზრუნავდეს კულტურული

მემკვიდრეობის დაცვა-შენარჩუნებაზე. კულტურულ მემკვიდრეობას სახელმწიფო იცავს კანონით“ (მუხ. 34.2).<sup>17</sup>

საქართველოს სახელმწიფოსა და საქართველოს სამოციქულო ავტოკეფალიურ მართლმადიდებულ ეკლესიას შორის კონსტიტუციური შეთანხმების საფუძველზე:

1. „სახელმწიფო ეკლესიის საკუთრებად ცნობს საქართველოს მთელს ტერიტორიაზე არსებულ მართლმადიდებულ ტაძრებს, მონასტრებს (მოქმედს და არამოქმედს), მათ ნანგრევებს, აგრეთვე მიწის ნაკვეთებს, რომელზეც ისინია განლაგებული.

2. ზემოაღნიშნულ ნაგებობათა დაცვის ზომები, მათი მოვლაპატრონობისა და სარგებლობის წესები განისაზღვრება შესაბამისი სახელმწიფო სამსახურის მიერ მოქმედი კანონმდებლობით და ეკლესიასთან შეთანხმებით.

„კულტურული მემკვიდრეობის დაცვის შესახებ“ მოქმედ კანონში მითითებულია: „ადგილობრივი თვითმმართველობის და მმართველობის ორგანოები განსაზღვრულ უფლებამოსილებათა ფარგლებში ახორციელებენ კულტურული მემკვიდრეობის დაცვას“ (მხ. 12). მათ უფლება აქვთ, არ დაუშვან „დეპარტამენტის წერილობითი თანხმობის გარეშე უძრავი ძეგლის, მისი ნაწილებისა და ფრაგმენტების გადაკეთება, გადაადგილება და დაშლა, ხოლო უძრავი ძეგლის დამცავ ზოლში - მიწის სამუშაოების ჩატარება, მიცვალებულთა დაკრძალვა, მრავალწლიანი მცენარეების დარგვა და მოსპობა“ (მუხლი 25).

„1. აკრძალულია უძრავი ძეგლის ან მისი ნაწილის გადაკეთება, გადაადგილება ან დაშლა.

2. უძრავი ძეგლის ან მისი ნაწილის გადაკეთება, გადაადგილება ან დაშლა დასაშვებია იმ შემთხვევაში, თუ ამას მოითხოვს:

ა) უძრავი ძეგლის გადარჩენა;

ბ) გადაუდებელი აუცილებელი მდგომარეობა;

3. უძრავი ძეგლის დაკარგული არქიტექტურული ფორმებისა და ელემენტების აღდგენა შესაძლებელია მხოლოდ აღსადგენი არქიტექტურული ფორმებისა და ელემენტების სრული იდენტიფიკაციისა და ზუსტ მეცნიერულ მონაცემებზე დაფუძნებული საპროექტო დოკუმენტაციის ბაზაზე“.<sup>18</sup>

<sup>17</sup> საქართველოს კონსტიტუცია, თბ. 1995

<sup>18</sup> საქართველოს საკანონმდებლო მაცნე, №1, თბ. 2006

საქართველოს სისხლის სამართლის კანონით „ისტორიის, კულტურის ან ბუნების ძეგლთა ანდა ისტორიული ან კულტურული ფასეულობის მქონე საგნის ან დოკუმენტის განზრას დაზიანება ან განადგურება ისჯება ჯარიმით ან თავისუფლების აღკვეთით ვადით ოთხ წლამდე“ (მუხ. 257). მაგრამ, სამწუხაროდ, ეს კანონი ჩვენს ქვეყანაში დღეს, ფაქტობრივად, არ მოქმედებს.



ჯვართამაღლების ეკლესია ურთის ციხის გალავნის ნარჩენებს შიგნით XIX საუკუნის პირველ ნახევარში (ერმაკოვის ფოტომასალა).



25/08/2010

ჯვართამაღლების ეკლესის ნგრევა 2010 წელს.



გადათხრილი და განადგურებული საფლავები.



ასე გამოიყურება რესტავრირებული ჯვართამაღლების ეკლესია დღეს, სადაც დედათა მინასტერია გახსნილი და იტალიიდან ჩამოსული ორი და ერთი ქართველი მონაზონი ცხოვრობს.



## პითევები ქალაქის მერს

ქალაქ ახალციხის მერი გიორგი კოპაძე დაიბადა 1960 წლის 28 თებერვალს ფსიქოლოგისა და მედიცინის მუშაკის ოჯახში. ახალციხის №1 საშუალო სკოლის დამთავრების შემდეგ სწავლა ახალციხის სასოფლო-სამეურნეო ტექნიკუმში აგრონომის ფაკულტეტზე გააგრძელა. 1981-1985 წლებში იყო სანერგე მეურნეობის აგრონომი. 1991 წელს გიორგი კოპაძე აირჩიეს ქალაქ ახალციხის საკრებულოს გამგეობის თავმჯდომარედ. 1995 წელს სწავლა გააგრძელა ივანე ჯავახიშვილის სახელობის თსუ-ს ახალციხის ფილიალში სამართალ-ცოდნების ფაკულტეტზე. 1996-1999 წლებში იყო ახალციხის სატელევიზიო კომპანია „მე-9“ არხის დირექტორი. 2014 წელს პირდაპირი წესით არჩეულ იქნა ქალაქ ახალციხის მუნიციპალიტეტის მერად. ჰყავს მეულელე და ერთი შვილი.

ქალაქის მერს რამდენიმე კითხვით მივმართეთ.

- ბატონო გიორგი, „არავის“ გასულ ნომერში არტაანის მერს ფარუქ ქოქსიოს ვკითხეთ, რას აკეთებდა ქალაქის მერია სტუდენტთა და-სახმარებლად. ბატონმა ფარუქმა გვითხრა, რომ მერია წელიწადში ერთჯერადად ქალაქ არტაანში მცხოვრებ 150 სტუდენტს ეხმარება. ამ მხრივ ჩვენი ქალაქის მერიის გამოცდილება როგორია?

- ჩვენ გვქონდა და გვაქვს სტიპენდიები სტუდენტთათვის. ეს ტრადიცია გაგრძელდება. ეს არის ის დახმარება, რომლითაც გვინდა წავახალისოთ ის სტუდენტები, რომლებიც მაღალი აკადემიური

მოსწრებით გამოირჩევიან. გასულმა წლებმა გვიჩვენა, რომ გარკვეულ სფეროებში კვალიფიციური კადრების დეფიციტია. არა მაქვს საუბარი ფილოლოგებზე, პედაგოგებზე. ჩვენ არ გვყავს სპეციალისტები ისეთ დარგებში, როგორიც არის, მაგალითად, ინფრასტრუქტურა. გვიჭირს ინჟინერების მხრივ, ასევე მენეჯმენტის კუთხით. ამიტომ, ვცდილობთ, ნავახალისოთ სტუდენტები. მე და უნივერსიტეტის რექტორს, ბატონ მერაბს გვქონია საუბარი ამ თემაზე. ის დარგები უნდა განვითარდეს, რომელიც ჩვენ და, ზოგადად, სახელმწიფოს სჭირდება. ვიცი, რომ უნივერსიტეტი ამ მიმართულებით წინ მიდის და ბევრ სასიკეთო ნაპიჯებს დგამს. მერიის მხრიდან სტიპენდიების გაცემა გაგრძელდება.

– სტუდენტთა საერთო საცხოვრებლის საკითხზე თქვენთან, თქვენს წინამორბედებთან, მხარის გუბერნატორთან არაერთხელ გვისაუბრია. აღნიშნულ საკითხთან დაკავშირებით, თითქოს არის მზაობა, მაგრამ სიტუაცია უცვლელია. საუბარია რუსთაველის ქუჩა №124-ში მდებარე მესაზღვრეთა შტაბის ტერიტორიაზე არსებულ შენობა-ნაგებობებზე. კონკრეტულად, უნივერსიტეტი საერთო საცხოვრებლის რეაბილიტაციისათვის მიზანშენონილად მიიჩნევს ყოფილი ყაზარმისა და სასადილოს შენობებს.

– ამ საკითხზე 2014 წლიდან ინტენსიურად ვმუშაობთ. ვერ ვიტყვი, რომ ამაზე ჩემთვის ვინმეს ეთქვას პირდაპირი უარი, მაგრამ მოდის საპუთები უარით. პირად საუბრებში ნებისმიერ დონეზე არის მზაობა. საკითხი ყველა ინსტანციაში გვაქვს დაყენებული, ვისაც ეს ეხება. მხარში გვიდგას მხარის გუბერნატორი ბატონი აკაკი მაჭუტაძე. მისი და ჩემი აზრი აბსოლუტურად ემთხვევა ერთმანეთს. გვინდა, რომ ამ ტერიტორიაზე სერიოზული საქმე გაკეთდეს. არა მხოლოდ სტუდენტთა საერთო საცხოვრებლის თვალსაზრისით, არამედ გვინდა, რომ ამ ადგილას გაკეთდეს კულტურის სასახლე, სხვადასხვა დაწესებულებებისთვის შენობა-ნაგებობები. გვინდა, რომ იქ ცენტრალურ მოედანზე ეკლესია აშენდეს. ბევრი რამ არის ჩვენ მიერ მოფიქრებული. ასევე, იქ არის ადგილები, სადაც შეიძლება გაშენდეს საცხოვრებელი კორპუსები. ასევე განხორციელდეს ინფრასტრუქტურული სხვადასხვა პროექტი.

– აღნიშნული შენობა-ნაგებობები არის ეკონომიკის სამინისტროს ბალანსზე. იყო საუბარი ამ შენობა-ნაგებობების მერიის ბალანსზე

## გადმოცემასთან დაკავშირებით. როდესაც უარი მოგდით, მიზეზად რა სახელდება?

– მიზეზი არასოდეს სახელდება. ჩვენ „არა“ სხვა საკითხებზეც მიგვიღია, განმარტების გარეშე. ვიტყვი იმას, რომ ეს შენობები ყოველ წელს უფრო და უფრო ნადგურდება. კარგავს პირვანდელ სახეს და მათზე უფრო მეტი უნდა დაიხარჯოს, ვიდრე, ვთქვათ, შარშან დაქსარჯავდით. მომავალ წელს უფრო მეტი იქნება დასახარჯა, ვიდრე წელს უნდა დაგვეხარჯა. ეს პრობლემაა და ბოლოს ცუდ შედეგს მივიღებთ, შენობები დაინგრევა.

– სამცხე-ჯავახეთის სახელმწიფო უნივერსიტეტის პროფე-სორის, ბატონი ვალერი სილოგავას სახელი მიენიჭა რუსთაველის ქუჩიდან ზარზმელის ქუჩისკენ მიმავალ ქუჩას (აღმართის, (ახალციხის მუნიცი-პალიტეტის საკრებულოს 2014 წლის 09 ივნისის №23 განკარგულება). თუმცა, ამის შესახებ მანიშნებელი ნიშანი არსად არ არის განთავსე-ბული. რას გვეტყვით ამასთან დაკავშირებით?

– საერთოდ ეს პრობლემა მთელ ქალაქში არსებობს. მთელ ქა-ლაქშია მანიშნებელი ნიშნები და სახლების ნუმერაცია ხელახლა გასაკეთებელი. როგორც ვიცი, რამდენიმე ქუჩა განახლდა, მაგრამ ეს საკითხი მოსაგვარებელია. ჩვენ ვფიქრობთ, რომ ამ პრობლემას მივხედოთ.

– კონკრეტულად ზემოთხსენებულ საკითხთან დაკავშირებით რას გვეტყვით?

– გეტყვით, რომ ეს მიმანიშნებელი ნიშანი, სულ მალე იქნება.

– ასევე იყო საუბარი აბასთუმნის ასტროფიზიკური ობსერვატო-რის დამარსებლის, ბატონი ევგენი ხარაძის სახელი მინიჭებოდა ქა-ლაქ ახალციხეში 9 აპრილის ქუჩაზე მდებარე ერთ-ერთ მშენებარე სკვერს. თქვენი წინამორბედის პასუხი იყო, რომ ამ საკითხთან დაკავ-შირებით დასამთავრებელი იყო გარკვეული ტექნიკური დოკუმენტა-ცია, ამიტომ, საკრებულომ მაშინ ვერ მიიღო შესაბამისი გადაწყვეტი-ლება. როგორია თქვენი დამოკიდებულება ამ საკითხის მიმართ?

– მინდა გითხრათ, რომ ეს ცოტა ხანგრძლივი პროცესია. ადრე, მსგავსი საკითხები მარტივად წყდებოდა. პირდაპირ შეეძლო მაშინ-დელ ხელმძღვანელობას, რომ მიენიჭებინა ამა თუ იმ ობიექტისთვის გამოჩენილი და ღვაწლმოსილი პიროვნების სახელი. ახლა ამ სა-

კითხს სჭირდება ბევრი დასკვნა. ეს ცოტა რთული საკითხია, ცოტა დროში გაიწელება ეს პროცესი.

– ანუ, გვაძლევთ დაპირებას, რომ ზემოთხსენებულ სკვერს მიენიჭება ბატონი ევგენი ხარაძის სახელი?

– დიახ. არ არის პრობლემა. ღირსეული ადამიანის სახელი, რატომ არ უნდა მივანიჭოთ ერთ-ერთ სკვერს. დიდი სიამოვნებით.

– „არავის“ მეხუთე ნომერში დაიბეჭდა ფოტოები, რომლებიც სხვა-დასხვა ობიექტზე არაქართულ წარწერებს ასახავს. ეს ეწინააღმდეგება საქართველოს კონსტიტუციით გათვალისწინებულ მოთხოვას, სახელმწიფო ენის დაცვასთან დაკავშირებით. როგორია მერიის როლი მსგავსი პრობლემების მოგვარების საკითხში?

– ჩვენი ფუნქცია და ჩვენი ზედამხედველობის სამსახური ამ ობიექტებს დააჯარიმებს, ვინაიდან ეს არის კანონის დარღვევა. ამ წუთში აღნიშნული სამსახური ნაგვის დაყრის კუთხით მუშაობს და ამ საკითხსაც აუცილებლად მიეხედება და რეაგირება იქნება.

– 2014 წელს მუნიციპალიტეტებს ქალაქი ახალციხე გამოეყო და შეიქმნა ქალაქ ახალციხის მერია. ბატონო გიორგი, როგორ ფიქრობთ, გაამართლა აღნიშნულმა მოდელმა?

– მერიები საქართველოს 12 ქალაქშია შექმნილი. ვფიქრობ, რომ ძალიან კარგი შედეგი მივიღეთ. რომ ავილოთ ბიუჯეტის თვალსაზრისით, მთლიანად ახალციხის რაიონის ბიუჯეტი იყო დაახლოებით 11 მილიონი, დღეს ქალაქ ახალციხეს აქვს 14- მილიონიანი და მუნიციპალიტეტს აქვს ცალკე 12-მილიონიანი ბიუჯეტი. ე.ი. 26 მილიონამდე გაიზარდა ბიუჯეტი. მეორე, პატრონი გაუჩნდა ყველა მხარეს. დასამალი არ არის, რომ მაშინ, იმ 12 მილიონიდან, 80 პროცენტი იხარჯებოდა ქალაქზე. სოფლებისკენ მცირედი მიემართებოდა. ახლა, კი ეს 12 მილიონი, თავიდან ბოლომდე მიმართულია სოფლების კეთილდღეობისაკენ. დაიგო გზები, მიეხედა ინფრასტრუქტურას და, რაც მთავარია, პატრონი გაუჩნდა ყველას თავის ადგილზე. ახალციხის ძალიან ბევრი ქუჩა გაკეთდა. დარწმუნებული ვარ, რომ სხვა შემთხვევაში ეს ვერ გაკეთდებოდა. სხვადასხვა საჭიროებას, რომლებიც მნიშვნელოვანია, უფრო ვიწრო რაკურსით და გამდიდებელი მინით ვაკვირდებით. ეს ნიშნავს იმას, რომ კარგად ჩანს ყველა ის პრობემა, რომელიც ჩვენს ქალაქთან დაკავშირები-

თაა. რაც მთავარია, დეცენტრალიზაცია, რომელიც აუცილებელია და ეს მოთხოვნა არის როგორც ევროკავშირის, ასევე ეს არის ცხოვრებისეული მოთხოვნა, დეცენტრალიზაცია აუცილებლად უნდა მოხდეს და ადგილობრივი ხელისუფლება უნდა გაძლიერდეს, ვინაიდან ადგილობრივ პრობლემებს უფრო მიეხედოს, რა თქმა უნდა, ცენტრალურ ხელისუფლებასთან ერთად.

### **– რას უსურვებდით უურნალ „არავს“?**

– ვიცი, რომ უურნალს საკმაოდ ბევრი მკითხველი ჰყავს. „არავს“ უურნალებ მეტ წარმატებებს. ყურადღებით ვადევნებ თვალ-ყურს უურნალის ყოველ ნომერს. „არავის“ მეხუთე ნომერი, რომელშიც ის ფოტოებია განთავსებული, რომელზეც ვისაუბროთ, ვერ ვნახე, რადგან ამერიკაში ვიყავი და ვეღარ გადავავლე თვალი. ამ შემთხვევაში, ჩვენ ამ საკითხს აქამდე მივხედავდით. ამ ადამინებს მოუწევთ ჯარიმების გადახდა იმიტომ, რომ ეს არასწორია. ჩვენ ენას უნდა მიეხედოს. საქართველოში სახელმწიფო ენა არის ქართული ენა და ეს დაცულია კანონით. კანონი კი ყველამ უნდა შესრულოს.

### **– ქალაქის მერის თუ აქვს ხარჯები, მაგალითად რომ დააფინანსოს „არავის“ გამოცემა?**

– ეს როთულია, რადგან საბიუჯეტო კოდექსი გაწერილია თავიდან ბოლომდე. იქ არის მუხლები, რომლითაც ასეთ რაღაცებს ვერ ვაფინანსებთ. ჩვენ შეგვიძლია, თუ არ მეშლება, ერთჯერადი დახმარება გამოვყოთ. სხვა მხრივ, რა თქმა უნდა, პრესის განვითარებას ხელი უნდა შევუწყოთ.

**– დიდი მადლობა, ბატონო გიორგი, საინტერესო საუბრისთვის.**

**ინტერვიუერი – ლია ზაზაშვილი**

# ტრიტობა

## ანდრო ბედუკაძე



### დედა და „ქართვლის დედა“

II წერილი\*

იღია ჭავჭავაძის „უწინს“ არა აქვს კონკრეტული დროის მნიშვნელობა, ეს „უწინ“ ზოგადი წარსულია. ბარათაშვილთან კი აღფრთოვანების სიტყვები კონკრეტულ ეპოქას მოიაზრებს. „პოი, დედანო, მარად ნეტარნო“ - ეს სტრიქონები მოსდევს სოფიო ლიონიძის ნათქვამს:

„რა ხელს-ჰყრის პატივს ნაზი ბულბული,  
გალიაშია დატყვევებული?

.....  
ესრეთ რას არგებს კაცსაც დიდება,  
თუ მოაკლდება თავისუფლება?“

აქ ეპოქა დაზუსტებულია, ეს ერეკლეს ხანაა. იქაური მანდილო-სანი მსჯელობს ამგვარად, დღეს კი:

„რა იქნებოდა, რომ ჩვენთა დედათ  
სულიცა თქვენი გამოჰყოლოდათ?  
ვინდა ჰყავს გულის შემატევარი  
მამულს ასული ახლა თქვენგვარი?

---

\* პირველი წერილი დაიბეჭდა „არავი“ №5-ში, გვ.39-46.

## **ქარმან ჩრდილოსმან ყველაზედ პირველ გარდაუცვალა მათ გული ცხოველ!**

როგორც ვხედავთ, ბარათაშვილს მიაჩნია, რომ გადაგვარების მიზეზი „ჩრდილოეთის ქარია“ და თავისუფლების დაკარგვას შეგუებული ადამიანი. ვის შეუძლია ქვეყანაზე იფიქროს, იბრძოლოს მისი კეთილდღეობისათვის და თუ საჭირო შეიქმნება, თავიც გაზიროს - ღირსებით სავსე ადამიანს. ასეთი ადამიანი კი ღირსეულმა ქალმა, ღირსეულმა დედამ უნდა გაზარდოს. ბარათაშვილმა იცის, რომ ამგვარი ქალები მის დროს აღარ არიან, სანატრელი გამხდარან, დედაც ხომ დედამ უნდა გაზარდოს.

როგორც დავინახეთ, ბარათაშვილმა იცის მიზეზისაგან გამოწვეული შედეგი, მაგრამ არ იცის, რა ეშველება ყოველივე ამას. ილიამ, როგორც ბარათაშვილის „მოკანანახემ“, დანერა „ქართვლის დედას“. ამ ლექსში ყველას მოგვიწოდა, რომ „მოვიყლათ წარსულ დროებზე დარდი“. გასაგებია, ვიცით, რომ დედა „უნინ მამულსა უზრდიდა შვილსა“. დრო შეიცვალა და აუცილებელია:

**„ჩვენ უნდა ვსდიოთ ეხლა სხვა ვარსკვლავს!“**

ეს სხვა ვარსკვლავი აღარ გულისხმობს ხმლის ქნევას, ასპარეზი მკლავის ნაცვლად შრომასა და განათლებას დასთმობია. ისევ მიმართვა დედისადმი: „საზრდოდ ხმარობდე ქრისტესა მცნებას: ძმობას, ერთობას, თავისუფლებას“, რათა მან შეძლოს „ბედთანა ბრძოლა“. ეს ყველაფერი კი საჭიროა იმისათვის, „რომ წინ გაუძლვეს ჭეშმარიტება, უკან ჰრეს კვალი განათლებული“. ქრისტეს მცნებით ნასაზრდოებ კაცს რამ შეიძლება უწინამძღვროს, თუ არა ჭეშმარიტებამ, ოლონდ ილია აქ თავსატეხს გვიტოვებს - რა იგულისხმება ჭეშმარიტებაში? ლექსის პათოსიდან გამომდინარე, ალბათ, მამულისადმი პატიოსანი მსახურება, საერთოდ სიკეთისათვის პატიოსანი გარჯა.

ილია ერთსა და იმავე საკითხს, თემას ხშირად უბრუნდება ლექსით იქნება ეს, პროზად თუ წერილების სახით. ასეა ამ შემთხვევაშიც. ლექსი „იაგნანაც“ ამის დასტურია. „დედის ნანასთან, ქვითინი მთისა“ მას (სამშობლოს) უმზადებდა მომავალ გმირსა“ - ეს სტრიქონები სხვა ნანარმოებიდან „ქართვლის დედადანაა“ ამოღებული. დედის ნანაა სათო, - ამბობს ილია და უკვე ამ ნანარმოებში განმარტავს, თუ როგორი უნდა იყოს ეს ნანა.

ილიას ეს ლექსი დაწერილია 1959 წლის 13 აპრილს პეტერბურგში. ლექსის მერვე სტრიქონშივე ავტორი ახსენებს „ქართველთადმი

ღვთიურ ვალს“... და იმასაც შენიშნავს, რომ შენ ჯერ პატარა ხარ, ამ ვალის გაცნობიერება არ შეგიძლია და „მაშ, რაღამ შეგაშინა?“, შემდეგ, როცა გაიზრდებიო, - დედა მიმართავს შვილს, - „ყრმობის სიზმრები ბრძოლაზედ გაგეცვლება, არ შემიღრკე მაშინა“. ეს „არ შემიღრკე მაშინა“ სამგზის მეორდება. ამ დაუინებული „არ შემიღრკეს“ შემდეგ დედა ამბობს, რომ შვილი ქვეყნისათვის არ დაენანება, მე ისე არ წავხდებიო. შენც მამულისათვის სიკვდილი რომ დაგეზაროს, „შენ ისე არ წახდები“, კაცი კაცად თუ მოკვდები, „ნუგეშს ვიცემ მაშინა“, მამულისათვის სიკვდილით მას თუ იხსნი, „გაიხარებ მაშინა“, „მამულის მსხვერპლო“.

ჩვენ აღვნიშნეთ, რომ ლექსი 1859 წელსაა დაწერილი და ქვეყნისათვის თავმერივის თემა, ბრძოლის თემა, ძლიერი მკლავის თემაა წინა პლანზე წამოწეული. ოლონდ „სურამის ციხისგან“ განსხვავებით ეს ძალადობის შედეგი კი არ უნდა იყოს, არამედ ნებაყოფლობითი აქტი, რომელსაც ილიასეული ნანათი აღზრდილი ადამიანი განახორციელებს.

როგორც ვნახეთ, „ნანა“ უნდა იყოს მსხვერპლად შესაწირი შვილის აღმზრდელი. ისეთი ადამიანისა, რომელიც თვითონ შეიძლება შეეწიროს ქვეყანას და ამისათვის სხვების ძალადატანება არ დასჭირდება. ასეთი რამ მხოლოდ ღირსებით სავსე პიროვნებას შეუძლია. როგორია „ოთარაანთ ქვრივის“ მთავარი გმირის, ოთარაანთ ქვრივის მიერ გაზრდილი შვილი? არის კი გიორგი ისეთი პიროვნება, რომელიც შემკობილია ყველა იმ თვისებით, რაც სურს „ნანას“ მთემელ დედას, ანდა ქართვლის დედას? თავის დროზე კიტა აბაშიძე გიორგის არჩილთან მსახურობისას გამოჩენილ ერთგულებაზე წერდა, რომ მის ამგვარ საქციელს მაამებლობის ელფერი დაჲკრავს.

ვფიქრობთ, რომ კრიტიკოსი გიორგის საქციელის შეფასებაში ცდებოდა. მაამებელი ადამიანი თავისი მაამებლობისათვის ყოველთვის ელის ჯილდოს - სიტყვიერს, ნივთიერს... გიორგი სამაგიეროს არავისგან არ მოითხოვს თავისი, სხვათათვის უცნაური ქმედებისათვის. პირიქით კია, იგი ყოველთვის რისკის ქვეშ აყენებს თავის პიროვნებას. მოვუსმინოთ რას ამბობს ილია: „ეს ხასიათი დასჩემდა გიორგისა. დედისავით, - თავისი იყო თუ სხვისა, - თუ ცუდი რამ იყო, გამოეკიდებოდა. ბევრს ამისათვის არ მოსწონდა გიორგი. კაცო, რა უნდა, სხვის საქმეში რად ერევაო? არა ერთი და ორი იძახდა ამას სოფელში. ამ ხასიათმა ბევრი ხიფათი შეამთხვია, მაგრამ არც თითონ იშლიდა, არც დედა უშლიდა. ამას წინად - სულ ორი კვირა არ იქნება - კი-

ნაღამ სოფლის სასამართლომ გომურში არ ჩაამწყვდია. ერთი უცნაური და დაუჯერებელი ამბავი ჩაიდინა“.

ნახეთ: „ამ ხასიათმა ბევრი ხიფათი შეამოხვია“, „კინაღამ სოფლის სასამართლომ გომურში არ ჩაამწყვდია“. მაამებელი ადამიანი ამგვარ რამეს მოიმოქმედებს, რომ საკუთარ თავს ავნოს? პირიქით კია, მაამებელი კაცი საკუთარი სარგებლობისათვის ირჯება.

გიორგის მიერ შექმნილ ბაღს ყველა სამოთხედ აღიქვაშს და ეს მართალიცაა. სამოთხის ბაღი სიყვარულს შეუძლია გააშენოს, ისეთ სიყვარულს, რომელიც თვითონ არაფერს ითხოვს ის თვითკმარია. გიორგიმ იცის, რომ კესოსგან სიყვარულს, სიყვარულის სანაცვლოდ, ვერ მიიღებს. იცის, ცაში ვარსკვლავს ვერ შესწვდება და სიკვდილის წინაც არაფერს ნანობს, რადგან მან შეძლო თავად სიყვარულისათვის გარჯილიყო და არა საპასუხო გრძნობისათვის. ასეთი კაცი პირმოთნე, მაამებელი ვერანაირად ვერ იქნებოდა.

გიორგი მიდის, დედისაკენ აღარ მოიხედავს. წინ ბუნება ეძახის, უფრო ძლიერი, ვიდრე მშობლისადმი სიყვარულია. გიორგის ამგვარი საქციელი ყველა შვილის ხევდრია. ქვრივს ერთი საყვარელი და საყრდენი მამაკაცი აღარ ჰყავს, მეორეც გაურბის და მისი მზერა სხვა ქალისთვისაა განკუთვნილი. დედა მარტობისთვისაა განწირული. აქ ერთმანეთის არავის ესმის: გიორგისა კესოს, კესოსი გიორგის, ქვრივს შვილისა, შვილს დედისა. ვაჟი და ქალიც მშობლისა დრომდის არიან, მერე კი ერთმანეთისა. ღალატობს გიორგი დედას? არა. ის, რაც მთავარია, არ ღალატობს ბუნებას, კაცურ, ადამიანურ ბუნებას. ადამიანურ ბუნებას არც ქვრივი ღალატობს შვილის მიმართ ასეთ განცდებში მყოფი და ვერ გაუგია, რომ მშობლიური სიყვარულისათვის ჯილდო მხოლოდ კარგი შვილია და არა ვალის გადამხდელი, მშობლიური ვალის გადამხდელი შვილი. ამგვარი რამ არა მარტო არ ხდება, არაბუნებრივიცაა.

„ოთარაანთ ქვრივის“ ყველა პერსონაჟი თითქოს მორტობისთვისაა განწირული, მათ ერთმანეთისა არ ესმით, ვერ უგებენ ერთმანეთს და ამიტომაც ტრაგიკული არიან. ვფიქრობ, ამგვარი შეხედულება ზედაპირულია, რისი ფიქრის საფუძველსაც მოთხოვობს შემდეგი ადგილი გვაძლევს: როდესაც არჩილი და კესო საუბრობენ გიორგის სიკვდილის შემდეგ, ეგრეთწოდებულ ხიდჩატეხილობის პრობლემაზე, არჩილი ამბობს ამგვარ რამეს: „გული რა არის? მარტო ერთადერთი კაცი რომ ყოფილიყო ქვეყანაზედ, გულიც არ იქნებოდა. გული მაღლია, და მაღლი მარტო ორს შუა ჰსაქმობს. ორნი მაინც უნდა

იყვნენ, რომ მადლი მოჰქმდეს, იმიტომ, რომ მადლი ერთისაგან გაწირვაა და მეორესაგან შენირვა ერთსა და იმავე დროს“.

მადლის გამწირვლებიც არიან ნაწარმოებში და შემწირველებიც, ოლონდ არ ხდება ამის დაფასება, აშეარა აღიარება. იქნებ საჯარო-დაც არ მიაჩნია მადლის გამცემს ამ მადლის აღიარება? მთავარი აქ ხომ გაცემაა მადლისა. ოთარაანთ ქვრივი იმაზეც კი ბრაზობს, თუ ვინმე მადლისათვის მადლობას ეტყვის. ის იმისათვის სულაც არ ირჯება, ვინმემ ეს დაუფასოს. თავისთავად გაცემაშია თვითექმარობა და არა აღიარებაში. გიორგიც თავისი დედის შვილია, იდეალია იგი მწერლისათვის. მერე რაა, რომ მისი საქციელი სხვათათვის უცნაურობისა და ახირებულობის შთაბეჭდილებას ტოვებს. იგი მომავლის შვილია, მას ქემმარიტება უძღვის წინ, უკან კი კვალი რჩება განათლებული. მან თავისი სიკვდილით სინათლის მომტანი ცრემლი აღძრა. დედამ აღზარდა ისეთი შვილი, როგორსაც უნდა დაეყრდნოს სოფელი, ქვეყანა. ახალ დროს აღარ სჭირდება ხმალი, ბრძოლის ველი სხვა სიპროტესტების გადანაცვლებული, ამიტომაც ქვეყანას გიორგის მსგავსი მებრძოლნი სჭირდება.

„სურამის ციხის“ ზურაბმა თავისი ტრაგედიით ვერ მოიტანა იმ-ედი, წყვდიადი ვერ განანათლა. გიორგის ტრაგედიამ იმედი შვა, სისათლე დაბადა. ზურაბი დედამ გაზარდა, გიორგი - ქართვლის დედამ.

# ტრიტიტ

## ვახტანგ ინაური

### გიორგი სოსიაშვილის პროზის მხატვრული საეციფიკა\*

გიორგი სოსიაშვილი, ჯერ კიდევ ახალგაზრდა მწერალი, უკვე ცნობილი პროზაიკოსია. მას 25 წიგნზე მეტი აქვს დაწერილი, აქედან უმეტესობა მხატვრულ ნაწარმოებთა კრებულია. ძნელია, პროზაში ასე ადრეულ ასაკში მიაღწიო დიდებასა და წარმატებას. ეს პოეზიაში უფრო მარტივია. პოეტური ნიჭით დაჯილდოებულმა კაცმა შეიძლება, სიყმანვილეში შექმნას შედევრები და მოიპოვოს აღიარება, რადგან იქ რითმები, მხატვრული სახეები, ფრაზეოლოგიზმი, ბუნებრივი პოეტური შემართება წყვეტის ძირითად შემოქმედებით პრობლემას. 15 წლის პოეტი შეიძლება გახდეს პოპულარული, როგორც ეს ნ. ბარათაშვილის და გალაკტიონის შეემთხვევაში გვაქვს. ბარათაშვილმა 15 წლისამ დანერა „შემოლამება მთაწმინდაზე“, ხოლო გალაკტიონმა „რაც უფრო შორს ხარ“.

პროზაში საჭიროა არა მარტო სამწერლო ნიჭი, არამედ დიდი ცხოვრებისეული გამოცდილება, რაც ბატონ გიორგი სოსიაშვილს უხვად აქვს. ის შიდა ქართლის მკვიდრია, იმ გეო-პოლიტიკურ არეალში გაიზარდა და ცხოვრობს, სადაც თავისი თვალით ნახა ქართველთა ტრაგედია: ქართველთა სისხლი, მშობლიური მიწა-წყლიდან აყრილ ქართველთა დევნა. სად უნდა ნახო შენი ერის ასეთი ტკივილი, სად უნდა დაინახო ის ეროვნული, ოჯახური და პიროვნული უბედურება, რაც მშობლიურ მხარეში იხილა მწერალმა. ის სოფელ დიცი ცხოვრობს და თავისი სახლის სარკმლიდან უყურებს მავთულხლართების მიღმა დარჩენილ საქართველოს. ეს არის მისი შემოქმედების მთავარი პრობლემა, ეს გვაძლევს საშუალებას გავიაზროთ, თუ როგორ შეძლო ნიჭიერება ახალგაზრდა მწერალმა ავტორიტეტის მოპოვება თანამედროვე პროზაში.

გიორგი სოსიაშვილის შემოქმედებას მნიშვნელოვანი ადგილი უკავია 2000-იანი წლების ქართულ მწერლობაში. მისი პროზა საინტერესოა თანამედროვე ეროვნული პრობლემატიკითა და თემატიკით, ადამიანის სულიერი ცხოვრებისა და რელიგიურ-ტრადიციული

\* ნაკითხულია მოხსენებად მწერალთან შეხვედრაზე სამცხე-ჯავახეთის სახელმწიფო უნივერსიტეტში.

საკითხების ასახვით. მის შემოქმედებაში შიდა ქართლის მრავალ მტკიცნულ ფაქტებსა და მოვლენებს ეცნობა მკითხველი, რომელთა ფონზე ნათლად ჩანს მწერლის პროზაული შემოქმედების განვითარების გზა.

სამწერლო სტილი და ენა უმეტესწილად განსაზღვრავს მწერლის ორიგინალობას. გ. სოსიაშვილს თავისი ხედვა და სპეციფიკური მიდგომა აქვს. ის უშუალოდ წერს საკითხზე. ასეთი უშუალობა, თხრობის სიმშვიდე, აუდელვებელი ტონი განაპირობებს გ. სოსიაშვილის სამწერლო სპეციფიკას, ამ გზით აღწევს იგი მკითხველის ყურადღების მობილიზებას. შინაარსი იზიდავს მკითხველს, აიძულებს ჩაუკვირდეს და ფინალში გაიაზროს ნანარმოების ძირითადი იდეა. ასეთი მეთოდები აქვთ ჩვენს დიდ კლასიკოსებს მ. ჯავახიშვილს, ო. ჩხეიძეს, გრ. რობაქიძეს, მეტ-ნაკლებად, ალექსანდრე ყაზბეგს. პროფესორ რევაზ მიშველაძის აზრით, გიორგი სოსიაშვილი მ. ჯავახიშვილის და ო. ჩხეიძისა ტრადიციების გამგრძელებლად შეიძლება ჩაითვალოს. თუ დავუკვირდებით მისი შემოქმედების თემატიკას და იმ მხატვრულ სივრცეს, სადაც მიმდინარეობს მოქმედება ოთარ ჩხეიძის მოთხრობებსა და მ. ჯავახიშვილის „ჯაყოს ხიზნებში“, გავიაზრებთ მათში ასახულ ცხოვრებასა და რეალურ სინამდვილეს, დავინახავთ, რომ მათ შორის გარკვეულ კავშირია. მწერლობა არ წყდება მობლიურ ძირებს და ტრადიცია გრძელდება მომდევნო თაობაში.

გ. სოსიაშვილი თავისი წინამორბედებივით ობიექტური და გულმართალი მწერალია. მისი პროზა მხატვრული, მეტაფორული, გასაგები და ნათელია. სიმართლის თქმა შემოქმედის უპირველელესი პრინციპია. ეს განაპირობებს მისი შემოქმედების დამაჯერებლობას.

მისი ობიექტურობა ყველაზე მეტად გამოვლინდა მოთხრობაში „ბელადის ბედისწერა“, რომელიც ისეთ საკითხს ეხება, რომ ძალიან ძნელია, ქართველმა კაცმა და თანაც გორელმა, თავი შეიკავოს და არ ჩაერის ბელადზე კამათში, არ გამოთქვას თავისი აზრი. სწორედ აქ ჩანს, მწერლის ობიექტურობა და მხატვრული ოსტატობა. ავტორი თავის მიერ ასახულ სიუჟეტში არ ერება, არ გამოხატავს თავის პირად აზრს. მან მიუკერძოებლად, ბელადისადმი სიმპატია-ანტიპატიის გარეშე აღწერა რეალურად მომხდარი ამბავი, დამაჯერებლად და ობიექტურად ასახა 2008 წლის სიტუაცია, საზოგადოების განწყობილება ბელადისადმი, მისი ადგილი თანამედროვე ქართველთა ცნობიერებაში.

კრებულში „მზის გადაღმა“ მწერალმა შიდა ქართლის პრობლემა სხვაგვარად გაიაზრა. აქ ფილოსოფიურადაა დანახული მის მშობლიურ მხარეში დატრიალებული ეროვნული ტრაგედია, ფილოსოფიურია სიკვდილ-სიცოცხლის პრობლემისა და იმ ტრადიციების ხედ-

ვა, რომლებიც შიდა ქართლში არსებობდა. თვითონ სათაურიც „მზის გადაღმა“, მზის მიღმა სამყაროზე მიგვანიშნებს, ანუ, იმ სა-მყაროზე, იმ ქვეყანაზე. მკითხველი დაუკვირდება ამ წიგნს და ყო-ფითი ცხოვრების უკან დაინახავს ცოტხალი ტრაგედიის მძაფრ პა-საუებს, რომელიც ფილოსოფიური სიღრმეებიდან არის გაშუქებული. ასევე საინტერესოა გ. სოსიაშვილის „ნატყვიარი“. მოთხოვთა, რო-მელიც ძალიან კარგად ავითარებს გრიგოლ რობაქიძის ტრადიციას, რომელიც „ჩაკლულ სულში“ გვხვდება. რომანში ასახულია 1920-იანი წლების ტიპიური შემთხვევა, სადაც ხატს მაუზერით ცხრილავს ერთ-ერთი რევოლუციონერი კომკავშირელი. ეს ნამდვილი ამბავია, ასეთი რამ ერთგან და ორგან არ მომზდარა იმ პერიოდში. ვრ. რო-ბაქიძემ სინამდვილე დაფიქსირა. გ. სოსიაშვილმა მოთხოვთაში „ნატყვიარი“ აჩვენა, თუ რა დაემართა ისეთი კაცის ნაშიერს, რო-მელმაც ხატი დაცხრილა: მის შვილიშვილს პირსახეზე ის ადგილები სტკივა, რომელზეც მისმა უმსგავსო წინაპარმა ტყვიები ესროლა ხატს. ამის გამო მას და მის მემკვიდრეებს მწარედ მიეზღოთ. ხალ-ხური გადმოცემის მიხედვით, ცოდვა უფლის წინაშე თაობიდან თაობაზე გადადის. ამას გვეუბნება ხალხური სიპრძნეც:

„ცოდვას წუ იზამ ხუცესო,  
საქმე არა ჰქნა უწესო,,..  
თორემ შენ თუ ვერ მოგწვდება,  
შენ შვილიშვილს უწევსო“.

გიორგი სოსიაშვილმა თავის შემოქმედებაში აჩვენა ის ტკივილი და უბედურება, რომელიც 1990-იანი წლებიდან 2008 წლამდე პე-რიოდს მოიცავს. ეს არის არა მარტო ქართველების, არამედ ოსები-სა და აფხაზების ტრაგედია. დღეს შიდა ქართლის თემაზე ძალიან ცოტა ინტერება. გიორგი სოსიაშვილი ერთა-ერთი პირველი მწერა-ლია, რომელიც შეეხო ამ საკითხს. ამ მხრივ განსაკუთრებით საინ-ტერესოა მოთხოვთა „ჩვიდმეტი“, რომელმაც მხატვრული სრულყო-ფილებით ასახა ცხინვალის რეგიონის უბედურება. აჩვენა ისიც, რომ ამ დროს, 2008 წელს, ქართული ჯარი ზეობრივად საბრძოლო წყობით უფრო სრულყოფილია, ვიდრე 1993 წელს. ისინი სამშობ-ლოს დამცველები არიან. ამის მაგალითია ის ჩვიდმეტი გმირი, რომ-ლებიც შინდისთან დაილუბნენ. ამ მოთხოვთაში მწერალმა ძეგლი დაუდგა მათ. ყოველ წელს თავადაც მიდის და ნახულობს მათ საფ-ლავებს. მოთხოვთაში ასახულია აგრეთვე ის ქართველი გლეხი კაცი, რომელიც დარჩა თავის სოფელში გამოკეტილ სახლებს შორის. ეს არის ნაწარმოების ერთ-ერთი პერსონაჟი მახარე, რომელიც უნიკა-ლური ქართული სახეა 2000-იანი წლების ჩვენს მწერლობაში. თუ

შევადარებთ წინა თაობის მწერალთა პერსონაჟებს, დავინახავთ, რომ მახარეს სახით ბატონმა გიორგიმ შექმნა ოთარ ჭილაძის რომანის „ყოველმან ჩემმა მპოვნელმან“ პერსონაჟის ქაიხოსრო მაკაბელის საპირისპირო სახე. ქაიხოსრო მაკაბელი გაიქცა თბილისიდან მტრის შემოსევის დროს, დატოვა ოჯახი, სადაც ხოცავდნენ მის დედას, მამას, დას. ის კი გაიქცა. ამიტომ მას თან დასდევს შიში, გადარჩენილის სიკვდილის შიში. მახარე კი იქ დარჩა, თავის სოფელში, იქ ცხოვრობს იმიტომ, რომ მას უყვარს თავისი მიწა, ის შრომობს, სახლს ვერ ტოვებს, საქონელს ვერ ტოვებს. მას ნაშრომი აქვს იქ, კარგი ღვინო აქვს - ლომიაური. ესეც ტრადიციაა, რა თქმა უნდა, ღვინის ხსენება შემთხვევითი არ არის. ხატის ღვინო, რომელიც ქვევრიდან მიართვა ქართველ მეომარ ბიჭებს, ზიარების მანიშნებელია. ისინი იღუპებიან მეორე დღეს, მათ მიიღეს ზიარება ხატის ღვინით, ლომიაურით, მათ მიიღეს პური მახარესაგან მიძღვნილი და ნაზიარებინი მეორე დღეს დაიხოცნენ. მახარე ახორციელებს ო. ჭილაძის მიერ გილგამეშის ეპონიდან გამორჩეულ ქაიხოსრო მაკაბელის ქმედების საპირისპირო დებულებას: „მე მირჩევნია გულზე მეყაროს, ვიდრე ფეხებქვეშ ურუქის ქვები“. მახარე უდიდესი გმირია, ის ყოველ დღე ელოდება სიკვდილს და მაინც იქ არის, ეს არის გმირობა და ვაჟყაცობა. გმირობა არ არის მარტო ის, რომ არ ეშინია ადამიანს, რომ ეშინია და მაინც იქ დგას, ეს არის გმირობა (ამ აზრს იზიარებს ჯეკ ლონდონის პერსონაჟი მგელი ლარსენი). მახარე, როგორც მტრის მიერ ოკუპირებულ სოფელში ჩარჩენილი ქართველი გლეხის სახე, საინტერესოდ არის წარმოჩენილი: „კოურიანი თითებით ცრემლები მოინმინდა და მიეგება ქართველ ბიჭებს“. ავტორი ხაზს უსვამს კოურიან ხელებს, თითებს, რაც იმას მიგვანიშნებს, რომ ის შრომობს მიწაზე. ასეთი მეურნეობა და ასეთი განწყობა რომ სხვებსაც ჰქონდათ, იქნება, არ აყრილიყვნენ და ის მიწები ასე ერთი ხელის ალებით არ დაგვეკარგა. ძნელი იყო მათვეს ამის გაკეთება, მაგრამ ამის თქმა აუცილებელია.

2000-იანი წლების ქართულ პროზაში ერთ-ერთი ბრწყინვალე მხატვრული სახეა მახარე, რომელიც 2008 წლიდან მტრის გარემოცვაში ცხოვრობს, მაგრამ სიცოცხლის ფასადაც არ ტოვებს თავის სახლკარსა და თავის სოფელს. ახლა ბატონ გიორგი სოსიაშვილს შეუძლია განავითაროს „ჯაყოს ხიზნებში“ ასახული პრობლემა დღევანდელ ეტაპზე.

# ტრიტიტ

## დალი ბეთხოშვილი

### სიყვარულის საკითხი თანამადროვა პრეზიდენტის შემოქმედები \*<sup>\*</sup>

თანამედროვე პოეტთა შემოქმედებაში მრავალ საკითხთაგან მნიშვნელოვანი ადგილი აქვს მიკუთვნებული სიყვარულის საკითხსაც. თითოეულ ლექსში, თუ ცალკეულ სტრიქონებში, ნათლად ჩანს პოეტთა ინდივიდუალობა, ხასიათი, რაც სათქმელთან მიმართებით იკვეთება და აჩვენებს იმ პრობლემებს, რომელიც შემოქმედის გონებაში არის დასადგურებული და მხატვრულ შეფერადებას ითხოვს; მათი საფიქრალი რეალობასთან მჭიდრო კავშირშია, რამაც შემოქმედის სულიერი სამყარო და, ზოგადად, წუთისოფლის სულიერ-მატერიალური ტკიფილი ერთმანეთს უნდა შეარწყას, გაამთლიანოს და იზრუნოს უკეთესი გზის დასახვისათვის; პოეტთა ნაფიქრ-ნაზრევში უნდა აისახოს ის, რასაც უშუალოდ გრძნობენ, განიცდიან, ყოველივე ემოციურობით იტვირთება, როთაც ესთეტიკურობას იქნება, მხატვრულად იდუმალიც ხდება და უფრო რეალისტურიც, მეტი დამაჯერებლობა რომ შეიძინოს. საფიქრებელია, რომ პოეტები არიან განსაკუთრებული საფიქრალით მოცული და სულიერებით აღვსილი, სხვაგვარად ვერ შეძლებდნენ საკუთარი გულის წუხილის, დარდის ასე სიღრმისეულად და მეტყველად გადმოცემას, რაც თანამედროვე რეალობითაა ნასაზრდოები.

ახალგაზრდა პოეტთა შემოქმედებაში არ წყდება ის მთავარი ხზი, რაც გასდევს ქართულ მწერლობას ოდითგანვე. სიყვარულის საკითხი ყველა ეპოქაში, მართალია, განსხვავებულად აღიქმებოდა – ზოგისთვის ღმერთი, ზოგისთვის ქალი – პიროვნება ან სამშობლო იყო სათაყვანებელი ობიექტი, ან შეიძლება სამივე ერთად, მაგრამ საფუძველი ერთია – ღვთაებრივი სიყვარული, რომლის განცდის და გათავისების გარეშე სხვა სიყვარული შეუძლებელია; თანამედროვეთა მხატვრული სიტყვა გამოირჩევა უშუალობით, რეალისტური ელფერით, სავსე, ბუნებრიობით. მათში ისეა მოძალებული ეროვ-

\* სტატია აგრძელებს ავტორის „არავი“ №5-ში გამოქვეყნებულ ნაშრომს.

ნული განცდა, რომ ბუნებრივად გადაიზრდება სიყვარულის განცდაში, რაც, რა თქმა უნდა, ანარეკლია იმ ცხოვრებისა, რომელიც თითოეულმა შემოქმედმა განვლო და მასთან მჭიდროდ იყო დაკავშირებული, თითქოს ისეთი დეტალებიც კი იკვეთება, რაც მათ ნათელ, მაგრამ ტკივილიან სიცოცხლეს ასახავს.

XXI საუკუნის პოეტთა შემოქმედებაში წარმოდგენილია თითოეული პოეტი-მოაზროვნის განსაჯუთრებული ხედვა, ინდივიდუალური პოეტური აზროვნება. მათ პოეტურ სამყაროში მაღალ სიმაღლეზეა აყვანილი ქალის და სამშობლოს სიყვარულის თავისებური განცდა, მუხტი ერთგვარად შესამჩნევია, მაგრამ, ამავე დროს, ღმერთის სიყვარული არ არის დავიწყებული.

თანამედროვე პოეტთა მსოფლმხედველობა წარსულს არ სწყდება, პირიქით, ფესვები, საფუძველი შენარჩუნებულია, მასზე დაფუძნებით სთავაზობენ მყითხველს თანამედროვეობის პრობლემების გააზრებას, რათა უფრო შთამბეჭდავი გახადონ თავიანთი ნაფიქრნააზრები. თანამედროვე პოეტთა ლექსები არათუ კლასიკური და სატრიფიალო ლირიკის ნიმუშებია, არამედ მათ მიერ დასახული სიყვარული ადამიანის ამამაღლებელი გრძნობაა, სისადავით და სულიერი სიწმინდით შეზავებული. მათი სიყვარულის განცდა, ბევრ შემთხვევაში, რეალობის ფარგლებს სცილდება და ირეალურ სამყაროშიც გადაინაცვლებს, ხან კი ამ წუთისოფლის ხედვის სივრცეში რჩება, მაგრამ ეს არ ნიშნავს იმას, რომ მხოლოდ წუთისოფლის ფერფლით არის დაფარული, პირიქით გვესახება, მისი ფერით და შემოსილობით მეტი სულიერი ღირებულება და ჭეშმარიტი ელფერი ეძლევა. ირეალურიდან ჩნდება და ამოიზრდება რეალური, რაც სინამდვილეს ასახავს, იძლევა მეტ მხატვრულ შესაძლებლობებს, თემატიკას, ლიტერატურულ-ესთეტიკურ გემოვნებას, პოეტთა მხატვრული გარდასახვისა და ღირსებების გამოვლენას; საკუთარი განცდები ორგანულად დაკავშირებულია ეროვნულ ცნობიერებასთან, რაც ბუნებრივია და ზომიერი. თითოეული ლექსის ყოველი სტრიქონი ყოფიერების ასახვით არის გაუღენთილი და მხატვრული ოსტატობით ახდენენ სინამდვილის გარდაქმნასა და გარდასახვას; ლექსები გამოირჩევა ფილოსოფიური სიღრმით, ფსიქოლოგიური წიაღსვლებით, მძლავრი ემოცია რომ ახლავს, რადგან ემოციისა და განცდის გარეშე არც ერთი ლექსი, თუ ცალკეული სტრიქონი არ ამოიკითხება მათი შემოქმედებიდან, ამიტომ ნათლად იკვეთრება თანამედროვე პოეტთა მხატვრულ-ინტელექტუალური მრწამსი; იგრძნო-

ბა ორიგინალური მიდგომა ყოველი საკითხისადმი, რომელიც თანამედროვე ყოფიერების წიაღიდანაა ამოზრდილი, თუმცა ფესვები ადრეულ ეპოქებშია ჩასახული, მეტიც, ადამიანის გაჩენის პერიოდიდან, კერძოდ, შესაქმის ეპოქიდან იწყება ადამიანის არსზე ფილოსოფიური ფიქრი, განსჯა... სიყვარულის პრობლემა ღმერთის არსებიდან იღებს დასაბამს, ამოზრდილია მარადიულის წიაღიდან, გადმონაცვლებული წარმავლობაში და მარადიულისა და წარმავლობის წყალობით ისევ მარადიული და უკვდავი არსებობით იმოსება; სწორედ ეს ჯაჭვი ამთლიანებს სამყაროს, სამყაროს ერთიანობას განსაზღვრავს, სამიცე ჟამს კრავს და კვლავ სიცოცხლის დასაბამი ხდება. ეს განცდა, ფილოსოფიური ხედვა სიყვარულისა ჩანს ყველა ეპოქაში, შემოქმედი დაუფარავად მსჯელობენ მასზე და უკვდავების წყაროდ სახავენ;

XXI საუკუნის პოეტთა შემოქმედებაში სიყვარულის საკითხის შემოტანა კიდევ ერთხელ იმაზე მეტყველებს, რომ ის სიცოცხლის მამოძრავებელია და მარადიულობის მიმნიჭებელი. მათ შემოქმედებაში სიყვარულის სათნოება ერთგვარად ტრაგიკულ ელფერს ატარებს, რადგან შთამომავლობამ, რომლის წარმომადგენლები თვითონ არიან, სიყვარული ვერ მიიღო წინააღმდეგობების, დაბრკოლებების გარეშე. სიყვარულის გრძნობის იქით ისინი თითქოსდა გრძნობენ ავს, ტრაგედით სავსე სამყაროს ჭვრეტენ, სადაც ბოროტება დასადგურებულა, რაც კიდევ აძლიერებს მათი სიყვარულის გრძნობას. მათი ფსიქოლოგია ამ სულისკვეთებითა გაუღინოთილი და ბევრ შემთხვევაში ეს განცდები შეყოვნებითა და დუმილითა ნასაზრდოები, ლოცვის დროს რომ იყუჩებს მოკვდავი და შინაგანი მზერა ღმერთისკენ არის მიმართული... სიყვარული ლოცვასავით არის გამჯდარი მათ სულში, შემდეგ აღსარებასავით გამოთქვამენ საკუთარი ლექსის სტრიქონებში, სხივებს რომ ჰავენს მათ ნაფიქრ-ნააზრევს.

სიყვარულის სათნოება ადამიანის არსებობის განმსაზღვრელია, ძალ-ლონეს რომ პმატებს და უკვდავებას უბრუნებს ცოდვა-მონანიების შემდეგ. ამავე დროს, აღსანიშნავია ისიც, რომ ისინი ცდილობენ, არა მარტო უბრალოდ გამოთქვან და იმსჯელონ სიყვარულის საკითხზე, არამედ ამოხსნან კიდეც. თანამედროვე ეპოქის ხალგაზრდა პოეტთა შემოქმედებაში სხვადასხვა კუთხითა წამოჭრილი, დანახული და ახსნილი სიყვარულის პრობლემა, მაგრამ ისიც უნდა ითქვას, რომ ყველანი ერთ საფუძვლამდე მიდიან – საწყისი ღმერთის სიყვარულია: „ღმერთი სიყვარული არს და რომელი

ეგოს სიყვარულსა ზედა, ღმერთი მის თანა ჰგიეს და იგი ღმრთისა თანა“ (I ოთანე, 4, 16).

XXI საუკუნის ახალგაზრდა პოეტები ცდილობენ, ახლებურად გაიაზრონ ეს საკითხი და განსხვავებულ ჭრილში დაგვანახონ, კერძოდ, ადამიანმა დაუზოგავად უნდა გამოიყენოს სიყვარული – ღმერთის და შემდეგ მოყვასის სიყვარული, წინააღმდეგ შემთხვევაში, სიცოცხლე გაფერმკრთალდება და სიცოცხლის უამიც შემოკლდება. სიყვარულმა უნდა განწმინდოს ცოდვები, ლოცვად შეამზადოს და გაუნათოს მოახლოებული აღსასრული, მარადიულობასთან რომ არის წილნაყარი.

აღსანიშნავია ისიც, რომ XXI საუკუნის ახალგაზრდა პოეტთა მსოფლმხედველობრივ მრწამსში სიყვარულის თემის წინ წამოწევა უთუოდ ეპოქისეულია, თითქოს უიმედო, სულიერი სიცარიელით გამორჩეული და ტკივილით აღსავსე, რაც საკმაოდ მძიმე ეპოქამ განსაზღვრა და, ამავე დროს, საზოგადოების მოთხოვნებსაც პასუხს აძლევენ. სიყვარულმა უნდა დაძლიოს და შეანელოს ეპოქისეული პრობლემები და გამოსავლის ძიებაშიც ჩართოს და უჩვენოს ხსნის გზაც. ამიტომ მათი აზროვნების სივრცეში ღმერთი, ეკლესია იკავებს ადგილს, სადაც განათავსებს ცოდვით სავსე ადამიანსაც, განუეუთვებს შესაფერის ადგილს და აყენებს ჭეშმარიტებისაკენ მიმავალ გზასავალზე, რომელსაც იგი უზენაესისაკენ მიჰყავს.

ახალგაზრდა პოეტთა ნააზრევში შეიძლება ერთდროულად სიყვარულის ძალის ორი მხარე დაინახოს მკითხველმა – არარომანტიკულიც და სულის შემძვრელიც – ეს ორი მხარე შემოქმედში, პიროვნებაში გვერდიგვერდ არსებობს და მისი სიცოცხლის აუცილებლობას განსაზღვრაუს. როინ აბუსელიძის „ნინოს“ ვკითხულობთ:

„კედლის კალენდარზე ზამთრის  
ფორმატია,  
თეთრი სუფლიორიც მალე  
მოგვაკითხავს,  
შენ კი იმით ჰგავხარ ახლა  
რომანტიკულს,  
წვეთიც რომ არ არის შენში  
რომანტიკა.

... მაგრამ, გეფიცები, რაც შენ

**შემიყვარდი,  
სიცხეს გულის მხარეს აღარ  
ვიზომავ და...” (გვ. 12).**

მოყვანილ სტრიქონებში სიყვარულის განცდა არარომანტიკული, უფრო სწორად, ხორციელებისაგან დაცლილია, შთამაგონებელია და სულის სიმშვიდის მომპოვებელია, წვიმის წვეთებივითაა, რომელიც უცბად გაძმოიღვრება და ჩაედინება ადამიანის სხეულში გულის გა-სათბობად და სულიერ სიმშვიდეს ამკვიდრებს.

ზოგიერთი პოეტის ლექსში სიყვარულის გაურკვევლობაც შეიძლება ამოვიკითხოთ, სიყვარულის ობიექტი არაა განსაზღვრული, რაც დაბნეულობას იწვევს, თუმცა ფიქრი მიზანმიმართულია და კონკრეტული ობიექტის დაპყრობისაკენ არის მიქცეული. **დიანა ან-ფიმიადის** ლექსში „პანდორა“ იკითხება:

„**სიცხე გაქს,**  
**თითქოს საბნის ნაცვლად მინა – სამკეცად,**  
**მე კი სიყვარულს ერთხელ ვხსნი და**  
**მუდამ ვამტკიცებ:**

ვამბობ, მიყვარხარ,  
ვამბობ, არავინ მინდა მეტი,  
ვამბობ, შენ გარდა,  
ვამბობ, შენ გარდა ყველა მინდა,  
ვამბობ, არ ვიცი.

...  
ვამბობ, მიყვარხარ...

და ვხსნი სიყვარულს, ვხსნი დაგმანულ ბაგეს და ვფანტავ  
სიტყვებს, ვირუსებს, კანჯეტების ვერცხლისფერ ფანტებს“ (გვ. 14).

ავტორის ფიქრში სიყვარული დუმილის პირობებში უფრო სხვა-ნაირია, სხვა ელფერის მატარებელი, უფრო სიცოცხლით სავსე, სი-ტყვიერმა ქსოვილმა კი იგი გააფერმურთალა, უბრალოება შესძინა და გაურკვევლობის სივრცეში მოაქცია, ვერცხლისფრად შეღება, ნისლით დაფარა და გაიფანტა მხედველობის მიღმა....

ნისლით დაფარული და გახუნებული სიყვარული ტრაგიკულია, სიკვდილს უტოლდება და ერთი შეხედვით არარაობად იქცევა, მა-გრამ მასში ისევ სიყვარული ძევს, რადგან მის გარეშე, ლმერთის მიერ განგებულ-განწესებული ფენომენის – სიკვდილის გარეშე, რი-სი დადასტურებაც მაცხოვრის სიკვდილი და კვლავ აღდგომაა,

სწორედ სიყვარულის შემწეობით მოხდა. როგორც ლექსის სტრიქონებში ვყითხულობთ:

„**სიზმარი ცხადს და**

**ცხადი სიზმარს**

**ისე აძიმებს...“** (გვ. 16)

ეს მძიმე ხევდრი წუთისოფლის სივრცეში გაბნეული, სანთლის ფითილის მსგავსად იწვის და იმავე სანთლის წვით, მისი ნათლით, რომელიც უფალთან მიიღოვის, მისივე დახმარებით და თანაშემწეობით, მისი სიყვარულით ერთიანდება და გვარდება.

„**მე შეგიყვარე**

**მაშინ, როცა**

**ალარ მიყვარდი,**

**ოქრო – სპილენძად,**

**ვერცხლი – რკინად,**

**რკინა – მოვკალე.**

**შენ – ჯერ ცოცხალი,**

**ლექსის ბოლო ხაზთან მიხვალ და**

**გაიგებ –**

**სანამ შენ მომკლავდი –**

**მანამ მოგკალი“** (დიანა ანფიმიადი, „მითოლოგება“, გვ. 16).

ადამიანის ცხოვრების გზა – დაბადებიდან სამარის კარამდე სიყვარულით არის შემსუბუქებული და გაძლიერებული. ეს გზა გრძელიც არის და მოკლეც, რთულიც და იოლიც, მაგრამ ყველა შემთხვევაში ამოუხსნელი და შეუცნობელი, როგორც თვითონ ღმერთი, რადგან სიყვარული ღმერთისაგან იღებს სათავეს: „**ღმერთი სიყუარული არს“** (ი იოანე, 4, 16), ამიტომაცაა ამოუხსნელი ძალა, სიცოცხლის მასულდგმულებელი სათნოება, საიდანაც იღებს სათავეს ყველა დანარჩენი სათნოებანი: სასოება, რწმენა, რასაც ქადაგებს პავლე მოციქულის ეპისტოლე: „**ხოლო ან ესერა ჰგიეს სარწმუნოება, სასოებად და სიყუარული, სამი ესე; ხოლო უფროხს ამათსა სიყუარული არს“** (I კორინთ. 13, 13); ... სიყვარული ცხოვრების ყველა გზას კრავს და ამთლიანებს.

სიყვარულის ფილოსოფია სიკვდილთან ჭიდილს ნიშნავს, მასთან დაპირისპირებით თუ კავშირით უფროა შესაძლებელი მისი გაგება. სიკვდილი ადამიანის სხეულზე ყველაფერს შლის, თუმცა ნაკვალევი მაინც რჩება – იგი ხომ ღმერთის სიყვარულით არის დასადგურებული და იძლევა მის ახსნას იმ კუთხით, რომ არსებობა მთლიანად

– სულიერ-ხორციელი ასპექტით – სწორედ ღვთიურია, უზენაესია; „იგია საქმე საზეო, მომცემი აღმაფრენათა“, – როგორც ამბობს გენია შოთა რუსთველი; საზეოა არა მარტო სიყვარული, არამედ მოკვდავის ცხოვრება, რადგან ხორციელი კვდომის შემდეგ სხვაგვარად იცვლება, სულიერ არსებობაში გადადის და, სწორედ ამაში მდგომარეობს სიყვარულის არსი: ღმერთი თავის შექმნილს თავადვე იბრუნებს სიყვარულის შემწეობით.

**დიანა ანფიძიადის** ლექსში „სიყვარულის ახსნა“, ჩვენი აზრით, სწორედ ამ ორი უდიდესი ფენომენის გვერდიგვერდ არსებობა გვაქვს – სიყვარულის და სიკვდილის, საიდანაც ჩანს, რომ სიკვდილი ადამიანში აძლიერებს ემოციებს და სიყვარულის შეგრძნება, მეტად გათავისება, წვდომა, ამოუსნელისაკენ სწრაფვა უფრო იკვეთება, ადამიანი ცდილობს, უკეთ ჩაუღრმავდეს და შეიმეცნოს მისი ძალა და უზენაესობა. მოვიყვანთ რამდენიმე სტრიქონს დასახელებული ლექსიდან:

„**თვალი დახუჭა ქალმა და მოკვდა.**

...

სული კვამლივით ამოუშვა მდუმარე სახლმა,  
ცეცხლი კი ჩაქრა,  
ცეცხლი ჩაქრა,  
ჰო, ჩაქრა ცეცხლი.

კაცი მოვიდა ცოტა გვიან  
(როგორც ყოველთვის),  
ხელი მიითბო ჩამქრალ ცეცხლზე,  
მის საწლათან სკამი მიიღდა,  
დაიხარა მკვდრისკენ და

უთხრა.

უთხრა:

- ამხსენი სიყვარული,
- მიდი, ამხსენი სიყვარული,
- მიდი, ამხსენი სიყვარული...

და ამ მხრებზე ზეცას შევიდგამ...

**თვალი დახუჭა ქალმა და მოკვდა“** (გვ. 18).

ეს ქვეყანა, მიწიერება ფერმერთალ და გახუნებულ სიყვარულს, შეიძლება უსიყვარულობას, სიყვარულის მოქლებას ანიჭებს ადამიანს:

„და ჩემს ქუჩაზე, სადაც ქალაქი  
უსიყვარულო ბინდებს გვპირდება,  
დგას მონუმენტი მწერლის მაღალი,  
დგას არა ბინდი, დგას შებინდება“ (დათა გულუა, „ვინ მომპარა  
მზე“, გვ. 46),

მაგრამ იმავე ლექსში სიყვარულის დაბრუნების, კვლავ განახლე-  
ბის გზაცაა მოძებნილი: სიყვარულს გადაარჩენს კიდობანი, მთელი  
კაცობრიობის მხსნელი წარღვნის ჟამს:

„თუმცა ჩემს გულში წევს კიდობანი,  
მე ამ გოლოლმა დამიხსნა სული,  
მას სიყვარულის აქვს ჭრილობანი,  
მას ხორცის წარღვნის ატყვია წყლული“ (გვ. 47).

კაცობრიობის დაცემის შემდეგ ხდება ღმერთისგან მოვლენილი  
წარღვნა. სიმართლისათვის, სისრულისათვის და სწორ გზაზე სია-  
რულისათვის ღმერთმა წარმხოცელი წარღვნის წყლებში ცოცხლად  
გამოატარა ნოე და შექმნა იგი განახლებული კაცობრიობის მამამ-  
თავრად (კიკნაძე ზ., საუბრები ბიბლიაზე, 1989: 23).

„უფლის რჩევით ნოეს მიერ აშენებული კიდობანი უნდა ყოფი-  
ლიყო ხსნის ჭურჭელი; ამავე დროს, კიდობანი იყო ყველაფრის შე-  
საკრებელი, რაც ღმერთმა გააჩინა ცისქვეშებში. მასში უნდა შენახ-  
ულიყო ადამიანი და ყველაფერი, რაც ადამიანისთვის იყო გაჩენი-  
ლი... წარღვნის დამთავრების შემდეგ ხელახლა უნდა შობილიყო  
დაბადებული, ძველი ქმნილება. წარღვნის წყლები... ინარჩუნებენ  
განმწმედელ ძალას...“ (კიკნაძე, 1989: 23-24).

მაცხოვარმა კაცთა სიყვარულის გამო უსამართლოდ მიიღო ჭრი-  
ლობები და ჯვარს აცვეს იგი. ადამიანებმა ვერ გაიგეს იქსოს მისია,  
თავისი ცოდვილი სხეულით კიდევ უფრო შესცოდეს, მაგრამ ძე  
ღმერთმა მაინც შეიყვარა ადამიანი და თავისი ჯვარცმით შეაცნო-  
ბინა მას არსებობის მთავარი წყარო. „რომელმან სიყუარული მოი-  
გოს, უშფოთველად თავს-იდებს მტერთა მიერ მონევნულსა მწუხარე-  
ბასა და ტკივილსა“ (მუხლი მე-4) (მამა აბბა თალასე, საქართველოს  
ეკლესიის კალენდარი, 1989: 416). „სულისა და წორცთა მაცხოვარი  
ქრისტე არს, რომლისა კუალსა უკუეთუ ვინ შეუდგეს, იჯსნების ბო-  
როტისაგან“ (წმიდა მამა აბბა თალასე, 1989: 419).

ამქვეყნიური სიყვარულის განცდა მძიმეა, ტკივილიანი, შორი...  
წუთისოფლის სიყვარულით ხდება მოძიება და მკვიდრობა სხვა გზი-  
სა, რომელიც ამქვეყნიურს გადალახავს და სხვა სახლს, სიყვარუ-

ლის სხვა სახლს მოაძიებინებს ადამიანს, რომელიც უკეთ გაითბობს გაყინულ სხეულს, სიყვარულდა კლებულს:

„...ჩემს საყელოში წუ გაითბობ გაყინულ ხელებს –

ახლა სხვა გზა გაქვს, სხვა სახლი

და სხვა მისამართი“ (სალომე ბენიძე, „გამოსამშვიდობებელი ბარათი“, 34).

იმავე ლექსში ვკითხულობთ:

„ხეებს ტოტები დაელლებათ, ამბობენ ასე,

და კიდევ უფრო გაჭირდება გზების გაგნება,

იარე ფრთხილად, მაშინ, როცა ადიხარ მთაზე,

ადამიანებს, გაყინულებს, ქცეულთ საგნებად

არ ედარდები, შენ კი მაღლა მიინევ ისევ...“ (გვ. 35).

ადამიანთა გულგრილობის არალშიც კი იძებნება გზა, გზა გამოსავლისა, რომელიც მაღლა მთისკენ, ღმერთისკენ, მისი სიყვარულისკენ მიემართება, საითკენაც სვლისას სიფრთხილეა საჭირო, მაგრამ, რაც მთავარია, ადამიანმა სწრაფვა მაინც უნდა გამოხატოს.

ბიბლიური მსოფლმხედველობით, მთა ღმერთის ადგილია, სადაც საღვთო სიყვარული არის დასადგურებული და მხოლოდ იქ შეიძლება დაიბრუნოს ადამიანმა ამქვეყნად დაკარგული სიყვარული. აქ დაკლებული სიყვარული საუფლობი ღმერთის სიყვარულით აღივსება და დაშორებულ არსებათ კვლავ ერთმანეთს აპოვნინებს. წმიდა მამა აბბა თალასე (VII საუკ.) თავის ნაშრომში „სიყვარულის, მარხვის და სულიერი მოქალაქობის შესახებ“ გვმოძღვრავს: „მხოლოდ სიყვარული ხოლო შეგუაერთებს დამბადებელსა ღმერთსა და ურთიერთარს ერთობითა“.

სალომე ბენიძე ლექსის დასასრულს წერს:

„დაყრუვდა სივრცე და ამქვეყნად ვუყვარდით ვისაც,

არ არის სხვა გზა, დაგვივიწყონ უნდა იმათვე,

ამბავი ჩვენი ქვეყნად მხოლოდ ჩვენ ორმა ვიცით,

ჩვენ ორმა ვიცით ჩვენი ყოფნის მთელი სიმართლე“ (გვ. 35).

პოეტს წუთისოფლის სივრცე დახმულად მიაჩინა. სივრცე, სადაც ნაკლებად ესმით სიყვარულისა, ამიტომ სჯობს მათ განერიდოს, სიმართლე იმაშია, რომ მხოლოდ ღმერთის სიყვარული არის ახალი გზა, უფრო სწორედ, განახლებული, აღდგენილი, დავინწყებულის დაბრუნება – კვლავ მიბრუნება ღვთაებრივი სიყვარულისკენ.

„იარე ფრთხილად, მაშინ, როცა ადიხარ მთაზე,

ადამიანებს, გაყინულებს, ქცეულ საგნებად

**არ ედარდები...“ (გვ. 34).**

საღვთო გზაზე, მაღალ მთაზე ასვლით, რომელიც ღმერთის სიყვარულთან მიახლოებას მოასწავებს, მხოლოდ ასე შეიძლება მონიოს ახალი გზა მოკვდავმა, რადგან წარმავალ წუთისოფელში ყოველივე მარტივი, განქარვებადი და წარმავალია, როგორც თვითონ ადამიანი:

**„რაც შენ წახვედი, მე ვარ ორი, ასე მგონია**

**და თან, ჯაში ვარ ამქვეყნიურ სიმარტივეთა...“ (სალომე ბენიძე, ლექსი „ომის ბალადა, ანუ ჩემი ჯარისკაცი ქმარი“) (გვ. 28).**

წუთისოფელში დამკვიდრებული სიყვარული სიჩუმესთან, უიმედობასთან, სიცოცხლის ხანძოკლეობასთან, სიკვდილთან იგივდება, რადგან ეს გრძნობა შეიძლება უცბადვე წარიშალოს:

**„და გელოდები, სასაკლაოს სუნით გაუღენილს,**

**შენი სიცოცხლის და სიკვდილის ჩუმი მხლებელი“ (დასახ. ლექსი, გვ. 28).**

თუმცა, სიყვარული უკვალოდ არ ქრება, იგი კვლავ სიცოცხლის მოლოდინში გადაიზრდება, რასაც სიკვდილი შობს; ეს მოლოდინი უძიროა, უკიდეგანო:

**„მე ყოველ დილით შენს მოლოდინში ვახლდები**

**და ყოველ ღამით მარტოობაში ვპერდები“ (გვ. 29).**

საყვარელ ადამიანთან ყოფნა საიქიოშიც სანატრელია სიყვარულის დასტურად:

**„და, უკუნძა მიიბაროს ჩემი სხეული,**

**ქმრად მექცეს მინა, თუკი გვერდით არ მეყოლები“ („ომის ბალადა...“, გვ. 31).**

საყვარელ ადამიანთან ყოფნის სურვილი ასახულია **ალექსანდრე ლორთქიფანიძის** ლექსში „არავინ“, სადაც გამოხატულია მხოლოდ და მხოლოდ ორი ადამიანის ყოფნა და არსებობა, მაგრამ ამ ცოდვით სავსე მინაზე სიყვარულიც კი ნისლისფერია, ნისლადაა ქცეული, მძიმეა და გაურკვეველ-ამოუკნობი, როგორც თვითონ ღმერთი.

**„... ანებებ თითებით ჰორიზონტს მინასთან, იცი და ეჭვდები,**

**და არ გავს ეს სივრცე, სულ არ გავს იქსოს,**

**ჯვარცმამდე ნანამებს,**

**და უფრო ნისლია, და უფრო აშკარად თმებზე გებეჭდება**

**ჰაერი. ჰაერი. და წვიმა. ბურუსი. ბურუსი. ჰაერი.**

**და მიჭირს გატარო ასეთი მძიმე და მძიმე და ნამდვილი,**

**და ხშირად მჭირდება მეტი დრო, მეტი დრო და თითქმის**

**სხვა ერა...“ (გვ. 88).**

საყვარელ ადამიანთან განშორებით თუ დაშორებით სიყვარულის სათნოება არ ნელდება, რაც ტკივილს იწვევს: „...მუდამ ავად ვარ...“, – წერს სალომე ბენიძე, მაგრამ იმავე სიყვარულის შემწეობით ამ ტკივილებს ძლევს:

„რაც შენ წახვედი, მე ვიძინებ სწორედ იმ მხარეს  
შენ რომ გეძინა ჩვენს საწოლში და იმ მანძილებს,  
ჩვენ რომ გვაშორებს, დოდი ხნის წინ როგორც მითხარი,  
ვამოკლებ ფიქრით და ტკივილებს ჩვენსას ვაძინებ“ („ომის ბალა-  
და...“) (გვ. 27).

სიყვარულის გარეშე, ტრფობის ობიექტის გარეშე:  
„მარტოობა ოთახში, მარტოობა რთულია.  
რალაც ნისლის მაგვარი შემოიჭრა ფანჯრიდან,  
რომ არ გამომელნის შენი სიყვარულიდან,  
ეგ თვალები დამჭირდა, ეგ ლიმილი დამჭირდა.

უთქმელი განშორება ჩემთვის არაფერია:  
შენ ხომ ზღვაში დაკარგულ მარგალიტის ფასი ხარ.  
მინას ორსულობისგან მთები გამობერვია,  
იცი, რა ლამაზი ხარ, იცი, რა ლამაზი ხარ?“ (გიორგი ზანგური,  
„უძრავი ქალაქი“, 57-58).

მოტანილი ლექსის სტრიქონებში ირეკლება წმინდა რომანტიკული გაგება სიყვარულისა, ტრფობის ობიექტთან განშორება სულიერ მარტოობას იწვევს, რასაც ანელებს მთელი სახე-სიმბოლოების დახმარებით გამოხატული სუნთქვა. ამ შემთხვევაშიც გამოყენებულია თვალები, ზღვა, მარგალიტი... პარალელებს აქ აღარ მოვიყვანთ, აღვნიშნავთ მხოლოდ, რომ ძველი და წინარე ეპოქების სული სიყვარულის გაგების კუთხით არა თუ დავიწყებული, არამედ სხვაგვარად ნირშეცვლილი სახით გვევლინება თანამედროვე პოეტთა შემოქმედებაში.

ტრფობის ობიექტის იდუმალად ტარება, ან მასთან განშორება, ბოლომდე არაა გამოსავალი, ის უფრო მარტოობას იწვევს, გამძაფრებამდე მისულს:

„შენ ამბობ: „იქ სადღაც, ზეცაში, ღმერთები თეთრ ღრუბლებს კერავე,“

მე გულში გიხუტებ და ისევ ილიმი და ისევ მარტო ვარ“ (ალ. ლორთქითანიძე, „არავინ“, გვ. 88).

ტრფობის ობიექტად ქალის დასახვა კიდევ უფრო ძლიერია გიორაბულის ლექსში „არ გეგონოს, რომ მიყვარდე, ქალავ“, რომელ-

შიც ჩანს სიყვარულის ტკივილიანი განცდა, გულში ჩამარხული, სულის სიღრმეშიც რომ ვერ ეტევა, ტკივილმა შთანთქა და დაიტია სიყვარული – ეს კი ძლიერ სიყვარულზე მეტყველებს, მწარ-ნუებად გარდაქმნილა, როგორც საწამებელი იარალი და მხოლოდ სტრიქონებად ქცეულა:

„არ გეგონოს, რომ მიყვარდე, ქალავ,  
მე მხოლოდ ყუითელ დალალებს ვეტრფი,  
ეს გული რამდენ ტკივილებს მალავს,  
რამდენი ვთქვი და რამდენი ვერ ვთქვი.

სიყვარულისა რა გითხრა, ქალავ,  
თუ ველარ ვუძლებ მწარე მარწუხებს,  
შენდამი ტრფობას ჩემს გულში ვკრძალავ,  
ვკრძალავ და უფრო ძლიერ მაწუხებს“ (გვ. 23).

შორეულ, გაუმხელელ ტრფობაზეა საუბარი ნინო ნადირაძის ლექსში „ჩამოიყანე ეგ ცხენები“, სადაც მეტი სიმძაფრე, მონატრება, სურვილი, სიყვარული წყურვილი ჩანს ორთა სულის შეერთებისა, რომელიც მხოლოდა მონატრებად და აუხდენელ ოცნებად ქცეულა, რაც ისევ მარტოობის პრობლემას აღძრავს:

„... მთას გვირგვინვით დაუდგია დარდი და ნისლი,  
მე მეფის თეთრი ასულივით გიმზერ შორიდან,  
ულმერთოვ, ერთხელ შემხედავდე, მზერას რომ ისვრი  
მწვანე ველებზე ჩვენს შუა მთელი შორეთი...“ (გვ. 96).

აქაც რომანტიკული აუხდენელი სიყვარულია, რასაც ახლავს დარდი, ღვთიური მადლის სიმცირე, შორეთი, უსაზღვროება, მიუწვდომლობისგან გამოწვეული დუმილი, რომელიც ბევრს იტევს, მეტყველია, მაგრამ გამოუთქმელი, თუმცა სიცოცხლის დაბრუნება უწერია, სისპეტაკით და სიწმინდით აღვსებული, რომელიც ღმერთის მიერ მონიჭებული სიყვარულითაა გაძლიერებული.

და მაინც, ზოგი თანამედროვე პოეტის შემოქმედებაში ამქვეყნიური სიყვარული შენელებულია, ცოტა ღვთაებრიობას არის დაშორებული, ამიტომ ჩანს, რომ წყვილთა პაემანი მოწყენილია, სევდიანი, სიხარულს და იმედს მოკლებული:

„არგოძნობის ქალაქში  
სიყვარულს არ ცნობენ,  
არ ცნობენ იმ ნაცნობ ხეივანს,  
სადაც გაზაფხულზე კოცნები ანცობენ

**და ნუში კვირტობას ზეიმობს“** (გიორგი ზანგური, „ჩემს დედამინელებს“, გვ. 59).

ნამდვილ სიყვარულს დრო ვერ შლის, რადგან მარადიულია, უკიდეგან... დროის დინება მხოლოდ უგრძნობ სიყვარულს ახლავს, წარმავალია და ცრემლით, დარდით საქსე, თუმცა ესეც შეუცნობელია და, რადგან დარდი სდევს თან, ე. ი. ისიც არ იკარგება უკვალოდ. ცრემლი – განშორებისა, ცრემლი – სინაწელისა, მის გაცნობიერებას უწყობს ხელს და იწვევს ადამიანის კათარზისს უკეთეს გზაზე დასაყენებლად. იმავე ავტორის ლექსში - „ჩვეულებრივი დღე“ სიყვარული ასეთია:

„... უნდა მიყვარდეს მე შენი ჩვეულებრივი კოცნები

ტუჩზე რომ დამაღნება და არაფრის გემოს მიტოვებს“ (გვ. 60).

მოტანილი სტრიქონების მიხედვით, სიყვარული ერთგვარად სახე-სიმბოლოდაა ქცეული, გაგებულია არა სიღრმისეულობით, არამედ უბრალოებით შემოსილი, დროებითი გატაცება სიცოცხლის გასაიოლებლად და გასაძლებლად, „ჩვეულებრივად“, – ავტორის სიტყვებით. თუმცა ახსნას თვითონვე იძლევა ლექსის ბოლო სტროფში:

„ჩვეულებრივად რას ნიშნავს? ჩვეულებრივად – ეს როგორ?

უჩვეულობის გარეშე? მაშინ სიცოცხლე რად მინდა?!“

თუ შემიყვარდა ისე რა, ჩვეულებრივად ეს გოგო

და არ ვაჩუქე მაისი აყვავებული ატმიდან...“ (გვ. 60).

ჩუმი, გაუბედვი სიყვარულია გადმოცემული ქეთი თუთბერიძის ლექსში „როცა მიდიან“:

„თითქმის ჩურჩულით გეუბნები „მინდა გიყვარდე...“

ჩურჩულით...“

თითქმის...“

გველეშაპივით ცეცხლს აფრქვევენ შენი ბეჭები,

შენ აღარ გესმის ჩემი ენა“ (გვ. 64).

ამ სტრიქონებში საუბარია გარდასულ სიყვარულზე, რომელიც ბედის უკულმართობამ უფლკრულად, გამყოფ გზად აქცია „აქ“ დამრჩენსა და „იქ“ წასულს შორის, მათ ერთი ენა აღარ ასაზრდოებს, მაგრამ ეს სიყვარული მაინც იარსებებს ღვთაებრივი სიყვარულის ძალით და მაღლმოსილებით, რადგან ის არის ყოველგვარი დაბრკოლების გადამლახავი და შეენევა ადამიანს მის დაძლევაში: „ყოვლისა წინა ურთიერთას სიყუარული განმარტებული გაქუნდინ, რამეთუ სიყუარულმან დაფარის სიმრავლე ცოდვათავა“ (I პეტრე, 4, 8).

წუთისოფლის ცოდვით სავსე წყვდიადი შთანთქავს ყოველგვარ სათნოებას, მათ შორის, სიყვარულსაც და პოეტს ამქვეყნად არსებობა, გაურკვეველ უდაბნოდ ქცეულ წუთისოფელში ყოფნა და მისი გამართლება მხოლოდ მეორე ადამიანის, ანდა მეტი, უფლის არსებობის შემთხვევაშია შესაძლებელი. ადამიანი ხომ მუდამ ეძებს მეორეს, „სხვას“, უფალი კი მუდამ ადამიანის გვერდით იმყოფება და ამაშია სიცოცხლის არსი, რომელსაც სიყვარული იძლევა:

„სათნოება ჩაუყლაპავს მორევს,  
გაუხლიჩავს წყვდიადს სულის სინაზე.  
შენც აქ ხარ და მეცოდები, თორუებ  
მე რა მინდა ამ უდაბურ მინაზე?!

... სითბოს ვითხოვ, ღმერთო, სულით ობოლს  
სხვა რა მინდა ამ უდაბურ მინაზე?!“ (ანა ლოლუა, „მე რა მინდა ამ უდაბურ მინაზე“, გვ. 84).

მოყვანილი ლექსის სტრიქონებში იკვეთება სხვის გვერდით ყოფნის, მისადმი ზრუნვის, სიყვარულის განაწილების შეგრძნება, რათა დაიძლიოს სულიერი მარტოობა უდაბური, გაურკვეველი მინის ამოსავსებად. ეს კი ღმერთისადმი ვედრებით გამოითქმის, ლოცვასავით არის წარმოთქმული ღვთაების მიმართ, რათა მეტად იქნას უზენაესამდე მიტანილი მინიერი ადამიანის სათხოვარი, წუთისოფლის სიყვარულის სიცარიელემ რომ წარმოშვა და მხოლოდ მისი შემწეობით შეიძლება მოკვდავში, წარმავალ ადამიანში სათნოების აღდგენა და განახლება; სტრიქონები მკითხველს შეახსენებს, რომ მინიერ გარემოში არსებობა ღვთაებრივი სიყვარულის გარეშე შეუძლებელია;

ღვთაებრივი სიყვარული და მასთან მიახლოებული ამქვეყნიური სიყვარული უკვდავების ტოლფასია:

„ჩემს წითურ თმაში თავი ჩარგე,  
ვნების მახეში,  
მერე რა, თუკი  
უკვდავება მართლაც მითია,  
დროს თუ აქვს სახე,  
ხელთათმანი ვტყორცნოთ სახეში  
და ერთმანეთით დავტკბეთ,  
სანამ ცეცხლი გვინთა“ (ნინო ნეკერიშვილი, „ევოლუცია“) (გვ. 107).

უკუდავებას სწორედ სათნოებანი აძლევენ დასაბამს: „უკუდავებასა შობს სათნოებად და გულისჯმისყოფა, რომელთაგან დაკლებად – დედა იქმნების სიკუდილისა“ (წმიდა მამა აბბა თალასე, 1989: 419).

უფლისადმი ვეღრება, სიყვარულის გამართლებისათვის, იმ ბედისწერის მინიჭებისათვის, რომ იქნებ დაიბრუნოს სატრფოსთან შეხვედრა, ამისათვის შენდობის თხოვნა უზენაესისადმი გამოხატულია ნინო სადლობელაშვილის მიერ ლექსში „ხვალ“:

„ამ ხეთა ჩრდილები დაინდე, უფალო,  
გაშალე მინდვრების ეტრატი...  
დავპრუნდეთ პირველი პაემნის ადგილას,  
უფალო, მომყევი ეტრამდე“ (გვ. 122).

დაკარგული და, ამავე დროს, დაუვინყარი სიყვარული, მეხსიერებაში რომ აღტექდილა და დავინწყებას არ მიეცემა, გამოხატულია ნინო ქევხიშვილის ლექსში „ტრიპტიზი: ანარეკლები“:

„როგორ ტყუილად გვაიძულებდნენ ჯერ კიდევ ცოცხლებს  
ზამთრის უძიროდ ცივ ჰაერში საფლავის გათხრას –  
ფესვების გადგმას მაინც არსად დავაპირებდით:  
ადგილებს, როგორც სიყვარულებს, ეჩვევი. კარგავ“ (გვ. 139).

სასურველი სიყვარულის წადილი, რომელიც მხოლოდ ოცნებად ქცეულა, იკითხება გიორგი შალამბერიძის ლექსში „სახლი მინდოდა მქონოდა, უბრალო, ხის და ისლის“. სანამ ლექსის სტრიქონებს დავიმოწმებთ, მანამ შევნიშნავთ, რომ დასახელებულ ლექსში სიყვარულთან ერთად გულისტყივილით გადმოცემულია სიცოცხლის არსებობის საზრისი, მისი უცილობელი მხარეები, რომელთა დაუფლება და მოპოვება ყველა ადამიანისათვის სირთულეებთან არის დაკავშირებული. პერსონაჟი – ავტორისათვის ყოველივე ოცნებად ქცეულა: უბრალო სახლი, სასთუმლად – ნუშის ბაღნარი, საბნად – თიბათვის ნისლი, ბაღი, სამსახურპლო კრავები... სურვილი აქვს, ააშენოს სალოცავები, კირში გადადულებული, ვაზს გააშენებდა საღვთოდ, ააგებდა სამრეკლოებს, საიდანაც ზარის ხმა იქნებოდა მუდამ ადამიანის ფხიზლობისათვის, ააშენებდა წისქვილს, სადაც პურს მოიწევდა, უმთავრეს მადლსა და საზრდოს:

„... მერე ვნახავდი საცოლეს – ცისფერთვალებას, ლამაზს,  
შემოვაკრავდი საჩუქრად ოქროდავერცხლილ ქამარს  
და ჩემი მატყლის საბაზე ავინწყვიტავდი ალერსს,  
შვილებს სახელად მივცემდი ლაზარეს, თომას, პავლეს“ (გვ. 141).  
შვილებს:

„მოვწყეტდი დედის ძუძუდან, რქემდე ვასმევდი ლვინოს  
და სასაფლაოს საყდარში შუბლზე ვაცხებდი მირონს“ (გვ. 141)  
და საოცარი ფრაზები:

„... კვდომის ვაცნობდი ლაზათს“, სადაც ჩანს, რომ ავტორს სურს  
შვილებს, უპირველესად, გმირული სული ჩაუნერგოს და, რაც მთა-  
ვარია, ასწავლოს და გააცნობიერებინოს სიცოცხლის ფილოსოფია  
და არსი.

დასახელებულ ლექსში სიყვარულის რამდენიმე ასპექტი იკვეთე-  
ბა: ლერთის სიყვარული, სალოცავებით, ვაზით, მირონით, მზის  
სხივით და კვდომის ანუ სიცოცხლის არსით გამოხატული, სატრფო  
ქალი, რომლის გვერდით სიყვარულის ნაყოფს – შვილებს გააჩენდა  
და სამშობლოს, მომავლის სიყვარული – აღზრდიდა შვილებს, რო-  
მელთაც ეყვარებოდათ ერი და სამშობლო.

კატო ჯავახიშვილის სიყვარული დუმილის დამრღვევია, სიჩუმის  
ამამეტყველებელია, სიცოცხლის წყაროა:

„დაგვრჩა რამ?! მაინც დარჩენისთვის მედლეხვალიე  
ეს სიყვარული დუმილს გვირლვევს, რომ არ დავმუნჯდეთ.  
დაგრჩა კი ძალა, რომ უბრალოდ ხელი მომხვიო,  
გადასასვლელზე გადავიდეთ სწორი ნაბიჯით  
მომავლისაკენ, გამიზნულად, იქნებ უმიზოდ  
მეტად ქარიან ან პირიქით მშვიდ, წყნარ ამინდში  
გამოიტირო ყველა წუთი, იქნებ უსიზმრო  
მქონდა ძილი და არ მინდოდა შორს რომ გამეშვი.  
...  
ალილუია!.. სიბნელეა. ის ლოცვა გახსოვს?!

ზურგებით დგომა შემოღომის თავსხმა წვიმაში  
და დუბლი ერთი, მერამდენედ შორით და ახლოს.  
– ამ წელს სიყვარულს ვერ დაგიბრუნებ,  
ნაკიანია“ („დუბლი“, გვ. 151-152).

თანამედროვე პოეტთა შემოქმედებაში არეკლილია სიყვარულის  
გამოვლენის ყოველგვარი სახე, რაც ეპოქის სულისკვეთების ამსახ-  
ველია, ამ ჩარჩოთი არის განპირობებული, მაგრამ ისიც უთუოდ  
ალსანიშნავია, რომ ყოველგვარი სიყვარულის დასაბამი და საფუძ-  
ველი ლერთის სიყვარულია, უსაზღვროებისკენ და მარადიულისა-  
კენ რომ უბიძგებს ადამიანის სიცოცხლეს...

# ტრიტიტ

## ნესტან სულავა

### XX საუკუნის II ნახევრისა და XXI საუკუნის დამდეგის ქართული ლიტერატურის ძირითადი ტეცლაციები \*

XX საუკუნის ქართველ მწერალთა რიცხვს ისეთი სახელები შეემატა, – განსაკუთრებით 20-30-იანი წლებში, – რომელთა მემკვიდრეობა იმდროინდელ პრესასა და ცალკეულ ბეჭდურ გამოცემებში ჩარჩა, ხოლო ფერმარიტი მხატვრული სიტყვის ოსტატთა სახელები ლიტერატურას შემორჩა. „რამდენი ხნით რჩება ადამიანი სხვათა მეხსიერებაში? ოჯახის წევრები, ვთქვათ, რამდენიმე თაობის მეხსიერებაში რჩებიან; ასე თუ ისე მნიშვნელოვან საქმეთა აღმსრულებელი – უფრო დიდანს, იმის თანახმად, თუ საზოგადოებრივ-ისტორიული თვალსაზრისით რაოდენ მნიშვნელოვანი იყო მათ მიერ აღსრულებული საქმენი“, – წერდა ჭაბუა ამირეჯიბი. XX საუკუნის ქართულ მწერლობაში თავიანთი მხატვრული სიტყვით უკვდავი ადგილი დაიმკვიდრეს სიმონ ჩიქოვანმა („სიმღერა დავით გურამიშვილზე“, „ვინა სთქვა“, „ცხრა ძმა ხერხეულიძეს“), ირაკლი აბაშიძემ (განსაკუთრებით ლექსტის ციკლით „რუსთაველის ნაკვალევზე“ და „პალესტინა, პალესტინა“, ლადო ასათიანმა („კრწანისის ყაყაჩიები“, „საალაობო“, „ბარდნალა“, „არ ვიცი, ასე რამ შემაყვარა“, „საქართველო იყო მათი საოცნებო სახელი“), ალექსანდრე საჯაიამ („ცისარტყელა“, „ძველი ჩონგური“, „თოვლი თოვს“), მირზა გელოვანმა („მე დავბრუნდები“, „ცხრაკარა“, „მე თქვენ გიგონებთ კრძალვით და რიდით“, „მე არ ვარ გმირი“, „იყოს ეს ლექსი უკანასკნელი“), მიხა ხელაშვილმა („ქაქუცა ჩოლოყაშვილს“, „ლექსო, ამოგთქომ, ოხერო“, „ლაშარის ჯვარი“, მიწისგანა ვარ შობილი“), რომლებიც ნაადრევად გაეცალნენ წუთისოფელს და უკვდავი ლირიკული სტრიქონები დაგვიტოვეს; დემა შენგელაიამ („ბათა ქექია“, „საანაკარდო“, „განძი“),

\* სტატია აგრძელებს „არავის“ წინა ნომრებში (№3,4,6) გამოქვეყნებულ პუბლიკაციებს

პოლიკარპე კაკაბაძემ, რომლის კომედია „ყვარყვარე თუთაბერი“ უკვდავ დრამატულ ნაწარმოებთა რიგს განეკუთვნება. მიუხედავად აქ ჩამოთვლილ მწერალთა მემკვიდრეობის მაღალი ლიტერატურული ღირებულებისა და მნიშვნელობისა, მათი განხილვის საშუალება ამ-ჯერად არ გვაქვს. მინდა ყურადღება შევაჩერო მხოლოდ ერთზე, რომელიც ირაკლი აბაშიძის ლექსების ციკლის „პალესტინა, პალესტინა“ მშვენებაა - „ხმა კატამონთან“. ეს ლექსი ქართველი კაცის სულიერი აღსარებაა, ქართული ენის საგალობელია, რომელიც ენის ლირსებას წარმოაჩენს და მის მარადიულობას უმდერის.

„ო, ენავ ჩემო, დედაო ენავ, შენ ჩვენო ნიჭო,

სრბოლავ და ფრენავ,

შენ, ჩვენი სუნთქვის დიდო ალამო,

შენ, ჭირთა ჩვენთა ტკბილო მალამო,

შენ, კირო ჩვენთა ქვათა და კირთა,

შენ ერთი შემრჩი სამარის პირთან...“

შენ ერთს, შენ ვერ გომობ

სამარის პირთან...“

„ხმა კატამონთან“ იოანე-ზოსიმეს „ქებავ და დიდებავ ქართულისა ენისაას“ სულიერი გადაძახილია, ქართული ენის სადიდებელი ჰიმნია.

XX საუკუნის 60-იან წლებში, ცოტა ადრეც, სამოლვანეო ასპარეზზე გამოვიდნენ ახალი თაობის წარმომადგენლები, რომელთაც პირობითად ხან XX საუკუნის სამოციანელებს უნდებენ, ხანაც „ცისკრელებს“: ანა კალანდაძე, ნოდარ ლუმბაძე, თამაზ და ოთარ ჭილაძეები, ჭაბუა ამირეჯიბი, მურმან ლებანიძე, რეზო ინანიშვილი, რეზო ჭეიშვილი, ოტია იოსელიანი, შოთა ნიშნიანიძე, გურამ რჩეულიშვილი, ჯანსულ ჩარკვიანი, გურამ გეგეშიძე, გურამ დოჩანაშვილი, ვახტანგ ჯავახაძე, ემზარ კვიტაშვილი, გივი გეგეჭვორი. დასახელებულთაგან მხოლოდ ზოგიერთზე შევაჩერებთ ყურადღებას, რადგან სტატიის მოცულობა და შინაარსი მაინც შემოსაზღვრულია.

ქართულ პოეზიაში ანა კალანდაძემ (1924-2008) განსაკუთრებული სულიერი სამყარო, სუნთქვა და მხატვრული სიტყვა მოიტანა. ანა კალანდაძის პოეზიამ გამოჩენისთანავე უდიდესი ყურადღება დაიმსახურა ლექსის იშვიათი სინატიფით, დახვენილობით, ლაპიდარული სტილითა და პოეტური აზროვნების მაღალი კულტურით. განსაკუთრებულ ხიბლსა და სილამაზეს ანას ლექსებს ანიჭებს ძველი ქართული ლიტერატურული ტენდენციებისა და ბიბლიური სახისმეტყველების მოხდენილად მოხმობა. მისი პოეზიის ყოველი

ნიმუში სისადავით, სიტყვისა და განცდის ჰარმონიულობით გამოირჩევა: „თუთა“, „ბეთანიის გზაზე“, „უუფუნა წვიმა მოვიდა“, „კარში გამო ჭიაჭია მარია“, „ისევ გახსენი გული ჩემი“. საქართველო და მისი ისტორია ისეთი ლირიზმით აღსავსე სტრიქონებით არავის წარმოუსახავს, როგორც ეს ანამ წარმოგვიდგინა; მის ლექსებში გარდასულ დროთა სურნელი და მისი ცხოველი მოგონება შეიგრძნობა: „შენ ისე ღრმა ხარ, ქართულო ცაო“, „ასეთი დარი თუ იყო მაშინ“, „საქართველოო ლამაზო“, „მრავალუამიერ“, „ფეხი დამადგით“, „მოდიოდა ნინო მთებით“, „მას ალავერდის დიდებულ ტაძარს“ და მრავალი სხვა.

ანა კალანდაძის პოეზიაში ძველი ქართული ლიტერატურისა და ქრისტიანული მსოფლმხედველობის სურნელი ტრიალებს. საგანგებოდ მინდა გამოვყო დავით აღმაშენებლისადმი მიძღვნილი უსათაურო ლექსი – „ფეხი დამადგით...“, რომელიც გვირგვინოსან მეფესთან დაილოგის სახით, მიმართვებით წარმოაჩენს გვირგვინოსანი მეფის სულიერ სამყაროს, ბუნებას და რითაც დავითისავე „გალობანის“ ერთგვარ რემინისცენციად წარმოგვიდგება, პოეტი მეფის აღსარების თანაგანმცდელად აღიქვამს თავს, რითაც ეს ნაწარმოები დავით აღმაშენებლისადმი მიძღვნილი ილია ჭავჭავაძის სტატიის აზრობრივ და შინაარსობრივ გაგრძელებად გვევლინება. ამიტომ დავით აღმაშენებლის ღვანლის შესაფასებლად, სულიერი ზეალსვლის სიმბოლურ-სახისმეტყველებითად გასააზრებლად, რომელიც „დაუსრულებელ საუკუნეთა“, „ზეშთა საუკუნეთა“ მკვიდრად იქცა, მინდა ილია ჭავჭავაძის დაუვიწყარი სიტყვაც დავიმოწმო: „ამ დიდებულმა მეფემ ერთად მოუყარა თავი ქართველობას, მტერი გაუფრთხო და გაუფანტა, და დღეს თუ ჩვენ ჩვენს ბინაზედ ვართ, – ეს იქნება იმისი ღვანლი, იმისი სამსახურიც უფრო იყოს... კაცს ორი სახელი უნდა ჰქონდესო, ამბობს ჩვენი ერი, ერთი აქ დასარჩენი, მეორე თან წასაყოლიო. ეს ანდერძი ქართველისა ისე არავის შეუსრულებია, როგორც დავით მეფესა. აქ აღმაშენებლის სახელი დარჩა, როგორც მეფეს, და იქ, როგორც დიდბუნებოვანმა კაცმა – ნაიყოლია სახელი წმინდანისა, დიდების გვირგვინით შემკობილი“ (ჭავჭავაძე, 1984: 608). ანა კალანდაძის ლექსის სტრიქონები ილიასეულ შეფასებასაც ეხმიანება და ლირიზმით გაჯერებული სიტყვებით მეფის სულიერ ხატს წარმოსახავს:

„ფეხი დამადგით,  
გულზე დამადგით ფეხი ყოველმან,

წყალობა ჰყავით...

საქართველოის ყოვლის მპყრობელმან

ვისურვე, დავით...

ფეხქვეშ გაცვითეთ საფლავის ლოდი

ყურძნის მტევნებით...

– ასეთი ცოდვა რა გაქვს, მეფეო,

მიუტევები?

ლირსმსახურებდი ქართულ მიწა-წყალს,

რაი გადარდებს?

გასწიე იგი „ნიკოფსითგან

დარუბანდამდე“...

თუ, ეს მაღალთა თავმდაბლობაა

ოდით და ოდით?

თუ ცოდვილი ხარ, მაშინ, მეფეო,

რაღა ქმნან ცოდვილთ

სულის სიმშვიდის, სულის სიმშვიდის

ვერსით მპოველთა?

– გულზე დამადგით, ფეხი დამადგით

გულზე ყოველმან...“

დავით აღმაშენებლის ქართველი მემატიანე და უცხოელი ის-ტორიკოსები დავითს მეფის იდეალად, მისაბაძად წარმოგვიდგენენ და მასში უარყოფითს ვერაფერს ხედავენ. თავად დავით აღმაშენებელი კი, დავით წინასწარმეტყველის მსგავსად, თავის საგალობელში საკუთარ თავს ცოდვით დამძიმებულ, კაცობრიობის ცოდვათა მტვირთველად სახავს, რაც მას, როგორც ადამიანს, როგორც მეფეს, როგორც პიმნოგრაფს სულიერი სრულყოფილებით, სისავსით შემკულ პიროვნებად წარმოგვადგენინებს. დავით აღმაშენებლის საგალობელში ასახულია სამყაროს შექმნის ბიბლიური ისტორია და კაცობრიობის მიერ გავლილი გზა, ადამიანის შექმნიდან მოყოლებული, პირველქმნილი ადამიანის ცოდვით დაცემა და შემდგომ ადამიანთა სწრაფვა პირველსახის დასაბრუნებლად, რისთვისაც აუცილებელია სინაწულის განცდა, აღსარების სურვილი, იმის მოთხოვნილება, რომ პირველქმნილი ადამიანის მიერ ჩადენილი ცოდვა მისი ცოდვაა. საგალობელში ინდივიდუალური განცდა და სინაწული ზოგადსაკაცობრიო დონეზეა აყვანილი, რაც თვით ავტორის შინაგანი სამყაროს სიმდიდრის, ზნეობრივი პასუხისმგებლობის, სულიერი განწმენდისა და ამაღლების, განლმრთობის

საწინდარია. დავით აღმაშენებლის პიროვნება, მისი ფიქრი, განცდა, ღირსება წარმოაჩინა მისმა საგალობელმა, რომლის კონცეფცია პოეტმა ქალმა სრულად გაიაზრა და მეფეს მრავალმნიშვნელობიანი კითხვით მიმართა: „ასეთი ცოდვა რა გაქვს, მეფეო, მიუტევები?“ ეს კითხვა ქრისტიანული ცნობიერების მქონე ადამიანის კითხვაა, რადგან არ არსებობს ცოდვა, რომელიც ადამიანმა მოინანიოს და არ მიეტევოს. ანა კალანდაძის ლექსი დავით აღმაშენებლის საგალობლის მსოფლმხედველობითა და სულისკვეთებითაა ნაკვები. ისიც უნდა გავიხსენოთ, რა ანერია გელათის მონასტრის შესასვლელში მდებარე დავითის საფლავს (ამჟამად შესასვლელი აღმოსავლეთის კარიბჭიდანაა და არა იმ მხრიდან, სადაც დავითის საფლავია), ეს ფსალმუნის სიტყვებია: „ესე არს განსასუენებელი ჩემი უკუნიოთ უკუნისამდე. ესე მთნავს აქა დავითკლორ მე“ (შდრ.: ფს. 131, 14). აუცილებლად უნდა ითქვას, რომ არც ერთი საისტორიო წყარო არ გვეუპნება იმას, რასაც ანა კალანდაძის ლექსში ვკითხულობთ: „ფეხი დამადგით, გულზე დამადგით ფეხი ყოველმან, წყალობა ჰყავით... ფეხევეშ გაცვითეთ საფლავის ლოდი ყურძნის მტევნებით“, თითქოს დავით აღმაშენებელმა ანდერძად დატოვა, გელათის მონასტერში შემსვლელთ მის საფლავზე ფეხი დაებიჯებინათ და ისე შესულიყვნენ ტაძარში. ამ ტრადიციას სათავე ანა კალანდაძის ლექსით დაედო, რაშიც უდიდესი ჩანაფიქრია: დავით აღმაშენებელი ისტორიულ ჭრილში სულიერ კავშირს ამყარებს ყოველ ქართველთან, ვინც გელათში შედის და მის საფლავს ფეხს დაადგამს, თვით დავით აღმაშენებელი მომავალ თაობებთან და ყოველი ადამიანი დავითთან სულიერ კონტაქტს ამყარებს.

ანა კალანდაძის სულიერი სამყარო წარმოჩნდა ასევე ლექსში „მოდიოდა ნინო მთებით“, რომელიც ქართული ლირიკის იშვიათ ნიმუშს წარმოადგენს და რომელშიც წმინდა ნინოს საქართველოში შემოსვლისა და ქრისტიანული რელიგიის ქადაგების მნიშვნელობაზეა საუბარი. ალეგორიაც თვალში საცემია, როდესაც წმინდანის შემოსვლის დროზე ამახვილებს ყურადღებას:

„თოვლი იდო ჯავახეთის მთათა ზედა

და ტყეებში ქარიშხლები ბლაოდნენ.

მოჰკიოდა, ქარი ღრუბლებს მოჰკიოდა

და ფარავნის ტბასა ზედა ძრნოდა ქარი...“.

ქართული ეკლესია წმინდა ნინოს საქართველოში შემოსვლას 1 ივნისს აღნიშნავს, ზაფხულის პირველი თვეს, ძველი სტილით ეს

მაისია, ვარდობის თვე. ამ დროს ჯავახეთში თოვლის ხილვა სიმბოლურ ხასიათს იძენს და ანა კალანდაძეც სწორედ ამიტომ ამახვილებს ყურადღებას წმ. ნინოს საქართველოში შემოსვლის დროზე. დრო საკრალიზებულია, გასიმბოლურებულია.

ლირიკულობის საოცარი ნიმუშია ანა კალანდაძის „თუთა“, რომელიც ბუნება და ადამიანი ერთიანობაშია წარმოდგენილი და ღრმა ფსიქოლოგიზმით დატვირთული. დავიმოწმებ ლექს:

„ლამის სახლში შემოიქრას თუთა,  
ლამის თავზე გადამისვას ხელი,...  
დამიძახებს, თვალს ჩამიკრავს მუდამ  
ხე მაღალი, ხე ზურმუხტისფერი.  
რა ჩურჩული ესმით ჩემთა ყურთა!  
რა ჩურჩული! დამდაგველი, მწველი.  
ლამის სახლში შემოვიდეს თუთა,  
ლამის წელზე შემომხვიოს ხელი“....

ანას ლექსებმა ის ტკივილიანი მძიმე პერიოდი გამოვლო, რომელიც ჩვენს ქვეყანაში სუფევდა, მაგრამ მისმა ლექსებმა მკითხველისაკენ გზა შექმნისთანავე გაიკალა და სიმღერებადაც იქცა. ჩემი აზრით, ანას ლექსი „საქართველო ლამაზო“ საქართველოს ჰიმნადაა შექმნილი და ჩამოქწილი.

უნდა აღინიშნოს, რომ XX საუკუნის ლიტერატურაში, როგორც საზღვარგარეთ, ისე ჩვენშიც, რემითოლოგიზაციის მეთოდის შემოტანის შედეგად მწერლის მხატვრული სამყაროს აღქმა ახლებურ დამოკიდებულებას მოითხოვს. განსაკუთრებული ადგილი დაიმკვიდრა მითოსმა, მითოპოეტურმა სააზროვნო სისტემამ, რომელიც ალეგორიით, სიმბოლურობით იყო დატვირთული. ამ პერიოდის ლიტერატურაში მწერლის მხატვრულ სამყაროში რეალური ცხოვრების გადატანა სხვადასხვა მიზეზთა გამო საკმაოდ რთული აღმოჩნდა, რისთვისაც მწერლობამ ალეგორიულ და სიმბოლურ მეთოდებს მიმართა. ამიტომ XX საუკუნის 60-70-იანი წლები ქართული მწერლობისათვის მეტად ნაყოფიერი და მნიშვნელოვანი იყო, რადგან შესაძლებელი გახდა ადამიანის, ერის, საქვეყნო სატკივარისა და საფიქრალის ტროპული მეტყველებით გადმოცემა. სწორედ ამ დროს შეიქმნა რამდენიმე მნიშვნელოვანი რომანი, ქართული რომანი, რომელებმაც იმთავითვე მიიქციეს ყურადღება. ესენია: ჭაბუა ამირევაგიბის „დათა თუთაშია“, ოთარ ჭილაძის „გზაზე ერთი კაცი მიდიოდა“, „ყოველმან ჩემმან მპოვნელმან“, გურამ დოჩანაშვილის

„სამოსელი პირველი“, ნოდარ დუმბაძის „მარადისობის კანონი“, გურამ ფანჯიკიძის „თვალი პატიოსანი“, ნაირა გელაშვილის „ამბრნი, უმბრნი და არაბნი“, გურამ გეგეშიძის „ცოდვილი“ და სხვ. როდესაც მხატვრულ სიტყვას ცენზურის მახვილი ჩამოეხსნა, ქართულ ლიტერატურაში ეს თხზულებები უკვე გამოქვეყნებული იყო და ქართველი მკითხველი იმ ურთულეს წლებიც კი მწერლის მართალი სიტყვის წაკითხვითა და მოსმენით განებივრებული გახლდათ. ფაქტობრივად, მწერლის უჯრაში დაუბეჭდავი მხოლოდ მცირე, უმნიშვნელო რამ აღმოჩნდა. ამ რომანების გამოქვეყნება ადვილი არ იყო, მაგრამ არც დაუძლეველი.

**ჭაბუა (მზეჭაბუა) ამირეჯიბის (1921-2013) ურთულესი ცხოვრებისეული გზა** მის რომანებსა და მოთხოვებში აისახა. „დათა თუთაშეია“, „გორა მბორგალი“, „გიორგი ბრნყინვალე“ ერთმანეთისაგან საკმაოდ განსხვავებული მხატვრული თხზულებებია, რომელთაგან იშვიათი პოპულარობით „დათა თუთაშეია“ სარგებლობს. იგი პირველად უურნალ „ცისკარში“ იბეჭდებოდა, 1973 წელს კი ცალკე წიგნად გამოიცა. „დათა თუთაშეიას“ დაბეჭდვის გამო მთავრობას „ცისკრელებთან“ ბრძოლა არ დაუწყია. ყველაზე პოპულარული თანამედროვე ქართული რომანის ავტორი, რომელმაც ცხოვრების დიდი ნაწილი საპყრობილები გაატარა, ხელისუფლებასთან დაპირისპირებას ერიდებოდა და არც ფიქრობდა, „ქართველი სოლუნიცინი“ გამხდარიყო. რომანი იყო იგავი კაცზე, რომელიც ბოროტებას ბოროტებით არასოდეს დაბირისპირებია და საზოგადოებას უარყოფით სურვილებს არ უღვიძებდა. „დათა თუთაშეიას“ პოპულარიზაციას საქართველოს ხელისუფლებამ თვითონ შეუწყო ხელი. გიგალორთქიფანიძისა და გიზო გაბეჭყირიას მრავალსერიიანი ფილმი, რომელიც მაშინდელი საბჭოთა კაცშირის ცენტრალური ტელევიზიის დაკვეთით გადაიღეს, ამის გამოხატულება იყო.

რომანს ორი მთავარი პერსონაჟი ჰყავს: აბრაგი — დათა თუთაშეია და მისი მამიდაშვილი მუშნი ზარანდია, რომელიც თავისი კარიერის უმაღლეს ეტაპზე რუსეთის სამეფო კარზე მსახურობდა. თუმცა, რომანი დათა თუთაშეიას სახელს ატარებს. დათა თუთაშეიასა და მუშნი ზარანდიას სახეებში ბიბლიური კაერისა და აბელის პიპოდიგმა იყითხება. საზოგადოდ, მთელი რომანი ბიბლიური სახის-მეტყველებითა და ხალხური მსოფლშეგრძებითაა ნასაზრდოები, რასაც მთავარი გმირის გვარიც მოწმობს. რომანის მოქმედება მე-19 საუკუნის დასასრულსა და მე-20 საუკუნის დამდეგს საქართველოში

მიმდინარეობს. სიუჟეტი აგებულია მწვავე სიტუაციებზე და მრავალ ეთიკურ პრობლემას შეეხება. მასში მწერლის პატიმრობისდროინ-დელი გამოცდილებაა გადმოცემული. წიგნი 4 თავისაგან, კარისაგან შედგება, მსგავსად წმინდა ათხთავისა. ყოველი კარი ცხოვრების ახალ ეტაპზე გადასვლას ნიშნავს. დათა თუთაშია თავის ცხოვრების მანძილზე ჭეშმარიტ გზას, უზენაესისაკენ მიმავალ გზას ეძებს, თითოეულ კარში აღწერილია, თუ როგორ იცვლის იგი შეხედულებებს დროთა განმავლობაში. თუთაშია მეგრულად ორშაბათს ნიშნავს, ხოლო თვით ამ ორფუძიან სიტყვაში ერთ-ერთია თუთა, რომელიც მთვარეს ნიშნავს. მთვარე უძველეს დროში ქართველთა ღვთაება იყო. მომავალში მთვარის ადგილი ქართველთა ზეციურ წარმოდგენებში, ქრისტიანულ რელიგიაში წმინდა გიორგიმ დაიჭირა. შესაძლოა, ამიტომ დაარქვა ავტორმა მთვარ გმირს თუთაშია (თუთაშია). იგი მისი წარმოდგენით არის სული კრებსითი. დათა თუთაშია ერთი ადამიანი არაა, იგი ქართველებში არსებული წმინდა გიორგის სულის წაწილების კრებსითი სახეა. მთვარე ამ წაწილების გასაღებია, რასაც შემდეგი გარემოება მონმობს: როცა მთვარე კარგად ანათებს, დათას საფრთხე არ ემუქრება. წაწილების დასასრულს დათას სიკვდილის წინ მთვარე ღრუბლებშია მიმალული, რაც თხზულების ცენტრალურ სიმბოლურ სახედ წარმოჩნდება.

რომანში მოთხოვილია მთვარი გმირის მორალური ევოლუციის შესახებ იმ პიროვნებების გადმოსახელიდან, რომლებთანაც დათა თუთაშიას ოდესმე კავშირი ჰქონდა. სწორედ ამ პირთა მონათხოვ-ბებისაგან შედგება რომანი. ჭაბუა ამირეჯიბის რომანის მონათხოვი მწერლის ინდივიდუალურ სტილს სწორედ ამგვარი თხრობის მანერითა და გადმოცემის თავისებურებით ქმნის და აყალიბებს. დათა თუთაშია დაბადებიდან ვერ იტანს უსამართლობასა და უკანონობას. რომანის დასაწყისიდანვე ვიგებთ, რომ დათას ცხოვრების გზა ერთმა შემთხვევამ შეცვალა. მას შემდეგ აბრაგად გაჭრილმა ტყეში დაიწყო ცხოვრება, რომელიც სასონარკვეთილი უანდარმერის მიერ მუდმივად იდევნებოდა. მთელი რომანის განმავლობაში დათა თუთაშია მრავალგზის იცვლის ადგილსამყოფელს, რაც დრო-სივრცული თვალსაზრისით უაღრესად მნიშვნელოვანია. იგი თავის ირგვლივ ბოროტებას ხედავს და ცდილობს, როგორმე დაძლიოს იგი.

დათა თუთაშიამ კანონგარეშე ცხოვრების გზა იძულებით აირჩია, უსამართლობასთან ბრძოლამ გააბრაგა და წლების მანძილზე მოახერხა მეფის უანდარმერის წინაშე დამალვა. რომანში დათა

სხვადასხვა სიტუაციაში გვხვდება, მას ავტორი საგანგებოდ აკვირდება, თუ როგორ მოიქცევა ცალკეულ შემთხვევაში. მისმა ბიძაშვილმა მუშნი ზარანდია, რომლის ოჯაბშიც აღიზარდა ობლად დარჩენილი დათა თავის დასთან, ელესთან, ერთად, იმგვარი არჩევანი გააკეთა, რომ სახელმწიფო სამსახურში შესულიყო, უანდარმერის ჩინოვნიკობა ამჯობინა. რომანში მოქმედება ამ ორი ადამიანის რთული, წინააღმდეგობებით აღსავსე ურთიერთობით წარიმართება. ნანარმოებში აღწერილია ამ ორი ადამიანის მიერ არჩეული ცხოვრების გზა და ჭიდილი ერთმანეთთან. მათი სახების ჩვენებით ავტორმა მკითხველს „დაპირისპირებულთა ბრძოლისა და ერთიანობის“ შესახებ ფილოსოფიური კანონი შეახსენა. მათ მიერ არჩეული გზის მიხედვით ისინი ერთმანეთის მტრებად ითვლებოდნენ, მაგრამ დათას მამიდაშვილისადმი სიყვარული არასოდეს დაუკარგავს, რასაც მუშნისთვის დათას ნათქვამი მოწმობს: „**შენს საკეთებელსაც და ჩემს საკეთებელსაც ჩვენი ძმობის სიწმინდე ჯობია, მუშნი**“. ძნელი სათქმელია, ამასვე იტყუოდა თუ არა მუშნი ზარანდია. თუმცა, დათასადმი სიყვარული რომ ძვალსა და რბილში ჰქონდა გამჯდარი, მასთან გაჯიბრების გარდა, ამას ისიც მოწმობს, რომ დათას სიკვდილის შემდეგ მუშნიც მალევე კვდება, რადგანაც მას ღირსეული მოწინააღმდეგე, მისი ზნეობისა და ქმედებების საზომი, მეტრი უკვე აღარ ჰყავდა, რის შედეგადაც მუშნისთვის ამქვეყნიურმა არსებობამ აზრი დაკარგა, მელანქოლით დაიტანჯა და საბოლოოდ ამითვე გარდაიცვალა. არც მუშნის მამის სიტყვების დავიწყება შეიძლება: „**ნესიერ ოჯახში ერთი თუ გამოვიდა ბოროტი და უხსენებელი, იმ ოჯახის მეორე კაცს არ აქვს უფლება, ერთის ბოროტება მთელი ოჯახისა და მოღვმის სახელად და სალანძლავად აქციოს. ოჯახის სახელი სუფთა უნდა დარჩეს ხალხის და მომავლის თვალში. გასწავლიდით მე თქვენ: შენს სამშობლოში შენი იჯახის დესპანი უნდა იყო და სამშობლოს გარეთ ერის დესპანი, რადგან შენი საქციელი შინ იჯახის სახეა და გარეთ — შენი ერის!** სწორად ცხოვრება თუ გინდა, ეს არის“.

მესამე მთავარ პერსონაჟად შეგვიძლია გრაფი სეგედი მოვიაზ-როთ, რადგან ნანარმოების საკმაოდ დიდი ნაწილი მისი თხრობისაგან შედგება, საკმაოდ ვრცლად არის გადმოცემული მისი მოსაზრებები ადამიანებსა და მათ ქმედებებზე, რაშიც მწერლის მსოფლმხედველობა და ლიტერატურულ-ესთეტიკური თვალთახედვა ირეკლება. გრაფი სეგედი რევოლუციის შემდეგ სარდაფში ცხოვ-

რობს, სადაც ადამიანთა ფიგურების ძერწვით ირთობს თავს. სიმბოლურად ეს იმას ნიშნავს, რომ იგი ადამიანთა ხასიათს სწავლობს და ძერწავს. რომანში ადამიანების შეცნობის წადილით შეცყრობილი გრაფი სეგედი, მისი სამსახურებრივი მოვალეობისადმი კეთილსინდისიერი დამოკიდებულების მიხედვით, ღირსეულ პიროვნებად არის წარმოდგენილი. მისთვის სამსახურებრივი მოვალეობაა ძირითადი, მაგრამ ადამიანის ფსიქოლოგიური სახის დადგენასაც დიდ მნიშვნელობას ანიჭებს.

რომანის პირველ ნაწილში ერთი ძირითადი თავი მოსე ზამთარაძის მონათხრობს ეთმობა. დათა თუთაშებიამ და მოსე ზამთარაძემ, ორმა აბრაგმა, თავი საირმის ტყეს შეაფარეს, სადაც უცნაური ისტორია გადახდათ თავს. ბელადად და მამა-მარჩენალად წოდებული არქიფო სეთურისგან ხალხის ხსნის ცდა დატას და მოსეს შემოუტრითალდათ და გალაზულები გამოყარეს სოფლიდან. ეპიზოდის ალეგორიული ხასიათი თვალში საცემია. ეს ეპიზოდი ლიტერატურულ ტრადიციებში არსებული მხატვრული სინამდვილის გაგრძელებაა და შეიძლება მან სხვა მხატვრული ნაწარმოებებიც გავვახსენოს. ასეთივე ალეგორიულია იგავი ვირთხების შესახებ, რომლებიც შიმშილობის ნიადაგზე ერთმანეთის ჭამას იწყებენ და არსებობისათვის ბრძოლის ბოლოს უძლიერესას გამოავლენენ. რომანის მეორე ნაწილში დათა თუთაშებიამ, მისი წინა გამოცდილებიდან გამომდინარე, გადაწყვიტა, აღარ ჩარეულიყო კერძო საკითხებში, თუ სრულად არ იქნებოდა დარწმუნებული, რომ მისი ქმედებები სიკეთეს მოიტანდა. მისი ახალი პოზიციის შედეგად ხალხმა მისი წარსულის ყველა კარგი საქმე დაივიწყა, რამაც მისი ფსიქოლოგიური სახის ჩამოყალიბებაში გარდატეხა შეიტანა. რომანის მესამე ნაწილში დათა თუთაშებია, რომელმაც ამ ეტაპზე თავისი გზა, აბრაგისა და ჩვეულებრივი ადამიანის გზა დაკარგა, შეეცადა სამოქალაქო საზოგადოებაში გარევას, რათა თვითონ განესაზღვრა და გაეაზრებინა ცხოვრების ღირებულება და ფილოსოფია. ის შეუერთდა ადვოკატის, საიდუმლოებით მოცული ქალის, ნანო თავყელიშვილისა და მათ გარშემო შემოკრებილ პატარა საზოგადოებრივ წრეს, ესწრებოდა სხვადასხვა შეკრებებს, ნადიმებს, სადაც ფილოსოფიურ თემებზე კამათი იმართებოდა. ერთ-ერთ ასეთ საღამოზე დათასა და მასთან მყოფ ინტელექტუალთა საზოგადოებას ეწვია საქართველოში მეფის ხელისუფლების უანდარმერის უფროსი გრაფი სეგედი, რომელმაც დათა თუთაშებიას განთავისუფლების დოკუმენტი მიიტანა. უნდა ითქვას,

რომ გრაფი სეგედი დიდხანს გაურკვეველ მდგომარეობაში იმყოფებოდა, ვიდრე დათა თუთაშებიას ნაფიქრ-ნააზრევს ჩასწვდებოდა. ამიტომ ამჯობინა დათასთან პირისპირ შეხვედრა. მართალია, იგი ხვდებოდა, რომ დათა ბელადი ვერ გახდებოდა, რადგან ბელადისაგან განსხვავებული თვისებები აღმოაჩნდა, მაგრამ მარც ბოლომდე დარწმუნებული არ იყო დათას პიროვნული თვისებების მისეული შეცნობის სისწორეში.. ამ მხრივ დათას თუ მიხეილ ჯავახიშვილის არსენა მარაბდელს შევადარებთ, მათ შორის არსებულ მკვეთრ სხვაობას უთუოდ შევნიშნავთ, რადგან მათი კანონგარეშე ცხოვრებაა ერთმანეთისაგან განსხვავებული. მიუხედავად იმისა, რომ ორივენი უსამართლობას ებრძვიან, სხვადასხვა ღირებულებები აქვთ, სხვადასხვა ინტერესები ამოძრავებთ. ეს სხვაობა ეპოქის მასასიათებელი ნიშნებიდან მოდის. არსენა მარაბდელი XIX საუკუნის 20-30-იანი წლებში ცხოვრობდა, დათა თუთაშებია – XIX-XIX საუკუნეთა მიჯნაზე მცხოვრები ადამიანია. სამართლიანობა მოითხოვს იმის აღნიშვნას, რომ მათ საკმაოდ ბევრი რამ აქვთ საერთო, მაგრამ ამ საკითხებზე მსჯელობა შორს წაგიყვანს.

რომანის მეოთხე ნაწილში დათა თუთაშებია ჯერ კიდევ ფიქრობდა, რომ ბოროტების დაძლევა მხოლოდ ძალით შეიძლებოდა. მუშნი ზარანდია, ერთ-ერთი რუსული იმპერიული უახდარშერიის საუკეთესო თანამშრომელი, თავისი სამუშაოს ერთგული დარჩა, სახითათო დამნაშავების, მათ შორის საკუთარი ბიძაშვილის, ძიებას და გაუვნებელყოფას გულმოდგინედ მეთვალყურეობდა. დათამ ბიძაშვილის ინტერესების გათვალისწინებით გადაწყვიტა, ნებით ჩამჯდარიყო ციხეში, სადაც საბოლოოდ მიხვდა, რომ მსოფლიოს-თვის ბოროტების არიდების საუკეთესო გზა არის ის, რომ ადამიანი უნდა იყოს კარგი და სიკეთე აკეთოს, რაც ბევრისთვის გაუგებარია და ადამიანისთვის კი ძალიან ძნელად აღსასრულებელი. დათა თუთაშებია მთელი თავისი ცხოვრების მანძილზე ბოროტების დამარცხებას ცდილობდა. მთელი ცხოვრება ისე წარმართა, რომ სიკეთის ქმნით ცდილობდა ბოროტების დათრგუნვას, მაგრამ რაც უნდა ეკეთებინა, ბოროტება მაინც მრავლდებოდა. დათამ გაითავისა სახარებისეული სიბრძნე: თუ ერთ ლოყაზე გაგარტყამენ, მეორე უნდა მიუშვირო. ეს ქრისტიანობის ერთ-ერთი მთავარი აზრია, ზნეობრივი კოდექსის ერთ-ერთი უმთავრესი დებულებაა და ავტორმაც „დათა თუთაშებიას“ დედააზრი სწორედ ამაში დაინახა. მას შემდეგ, რაც დათამ ასე თუ ისე მიაგნო თავისი გაგებით ჭეშმარიტებას, მან ამო-

წურა თავისი ამქვეყნიური მისია. იგი ზეცად უნდა ამაღლებულიყო. საამისოდ მას სჭირდებოდა კაენი ან იუდა, რომლის როლიც მუშნი ზარანდიას ხვდა წილად, უფრო ზუსტი იქნება, თუ ვიტყვით, რომ ეს როლი მუშნიმ მოირგო. ამ თვალსაზრისით რომანში უძლები შვილის იგავური გააზრებაც იკითხება, თუმცა, კაენისა და იუდას როლის მორგება გაცილებით უფრო მძაფრად წარმოაჩენს დათასა და მუშნის ურთიერთდამოკიდებულებას.

რომანში ერთ-ერთი უმნიშვნელოვანები ეპიზოდია დათასა და მისი თანამეინახეების საუბარი-მსჯელობა ქართველი ერის, საქართველოს მისის შესახებ, განსაზღვრულია მოსაზრებები საქართველოს გეოპოლიტიკური მდგომარეობის შესახებ. ავტორმა თავისი შეხედულებები საქართველოს ისტორიის გააზრების თაობაზე გეოპოლიტიკური კუთხით წარმოადგინა. თითოეულ ეპიზოდში არა მარტო დათა არის სხვადასხვა კუთხით წარმოჩენილი, არამედ მასთან ერთად ჩანს სხვა ადამიანების დადებითი და უარყოფითი თვისებები, რომელთა ფონზე ზოგჯერ დათა მოგვაგონებს „თევზს ცოდვების ოკეანეში, როგორც ამას ქრისტეზე ამბობენ ხოლმე“. ამ მხრივ უაღლესად მნიშვნელოვანია სანდრო კარიძის მიერ გამოთქმული აზრები ერისა და ხალხის, სამშობლოსა და სახელმწიფოს შესახებ: „ხალხი ხელებია და სტომაქი. ერი – მაღალი ზნეობა და შორსმჭვრეტელობა. ხალხი სულიერსა და ნივთიერ ლირებულებებს ქმნის და ვინაიდან მოთხოვნილება ყოველთვის სჭარბობს შექმნილს, მას აქვს დაუოკებელი მისწრაფება მთლიანად შთანთქას არა მარტო ის, რაც თვითონ შექმნა, არამედ ისიც, რაც მანამდეა შექმნილი და შთანთქმას გადაარჩენილი. ერი ცალკეულ პიროვნებებში თუ მათ ერთობლიობაში განხორციელებული ის მარადისი სულია, კრებსითი სულია, რომელიც ნებაყოფლობით კისრულობს მთელი ეთნიკური ორგანიზმის წარსულზე, ანმყოსა და მომავალზე პასუხისმგებლობას. ერი დამაკებელი, მომწერიგებელი საწყისია, სულიერ და ნივთიერ საუნჯეთა დამგროვებელი, მცველი. ...ცხოვრება სულიერი და ხორციელი სარჩოს მოპოვების პროცესია, ხოლო ზნეობა – ამ პროცესის მომწერიგებელი ძალა. ერის ცნებასა და ზნეობის ცნებას შორის ტოლობის ნიშანი ზის“. მისი მსჯელობა ქართველი ერის მისის შესახებ დღესაც არ კარგავს მნიშვნელობას, რადგან ეს თვალსაზრისი ამჟამადაც, ჩვენს თანამედროვეობაშიც, ძალზე აქტუალურია. როდესაც ქართველი ერი იბრძოდა და მომხდეურ მტერს სამშობლოს არ ანებებდა, მამინ მას დიდი მიზანი და ფუნქცია ჰქონდა, დღეს კი

იგი მოგვაგონებს საძოვარზე მიშვებულ ნახირს, რომელსაც მიზნად დასახული აქვს ყოველდღიური სარჩის მოპოვება. ფუნქცია დავკარგთო, გულისტყვილით ამბობს სანდრო კარიძე და თანამოსაუბრების თანაგრძობას იმსახურებს. თუ დავუკვირდებით, მიხეილ ჯავახიშვილის „ჯაყოს ხიზნების“ მსგავსად, ჭაბუა ამირეჯიბის „დათა თუთაშიაც“ რომანი-წინასწარმეტყველებაა, რადგან მასში საქართველოს, როგორც სახელმწიფოს, ქართველი ერის, როგორც კაცუობრიობის ნაწილის, დათა თუთაშიას, როგორც ადამიანის მისია განსაზღვრული; ყოველმა სახელმწიფომ, ყოველმა ერმა, ყოველმა ადამიანმა უნდა შეძლოს იმის განსაზღვრა, რაზე გადის მისი შესაძლებლობების ზღვარი და რა არის მისი არსებობის მისია, რა დააკისრა მას ღმერთმა. ამიტომ ესაა რომანი ადამიანისა და სამშობლოს მისის შესახებ. რა არის ადამიანის არსებობის აზრი, თუ არა სიკეთის ქმნა, ერისა და ქვეყნის სამსახური. იმედი, რწმენა და სიყვარულია ის ქვაკუთხედი, რაც დათას ცხოვრებასა და ქმედებას უდევს საფუძვლად.

მართალია, „დათა თუთაშია“ XX საუკუნის ქართულ ლიტერატურაში ერთ-ერთ საუკეთესო რომანად რჩება, რადგან მასში თავისუფლებისაკენ მიმავალი ერთ-ერთი გზაა ნაჩვენები და ისაცაა მონიშნული, თუ როგორ შეიძლება ეს გზა ერთმა ადამიანმა გაკვალოს. ამიტომაცაა იგი, არსენა მარაბდელის მსგავსად, ზნეობრივი გმირიც და ეროვნული ინტერესებით აღჭურვილი პიროვნებაც, მაგრამ თავისი მიზნის აღსრულება მას მისმა მამიდაშვილმა, მუშნი ზარანდიამ, რომლის სახეში იმპერიული სახელმწიფო მოიაზრება, არ დააცადა. დათას პიროვნულმა ზრდამ, რომელიც რომანის მსვლელობისას მრავალსაფეხურიანადაა წარმოდგენილი, კიდევ უფრო მეტად გააღიზიანა მუშნი და საკუთარი ბიძაშვილი, რომელიც ძმად მოიხსენიება და რასაც ბიბლიურ-ევანგელიური სახისმეტყველება უდევს საფუძვლად, სასიკვდილოდ გაიმეტა. სიმბოლურია რომანის დასასრულიც, სულთმებრძოლმა დათამ, ძმისგან განწირულმა და შვილის გასროლილი ტყვიით სასიკვდილოდ დაჭრილმა, ზღვამდე მიაღწია, რათა არც ძმას და არც შვილს არ მისცემოდა დათაზე შურისმაძიებლის სახელის ტარების საფუძველი, ხოლო შვილს არც მატერიალური უზრუნველყოფისათვის გამოეყენებინა დათას სისხლის სანაცვლოდ აღებული ფული. „გვამს ვერ იპოვნიან...“ ამ სიტყვებით გაეცალა გუდუნას, უკანონო შვილს, დათა თუთაშია. ზღვა სხვადასხვა კონფაციის მქონე სიმბოლური სივრცეა და

დათას ზღვაში გადავარდნაც სიმბოლურია, რადგან მითოპოეტური თვალსაზრისით ზღვა, წყალი განახლების, სულიერი გარდასახვის სიმბოლოა. დათას დაკარგვას, უფრო სწორად, ზღვაში მის გადავარდნას ის მნიშვნელობაც აქვს, რომ უსაფლავოდ რჩება და თვითონ, როგორც პიროვნება, ლეგენდის სახით რჩება ხალხის მეხსიერებაში. რომანი ერთდროულადაა ქრისტიანული სახისმეტყველებითა და მითოსური აზროვნებით გაჯერებული თხზულება.

მწერლის სხვა რომანებიც, „გორა მბორგალი“ და „გიორგი ბრწყინვალე“, უაღრესად მნიშვნელოვანი თხზულებებია. „გორა მბორგალი“ დევნილი კაცის ურთულესი ცხოვრების მოწმეს ხდის მკითხველს და დოკუმენტური პროზის მახასიათებელი ნიშნებით შემკული მნიშვნელოვან ადგილს იჭერს ქართულ რომანისტიკაში, რადგან მასში XX საუკუნის ურთულესი პერიოდი, 20-30-იანი წლების ქართველი არისტოკრატი, განათლებული საზოგადოების მძიმე ცხოვრებაა ასახული. ეს ის პერიოდი იყო, როდესაც ადამიანის სიცოცხლე ყოველმხრივ დაუცველი და გაუფასურებული იყო, როდესაც ცოდნა და განათლება, ადამიანის ჭუა და გონება მისივე უბედურების სათავედ იქცეოდა. გორა ქართველი კაცის განზოგადებული სახეა, რომლისთვისაც ეროვნული და ზოგადსაკაცობრიო იდეალები ერთიან მსოფლმხედველობრივ ჭრილშია აღსაქმელი და რომელსაც მუდამ ახსოვს პაპისეული სიბრძნე: „ლმერთო, არ მომაკლო გასაჭირი, რომ სული ვწვრთო“. ამ რომანშიც იმპერიის წინააღმდეგ ბრძოლაა უმთავრეს იდეალად დასახული. გორა მბორგალი ერთგანზომილებიანი მხატვრული სახე არაა, არც მხოლოდ პოლიტიკოსი მებრძოლია, უწინარეს ყოვლისა, იგი ინტელექტუალური პიროვნებაა, რომელსაც უყვარს მწერლობა, საზოგადოდ, ცოდნის სფერო. თავისი მაღალი სულიერებით იმ ესთეტიკურ იდეალებს უახლოვდება, რაზეც ჩვენი წინაპრები და ჩვენი თანამედროვენი ოცნებობენ.

რომანი „გიორგი ბრწყინვალე“ კი საქართველოს ისტორიის უმნიშვნელოვანეს პერიოდს, მეფე გიორგი ბრწყინვალის ეპოქას აცოცხლებს თავისი პოლიტიკურ-იდეოლოგიური და საზოგადოებრივი ვითარების კვალობაზე. „დათა თუთაშიას“ მსგავსად, მწერალმა „გიორგი ბრწყინვალეშიც“ მხატვრულ-ალეგორიული და იგავური მეთოდი აირჩია, რათა პიროვნების თავისუფლების, მისი ზნეობრივი არჩევანის, პოლიტიკური დეტერმინაციის პარადიგმა გადმოეცა. მთავარი ისაა, რომ გმირი რომანისა საქართველოს ისტორიაში გან-

საკუთრებულის, უჩვეულოს სახელითაა ცნობილი. გიორგი ბრწყინვალის სახით ქვეყნისა და ერის არსებობისათვის მარადიულ ბრძოლაზე ორიენტორებული პერსონაჟია წარმოსახული, რომლის მთელი მოღვაწეობა ერის ისტორიული მეხსიერებისა და მომავლის რწმენას დაუკავშირდა. იმ დროს, როდესაც თანამედროვე ლიტერატურაშიც გაჩნდა იდეალის, მისაბაზი გმირის გაქრობის საფრთხე, ჭაბუა ამირეჯიბის გიორგი ბრწყინვალე ჭეშმარიტად რაინდული სულის მქონე, ფილოსოფიურად მოაზროვნე და მაღალ ზნეობაზე პროცეირებულ პერსონაჟად წარუდგა მკითხველს. კიდევ ერთი თავისებურება უნდა აღინიშნოს რომანის შესახებ: „გიორგი ბრწყინვალე“ იმგვარადაა ორგანიზებული და კომპოზიციურად აგებული, რომ მისი დასრულება მკითხველის ცნობიერებასა და გონებაშია ნავარაუდები მწერლის მიერ. იგი მხოლოდ ფრაგმენტებს, ეპიზოდებს წარმოაჩენს მეფის ცხოვრება-მოღვაწეობიდან, შორეული ასოციაციებით, რემინისცენციებით, ისტორიულ-კულტურული ალუზიებით ხატავს უზარმაზარ ისტორიულ დრო-სივრცეში ჩამკვიდრებულ პერსონაჟებს, ცხოვრებიდან იღებს სხვადასხვაგვარად აქცენტირებულ სურათებს, რომელთა გამთლიანებასა და ერთმანეთთან დაკავშირებას მწერალი მკითხველის საქმედ მიიჩნევს.

XX საუკუნის 60-80-იანი წლები სიმბოლურ-ალეგორიული რომანის შექმნის ეპოქა იყო. მოვიდა მწერალთა თაობა, რომელმაც თავისი ძირითადი სათქმელი მითოპოეტურ და სახისმეტყველებით საბურველში გაახვია, რათა მკითხველი ადამიანის არსებობის აზრის, საზოგადოების ზნეობის, სამყაროში მიმდინარე მოვლენების, სამშობლოს სავალალო ხვედრის საკითხებზე დაეფიქტურებინა. ამ მხრივ გამორჩეული ადგილი ოთარ ჭილაძეს (1933-2009) უჭირავს, რომლის რომანები, ლექსები, პოემები, სტატიები, ჩანახატები ის ერთანანობაა, რომელიც მწერლის ლიტერატურულ-ესთეტიკურ და მხატვრულ სამყაროს ქმნის. მთელი მისი მემკვიდრეობა, რომელსაც უდიდესი მნიშვნელობა ენიჭება, მსოფლიო ლიტერატურის კონტექსტშია განსახილველი. ოთარ ჭილაძის კალამს ეკუთვნის რომანები „გზაზე ერთი კაცი მიდიოდა“, „ყოველმან ჩემმან მპოვნელმან“, „რკინის თეატრი“, „მარტის მამალი“, „აველუმი“, გოდორი“, პოემები „თიხის სამი ფირფიტა“, „წათეს წითელი წალება“, ლირიკული ლექსები.

ოთარ ჭილაძის რომანები, პოემები, ლექსები უმეტესად მითოპოეტურ მხატვრულ ხერხებსა და საშუალებებს ემყარება და იყენებს. ამ მხრივ განსაკუთრებულ ადგილს იჭერს „გზაზე ერთი კაცი მი-

დიოდა”, რომლის სათაური ზღაპრის რემინისცენციის აჩენს და რო-  
მელშიც მოქმედება არგონავტების მითის საფუძველზეა გაშლილი.  
თხრობა იმ დროიდან იწყება, როდესაც ვანი ზღვისპირა ქალაქი იყო  
და იქ მცხოვრები – ზღვისპირეთის მკვიდრნი. ზღვა ყველა ვანელის  
ფანჯრიდან მოჩანდა, რასაც სიმბოლური დატვირთვა აქვს, ზღვა  
განახლების, სულიერი შობის სიმბოლოდ გაიაზრება მითოსურადაც  
და ბიბლიურ-ევანგელური სახისმეტყველებითაც. ზღვა იმასაც  
მიუთითებს, რომ სამყარო უკიდეგანოა, ასევე უკიდეგანოა ადამიანთა  
სულიერი სამყაროც. ერთ-ერთი მთავარი პერსონაჟი ფარნაოზი ისე-  
თივეა, როგორებიც არიან ჭაბუკა ამირეჯიბის დათა თუთაშხია,  
მიხეილ ბულგაკოვის ოსტატი, მარკესის „მარტოობის ასი წელის“  
პერსონაჟები აურელიანო, ხოსე არკადიო, საზოგადოდ ბუნები,  
ხოლო ფარნაოზი და მისი შვილი პატარა უხეირო ოდისევისა და  
ტელემაქეს პარადიგმით შემოდიან რომანის სააზროვნო სივრცეში.  
რომანის მთავარი გმირი გაივლის ყველა იმ საფეხურს, რომელთა  
გარეშე შეუძლებელია ბოროტების დამარტება და სიკეთის  
დამკიდრება, რაც ყოველი ადამიანის ამქეცენიური არსებობის  
ქვაკუთხედია, სულიერი მისია. რომანში შერწყმულია მითოპოეტური  
სამყარო, ფოლკლორული საწყისები, ბიბლიურ-ევანგელური სახის-  
მეტყველება, ლიტერატურული ტრადიციები, რომელთა ერთიანობით  
იქმნება ოთარ ჭილაძის რომანის მხატვრული ქსოვილი.

შეიძლება ეს ჩემი სუბიექტური აზრია, მაგრამ ვფიქრობ, ყველა-  
ზე უკეთ მნერლის მხატვრულ სამყაროსა და მსოფლმხედველობას  
წარმოაჩენს რომანი „ყოველმან ჩემმან მპოვნელმან“, რომელიც  
ღრმა სიმბოლურ ქვეტექსტებს შეიცავს. განსაკუთრებით მნიშვნე-  
ლოვანია ბიბლიიდან მომდინარე სახელწოდება რომანისა; ეს  
სიბრძნე ურუქის მღვდელმა, ზოსიმე მღვდელმა, ნაწარმოებში ერთ-  
ერთმა ყველაზე საინტერესო პერსონაჟმა, წარმოთქვა. რომანში  
„ყოველმან ჩემმან მპოვნელმან“, რომელიც საკმაოდ პერსონაჟ-  
მრავალი თხზულებაა, უმრავლესობას თვითდამკიდრების და საკუ-  
თარი თავის საზოგადოებაში პოვნის პრობლემა აქვს. მის წინაშე  
დგანან ანა, ქაიხოსრო, ალექსანდრე, ნიკო და ანეტა. ოჯახის ყველა  
წევრი იმ სივრცით, იმ მორალურ-ზნეობრივი ატმოსფეროსა და ჭეშ-  
მარიტი ოჯახური ლირებულებების უქონლობითაა შემოზღუდული,  
რაც ქაიხოსროს მიერ დამკიდრებულმა რეჟიმმა წარმოშვა. მთელი  
ოჯახი, გიორგას გარდა, ცრუმაკაბელთა შთამომავლობაა, ამიტომ  
მათი საზრუნავი საკუთარი ჭეშმარიტი არსის ძიებაა. რჩენა-

დაკარგული და ღმერთდაკარგული შთამომავლობა თვითდამკვიდრებას თავისებურად შეეცადა: ნიკო — სახლიდან წასვლით, ალექსანდრე — ძმის მოძიებით, ანეტა — შემხუთველი გარემოდან გაქცევით. ცხადია, ავტორი ალეგორიის მხატვრული ხერხით კაცობრიობის რაობის, არსებობის აზრისა და დანიშნულების გარკვევას ისახავს მიზნად. ამიტომ რომანში ხშირია ალუზიები და ენიგმები, რომელთა გახსნა-გაშიფრას მკითხველისაგან დიდი ძალისხმევა სჭირდება.

რომანში აღწერილი სოფელი ურუქი რეალურად არსებული ქართული სოფელი არ არის. სოფლის სახელწოდება შუმერული ეპოსის ერთგვარი ალუზია. თუმცა, იგი არც შუმერს არ გულისხმობს, კონკრეტულობის საზღვარს სცილდება და მთელი სამყაროს სახე-სიმბოლოდ გვევლინება, იგი კონკრეტული დროსივრცული ფენომენისაგან დაცლილია. ნაწარმოებში ქრონოლოგიურადაა მოთხოვნილია ქაიხოსრო მაკაბელის ოჯახის ოთხი თაობის ისტორია, ამიტომ რომანი მხატვრული საგაა მაკაბელთა ოჯახის შესახებ. აღამაშემად-ხანის შემოსევისას 4 წლის ქაიხოსრო სიკვდილს შემთხვევით გადაურჩა, პატარა ბიჭი დიდი ხნის ხეტიალის შემდეგ ყაზარმას შეეკედლა, სადაც მაიორმა მაკაბელმა იშვილა, გვარიც მისცა და მემკვიდრეობაც დაუტოვა. ასე რომ, ქაიხოსრო ნამდვილი მაკაბელი არაა. რომანი ქაიხოსრო მაკაბელის სამშობლოში დაბრუნებითა და სოფელ ურუქში მამობილისაგან მემკვიდრეობით დატოვებულ სახლში დამკვიდრება-დასახლებით იწყება. მალე მისვდა, რომ უსასრულო სიმარტოვის ღამეების ატანა გაუჭირდებოდა და თვალი დაადგა ქვრივ ანას, რომელსაც თათარი საყვარელი ჰყავდა. ეს ამბავიც სიმბოლურად იკითხება. თხზულების სიუჟეტი ურუქში იშლება. თათარი, რომლის სახელი ნაწარმოების ბოლომდე უცნობი რჩება და რომელიც მტრის სიმბოლოდ მოიაზრება, თავის საყვარელ ქვრივ ანასა და მის 11 წლის შვილს გიორგას სცემდა. ეს ამბავი სოფელში ყველამ იცოდა. ამის თაობაზე გიორგამ თავისზე უფროს მეგობარს მაიორ ქაიხოსრო მაკაბელს შესჩივლა. უნდა აღინიშნოს, რომ მაიორის წოდება სინამდვილეში მას კანონიერად არ მიუღია. ეს იმას ნიშნავს, რომ ქაიხოსრო როგორი მაკაბელიცაა, ისეთივე მაიორია. მან თათარი დაჭრა, რის შემდეგაც ამ უკანასკნელმა სოფელი დატოვა. გიორგას ეგონა, რომ ამით ეშველებოდა და დედამისის არავინ შეაწუხებდა, მაგრამ მაიორმა ანა ცოლად შეირთო და ოჯახი მაკაბელების საგვარეულო სახლში დასახლდა. გიორგა მაიორის

მამინაცვლობას ვერ ეგუებოდა და ერთ დროს მევობარს მტერივით უყურებდა. ქაიხოსროსგან ანას ვაჟი, პეტრე, შეეძინა. წამოზრდილ პეტრეს გიორგას მიმართ შური და ბოლმა ამოძრავებდა, რადგან გიორგა დედის სიყვარულსა და ზრუნვაში მოზიარედ მიაჩნდა. პეტრემ გიორგაზე ადრე შეირთო ცოლი, ბაბუცა მიქელაძე. მათ სამი შვილი ეყოლათ: ალექსანდრე, ნიკო და ანეტა. უცოლშვილოდ დარჩენილ გიორგაზე თათარმა შური იძია და მოკლა.

სოფლის ექიმმა ჯანდიერმა ქაიხოსროს უკურნებელი სენი დაუდგინა და მას სახლიდან გასვლაც კი აუკრძალა. ალექსანდრეს და ნიკოს ადრეული სიყმანვილიდან გაუწინდათ პროტესტი პეტრესადმი, ბოროტი მამისადმი, რომელიც მათ დასასჯელად მუდამ მიზეზებს ეძებდა. ერთხელ ბავშვებმა საღორე ააფეთქეს და სწორედ ამ დროს ალექსანდრემ მარჯვენა ხელი დაკარგა, ნიკო კი უვნებელი გადარჩა. შედეგად ალექსანდრემ განათლების მიღების საშუალება დაკარგა და სოფელში დარჩენა მოუხდა. ნიკო თბილისში გაემგზავრა გიმნაზიაში სწავლის გასაგრძელებლად, თუმცა ურუქში მალევე მოვიდა ცნობა, რომ რევოლუციონერებთან კავშირის დამყარების გამო ციმბირში გადასახლეს. ალექსანდრემ ოჯახი მიატოვა და საყვარელთან, კოჭლ მარისთან ერთად უგზოუკვლოდ გადაიკარგა. ჯერ ანა გარდაიცვალა, შემდეგ მას ნიკოს დაღუპვის ამბით გულშეწუხებული ბაბუცა მიჰყვა. უდედოდ და უბებიოდ დარჩენილი ანეტას აღზრდას აღათია უძლვებოდა, მაგრამ გარდატეხის ასაკში მყოფი გოგონას დამორჩილება გაჭირდა. ქაიხოსრო მოხუცდა. და ბოლოს, მისი გარდაცვალების შემდეგ მაკაბელთა ოჯახში ყველაფერი აირია. ალექსანდრემ უამრავი ბოროტება და სიავე ჩაიდინა. ანეტა სოფლიდან გაიქცა და გზას ასცდა, რაც ალექსანდრემ შეიტყო და შურისძიება განიზრახა, მაგრამ ვერ მოახერხა და ხიფათს გადაეყარა. ალექსანდრემ გაიგო ნიკოს მეგობრების ადგილსამყოფელი და მათთან ჩაალწია, სადაც ნიკოს ობლად დარჩენილი შვილი, მართა, დახვდა. ნიკოს საყვარელი ლიზიკოც, – მათ ქორწინება ვერ მოასწრეს, – გარდაცვლილიყო. ალექსანდრემ ძმისშვილი სოფელში წამოიყვანა და მისი აღზრდა გადაწყვიტა. ალექსანდრე ერთ-ერთი მთავარი ფიგურაა რომანში. ის პირველია, რომელმაც დაინახა თავისი ოჯახის ცოდვები და შეეცადა მისგან განწმენდას. ასევე, მნიშვნელოვანია მართა, ნიკოს გოგონა, რომელიც ალექსანდრემ რომანის დასასრულს იპოვა და ურუქში წაიყვანა. მართა ოჯახის მეოთხე თაობაა, სიმბოლურად იგი ახალი სისხლია, რომელმაც უნდა გამოისყიდოს წინაპრების ცოდვები

და ცხოვრება ახლიდან დაიწყოს. ალექსანდრემ მის აღზრდაში მონაწილეობა უნდა მიიღოს, რათა კაცობრიობის, წინაპართა, საგვარეულოს წინაშე, ცრუმაკაბელთა წინაშე, ვალი მოიხადოს.

რომანში ავტორმა დრო-სივრცის მეტაფორის გამოყენებით რამდენიმე, ერთმანეთისაგან განსხვავებული მოდელი დახატა. სივრცული განზომილებები ერთმანეთს მხოლოდ გეოგრაფიულად არ უკავშირდებიან: მაკაბელების კარმიდამო — ურუქი — კახეთი, რომლის ზოგად სახეს თელავი წარმოადგენს, — საქართველო, თბილისი, — რუსეთის იმპერია: კატორლა, ტიუმენი. ყოველი მათგანი იმპერიის შემაღებული ნაწილია და იმპერიის ზოგად ტიპოლოგიურ ნიშნებს ატარებენ. მაკაბელების ეზო ის სივრცეა, სადაც უარყოფითი ძალა ბატონობს, სადაც ბოროტება, სიძულვილი და უნდობლობა ნორმად ქცეულა. მართალია, ამ სივრცეში არსებობს კეთილი საწყისი ანას, გიორგას, ბაბუცასა და აღათიას სახით, მაგრამ იგი სუსტია და ოჯახში ატმოსფეროს ვერ ცვლის. მაკაბელების სივრცე იმდენად წინააღმდეგობრივი და არამყარია, რომ სიკეთე-ბოროტების ჭიდილი საბოლოოდ მას ბინარული ოპოზიციის სახით წარმოგვიდგენს: ქაიხოსროს ორსართულიანი სახლი უარყოფითი ძალის სიმბოლოა, სახედრის გომური კი — დადებითისა. შესაბამისად ორ ფრთად იყოფიან იქ შცხოვრები ადამიანებიც: ერთ მხარეს დგანან: ქაიხოსრო, პეტრე, ალექსანდრე, ვიდრე ეს უკანასკნელი პიროვნული იდენტიფიკაციას მოიპოვებდა, მეორე მხარეს — ანა, გიორგა, ბაბუცა, ანეტა, აღათია, ნიკო, ექიმი ჯანდიერი, და იმედი რჩება, რომ მართაც ამ გზას გაჰყვება. გომურს სიმბოლური დატვირთვა აქვს, იგი მაცხოვრის შობის ადგილის, ბეთლემის გამოქვაბულის პარადიგმად ალიქმება, საიდანაც სიკეთე უნდა გამოვიდეს, რასაც გიორგა უდგას სათავეში და ამ ემედებას წარმართავს. იგი დედის ქორწილის დღიდანვე ინანიებს იმას, რომ დედამისს მაიორი გადაჰკიდა, ხოლო სინანულს სიკვდილით ამთავრებს. გიორგას უარი მაკაბელების ჭერქვეშ ცხოვრებაზე მისი სინანულის გამოხატულებაა. ანა შვილის გარდაცვალების შემდეგ გომურში მკვიდრდება და ქმარს აშკარად უპირისპირდება, რაც იმას ნიშნავს, რომ მადლს ამჯერად უკვე ანა ატარებს და აძლიერებს, რის დამადასტურებელი ქრისტიანული სახე-სიმბოლოებია ჩიტები, რომელთაც ანა აპურებს, და გიორგას სახედარი, რომელიც იერუსალიმში უფლის სახედრით შესვლის პარადიგმად და ალუზიად გაიაზრება. ანა შვილის სამყოფელში, გომურში, ბედნიერია. დამარხვამდე გომურში შეაქვთ აღათიას

გვამიც, რომელიც სიცოცხლეში უანგაროდ გასცემდა სიკეთეს. მაკაბელთა სულიერი აღორძინება გომურიდან იწყება და ნელ-ნელა ფართოვდება\*. ანასა და გიორგას სიკეთე მომავალ თაობაში, ნიკოში, ალექსანდრესა და ანეტაში უნდა გადავიდეს. სამივენი სახლიდან გარბიან, რათა იდენტობა, საკუთარი თავის მოპოვება შეძლონ. ასე გადის სიმბოლურად ანასა და გიორგას მადლი ოჯახიდან და მომავალს ეფინება. მხატვრული სივრცის იდენტობის რღვევას რომანში ქაიხოსრო იწვევს, რადგან იგი, უარყოფითი იდენტობის მქონე, სხვასაც წინ ელობება საკუთარი მეობის ძიების გზაზე. მაკაბელებს ლირებულებების შეგრძნება, აღქმა არ აქვთ, რაც მათ სულიერ სიღარიბეს ნიშნავს. მათვის სიცოცხლე მხოლოდ ფიზიკურ გადარჩენაზე ზრუნვა და მატერიალური კეთილდღეობის მოპოვებაა. პეტრეს საფიქრალი ხომ მხოლოდ ღვინის სარფიანად გაყიდვაა, შვილების სიყვარულის მოპოვებაზე არ ზრუნავს. ანას სიკეთე უძლეური აღმოჩნდა. ქაიხოსროს უარყოფითმა ძალამ მეტი გააკეთა და ოჯახის არც ერთ წევრს სიკეთედ ჩამოყალიბების საშუალება არ მისცა. მიუხედავად ამისა, რომანის დასასრულს დიდი სულიერი კატაკლიზმების, დაბრკოლებების შემდეგ მაინც ჩნდება იმედი, რომ მართაში განსახოვნდება მაკაბელთა დადებითი მუხტი, რომელიც გოგონას მემკვიდრეობით ბებიებისგან, ანასგან და ბაბუცასგან უნდა რგებოდა, ამაში უშვილოდ გადაგებული გიორგას წილიც მოიაზრება. მართალია, ოთარ ჭილაძის რომანებში ბოროტება ძლიერად ვლინდება და დიდ ადგილს იჭერს, მაგრამ იგი გადაულასავი არაა, საბოლოოდ დიდი ტანკების შემდეგ მაინც სიკეთე იმარჯვება.

XX საუკუნის 60-70-იან წლებში კიდევ ერთი ქართველი მწერლის სახლება მიიქცა მეტაზელი საზოგადოების ყურადღება. ეს **გურამ დოჩანაშვილის** რომანი, „სამოსელი პირველი“ იყო, რომლის სახის-მეტყველებითი ასპექტების წარმოჩენა მოითხოვს რომანის მიმართების შესწავლას ბიბლიასთან და ძველ ლიტერატურულ ტრადიციებთან, რათა უკეთ გავიაზროთ მწერლის მხატვრული ჩანაფიქრი და უკეთ მივწვდეთ იმ მხატვრულ ფენომენს, რომლის გარეშე არც ერთი ნაწარმოები არ იწერება.

---

\* ამასთან დაკავშირებით უთუოდ უნდა გაგვახსენდეს დემეტრე-დამიანეს ერთი იამბიკო, რომელშიც მღვიმის სულიერ დანიშნულებაზეა საუბარი: „მღვიმე ფართობს სამყაროდ“.

გურამ დოჩანაშვილის რომანში რამდენიმე კონცეპტუალური საკითხია დასმული. ესენია: „აღთქმული მიწის“ პარადიგმა, როგორც მთლიანი სამყაროს სილამაზის ფენომენი და რომანის მთავარი გმირის, ანუ პროტაგონისტის, დომენიკოს გზა, რომელსაც იგი გადის შინიდან გასვლის შემდეგ შინ დაბრუნებამდე; ამ ფონზე თავს იჩენს უძლები შვილის თემა; ენახის მუშავთა და მათი საზღაურის შესახებ იგავის ალუზია რომანის მიხედვით, რომელიც განსაკუთრებით მნიშვნელოვანია და გავრცელებულიც საზოგადოდ ლიტერატურაში. ყურადღება უნდა გავამახვილოთ დუმილის ესთეტიკაზე, როგორც პერსონაჟის გამოსახვის მხატვრულ ხერხზე; უნდა განისაზღვროს რომანის მთავარი თემა: ვინ ვართ, საიდან მოვდივართ, საით მივდივართ და სად ვმთავრდებით, ან ვმთავრდებით კი?! გავიხსენოთ დავით გურამიშვილის უკვდავი სიტყვები:

„ყმანვილი უნდა სწავლობდეს საცნობლად თავისადაო,

ვინ არის, სიდამ მოსულა, სად არის, წავა სადაო?“

ეს ის მარადიული პრობლემაა, რომელზეც პასუხს ყოველი ეპოქის შემოქმედი ეძიებს. გურამ დოჩანაშვილის რომანი ერთ-ერთი საუკეთესოა იმ თხზულებათა შორის, რომელშიც ადამიანის ამქეციური მისის განსაზღვრაა მწერლის ასახვის მიზნად დასახული. რომანის არსი ღრმად ფილოსოფიურია, ამავე დროს, საღვთის-მეტყველო ლიტერატურითა და ფოლკლორითაცაა მოტივირებული.

ცნობილია, რომ მხატვრულ ლიტერატურას, მრავალ სხვა ფუნქციასთან ერთად, კულტურული სივრცის მოწესრიგება აკისრია, ხოლო ყოველ ახალ ნაწარმოებს მოაქვს დროსივრცული კატეგორიებით განპირობებული სიახლე. XX საუკუნის 60-80-იან წლებში სამწერლო ასპარეზზე გამოსული მწერლები – ზაირა არსენიშვილი, ვახუშტი კოტეტიშვილი, იზა ორჯონიკიძე, ბესიკ ხარანაული, ლია სტურუა, ნუგზარ შატაიძე, მაკა ჯოხაძე, გოდერძი ჩოხელი, კოტე ჯანდიერი, ნაირა გელაშვილი, გულო კობიაშვილი, ელა გოჩიაშვილი, თინათინ მღვდლიაშვილი და სხვანი – ცალკე გამოკვლევას იმსახურებენ, მაგრამ ერთ სტატიაში ეს შეუძლებელია.

გასული საუკუნის 90-იანი წლებიდან, პოლიტიკურ-კულტურული ღირებულებების გადაფასების პერიოდიდან მოყოლებული, ქართულ ლიტერატურაში, ტრადიციულის გვერდით, ახალი ტიპის პროზა და პოეზიაც იმკვიდრებს ადგილს. XI საუკუნეში გამოჩნდნენ ახალი თაობის წარმომადგენლები, რომელთა ნაწილი ლიტერატურულ ტრადიციათა გამგრძელებლად გვევლინება, მაგ., დავით მალრაძე,

თამარ (თამრი) ფხაკაძე, მაკა გოგუაძე, ანა კორძაია-სამადაშვილი, მარიამ წიკლაური, თამარ მიქაძე და სხვანი, ზოგიც – პოსტმოდერნიზმის ლიტერატურული მიმდინარეობის სათავეებთან დგანან: აკა მორჩილაძე, რატი ამალლობელი, ზაზა თვარაძე, დათო ტურაშვილი, თეონა დოლენჯაშვილი, ბესო ხვედელიძე, არჩილ ქიქოძე, ლაშა ბულაძე და სხვები. მათი მემკვიდრეობის შესახებ მსჯელობა სამომავლო პერსპექტივად გვესახება. ისინი ჯერ კიდევ შემოქმედებითი ძიების პროცესში იმყოფებიან. ამჯერად მხოლოდ პოსტმოდერნიზმის ძირითადი მახასიათებლების შესახებ შეიძლება ითქვას ზოგი რამ, იმის შესახებაც, არის თუ არა საქართველოში პოსტმოდერნიზმი.

საკითხის უკეთ გასააზრებლად აჭიროა თვით პოსტმოდერნიზმის არსში გარკვევა. პოსტმოდერნიზმს უწოდებენ ლიტერატურულ ეპოქას, რომელიც XX საუკუნის 60-70-იან წლებში დაიწყო და დღემდე გრძელდება, ზოგი ვერსიით, ათასწლეულთა გასაყარზე, 2001 წელს, დასრულდა და გლობალიზმის ლიტერატურული ეპოქა დადგა. პოსტმოდერნის, როგორც ლიტერატურის განვითარების ისტორიული ეპოქის მთავარი თავისებურებაა ლირებულებების, ნორმების, იდენტობების, კონცეფციების მრავალფეროვნება, პლურალიზმი, რაც გამორიცხავს ერთადერთი, ყველასთვის საერთო ათვლის წერტილის არსებობას, დეცენტრირებას, ეთიკური, ესთეტიკური და მსოფლმხედველობრივი თვალსაზრისით. ყურადღება მახვილდება იმაზე, რაც აქამდე ხელოვნურად, იძულებითი მეთოდებით იდევნებოდა ან ითრგუნებოდა. მნიშვნელოვანია არა ის, რაც ცენტრშია, არამედ საყურადღებოა ყველაფერი მარგინალური. სწორედ ამგვარი დეცენტრირების შედეგია, მაგალითად, ეკოლოგიური ცნობიერება და ფემინიზმი. პოსტმოდერნულ ეპოქაში არ მოიპოვება ლირებულებების მწყობრი, ყველასთვის მისაღები სისტემა: ტრადიციული დიქოტომიების რღვევის შედეგად იშლება ზღვარი გონითსა და მითოსს, კეთილსა და ბოროტს, ლამაზსა და მახინჯს, თეთრსა და შავს, ქალსა და მამაკაცს, ცივილიზაციასა და ბუნებას, ბავშვსა და ზრდასრულს, ცნობიერებასა და სხეულს, ფსიქიატრსა და პაციენტს, სინამდვილესა და სიმულაციას შორის. მოდერნისტული ეპოქისაგან განსხვავებით, თვით სუბიექტიც მოკლებულია უნარს, იყოს სამყაროს ცენტრი, რადგან სამყაროში იმდენივე სინამდვილე, იმდენივე ღირებულებათა სისტემა და იმდენივე ცენტრია, რამდენი ადამიანიც არსებობს. პოსტმოდერნისტებს აღარ სწამთ სამყაროს შეცვლის შესაძლებლობა და ამიტომ მათი მემკვიდრეობა ნაკლებ მეტაფორუ-

ლია. მათი აზრით, ახალს ვერაფერს შექმნი, რადგან თითოეული ახალი ქმნილება ძველის, ზოგჯერ ოდნავ სახეცვლილის, გამეორებაა. ისინი არ ცდილობენ, შექმნან ორიგინალური ნაწარმოებები, კომპოზიციური თუ შინაარსობრივი თვალსაზრისით. თითოეული პოსტმოდერნისტული ტექსტი ერთგვარი მიწვევაა სასიამოვნო თა-მაშზე უკვე ნაცნობი ლიტერატურული ან სხვა მოტივებით, თემებით, მოქმედი პირებით, სიუჟეტებითა და ა.შ. იგი მოიცავს ციტატებს და ასევარა ან ფარულ ინტერტექსტობრივ მინიშნებებს და იყითხება როგორც უკვე ნაცნობი ტექსტის პაროდია. ნიმუშად აკა მორჩილაძის პროზას დავასახელებდი. პოსტმოდერნისტული ლიტერატურის თავისებურებაა ასევე საზღვრის წაშლა ტრივიალურსა და სერიოზულ ლიტერატურას შორის: პოსტმოდერნისტული ტექსტი ორშრიანია, იგი, ერთი მხრივ, თავშესაქცევ ამბავს მოგვითხრობს, მეორე მხრივ კი - გამომძიებლად აქცევს მკითხველს, რომელმაც თავად უნდა იცნოს და ერთმანეთთან დააკავშიროს ტექსტში მი-მობნეული ინტერტექსტობრივი მინიშნებები. პოსტმოდერნიზმში გამქრალია ის ე. ნ. რევოლუციური განწყობა, რომელიც მოდერნისტულ მიმდინარეობებში იჩენდა თავს. პოსტმოდერნიზმი არის სტილების, უანრებისა და მიმდინარეობების კომბინაცია, რის გამოც ყველა პოსტმოდერნისტული ნაწარმოებისთვის საერთო თავისებურებების დადგენა შეუძლებელია. პოსტმოდერნისტული ესთეტიკა მიმართულია არა ძველი ნორმების რღვევისა და გადაფასებისკენ, არამედ მათი გახსენებისა და შენარჩუნებისკენ. თუმცა ძველის გახსენება ხორციელდება არა მიამიტურად, არამედ მსუბუქი და ოდნავ ნოსტალგიური იორნიით (მოსაზრებები პოსტმოდერნიზმის შესახებ მოცემულია რუსულენოვანი ლიტერატურის ენციკლოპედიის მასალის მიხედვით).

ცნობილი პოსტმოდერნისტი საზღვარგარეთელი ავტორები – უმბერტო ეკო, იტალო კალვინო, პატრიკ ზიუსკინდი, პოლ ისტერი, მიშელ ბიუტორი, დენ ბრაუნი და სხვები, – ერთი მხრივ, წარსულის ფურცლებს აცოცხლებენ, მეორე მხრივ, სრულიად ახალ დროსივრცულ სამყაროში მოგზაურობას სთავაზობენ მკითხველს. განსაკუთრებით მინდა გამოვყო ჩემთვის უაღრესად საინტერესო რომანები: უმბერტო ეკოს „ვარდის სახელი“ და „პრაღის სასაფლაო“, დენ ბრაუნის საკმაოდ გახმაურებული თხზულება „და ვინჩის კოდი“, რომლებშიც ტრადიციული სიუჟეტური რკალი დეტექტივის სიუჟეტსაა გადაბმული და ხშირად სამყაროში მიმდინარე მოვლენები, პერსო-

ნაუები, ამბები ამოყირავებულია და ფანტასტიკის სფეროში გადადის. საქართველოში, მართალია, პოსტმოდერნიზმის ეპოქაა, მაგ., აკა მორჩილაძე, დათო ტურაშვილი, შოთა იათაშვილი, ლაშა ბუღაძე, ზაზა ბურჯულაძე, ზაზა თვარაძე, ირაკლი სამსონაძე, ირაკლი ჯავახაძე და სხვ., მაგრამ მათი თხზულებები მეტაფორულ აზროვნებას მოკლებულია და, შესაბამისად, უფრო დოკუმენტური პროზის, ზოგჯერ ტექსტის გადაწერის ხასიათს ატარებს და წინა პერიოდების მწერალთა მხატვრული მემკვიდრეობის ლიტერატურულ გადამუშავებას გვთავაზობენ. ლიტერატურათმცოდნეობაში მათი ადგილიც განსაზღვრულია, თუმცა მათი კვლევა წინამდებარე სტატიის მიზანი არ არის. მაინც მინდა აღვნიშნო, რომ დასახელებულთაგან ზოგიერთის მემკვიდრეობა წინა ლიტერატურულ ტრადიციებს ეხმანება და მეტად საინტერესო გააზრებასაც გვთავაზობენ. პოეზიიდან მაგალითად უნდა დაგასახელო ზაზა თვარაძის „ლურჯი მერანი“, რომელიც მხატვრული და მსოფლმხედველობრივი თვალსაზრისით, ერთი მხრივ, ნიკოლოზ ბარათაშვილის „მერანთან“ ამყარებს სულიერ კავშირს, მეორე მხრივ, გალაკტიონ ტაბიძის „ლურჯა ცხენებთან“, ასევე, ლიტერატურული ასოციაციები და ალუზიები მას შოთა რუსთველის „ვეფხისტყაოსანთანაც“ აკავშირებს.

გაზვიადებულად მიმაჩნია თანამედროვეობაში გავრცელებული ის სკეპსისი, რომანის, როგორც ჟანრის, „გარდაცვალებას“ რომ იუნიკა. ეს, ალბათ, უფრო ხელმოცარულ მწერალთა ხვედრია, რომელიც „დიდსა ვერ მოჰკვლენ, ხელად აქვს ხოცა ნადირთა მცირეთა“. აქვე უნდა აღინიშნოს, რომ კლასიკად ქცეულ თხზულებათა გადანერა-გადააზრების პოსტმოდერნისტულ ეპოქაში ჩვენს თვალწინ, XXI საუკუნის დასაწყისში შეიქმნა ახალი რომანი, არაორდინარული, სრულიად განსხვავებული სტილით შესრულებული ტრადიციული, კლასიკური ხასიათისა, რომელიც მოდერნისტულ-პოსტმოდერნისტული რომანისაგან განსხვავდება. თუმცა, სამართლიანობა მოითხოვს იმის აღნიშვნას, რომ არც მთლიანად დაცილებულია პოსტმოდერნისტულ ხერხებსა და ტერდენციებს. ეს გახლავთ **მაკა გოგუაძის „ერზაცი ისევ ხუმრობს“**.

მაკა გოგუაძემ ქართულ მწერლობაში ახალი სიტყვა მოიტანა; მწერალს ყოველთვის აქვს მკითხველისათვის სათქმელი რაღაც ახალი, რადგან ყოველი ეპოქა ახალ ლირებულებებზეა ორიენტირებული. იგი მთელი თავისი არსებით, მსოფლხედვით, განცდით შემოქმედია, მისი რომანიდან კიდევ ერთხელ ნათლად წარმოჩნდება, რომ

სამყარო საოცრად მრავალფეროვანია. მაკა გოგუაძემ თავისი რომანით მკითხველსა და მწერალს შორის სანახევროდ გაწყვეტილი სულიერი კავშირი აღადგინა და, ასე მგონია, ჩვენი დარღვეული ცხოვრებისეული ეთიკური არსის აღდგენის გზებიც შემოგვთავაზა. ეს რომანი ამის საწინდრად უნდა მივიჩნიოთ. ჩემი აზრით, ის სკეპტიკური დამოკიდებულება, რომელიც ბოლოდროინდელ კრიტიკულ სტატიებსა და აზროვნებაში იჩენს თავს, თითქოს ამბის, ისტორიის თხრობა, როგორც უბრალოდ ყოველდღიური ცხოვრების სილამაზის ასახვა, და თითქოს მხოლოდ „ევფემისტური ორნამენტული ფორმებით“ მონოდება იყოს მწერლის მთავარი მიზანი, სრულიად ქარწყლდება მისთვის, ვინც ამ რომანს წაიკითხავს.

მინდა ორიოდე სიტყვით შევეხოთ რომანის სათაურს: „ერზაცი ისევ ხუმრობს“. ავტორმა ერთ თავის ინტერვიუში განაცხადა: „ადამიანს, მეტადრე, შემოქმედს, არ ჰყავს ერზაცზე – არანამდვილზე, სუროგატზე დიდი მტერი“. მოგეხსენებათ, სათაური ნაწარმოების გასაღებია, ხოლო სახელდების პრინციპი ერთდროულად არის ბიბლიური შესაქმური პროცესის შემადგენელი ნაწილი, ფილოსოფიური და ესთეტიკური კატეგორია. ამიტომაა მაკა გოგუაძის რომანის სახელწოდება მრავალშრიანი და ლრმააზროვანი; იგი, როგორც ხატოვანი და სახეობრივი არსის მქონე, მთელ რომანს მსჭვალავს. სწორედ სათაურით ნარმოჩნდება რომანის ძირითადი მხატვრულ-ესთეტიკური და ზნეობრივ-მორალური პრობლემატიკა. რომანის სათაური მრავალ კითხვას აღძრავს: 1. თუ ერზაცი, რომელსაც ნამდვილი საგნის მხოლოდ ზოგიერთი თვისებადა აქვს შერჩენილი და, აქედან გამომდინარე, ყალბია, სუროგატია, ოდესმე შეიძლება გახდეს სერიოზული? 2. ან თუ ყველაფერი ის, რაც ჩვენს ირგვლივა, ჩვენს რეალურ ცხოვრებაშია, ერზაცია, რაა ნამდვილი? 3. და კიდევ: თუ რომანის სახელწოდებას განვაზოგადებთ და ქართველი ერის ცხოვრებასა და ისტორიას ვიგულისხმებთ, მაშინ რა არის ნამდვილი „ქართლის ცხოვრება“ ან ნამდვილი „ქართველი ერის ისტორია“? ამ პრობლემების მხატვრული ნარმოსახვა მწერლის მიზანი.

„ერზაცი ისევ ხუმრობს“ ერთი ოჯახის საგაა, რომელშიც უმთავრესია მთავარი პერსონაჟის რთული სულიერი ცხოვრება, მისი გარდასახვები, პიროვნებად ჩამოყალიბების ურთულესი პროცესი; აქედან გამომდინარე, გახლეჩილი, გაორებული პიროვნების, ასევე გახლეჩილი საზოგადოების გამთლიანების მიზანდასახულობა ნარმართავს რომანის სიუჟეტსა და კომპოზიციას. რომანის მთავარი პერ-

სონაჟი სულიერების, მაღალი იდეალებისა და მარადიული ღირებულებების მაძიებელია, სულიერი წიაღის, სულიერი მამის მაძიებელია, რომელსაც „გულისგული ეუბნებოდა: ძიდან დაქირავებულამდე ჩამოქვეითდიო“. ამიტომ რომანის დასასრული, უფრო ზუსტად, ბოლო ფრაზა: „მზეს რა ამოიყვანდა!“ კონცეპტუალურ ხასიათს იძენს, რომელსაც უთუოდ დაჰკურავს ტრაგიკული ელფერი. იმედის მომვრელია, რომ ამგვარი რომანები ქართულ ლიტერატურაში ჯერ კიდევ იქმნება. მაკა გოგუაძის რომანი ქართულ ლიტერატურულ ტრადიციებს აგრძელებს.

XX-XXI საუკუნეების მიჯნის ქართულ ლიტერატურას საზღვარგარეთაც ჰყავს წარმომადგენლები, რომელთა ნაწილი ქართულად წერს, ნაწილიც – იმ ენაზე, რომელ ქვეყანაშიც ცხოვრობს. მათგან ნინო ხარატიშვილი მინდა გამოვყო და ზოგი რამ მოგახსენოთ. იგი თბილისში დაბადებული ახალგაზრდა პროზაიკოსი და დრამატურგი გახლავთ. ოლონდ გერმანიაში ცხოვრობს და გერმანულად წერს. ნინო ხარატიშვილი საოცრად პოპულარულია დასავლეთ ევროპის ქვეყნებში, მისი დრამები დასავლეთის უდიდეს თეატრებში წარმატებით იღებება, მიღებული აქვს საერთაშორისო ჯილდოები, პრემიები. მისმა რომანმა „უუჟაბ“ გამოქვეყნებისთანავე მიიპყრო საყოველთაო ყურადღება, იგი ქართულადაც ითარგმნა და გამოიცა. ესაა რომანი წიგნზე, ლიტერატურაზე, უფრო ზუსტად რომ ვთქვათ, იმაზე, თუ რა გავლენას ახდენს ლიტერატურა ადამიანის სულიერინტელექტუალურ სამყაროზე. ესაა რომანი, რომელიც აჩვენებს, თუ როგორ შეიძლება ერთმა წიგნმა წებისმიერი ადამიანის ცხოვრება თავდაყირა დააყენოს. ნინო ხარატიშვილმა ორიოდე წლის წინ დაასრულა 1275-გვერდიანი რომანი „მერვე სიცოცხლე“, რომლის ქართულ ენაზე თარგმნა ახლა მიმდინარეობს. მწერლის სიტყვით, ესაა ერთი ოჯახის ისტორია, რომელიც 1900 წლიდან იწყება და 2007 წლამდე მოდის. იგი საქართველოსა და საბჭოთა კავშირის ისტორიას მოიცავს, რაც ძირითად თხრობას გასდევს. მოქმედების ადგილებია თბილისი, პეტერბურგი, მოსკოვი, ლონდონი, ბერლინი, ე.ი. რომანის მხატვრული სივრცე უკიდეგანოა. რომანისათვის ავტორს დასჭირდა რუსეთის ბიბლიოთეკებსა და არქივებში მუშაობა.

\* \* \*

ბოლოს მინდა გაგიზიაროთ ჩემი დამოკიდებულება საქართველოში არსებული თანამედროვე სულიერ-ინტელექტუალური ვითარების შესახებ: ავტორიტეტშელაბულ წიგნიერებას, განათლებას დღეს ლიტერატურა, ჭეშმარიტად ღირებული ლიტერატურა უნდა დაეხმაროს, მეტიც – გადაარჩინოს. ჭეშმარიტმა შემოქმედმა უნდა

თქვას თავისი ორიგინალური, კულტურის, სულიერების, ინტელექტურის გადამრჩენი სიტყვა, რადგან ლიტერატურას, საზოგადოდ კულტურას, წიგნიერი, განსწავლული ადამიანები ქმნიდნენ და ქმნიან.

ჰერაკლიტეს ცნობილი სიტყვების მიხედვით, ისტორიული მდინარების ყოველი მონაკვეთი განუმეორებელია. სწორედ მისი ამ შეუცვლელი და შეუვალი თვისების მიზეზის გამო ადამიანს მეორედ არ მოუწევს მდინარების იმ ნაკადში, იმ მონაკვეთში ჩასვლა, რომელშიც ერთხელ უკვე ჩავიდა, ვინაიდან ყოველი ახალი ნაკადი და მასში ჩასვლა განუმეორებელია. ეს იმასაც მიუთითებს, რომ ყოველი ადამიანი განუმეორებელია, თუნდაც მას ბევრი საერთო თვისება თუ გარეგნული წიშანი აკავშირებდეს წინაპრებთან, თანამედროვეებთან თუ მომავალ თაობებთან. ყოველი ადამიანი ინდივიდია, განუმეორებელი ინდივიდი, რომელიც ფიქრობს იმაზე, საიდან მოდის, საით მიდის, რა მოეთხოვება და რა უნდა აკეთოს. მართალია, ამ თვალსაზრისის განზოგადება ძნელია, რადგან თუნდაც ძლიერად გამოკვეთილი ინდივიდი-პიროვნებებიც კი ორად იყოფიან. ასევეა ლიტერატურაც, ნებისმიერი ქვეყნის ლიტერატურა ინდივიდუალურია, რადგან ადამიანების, ქვეყნების ცხოვრებას ასახავს, სამყაროში მიმდინარე პროცესებს ეხმიანება. ამიტომ ლიტერატურა სულიერ საზრდოს აწვდის ნებისმიერ ადამიანს, ვისაც უყვარს წიგნი და კითხვა, ან არ უყვარს, მაგრამ იცის მისი ფასი და ლირებულება. საქმე ისაა, რომ ქართული ლიტერატურა მისაწვდომი უნდა გახდეს მსოფლიოსთვის. დავიმოწმებ რევაზ თვარაძის სიტყვებს, რომ დასანი იქნება, თუ მსოფლიოსათვის უცნობი დარჩება ქართული ლიტერატურა, მსოფლიო ლიტერატურა ბევრს დაკარგავს, თუ ქართული ლიტერატურა არ ეცოდინება. ყოველი ქვეყნის ლიტერატურა თავისი ქვეყნის ძველი და თანამედროვე საზოგადოებრივი ვითარების, პოლიტიკური ისტორიის ცოდნას იძლევა, რადგან ყოველი ნაწარმოები იკითხება, როგორც თავისი ეპოქის სულიერი და ინტელექტუალური დონის გამოხატულება, თავისი ერის საზოგადოებრივი ცხოვრების ანარეკლი. ქართული ლიტერატურაც საქართველოს ისტორიის, ქართველი ერის სულიერი და ინტელექტუალური შესაძლებლობების გამოვლინებაა და, შესაბამისად, მისი განვითარება და მსოფლიოსათვის გაცნობა ჩვენი უპირველესი მოვალეობა უნდა იყოს.

# ଓଡ଼ିଆରେ

## გულიკო ბეჭაური

### „ვეფხისტყაოსნის“ ზეაირად მცოდნეთა მასამა კონკურსი უნივერსიტეტი

„ვეფხისტყაოსნის“ ზეპირად ცოდნას არამატერიალური კულტურის ძეგლის სტატუსი მიენიჭა. 2016 წელი შოთა რუსთაველის 850 წლის იუბილეა, ამიტომ იუნესკომ ეს წელი შოთა რუსთაველის წლად გამოაცხადა. ამ საიუბილეო თარიღს ვუძღვნით ჩვენს წერილს, რითიც კიდევ ერთხელ გამოვხატავთ უდიდეს სიყვარულსა და პატივისცემას უკვდავი პოემისადმი, რომელიც ყველა დროსა და ეპოქაში მნიშვნელოვანი ძეგლი იქნება, რომელსაც შეუძლია ნებისმიერ ცხოვრებისეულ კითხვას და პრობლემას გასცეს პასუხი.

არასოდეს დამავიწყდება „შოთაობა“, რომელიც იყო ყველაზე დიდი და ეროვნული დღესასწაული სამცხე-ჯავახეთში. გავრბოდით მანქანისკენ, სადაც შოთა რუსთაველის სურათი იყო. ყველას გვინდოდა სურათთან ახლოს ყოფნა, ამიტომ ერთმანეთს ვეჯიბრებოდით, ვის შეხვდებოდა ეს ადგილი. საოცარი სიყვარული დღესაც მომყვება, ის ბავშვური შთაბეჭდილებები დღესაც ცოცხალია და ერთადერთი, რაც ძალიან მინდა, ის არის, რომ „ვეფხისტყაოსანი“ ყველას უყვარდეს, განსაკუთრებით - მომავალ თაობას.

1966 წელი... ასპინძის კულტურის სახლი სავსეა ხალხით. „ვეფხისტყაოსნის“ ზეპირად ცოდნაში პირველობისათვის რამდენიმე კანდიდატი იძრძვის. მიხა ჯვარიძის ხმა ისმის... შეუცდომლად ყვება სტრიქონებს და ერთადერთი გრძნობა, რომელიც ასპინძელებს ეუფლებათ, სიამაყეა, შენი კუთხის ლირსეული ადამიანის მოსმენით გამოწვეული. მაშინ სკოლას ამთავრებდა... აღტაცებული და გახარებული ადევნებდა თვალს კონკურსი... თან პაპის ნათქვამი ახსენდება: „თუ გინდა ცოდნა და განათლება მიიღო, „ვეფხისტყაოსანი“ უნდა ისწავლო“. ეს სიტყვები მთელი ცხოვრება ახსოვდა, პროფესიაც ისეთი აირჩია, პირდაპირ თუ ირიბად ყოველთვის „ვეფხისტყაოსანთან“ იყო დაკავშირებული. ბავშვური შთაბეჭდილებები, ოჯახის დარიგება, ხალხის ემოცია და სიხარული - ის დიდი მოტივი გახდა, რითაც თავს ვალდებულად თვლის, ყველაფერი გააკეთოს

იმისათვის, რომ შოთა რუსთაველის „ვეფხისტყაოსანი“ უყვარდეს და ახსოვდეს ხალხს, განსაკუთრებით მომავალ თაობას.

ასე შორიდან მიყვარს ხოლმე იმ აზრზე ფოკუსირება, რომლსაც ვეხები და ვწერ. ვწერ „ვეფხისტყაოსანის“ ზეპირად ცოდნაზე და მინდა მადლობა გადავუხადო იმ პიროვნებას, ვინც ამ ტრადიციას საფუძველი ჩაუყარა. ეს ბატონი მერაბ ბერიძეა, სამცხე-ჯავახეთის სახელმწიფო უნივერსიტეტის რექტორი. მიჭირს მასზე საუბარი, მისაყვედურებს კიდეც (არ უყვარს ქება), მაგრამ ეს ჩვენი ისტორიაა და ყველამ უნდა იცოდეს, გაიგოს, შეაფასოს. სერგი მიხალკოვი მახსენდება: „ყველაფური ბავშობიდან იწყება“....

1999 წელი... ახალციხის უნივერსიტეტის სააქტო დარბაზი... „ვეფხისტყაოსანის“ ზეპირად ცოდნაში კონკურსია. ერთმანეთს რამდენიმე ზეპირად მცოდნე ეჯიბრება. უიურის თავმჯდომარე, უნივერსიტეტის რექტორი, გამარჯვებულს აცხადებს: „დღევანდელი კონკურსის გამარჯვებულია ანრო ცირეკიძე“. დარბაზში მქუხარე ტაში გაისმა... კომპეტენტურმა უიურიმ ობიექტური გადაწყვეტილება მიიღო.

2015 წლის დეკემბრში ჩატარებულ კონკურსს წინ უძლოდა არა-მატერიალური კულტურული მემკვიდრეობის დაცვის ეროვნული სააგენტოსა და სამცხე-ჯავახეთის სახელმწიფო უნივერსიტეტს შორის გაფორმებული მემორანდუმი, რომელიც, გვჯერა, მნიშვნელოვნად შეუწყობს ხელს ეროვნული კულტურული ფასეულობების დაცვას და პოპულარიზაციას. 2015 წლის 30 სექტემბერს „ვეფხისტყაოსანის“ ზეპირად ცოდნას არამატერიალური კულტურული მემკვიდრეობის ძეგლის სტატუსი მიენიჭა. ეს ფაქტი ძალიან მნიშვნელოვანია და კიდევ უფრო დიდი პასუხისმგებლობის წინაშე დაგვაყენა, რადგან ამ საქმეში ჩვენმა უნივერსიტეტებმაც მნიშვნელოვანი წვლილი შეიტანა. იმავე დღიდან დავიწყეთ მზადება კონკურსის მოსამზდებლად. ჩვენი ფაკულტეტი აქტიურად ჩაერთო საორგანიზაციო საკითხების მოგვარებაში. დაფუკავშირდით მუნიციპალიტეტებს, რესურსცენტრებს, გავავრცელეთ ინფორმაცია თანამედროვე მედია საშუალებებით. მონაწილეობის მისაღებად დარეგისტრირდა სამი კონკურსანტი: ქუთაისიდან ზემფირა გვამბერიძე, ტყიბულიდან ანრო ცირეკიძე, ახალციხიდან თემურ ხუციშვილი. კონკურსი ჩატარდა 10 დეკემბერს.

აქვე მინდა უიურის შემადგენლობა მოგახსენოთ: თავმჯდომარე - უნივერსიტეტის რექტორი, პროფესორი მერაბ ბერიძე, წევრები: რექტორის მოადგილეები სასწავლო და სამეცნიერო დრაგში ნიკო

ახალკაცი, მაკა ბერიძე-კაჭკაჭიშვილი, უნივერსიტეტის პროფესორები: ნესტან სულავა, ქეთევან გრძელიშვილი, დალი ბეთხოშვილი და ვახტანგ ინაური. კონკურსს ესწრებოდა საქართველოს კულტურული მექანიდრეობის დაცვის ეროვნული სააგენტოს წარმომადგენელი ქალბატონი მაკა თაქთაქიშვილი, რომელმაც სცენაზე მისალმების დროს აღინიშნა, რომ 2016 წელს რესპუბლიკური ლონისძიება „ვეფხისტყაოსნის“ ზეპირად ცოდნაში სამცხე-ჯავახეთის სახელმწიფო უნივერსიტეტში ჩატარდებოდა. უნივერსიტეტის რექტორატის გადაწყვეტილებით გამარჯვებულებისათვის დაწესდა სამი პრემია: I ადგილისთვის - 1000 ლარი, II-სთვის - 800, ხოლო მესამე ადგილისთვის - 600 ლარით.

საკმაოდ დიდი და დაძაბული პაექრობის შემდეგ გამოვლინდა ორი გამარჯვებული, რომელთა შორის არჩევანის გაკეთება შეუძლებელი გახდა. მსჯელობის შემდეგ ჟიურიმ მიიღო გადაწყვეტილება, რომლის თანახმადაც ორივე კონკურსანტი, ანრო ცირეკიძე და თემურ ხუციშვილი, გახდა პირველი ადგილის პრემიის მფლობელი. „ვეფხისტყაოსნის“ ზეპირად ცოდნის კონკურსში მონაწილეობა მიიღეს ნინოწმინდის მუნიციპალიტეტის სოფელ განძის რუსთაველის სახელობის სკოლის მოსწავლეებმა, რომლებმაც ქართულ და სომხურ ენებზე ზეპირად წაიკითხეს სტრიქონები „ვეფხისტყაოსნიდან“. სკოლის ქართული ენის მასწავლებელმა ქალბატონმა ნანული ბარჯაძემ პრემიისათვის დარგინა მიმდინარეობდა, როგორც გაკვეთილი „ვეფხისტყაოსნაზე“.

კონკურსი იყო მეტად ემოციური, დაძაბული და საინტერესო. 10 დეკემბერი უნივერსიტეტის ისტორიაში ჩაიწერა, როგორც ერთ-ერთი დასამახსოვრებელი დღე, რომელმაც კიდევ ერთხელ შეგვახსენა, რომ „ვეფხისტყაოსანი“ იმ მაღალი სულიერი ღირებულებების მატარებელი საუნჯეა, რითაც ყოველთვის იამაყებს ქართველი ერი.

იუნესკოს გადაწყვეტილებით, შოთა რუსთაველის 850 წლისთავთან დაკავშირებით, 2016 წელი რუსთაველის წლად გამოცხადება იყო კიდევ ერთი აღიარება და პატივისცემა იმ უკვადავი პოემისა, რომელმაც უდიდესი როლი შეასრულა ქართველი ხალხის სულიერი კულტურის განვითარების პროცესში. მსოფლიოს მრავალ ქვეყანაში საზეიმოდ აღინიშნა ეს დღესასწაული, მათ შორის ჩვენს ქვეყანაშიც და ჩვენს უნივერსიტეტში.

2016 წლის თებერვლიდან დაიწყო მზადება ახალი კონკურსისათვის. ახლა უკვე ჩვენ და კულტურის ეროვნული სააგენტოს წარმო-

მადგენელმა ქალბატონმა მაკა თაქთაქიშვილმა დავიწყეთ პროგრამის მომზადება და ინფორმაციის გავრცელების კამპანია. მთელი საქართველო ჩაერთო ამ პროცესში, ადგილობრივი თვითმმართველობები, რესურსცენტრები, საზოგადოებრივი ორგანიზაციები, მეცნიერებათა აკადემია, ლიტერატურისა და ენათმეცნიერების ინსტიტუტები, განათლებისა და მეცნიერების, კულტურისა და სხვა სამინისტროები. საერთო სახალხო აქტივობაში შედეგი გამოიღო - თავდაპირველად 35 კონკურსანტი დარეგისტრირდა ქვეყნის თითქმის ყველა რეგიონიდან, მაგრამ როგორც კი გაიგეს კონკურსის პირობები, 20-მა მათგანმა მოხსნა კანდიდატურა. ქვემოთ მოგახსენებთ იმ 15 მონაწილის ვინაობას, რომლებსაც რეალურად უნდა მიეღოთ მონაწილეობა, მაგრამ ზოგიერთმა ავადმყოფობის გამო ვერ შეძლო და დასკვნით დღეს 9 კანდიდატი ჩამოვიდა ახალციხეში.

### **„ვეფხისტყაოსნის“ ზეპირად მცოდნეთა კონკურსის მონაწილეთა ნუსხა:**

1. ხუციშვილი თეიმურაზ - ახალციხე
2. ბერიძე ლავრენტი - ახალციხე
3. აფციაური ევგენია - ახალციხე
4. ვანაძე შალვა - ადიგენი
5. აკოფაშვილი პავლე - ადიგენი
6. სალალაია ნანა - ბორჯომი
7. ჩხეიძე ომაზ - ბორჯომი
8. ცირეკიძე ანრო - ტყიბული
9. გუმბერიძე ზემფირა - ქუთაისი
10. ლანჩავა ნათელა - ტყიბული
11. ბექაური შალვა - დუშეთი
12. აფციაური გრიშა - დუშეთი
13. სიყმაშვილი თინათინ - ლაგოდეხი
14. ნესუაშვილი მანანა - გურჯაანი
15. ელიტაშვილი მაია - გურჯაანი

ამ ჩამონათვალიდან კონკურსში მონაწილეობა ვერ მიიღეს ევგენია აფციაურმა, ნანა სალალაიამ, შალვა ვანაძემ, ლავრენტი ბერიძემ, ომაზ ჩხეიძემ, შალვა აკოფაშვილმა.

უშულაოდ კონკურსის დაწყებას წინ უძლოდა უნივერსიტეტის პირველი კორპუსის ფორემ „ვეფხისტყაოსნის“ თემატიკაზე შესრულებული ნახატების გამოფენა, რომლის ავტორები ნინოშმინდის მუ-

ნიციპალიტეტის, სოფელ განძის რუსთაველის სახელობის სკოლის, ასპინძის მუნიციპალიტეტის სოფელ რუსთავის, სოფელ ოშორის საჯარო სკოლების მოსწავლეები და უნივერსიტეტის დიზაინის მიმართულების კურსდამთავრებული თამარ თამარაძე იყვნენ. სამეცნიერო ბიბლიოთეკაში კი ადიგენისა და ასპინძის მუნიციპალიტეტების სოფლების: რუსთავის, უდისა და არლის საჯარო სკოლის მოსწავლეებმა რეჟისორ ნოდარ ბეგიაშვილის მეთვალყურეობით პირდაპირ რეჟისორში შეასრულეს ილუსტრაციები „ვეფხისტყაოსნიდან“.

კონკურსში გამარჯვებულთა დაჯილდობა და საზეიმო ცერემონიალი 23 ივნისს, ახალციხის ციხის ტერიტორიაზე გაიმართა, სადაც მონაწილეობა მიიღეს ნინოწმინდის მუნიციპალიტეტის სოფელ განძის რუსთაველის სახელობის სომხური სკოლის მოსწავლეებმა, ახალციხის სასულიერო სემინარისათან არსებული არლის სამრევლო სკოლის გუნდმა „ირმისამ“ (ხელმძღვანელი მონაზონი ალაპია ბეშაძე), რომელმაც ბრწყინვალედ შეასრულა ქართული საგალობლები.

კონკურსში გამარჯვებულები სამცხე-ჯავახეთის სახელმწიფო უნივერსიტეტის რექტორმა, პროფესორმა მერაბ ბერიძემ და საქართველოს კულტურული მემკვიდრეობის ეროვნული სააგენტოს გენერალურმა დირექტორმა ნიკოლოზ ანთიძემ დაავილდოვეს.

როგორც უკვე აღვნიშნე, საბოლოოდ კონკურსში ცხრა კონკურსანტი მონაწილეობდა. მათგან პირველი-მეორე ადგილი კვლავ თემურ ხუციშვილმა და ანრო ცირკეიძემ გაიყვეს, მესამე ადგილზე კი გურჯაანელი მანანა ნესუაშვილი გავიდა.

აქვე მოგახსენებთ კონკურსის უიურის წევრებს:

ჟიურის თავმჯდომარე - უნივერსიტეტის რექტორი, პროფესორი მერაბ ბერიძე;

წევრები: მეცნიერებათა აკადემიის რუსთაველის კომიტეტის თავმჯდომარის მოადგილე, პროფესორი, პარმენ მარგველაშვილი;

ლიტერატურის ინსტიტუტის რუსთველოლოგიის განყოფილების უფროსი ვანო ამირხანაშვილი;

კულტურის მინისტრის მრჩეველი გიორგი გეგეჭკორი;

რუსთველოლოგი, უნივერსიტეტის პროფესორი ნესტან სულავა;

რექტორის მოადგილე სამეცნიერო დარგში, ასოცირებული პროფესორი მაკა კაჭკაჭიშვილი;

8 საათის განმავლობაში ისინი ყურადღებით უსმენდნენ ზეპირად მცოდნეებს.



2016 წლის 23 ივნისი, კონკურსის მიმდინარეობის პროცესი, მარცხნიდან მარჯვნივ მესამე რიგში: რუსთაველის საზოგადოების თავ-რე დავით შემოქმედელი, მეორე რიგში: კულტურული მინისტრის მრჩეველი გიორგი გეგეჭვირი, საქართველოს კულტურული მემკვიდრეობის დაცვის ეროვნული სააგენტოს დირექტორის მოადგილე დავით ლომიტაშვილი, ქალაქ ახალციხის მერის მოადგილე ზაზა თამარაშვილი; პირველი რიგში, კონკურსში გამარჯვებული თემურ ხუციშვილი; სახალხო მთქმელი, ფოლკლორის სახელმწიფო პრემიის ლაურიატი, მოსე ძექაური; კონკურსის ერთ-ერთი მონაწილე დუშეთის მუნიციპალიტეტიდან, ფილოლოგი შალვა ძექაური.

ვუყურებ მოხუცებს, რომლებმაც ზეპირად იციან „ვეფხისტყაოსანი“ და გული სიამაყით მევსება. ეს ის ადამიანები არიან, რომლებიც „ვეფხისტყაოსნის“, თავისი ქვეყნის, ხალხის სიყვარულით გაიზარდნენ და ახლა სურთ ეს სიყვარული მომავალ თაობას, საზოგადოებას და ქვეყანას გადასცენ. კიდევ ერთხელ შევგახსენონ, რომ არაფერია იმაზე ძლიერი, ვიდრე მოყვასის, შენი ქვეყნისა და ხალხის სიყვარული.

1966 წელი... ასანძის კულტურის სახლი სავსეა ხალხით. „ვეფხისტყაოსნის“ ზეპირად ცოდნაში პირველად ტარდება კონკურსი. მიხა ჯვარიძის ხმა გულის სილრმეში აღწევს... სიყვარულზე, მეგობრობასა და ყველა პიროვნულ ღირებულებაზე აფიქრებს ხალხს. „თუ გინდა ცოდნა და განათლება მიიღო „ვეფხისტყაოსანი“ უნდა ისწავლო“... ასე ამბობდნენ და აფასებდნენ „ვეფხისტყაოსანს“ ჩვენი წინაპრები.

გვჯერა, ეს სიტყვები ყველა ღროში აქტუალური და მნიშვნელოვანი იქნება.

# გამოხატულის

## სერგო წურწუმია

### „არავი“ – ახალი ჟურნალი ქვეყნის სამხრეთ კარიბზედაც\*

ახალციხის სახელმწიფო უნივერსიტეტის ეროვნულ-სახელმწიფოებრივი დანიშნულება ამ რეგიონისა და სრულიად საქართველო-სათვის იმთავითვე გარკვეული, ნატელი იყო და ამის თაობაზე სიტყვას არ გავაგრძელებთ. ჩვენთვის ამჯერად განსაკუთრებული დაინტერესების საგანს ის ჟურნალი წარმოადგენს, რომელსაც უნივერსიტეტი სცემს.

„არავი“ დაურქმევიათ მესვეურებს მისთვის და მორგებულადაც: „არავი არს ქარი სამხრეთით, განმადნობელი ყინვათა“, ასე ჰქონია სულხან-საბას განმარტებული ამ სიტყვის მნიშვნელობა. სწორედ რომ ამგვარი ქარის ქროლვასავით მოაქვს დანარჩენ საქართველოში მესხეთ-ჯავახეთის თბილი და მაღლიანი სიტყვა ამ მომცრო ზომის ჟურნალს, რომლის ორი წერტილი „განთიადის“ რედაქციასაც გვხვდა საჩუქრად ახალციხის უნივერსიტეტში საქმიანი სტუმრობის დროს.

შეუძლებელი იყო, არ გაგვხარებოდა და შეუმჩნევლად ჩჩაგვეტა-რებინა განათლების ამ მნიშვნელოვანი კერის მესვეურთა მცდელობა, მხატვრული სიტყვის ძალითაც შესწოდნენ თავიანთ მშობლიურ კუთხეს, გაეცნოთ გაეცნოთ მისი შემოქმედებითი ძალები მთელი ქვეყნისათვის.

ცარიელ ადგილას, ტრადიციისა და საძირკველის გარეშე, არაფერი მნიშვნელოვანი არ იქნება და არც „არავი“ მოსულა თავისით. უნივერსიტეტის იმთავითვე, შექმნის დღეებიდანვე ჰქონდა მცდელობა ლიტერატურული ცხოვრების გამოცოცხლებისა და მწერლური ტრადიციის აღორძინებისა.

წლების განმავლობაში არაერთი პოეტური თუ პროზაული კრებული გამოიცა, რამაც თვალსაჩინო გახადა რეგიონის შემოქმედებით ძალა.

\* „განთიადი“, 5-6, 2016 წელი, გვ. 184-186

იმავდროულად მიმდინარეობდა ინტენსიური მთარგმნელობითი მოღვაწეობა. მრავალი შესანიშნავი ნაწარმოები ითარგმნა უნივერსიტეტის ძალებით ინგლისური, ფრანგული, თურქული, სომხური, ახალბერძნული და სხვა ენებიდან. საბოლოოდ მთარგმნელობით სახელოსნოდ ჩამოყალიბებულმა ჯგუფმა მრავალი საინტერესო თარგმნილი ნიმუში სესძინა ქართულ ლიტერატურულ სივრცეს. შერიყო და გაზრდით „მესხეთი“ იშვა, შემდგომ კი უნივერსიტეტის პირველი კრებული „სიტყვად“.

ურთულეს წლებში კი მხატვრული სიტყვის, პოეზიის ერთგულება გახლდათ პედაგოგებისა და სტუდენტების უპირველესი საზრუნავი. სწორედ იმ წლებში ჩამოყალიბდა ლიტერატურული ხუთშაბათობების ტრადიცია, რამაც იმედი ჩაუსახა მის მესვეურებს, რომ შეძლებდნენ სისხლსავსე ლიტერატურული ცხოვრების გაჩაღებას, ააღორძინებდნენ უძველეს ლიტერატურულ ტრადიციებს და აღადგენდნენ დროთა ავტედითობით განწყვეტილ მაგისტრალურ ხაზს.

მოდიოდნენ სტუდენტთა ახალი და ახალი ნიჭიერი თაობები, აცოცხლებდნენ უნივერსიტეტის ლიტერატურულ გარემოს, იძლეოდნენ იმედს, რომ მათი ძალისხმევით შეიქმნებოდა მძლავრი სამხრეთული ლიტერატურული სკოლა.

სწორედ „სტყუას“ გამოჩენამ დააგვირგვინა მრავალწლიანი ლიტერატურული მაჯისცემის გამძაფრებისა და შემოქმედებითი ცხოვრების აღორძინებისათვის.

ეს უკვე იყო მნიშვნელოვანი განაცხადი და საფუძველი შემდგომში უფრო მასშტაბური სიტყვის სათქმელად, ამან შეასრულა წარმართული როლი ახალი, ახალი უფრო მნიშვნელოვანი და მასშტაბური ლიტერატურული გამოცემის შესაქმნელად და აი, დადგა დიდი ხნის ჩანაფიქრის აღსრულების დროც: იშვა „არავი“.

ოცდახუთწლიანი ლიტერატურული ცხოვრების შეჯამებად და სამომავლი პერსპექტივის დაასასახად გაჩნდა პერიოდული გამოცემის დაარსების აუცილებლობა. მას უნდა შემოეკრიბა რეგიონის გამორჩეული შემოქმედებითი ძალები - სამეცნიერო ინტელიგენცია, პოეტები, პროზაიკოსები. მეცნიერული ლიტერატურული კრიტიკის, ლიტმცოდნებითი თუ ისტორიის განხრით შექმნილი ნაშრომების ნაკლებობას უნივერსიტეტი ისედაც არ განიცდიდა.

დიდ ამოცანას უსახავს უნივერსიტეტსა და „არავს“ უნივერსიტეტის რექტორი და უურნალის რედაქტორი, პროფესორი მერაბ ბერიძე გამოცემის მე-2 ნომრის წინასიტყვაობაში: „დიდი ლიტერა-

ტურე უნდა მოვიდეს. ჟრირუბლო ციდან წვიმა არ იცის. ჩვენს უნივერსიტეტს აქვს პრეტენზია, რო შექმნას საფუძველი დიდი ლიტერატურის მოსვლისთვის. რომ არ ყოფილიყვნენ სერაპიონ ზარზმელი და გრიგოლ ხანძთელი, არ იქნებოდა რუსთაველი“...

დიდი დაიმედებით შეგვიძლია ვთქვათ, „არავი“ ღირსეულად შეასრულებს მასზე დაკისრებულ ამ საპატიო მისიას – რეგიონის ლიტერატურულ ძალებს, შემოქმედებითი ნიჭით დაჯილდოებულ სტუდენტობას, მეცნიერ-მუშაკებს მისცეს თავიანთი ნალვანის ქვეყნის მასშტაბით გატანის შესაძლებლობა, ამის განცხადების საშუალებას გვაძლევს უკვე გამოცემული პირველივე ნომრები.

ამასთან ერთად „არავი“ ფურცლები უნდა დაეთმო თანამედროვე ქართული ლიტერატურის თვალსაჩინო წარმომადგენლებისათვის სხვადასხვა რეგიონებიდან თუ დედაქალაქიდან, რათა შექმნილყო სათანადო ლიტერატურული დონე და მას მიეცა ადგილობრივი შემოქმედებისათვის საკუთარი ძალების რწმენისა და ცნობილ კალმოსანთა გვერდიგვერდ თავის ღირსეულად წარმოჩენისა.

განვლილი გზა, მიღწევები და სამომავლო ორიენტირები, ცხოველი ლიტერატურული ურთიერთობები, შემოქმედებითი დუღილი და სამეცნიერო ნალვანი შესანიშნავად წარმოჩნდა „არავის“ ორივე ნომრისთვის წამძღვარებულ მერაბ ბერიძის წერილებში – „ზოგი რამ ლიტერატურული ცხოვრების ისტორიიდან უნივერსიტეტში“ და „სტუმრად უნივერსიტეტში“.

თვალის ერთი გადავლებაც კი საკმარისია უურნალის ლიტერატურული პროდუქციით დასაინტერესებლად. მკითხველს არაერთ შესანიშნავ ავტორთან და ნანარმოებთან მოუწევს შესვედრა.

ღუბრიკა „პროზა“ წარმოდგენილია გიორგი სოსიაშვილისა და რევაზ მიშველაძის მოთხრობებით: „დამიანეს სტუმარი“ (№1) და „ორმოცდაცხრა“ (№2).

მესხეთის ისტორიის ტრაგიკული ფურცლები, ქვეყნის თავისუფლებისა და დამოუკიდებლობისათვის მისი მკვიდრების გმირული ბრძოლაა ასახული ზელიმხან მაღრაძის მოთხრობებში „არცა ამბორს-გიყო, ვითარცა იუდა“ და „ქვაკაცა“.

საინტერესოდ იყითხება მე-2 ნომერში დაბეჭდილი ივანე ჯაფარიძის მონადირული ჩანაწერები, გიგი ხორნაულის მემუარები, პროფესორ უჩა ბლუაშვილის ნარკვევი XX საუკუნის 20-იანი წლების პოლიტიკური პერიპეტიიების შესახებ, რასაც სეენირა საქართველოს სახელმწიფოებრივი დამოუკიდებლობა; პროფესორ გიორგი

ბუცხრიკიძის მასალა სამცხე-ჯავახეთის ცნობილი ტერასების სამშენებლო ტრადიციების შესახებ.

პროფესორ ნატო ყრუაშვილის კვლევა მესხეთის პირველი სტამბის თაობაზე ნათელს ჰქონის პოლიგრაფიული დარგის განვითარების ერთ ეტაპს საქართველოში.

ყურადსალებია მაკა კაჭკაჭიშვილი-ბერიძის წერილი „თანამედროვე ქართული პოეზის ენისათვის“, რომელშიც ქართველ შემოქმედთა პოეტური ნაღვანია შესწავლილი ენობრივი თვალსაზრისით „ცისკარი 1852“-ის მასალების საფუძველზე.

რუბრიკით „ლიტერატურული კრიტიკა“ დაბეჭდილია ვახტანგ ინაურის წერილი „ნოდარ დუბბაძე, „მარადისობის კანონი“, ხოლო რუბრიკა „ეს“ ნარმოდგენილია გიორგი მესხის ესეისტური წერილით „ჯვეარცმული დიონისიო“, რომელშიც ფრიდრიხ ნიცეს „ტრაგედიის დაბადება“ მიმოხილული. „პოეზიაში“ უურნალი ნარმოგვიდგნენს ვაჟა ხორნაულის, თინათინ მღვდლიაშვილის, მერაბ კვიცარიძის, სალვა კელოშვილის, მარინა ყიფაინის, ზაირა კელოშვილის ლექსებს.

და მაიც, განსაკუთრებით გამოვყოფთ უურნალში ნარმოდგენილ თარგმანებს, რომელთვან არაერთი გამოირჩება შესრულების დონით, მაგრამ გვინდა, აქაც გამოვყოთ გრიგოლ რობაქიძის „ორი ძმა“, გერმანულიდან თარგმნილი ნუგეშა გაგნიძის მიერ, გამოჩენილი თურქი მწერლის რემად ნური გუნთექინის „ბაუშვების ჩხუბი“, მთარგმნელი - მარინე შონია, აგრეთვე - ფრიდრიხ შილერის „ხელთამანი“, მთარგმნელი - ვასილ მამულაშვილი.

დარწმუნებული ვართ, „არავის“ შემდგომი ნომრები მრავალ ახალ ავტორსა და ნანარმოებებს ნარმოიჩენს, იგი იქნება ახალი, აქამდე უცნობი მწერლების ქომაგი და გზის დამლოცავი, გაიყვანს შემოქმედებით ძალებს რეგიონებში, როგორც მას მესვეურები უსახავენ მიზნად, რათა „ქართული სიტყვა ძალუმად გაისმოდეს ყველგან“.

იმედია „არავი“ დარჩება ერთგული თავისი მისისა — დაამკვიდროს საქართველო იქ, სადაც საქართველოა და ხმამაღლა ახმიანოს ქართული სიტყვა საქართველოს იმ მხარეში, სადაც ოდესალაც დარწეულა ქართული სულიერებისა და სახელმწიფო ბრიობის აკვანი, რათა მწერლობას შეეძლოს „საკუთარ ფესვებთან ხშირი შეხება, რომ არ გაცვდეს ეროვნული ემოცია, სულერთი არ გახდეს მწერლისათვის, ვისთვის წერს იგი და ვინ კითხულობს მის ნანარმოებს“, ამავდროულად - დარჩება სამხრეთულ გამოცემად, „რადგან სამხრეთი ყოველთვის სითბოს, ერთიანობის სიმბოლო იყო საქართველოსთვის“, რათა, „გაღლვეს ყინული, რომელიც თანამედროვე „დათიოებულ“ ადამიანთა გულებშია და „არავმა“ სიკეთე მოუტანოს ჩვენს ქვეყანას“.

# გამოხატული

ავთანდილ მესხი (ავთანდილ ბერიძე)

„არავი არს ქარი სამხრეთით“\*

ოცდახუთ წელზე ცოტა მეტი დრო გავიდა, მას შემდეგ, რაც უძველესი ისტორიის მქონე ახალციხეში, სამცხე-ჯავახეთის სახელმწიფო უნივერსიტეტი დაფუძნდა, უნივერსიტეტი, რომელმაც ამ ხნის მანძილზე იმდენი რამ გააკეთა, რისი გაკეთებაც ბევრმა, თითქმის საუკუნოვანი გამოცდილების მქონე სახელმწიფო უნივერსიტეტებმაც, ვერ შეძლო.

სამცხე-ჯავახეთის სახელმწიფო უნივერსიტეტი – მძლავრი საგანმანათლებლო კერა დღეს თავისი მატერიალურ-ტექნიკური ბაზით, მაღალკავალიფიციური აკადემიური დონის კადრებით, არ ჩამოყარდება ქვეყნის წამყვან უნივერსიტეტებს და ამიტომაცაა, რომ აյ მიმდინარე უმნიშვნელოვანესი პროცესები ყოველთვის საზოგადოების განსაკუთრებული ყურადღების ცენტრშია. რომ არაფერი ვთქვათ, თუნდაც, იმ ფაქტზე, რომ სამცხე-ჯავახეთის რეგიონის საჯარო თუ კერძო სექტორი, მთლიანად ამ უნივერსიტეტის კურსდამთავრებულებითა დაკომპლექტებული. გარდა ამისა, ბევრი მნიშვნელოვანი და საპატიო მისის ავანგარდშიც გვევლინებიან უნივერსიტეტები – რეგიონში არ ტარდება არც ერთი უმნიშვნელოვანესი მასშტაბური ღონისძიება, რომ მათ თავიანთი ავტორიტეტული სიტყვა არ თქვან. ასევე ნიშანდობლივია, საერთაშორისო კონფერენციებსა და სიმპოზიუმებში მათი მოხაწილეობა, რაც უნივერსიტეტის დიდ აღიარებაზე მიუთითებს.

როგორც ჩვენი გაზეთის დაინტერესებულმა მკითხველებმა იციან, რომლის შესახებაც ჯერ კიდევ ჩვენი გაზეთის თებერვლის ნომერში ვიუწყებოდით, ახლახან კიდევ ერთი საინტერესო ფაქტის მომსწრე გახდა რეგიონის მოსახლეობა: ქართული ეროვნული ლიტერატურის განვითარების მიზნით მნიშვნელოვან საგამომცემლო საქმეს ჩაეყარა საფუძველი – გამოვიდა ლიტერატურული და სამეცნიერო-პოპულარული ჟურნალი „არავი“.

\* გაზეთი „ლიტერატურული მესხეთი“, 2016 წ, №8, გვ.11.

ჟურნალის პირველი წომრის გარე ყდაზე მინაწერი გვამცნობს: „არავი“ ჰქვია ჩვენს ლიტერატურულ და სამეცნიერო-პოპულარულ ჟურნალს, სულხან-საბა ორბელიანის განმარტებით: „არავი არს ქარი სამხრეთით, განმადნობელი ყინვათა“;... „თბილი ქარი მესხეთის სიმბოლოა. მესხეთი – საქართველოსი. ჩვენი სურვილი და მიზანია: ჟურნალი „არავი“ ერთნაირი სითბოს, სიყვარულის სიმბოლოდ იქცეს“.

და ამ სითბოსა და სიყვარულისათვის ბრძოლის სიმბოლოს დე-მონსტრირებად იქცა განვლილი ექვსი თვის – ჟურნალის მხოლოდ მექევსე ნომრის გამოცემის შემდეგ ფართო მკითხველის – ახალ-ციხის ინტელიგენციისა და უნივერსიტეტელების წინაშე მომხდარიყო მისი წარდგინება.

სიმბოლურად ჟურნალის წარდგინება არა რომელიმე დიდ აუდიტორიაში, არამედ უნივერსიტეტის ეზოში, ღია ცის ქვეშ მოხდა.

სამცხე-ჯავახეთის სახელმწიფო უნივერსიტეტის რექტორმა, ჟურნალ „არავის“ სულისჩამდგმელმა და სარედაქციო საბჭოს თავმჯდომარემ მერაბ ბერიძემ ვრცელი ანალიზი გაუკეთა ჟურნალის საგამომცემლო საქმიანობას და ხაზგასმით ისაუბრა ჟურნალში დაბეჭდილი თითოეული ავტორის შესახებ, რომ უნივერსიტეტის პროფესორ-მასწავლებელთა და სტუდენტი-ახალგაზრდების გარდა, განსაკუთრებული ადგილი ეთმობა საქართველოს ყველა რეგიონიდან ავტორთა მოზიდვას. ასევე ჟურადლება მიაქცია იმ ფაქტს, რომ ჟურნალის თითქმის ყველა ნომერში იბეჭდება უცხოეთში მცხოვრები ქართველების ლიტერატურული ნაწარმოებები და მისი გავრცელების არეალი გასცდა სრულიად საქართველოს.

მერაბ ბერიძემ დამსწრე საზოგადოებას წარუდგინა სარედაქციო საბჭოს მთელი შემადგენლობა, რომელთა მხრებზეც დგას ჟურნალის საგამომცემლო საქმიანობა.

ჟურნალ „არავის“ გამოცემის თაობაზე ისაუბრეს რექტორის მოადგილემ, სარედაქციო საბჭოს თავმჯდომრის მოადგილემ მაკა კაჭკაჭიშვილი-ბერიძემ, უნივერსიტეტის პროფესორ-მასწავლებლებმა – ვასილ მამულაშვილმა, ვლადიმერ ზედგინიძემ, ახალციხის მერის მოადგილემ ზაზა თამარაშვილმა, გაზეთ „ლიტერატურული მესხეთის“ რედაქტორმა ავთანდილ ბერიძემ და სხვებმა.

## პრეზიდენტის და მინისტრის

**მერაბ ბერიძე, რედაქტორი:** მოგესალმებით ყველას და მადლობას მოგახსენებთ მობრძანებისათვის. დღეს ჩვენმა უნივერსიტეტმა გადაწყვიტა, გაეკეთებინა პრეზენტაცია შურიალისა, რომელსაც „არავი“ ჰქვია. „არავი“ საბას განმარტებით, სამხრეთულ თბილ ქარს ნიშნავს. თავის დროზე, შურიალის პირველ ნომერში პატარა განმარტებას თან ახლდა მცირე ემოციური დანართი, რომ ჩვენ, სამხრეთელებს, მესხეთიდან, სამცხე-ჯავახეთიდან ჩვენს ქვეყანას გვინდა შევთავაზოთ სითბო, რომლის დეფიციტიც სერიოზულად გვაქვს დღეს. ამ სითბოს ჩვენ სხვადასხვა ფორმით გავცემთ, რადგან შურიალი საზოგადოებრივი ხასიათისაა, ის არ არის არც წმინდა მეცნიერული, მას სამეცნიერო-პოპლარული ხასიათიც აქვს, არც ლიტერატურულია მხოლოდ, ლიტერატურულ პრობლემებზე საკმაოდ ვრცელი პუბლიკაციები გვაქვს, მაგრამ მხოლოდ ლიტერატურული არ არის. ამასთან ერთად შურიალს აქვს ამბიცია, დაინტენს სამხრეთ საქართველოში, ამჯერად ახალციხეში, შურიალის გამოცემის ტრადიცია. ეს პატარა საქმე არ გახლავთ. ვფიქრობ, დღევანდელი ჩვენი დამსწრე საზოგადოებისათვის განსაკუთრებული შეხსენება არ არის საჭირო, რომ წიგნის გამოცემის ტრადიცია XX საუკუნის ბოლოს, 1991 წელს, უნივერსიტეტის მაშინდელმა ფილიალმა აღადგინა, როდესაც ადგილობრივ სტამბაში პირველად პატარა „ქართლის ცხოვრება“ გამოიცა ვალერი სილოგავასი. ასევე ურიგო არ იქნება, გავიხსენოთ, რომ ჩვენი გაზეთი, მაშინ „მესხეთი“ ერქვა და დღეს „მესხეთის უნივერსიტეტი“ ჰქვია, გახლავთ პირველი დამოუკიდებელი გაზეთი სამხრეთ საქართველოში. მე პატივს ვცემ იმ შესანიშნავ გაზეთებს, რომელნიც ყველა რაიონში გამოდიოდა მაშინ, მართალია, ისინი იყო პოლიტიკური, პარტიული ხასიათისა, მაგრამ ეს ხაზი მხოლოდ პირველ-მეორე გვერდს ეხებოდა და შემდეგ მშვენიერი ინფორმაციული, პოპოლარული და პატრიოტული სახის პუბლიკაციებიც ჰქონდა, მაგრამ ჩვენ, როგორც დამოუკიდებელი გაზეთი, გამოვედით 1990 წლის დეკემბერში. აი, სწორედ დღეს, ამ ფონზე, ჩვენი უნივერსიტეტი, სამცხე-ჯავახეთის დღეს უკვე სახელმწიფო უნივერსიტეტი, იწყებს შურიალის გამოცემას.

\* პრეზენტაცია გაიმართა 2016 წლის 15 ივლისს სამცხე-ჯავახეთის სახელმწიფო უნივერსიტეტის | კორპუსის ეზოში.

არ მეგონა, რომ უურნალი ამდენი პრობლემის მომცველი იქნებოდა. მე დღეს მართლაც სიამაყით შემიძლია ვთქვა, რომ ეს არის სწორედ ჩვენთვის ძალიან საამაყო და მნიშვნელოვანი. კერძოდ, დღეს „არავს“ თავის 6 ნომერში აქვს უკვე გამოქვეყნებული 900 გვერდი, თითოეული ნომერი დაახლოებით 150-155 გვერდს მოიცავს. არავში არის დღეს 106 პუბლიკაცია, საშუალოდ 9 გვერდზე ერთი პუბლიკაცია მოდის. ეს შეიძლება ისეთი სტატისტიკაა, რომელიც მოსახლეზებელია ლიტერატურის პრობლემებით დაინტერესებული ადამიანებისთვის, მაგრამ, ვფიქრობ, ეს არის ის სტატისტიკა, რამაც პერსპექტივა უნდა განსაზღვროს უურნალის მომავლისა. „არავში“ გვაქვს შემდეგი განცოფილებები და ამ ტიპის განცოფილება არის ჩვენთან 34, როგორიცაა: პროზა, პოეზია, ესე, ლიტერატურის კრიტიკა, საინტერესო ადამიანები, ჩვენი წინაპრები, ინტერვიუ, ემიგრანტული პოეზია, ემიგრანტული პროზა, თარგმანები, ჩვენ ამით ვამაყობთ, რომ დღეს ჩვენი ძალებით შეგვიძლია ვთარგმნოთ სომხურიდან, თურქულიდან, რუსულიდან, თანამედროვე ბერძნულიდან, ასევე ინგლისურიდან და გერმანულიდან. მართალია ჩვენი ძალებით არა, მაგრამ გვაქვს სპარსულიდან შესანიშნავი თარგმანი საადისა და ეს მკითხველს ძალიან მოეწონა... ამასთან ერთად ცალკეა სამეურნეო ძეგლებზე პუბლიკაციები, ენა და პოეზია, ნადირობა, მუსიკალური საკრავები, ლიტერატურის ისტორია, კულტურის ძეგლები, ფიქტოლოგია, მოგონებები, დებიუტი, ამერიკული მწერლობა ცალკე, მოდის ისტორია და ა.შ. ვრცელია ეს ჩამონათვალი და ეს ჩვენი სერიოზული შედეგია. ამჯერად მე მინდა ჩამოვთვალო ის ავტორები, რომლებიც უკვე დაიბეჭდნენ უურნალში. საქართველოდან: გიორგი სოსიაშვილი, ვაჟა ხორნაული, ზელიმხან მალრაძე, მერაბ კვიცარიძე, შალვა კელოშვილი, ვახტანგ ინაური, ლალი ბერიძე, მალხაზ ლომსაძე, ლია ზაზაშვილი, ლელა ფერაძე, ვასილ მამულაშვილი, რევაზ მიშველაძე, თინათინ მლიდვლიაშვილი, გრიგოლ რობაქიძე, მაია ქუქ-ჩიშვილი, ივანე ჯაფარიძე, გიგი ხორნაული, უჩა ბლუუშვილი, გიორგი ბუცხრიკიძე, ნატო ყრუაშვილი, მაკა კაჭკაჭიშვილი-ბერიძე, ირაკლი ვაშაყმაძე, ალექსანდრე ტაბატაძე, უჩა ლონლაძე, ჯულიეტა ელბაქიანი, გულიკო ბექაური, თინა იველაშვილი, ნესტან სულავა, გივი ნემსაძე, ტარიელ ფუტკარაძე, ნანა გენაძე, ოთარ მჭედლიშვილი, ნანა ყორანაშვილი, ლერი ნოზაძე, ნუგეშა გაგნიძე, ჯემალ დობორვეინიძე, დათო ტურაშვილი, ანდრო ბედუკაძე, ნანა ჯლარკავა, ქეთინო გრძელიშვილი, დალი ბეთხოშვილი, ნიკო ოთინაშვილი, დარეჯან უუუუნაძე, მურმან

**ჯგუბურია, ანა ჩიქოვანი, დიანა ანფიმიადი, ზვიად ბერიძე, ჯუმა ჯუმათელი.** ექვსი ნომრისთვის, დამერწმუნეთ ეს ცოტა არ არის და საინტერესო გახლავთ ერთი ფაქტი, რომ ავტორები გვყავს მთელი ჩვენი ქვეყნის სხვადასხვა კუთხიდან, თუმცა ძირითადი ნაწილი მაინც აქაური გარემოა და მათ შორის უმრავლესობა ჩვენი თანამშრომელია, ე.ი. ჩვენ მაინც უფრო საკუთარ ძალებს ვეყრდნობით. ახლა მე ვფიქრობ, ფრიად მნიშვნელოვანია ერთი დამახასიათებელი რამ, რაც ჩვენს უურნალს, შეიძლება ითქვას, რომ ნარმოაჩენს, როგორც ამ კუთხით წინ გადადგმულ საინტერესო ნაბიჯის მქონეს. კერძოდ, უურნალი გასაკუთრებულ ყურადღებას უთმობს ემიგრანტულ ლიტერატურას. ჩვენ გვაქვს კონტაქტები უცხოეთის ბევრ ქვეყანასთან და იქ მცხოვრებ ქართველებთან. ემიგრანტი პოეტები და პროზაიკოსები, რომლებიც ჩვენთან უკვე დაიბეჭდნენ, არიან: **საბერძნებიდან, სალონიკიდან –** მარიამ ყიფიანი, ნანა ჩხაიძე; **ათენიდან –** ზაირა კელოშვილი, სპარტაკ ბენიძე, ნანა მეტრეველი, ნინო ქიზიყვლი, მანანა ბრაჭული, რუსუდან ჯანელიძე. **იტალიიდან:** სოლომონ ნერგაძე; **გერმანიიდან:** მაია გოგოლაძე-კილიჩი; **აშშ-დან:** ნანა მეფარიშვილი; **კანადიდან:** ნუნუ ლურქუმალიძე; **ისრაელიდან:** რიმა გურდუხაშვილი. გვინდა ვაჩვენოთ, რომ ქართველი ემიგრანტები კრიმინალები არ არიან, როგორც გვიხატავენ ხმირ შემთხვევაში, ქართველი ემიგრანტები შესანიშნავი, ინტელექტუალური ძალის პატრონები არიან და ჩვენ ამ ძალას ვიყენებთ. ახლა მინდა თარგმანებს შევეხო და ის ავტორები წარმოგიდგინოთ, რომლებიც ჩვენი ძალებითაა ნათარგმნი: **ბერძნულიდან გულიასი – მთვარელიდისა და ქუეჩიშვილის** თარგმანი; **გერმანულიდან – გრიგოლ რობაქიძე,** ამაზე ოდნავ გავამახვილებ ყურადღებას... რობაქიძის ერთ-ერთი ძალიან საინტერესო ზღაპარი, რომელიც გერმანულად დაიბეჭდა და არ იყო გამოქვეყნებული ქართულ სინამდვილეში, ჩვენ ვთარგმნეთ, გამოვაქვეყნეთ და შემდეგ სხვა სტატიაც დაიბეჭდა ამ თარგმანის შესახებ. ასევე კონდრატ ფერდინანდ მაიერი, ჰერმან ჰესე, გერმანულიდან ეს ყველა თარგმნილია ჩვენი თანამშრომლების – ლალი ბერიძისა და ლია წაქაძის მიერ. ფრიდრიხ შილერი თარგმნა ვასილ მამულაშვილმა. ფრიდრიხ ნიცშე, თარგმნა გიორგი მესხმა, ჩვენი პროფესორის უცხოეთში მცხოვრებმა შვილმა, ხოლო გ. რობაქიძის ზღაპარი - ნუგეშა გაგნიძემ. თურქულიდან: **გუნ თექინის** ერთი მოთხრობა მარინა შონიას თარგმანია, ასევე მარინა შონიასი და ნანა თათოშვილის მიერ რეშად ნური გუნთექინის მეორე მოთხრობა ითარგმნა. რუსუ-

**ლიდან:** დუნაევი, ბერდიაევი ირინა ჯიშკარიანმა თარგმნა, ასევე შელდი, ახმატოვა, ახმადულინა, ევტუშენკო, ბუნინი, ცვეტაევა, ანა ჩიქვანის შესანიშნავი თარგმანებია, სომხურიდან: არამ პაჩიანი, რომელიც ჩვენმა სტუდენტმა ელზა რაისიანმა თარგმნა და ორივე ენის სპეციალისტების აზრით, მშვენიერი თარგმანია. სხვათა შორის რამდენიმე დებიუტი შევთავაზეთ მყითხველს და ვფიქრობთ, რომ ამით სწორ გზაზე ვდგავართ. ასევე **საადი** თარგმნა **ალექსანდრე ელერდაშვილმა.** მე მინდა ასევე ერთ ფაქტზე გავამახვილო ყურადღება: უურნალი გამორჩეულია იმითაც, რომ ჩვენი საკუთარი მხატვრები გვყავს, ჩვენი ორი თანამშრომელი **ნანა ყორანაშვილი** და **ლელა ფერაძე** ყველა ნომერს ასურათებენ, გრაფიკული ჩანახატები სერიოზულად ამდიდრებს უურნალს და ეს ძალიან პრინციპულია. ამასთან ერთად ისინი მხოლოდ მხატვრები არ არიან, თეორეტიკოსებიც არიან და ძალიან მინდა დღეს გავუსვა ხაზი **ლელა ფერაძის** ინტერვიუებს ხელოვნების მიმართულებით, **ნანა ყორანაშვილის** პუბლიკაციას სამოსთან და მოდასთან დაკავშირებით. ასევე ინტერვიუები, ძალიან საინტერესო როგორც უცხოელებთან, ისე ქართველებთან. უცხოელებიდან განსაკუთრებით გამოვყოფდი თურქეთის საისტორიო საზოგადოების პრეზიდენტთან ინტერვიუს, მზადდება არტანის მერთან ინტერვიუ, გერმანელ მწერალთან, სხვადასხვა ინტერვიუები, მათ შორის ჩვენს ვიცე-პრემიერთან, ინტერვიუერი ჩვენი უურნალისტი ლია ზაზაშვილი გახდავთ. ეს არის ჩვენი ძალა, რითიც წარვსდექით თქვენ წინაშე „არავი“ დღეს ერთადერთი უურნალია, სამეცნიერო-პოპულარული, პოლიტიკასაც რომ „გაკრავს კბილს“, ამასთან ერთად ლიტერატურული, მხატვრული და საზოგადოებრივი, რომლის სარედაქციო საბჭოს უმრავლესობა პროფესურისგან შედგება. ჩვენ „არაველები“ აქ ვართ და მინდა ისინი წარმოგიდგინოთ, თუ ნებას მომცემთ. **ზაირა გელაძე** – „არავის“ მდივანი, ჩემი თანაშემწერა. აქვე მინდა მოგახსენოთ, რომ შევქმენით სარედაქციო საბჭოს საზღვარგარეთთან ურთიერთობის ბიურო, რომელსაც კურირებენ მაია ქუქჩიშვილი და **ლალი ბერიძე**. ჩვენი მხატვრების, **ნანა ყორანაშვილის** და **ლელა ფერაძის** შესახებ უკვე მოგახსენეთ. ლია ზაზაშვილი, გაზეთ „მესხეთის უნივერსიტეტის“ უურნალისტი, ასევე სარედაქციო საბჭოს წევრია. მინდა ბატონი გიორგი **ბუცხრიკიძის** შესახებაც მოგახსენოთ, იგი ეკონომიკის მიმართულებით „ამარაგებს“ უურნალს. ბატონი ვასილ მამულაშვილი უურნალისტია, იგი „არავის“ პირველი ნომრის რედაქტორი იყო. „არავშიც“

და უნივერსიტეტშიც ჩემი მოადგილეა მაკა კაჭკაჭიშვილი-ბერიძე. ასევე მინდა წარმოგიდგინოთ უნივერსიტეტის გამომცემლობის თა-ნამშრომლები ლიკა გზირიშვილი და ნანა კედელაშვილი.

ბევრი პრობლემა გვაქვს. უპირველესი არის გავრცელების სა-კითხი. ბუნებრივია, რომ პირველ რიგში უურნალს უნივერსიტეტე-ლები კითხულობენ. სამწუხაროდ, ჯერჯერობით ვერ მოხერხდა ისეთი სისტემის შექმნა, რომ ყველგან მივაწვდინოთ იგი, სადაც კი არის მასზე მოთხოვნა. დამფინანსებელი არის სამცხე-ჯავახეთის სახელმწიფო უნივერსიტეტი. დარწმუნებული ვარ, წლის ბოლოს ჩვენი პროდუქცია დაფუარავს მასზე განეულ ხარჯებს. გასაფართოე-ბელი და გადასახალისებელია ბეჭდვის ტექნიკური მხარე. მოსაგვა-რებელია ხარისხის პრობლემა. გარკვეული და დგას დიზაინის სა-კითხიც. ალბათ გამოჩნდებიან ბიზნესმენები, რომლებიც „არავში“ დაინახავენ პროგრესს, მომავლის უურნალს, ჩადებენ უშურვებლად ინვესტიციას და მოგებასაც ნახავენ.

**მაკა ბერიძე-კაჭკაჭიშვილი:** მოგესალმებით. მსურს გაგახსენოთ გურამ დოჩანაშვილის სიტყვები: „იყო მკითხველი, ეს თავისთავად სასწაულია. მკითხველი — ეს სწორედ ისაა, ვისაც შეგიძლია ისედაც ვიწრო საძილე ტომარაში შეყვარებულებს შორის იწვე და სულაც არ იყო ზედმეტი, ეს — სასაწულია და მეტსაც გეტყვი, ზედმეტი კი არა, აუცილებელი ხარ, რადგან ავტორმა ასე ინება“.

ქალბატონებო და ბატონებო, თითოეული აქ მობრძანებული სტუმარი აუცილებელია ჩვენი უურნალისთვის და ამიტომ კიდევ ერთხელ დიდ მადლობას მოგახსენებთ მობრძანებისთვის. გამოვთ-ქვამთ იმედს და დარწმუნებულიც გახლავართ, რომ გახდებით ჩვენი უურნალის აქტიური მკითხველები. პირადად, მიუხედავად იმისა, რომ წიგნთან შორს არ გახლავართ, „არავმა“ საკუთარ თავში სხვაგ-ვარი მკითხველი აღმომაჩენინა. თითქოს დიდი დრო არ არის გასუ-ლი, მაგრამ პატარა ისტორია თითოეულ ნომერს ახლავს. ავტორები ჩვენი უურნალისთვის წერენ და ჩვენი პატარა არქივი უკვე ინახავს ცნობილ მწერალთა ხელნაწერებს. დიდი მადლობა თითოეულ შე-მოქმედს ჩვენთან თანამშრომლობისთვის, მადლობა იდეის ავტორს, უურნალის რედაქტორს მისი დაარსებისთვის, რადგან ჩვენთან, სამცხე-ჯავახეთში დაიბადა უურნალი, რომელიც ეროვნებისა და საცხოვრებელი ადგილის მიუხედავად ეკუთვნის ყველას, ვისაც შეუძლია ქართულ ენაზე წიგნის წაკითხვა. დიდი მადლობა ყველას.

**ვასილ მამულაშვილი:** იცით, ახლა უურნალისტიკა საკმაოდ კრიზისულ მდგომარეობაშია. მე არ მინდა რაიმე გადავაჭარბო, მაგრამ მაინც რეალურად უნდა გითხრათ. ის, რაც დღეს უურნალისტიკის მიმართ არის, იმას, რასაც თქვენ უყურებთ, აუცილებლად მოითხოვს მაღალ პროფესიონალიზმს. ბატონი მერაბის მიერ დაარსებული უურნალი სწორედ დღევანდელ საქართველოს სჭირდება, არ იფიქროთ, რომ მხოლოდ მესხეთზეა აქ ლაპარაკი. ეს უურნალი მესხეთიდან საკმაოდ შორს გავა. მე მინდა მოვულოცო ყველა მესხს იმიტომ, რომ უნივერსიტეტია განათლების ცენტრი არა მხოლოდ მესხეთში, უფრო შორსაც. ამიტომ დღევანდელი უურნალი ძალიან დიდ საქმეს გააკეთებს. ძვირფასო მეგობრებო, სტუდენტებს მივმართავ. როდესაც მეორე-მესამე კურსზე არიან უურნალისტიკის სპეციალობის სტუდენტები, მათ სჭირდებათ, როგორმე წავიდნენ პრაქტიკაზე. იცოდეთ, უურნალისტიკა არ არის თეორია მხოლოდ, უურნალისტიკა არის პრაქტიკა. ამიტომ, როდესაც იფიქრებთ, სად წახვიდეთ, სად წახოთ, რომელ უურნალში გაიაროთ პრაქტიკა, რომელ ტელევიზიაში, აი, აქ. მესხეთის სახელმწიფო უნივერსიტეტს აქვს თავისი ბაზა და არსად წასვლა არ დასჭირდებათ სტუდენტებს. იცით, უურნალისტიკა დღეს რომ უყურებენ, ის არ არის, ინტელექტს მოითხოვს. ერთი საიდუმლოება აღმოვაჩინე და გაგიმხელთ: თითოეულ თქვენგანში არის უურნალისტი, ანუ ყველა თქვენგანს აქვს ახალი ამბის გადაცემის უნარი. თითოეული ადამიანი ცდლობს, გაუზიაროს სიკეთე სხვას ცხოვრებაში და ახლაც ეს ასეა. მოგესალმებით კიდევ ერთხელ და მე ამ დღეს დავიმახსოვრებ, როგორც უჩვეულო მოვლენას. ეს არის პრეზენტაცია, როდესაც ლაპარაკობენ უურნალისტებზე. გამადლობთ ამისათვის.

**ჯულიეტა ელბაქიანი:** უურნალ „არავის“ შესახებ მაშინ გავიგე, როდესაც ის იდეის დონეზე იყო თურმე. ჩვენმა გენიალურმა ლექტორმა ქალბატონმა ნათელა ბერიძემ პირველი კურსის ფილოლოგებს ღია სემინარი ჩაგვიტარა თემაზე - „ჩემი რელიგია“; მეც წარვადგინე ჩემი თემა, რაც ძალიან მოენონა დამსწრე საზოგადოებას, მათ შორის ბატონ მერაბს. მან მითხრა, რომ დავბეჭდოთ ესე უურნალ „არავშიო“. იმ დროს არ ვიცოდი, რომ უურნალის ნომრები ჯერ არ გამოდიოდა, ახლა კი მიხარია, რომ „სამხრეთით მონაბერი თბილი ქარი“ ჩვენს უნივერსიტეტში იღებს სათვეს. იმედი მაქვს, იგი თავისი სამეცნიერო და პოპულარული ნაშრომებით გააანათლებს და გაახარებს არა მხოლოდ საქართველოს, არამედ მის ფარგლებს გარეთ მყოფთ.

წარმატებას ვუსურვებ და მადლობას მოვახსენებ უურნალის რედაქტორს – ბატონ მერაბ ბერიძეს და სარედაქციო კოლეგიას. იმედი მაქვს ჩემი თანამშრომლიბა ამ უურნალთნ დიდხანს გაგრძელდება, მის ნომრებს კი ყოველთვის სიამოვნებით გავეცნობი.

**ლალი ბერიძე:** მოგესალმებით! ყველაზე მეტად რაც გამოგვარჩევს ქართველებს, რასაც ჩვენი უცხოელი მეგობრები აღნიშნავენ, ეს არის თანადგომის უნარი და ეს თანადგომა თურმე სიხარულში უფრო საჭირო ყოფილა. ყველას მინდა დიდი მადლობა მოგახსენოთ აյ მოპრძანებისათვის და ამ სიხარულის გაზიარებისათვის. გაგაცნობთ იმ მილოცვებს, რომლებიც გამოგვიგზავნეს „არავის“ მეითხველებმა და ავტორებმა საქართველოს სხვადასხვა კუთხიდან.

**იზა ჩანტლაძე:** ფილოლოგის მეცნიერებათა დოქტორი, ილიას სახელმწიფო უნივერსიტეტის საპათიო პროფესორი: „სიყვარული გზად და ხიდად!..“ სიყვარული — ეს საოცარი გრძნობა, გენიალური შოთას „ვეფხისტყაოსნიდან“, მესხეთიდან, ეფინება სრულიად საქართველოს, რომელიც თურმე „ყინვათა განმადნობელ“ სამხრულ ქარს მოჰყება, არავი რომ ჰქვია სახელად. იგივე სახელწოდება აქვს სამცხე-ჯავახეთის სახელმწიფო უნივერსიტეტში ახლახან გამოცემულ სამეცნიერო-პოპულარულ უურნალს... მთელი სულითა და გულით გილოცავთ ყველას მის დაარსებას, განსაკუთრებით კი ამ დიდებული პუბლიკაციის შექმნის მესაძირკვლეებს, შესანიშნავ ეთნოლინგვისტებს, მრავალი წლის მანძილზე ჩემს უდალატო კოლეგა-მეგობრებს... მზის სხივის სითბო და გამომცემლობის სურნელი ნუმც მოჰკლებოდეს „არავს!.. დღეის შემდეგ არავის არც დაეწეროს და არც წაეკითხოს თქვენს უურნალში დაბეჭდილი ერთ-ერთი ლექსის მსგავსი სტრიქონები: „საქართველო დამეკარვა და დავეძებ ქართველს, ილორსა და აჩაბეთში სანთელს ველარ ვანთებ“...

**ანა ჩიქოვანი:** მოგესალმებით უურნალ „არავის“ საზეიმო წარდგნის ორგანიზაციონებს, მონაწილეებსა და სტუმრებს!

წელს ქართველ მეითხველს მნიშვნელოვანი საჩუქარი გაუკეთა სამცხე-ჯავახეთის სახელმწიფო უნივერსიტეტმა - ლიტერატურული და სამეცნიერო პოპულარული უურნალი „არავი“. უურნალში იბეჭდება არა მარტო ცნობილი და ტიტულოვანი ავტორების ნანარმოებები, არამედ დამწყებ პოეტთა და მწერალთა შემოქმედებაც, - ეს დიდი სტიმულია მათთვის. უურნალ „არავის“ უკვე მეექვსე ნომერი გამოიცა და მას აქვს საკუთარი კონცეფცია და სტილი, რაც უურნალის თანამშრომელთა დამსახურებაა.

გულითადად ვულოცავ უურნალის რედაქციას, ყველა თანამშრომელს, გულშემატკივარსა და მკითხველს უურნალ „არავის“ დაარსებას! გისურვებთ წარმატებას, წინსვალასა და განვითარებას!

**ნუგება გაგნიძე, აკაკი წერეთლის სახელმწიფო უნივერსიტეტი გერმანული ფილოლოგის დეპარტამენტი, პროფესორი:** დიდი სიყვარულით მოგესალმებით ჩვენი ქვეყნის უძველესი ქალაქიდან — ქუთაისიდან. მადლიერი და ბედნიერი ვარ, ეს შესძლებლობა რომ მომეცა!

თვალ-ყურს ვადევნებ ყინულის დამადნობელ სამხრეთის თბილ ქარს, რომელსაც ბევრი სიამოვნება და სიხარული მოაქვს თან ... დაგაფიქრებს, საზრუნავს გაგიჩენს .....

დიდი შრომაა ჩადებული ლიტერატურული უურნალის „არავის“ თითოეულ ნომერში და შედეგიც სახეზეა. უკვე 6 ნომერი გამოვიდა, რომლებიც არა მარტო ძველ ავტორებთან შეხვედრას სთავაზობს მკითხველს, არამედ ახალ სახელებს აცნობს მათ. ეს დიდმნიშვნელოვანი და საპასუხისმგებლო საქმეა, ამავდროულად აუცილებელი.

თქვენს უნივერსიტეტს განსაკუთრებული მისია აკისრია საქართველოში, ისევე როგორც ბებერ და მრავალ ჭირგამოვლილ სამცხე-ჯავახეთს. თქვენ დასავლეთისა და აღმოსავლეთის გასაყარზე ყოველთვის თამამად ამბობდით თქვენს სიტყვას. „არავიც“ დიდებულ ტრადიციათა ლირსეულ გამგრძელებლად მიმართია.

წარმატებებს ვუსურვებ ლიტერატურული უურნალის „არავის“ რედაქტორს ბატონ მერაბ ბერიძეს, მოადგილეს, სარედაქციო საბჭოს, მხატვრებს, მდივანსა და საგამომცემლო ჯვეფს!

**მაია ქუქჩიშვილი:** მოგესალმებით ქალბატონებო და ბატონებო, მოპრანებულო სტუმრებო, სტუდენტებო და უნივერსიტეტის თანამშრომლებო!

დღეს ჩვენს უნივერსიტეტში ემოციებით სავსე ისტორიული დღეა! დღეს „არავის“ პრეზენტაციაში არა მხოლოდ ჩვენი ქალაქი ახალციხე, არამედ სრულიად საქართველო და თამამად ვიტყვი, მსოფლიოს ბევრი ქვეყანა ღებულობს მონანილეობას.

მე, როგორც სარედაქციო საბჭოს საზღვარგარეთთან თანამშრომლობის ბიუროს წამომადგენელმა, დღევანდელი დღისადმი უამრავი მილოცვა მივიღე ემიგრანტი ქართველებისგან საბერძნეთიდან, კანალიდან, იტალიიდან, საფერანგეთიდან, ინგლისიდან, ამერიკიდან, აშშდან, გერმანიდან, ესტონეთიდან... მინდა გაგაცნოთ ზოგიერთი მათგანის წერილობითი და აუდიო მილოცვა. მადლობა მინ-

და მათ გადავუხადო და ყველა ემიგრანტს სამშობლოში და თავიანთ კერაზე დაბრუნება ვუსურვო.

**ნინო ქიზიყველი, ათენი:** დღევანდელ დღეს ვულოცავ უურნალ „არავის“, მის შემოქმედებით კოლექტივს და სამცხე-ჯავახეთის სახელმწიფო უნივერსიტეტს, რომელთა თავდადებული შრომით კიდევ ერთი უძვირფასესი საჩუქარი მიეძლვნა ქართულ ემიგრაციას. ეს უდიდესი ბეჭნიერებაა, გესაუბროს ცხრა მთას იქიდან შენი სისხლი, სულში იმ-ედად გაგიძლიერდეს და ასე გულიანად მოგეფეროს - ემიგრანტი ადამიანისათვის სასიცოცხლო უანგბადის მიწოდების ტოლფასია.

უღრმესი მადლობა თქვენ, რომ ჩვენი სულის ნადენი ერთ უდიდეს და უმდიდრეს საცავში ჩაგროვეთ და რუდუნებით მიაწოდეთ ქართველ ერს, მისი შვილების უხვად ფურცლებზე დადგენილი ვარამი. კიდევ ერთხელ განაახლეთ თავდადებისა და ერთგულების ხიდი ქალთა ლაშქართან! ქალთა ლაშქართან, რომელიც საქართველოს დედაბურჯია!

უურნალი „არავი“ დღეს დაბადებას ზეიმობს და მინდა ძლიერება, წელთა სიმრავლე და ნაყოფიერი შემოქმედებითი წინსვლა ვუსურვო უნივერსიტეტს, უურნალის შემოქმედებით კოლექტივს... უღრმესი მადლობა ამ უძვირფასესი ძლვენისათვის, რომელიც თქვენგან მიგრირებულმა ქართულმა ლაშქარმა მიიღო საბერძნეთში! ქართული, ძარღვიანი სიტყვის კელაპტარი აანთეთ ყველა ჩვენგანის გულში და მაცოცხლებელი სიგრილით გვესალბუნება მარადიული მზის ქვეყანაში თვენგან მონაბერი სამხრეთის ნიავი! კიდევ ერთხელ გილოცავთ დღევანდელ დღეს და შემოქმედებით უკვდავებას ვუსურვებ უურნალ „არავი“!

**ნანა ჩხაიძე, თესასალონიკი:** ვულოცავ უურნალ „არავი“ მზის სინათლეზე გამოსვლას. წარმატებების გზით ევლოს და გაბრნყინებულიყოს. მადლობა უურნალის რედაქტორს, რედკოლეგიას განეული მუშაობისათვის. უურნალში სხვა რუბრიკებთან ერთად, იბეჭდება ემიგრაციაში მყოფი ხალხის შემოქმედება, რაც საშუალებას იძლევა არა მარტო ჩვენ — ემიგრანტები, სხვადასხვა ქვეყანაში მყოფი თანამოკალმეები გავეცნოთ ერთმანეთსა და ერთმანეთის შემოქმედებას, არამედ საქართველოს მოქალაქეებსაც აძლევს საშუალებას წაიკითხოს უცხოეთში შექმნილი ლიტერატურა. კიდევ ერთხელ დიდი მადლობა თქვენ, გილოცავთ დღევანდელ დღეს და გისურვებთ წარმატებებს.

**ზაირა კელოშვილი, ათენი:** მოგესალმებით და მოგილოცავთ უურნალ „არავის“ დაარსებას. როგორც ამ კუთხის შვილი, ჩემთვის ძალიან მნიშვნელოვანია, რაც ახლა თქვენთან ხდება. სამცხე - ჯავახეთი ოდითგანვე ითვლებოდა განათლების კერად, თქვენი უნივერსიტეტი კი არის ცოდნის ტაძარი. ამ „ტაძარში“ დაარსებული უურნალი „არავი“ კი ისეთივე ამაღლებულია, როგორც ეს კუთხე და უნივერსიტეტი.

მოგესხენებათ, ნოყიერ ნიადაგზე მცენარე კარგად ხარობს. ამ უურნალის სათავეებთან მდგომი სარედაქციო საბჭოს ყველა წევრი ემსახურებით მომავალი თაობების აღზრდა-განათლებას და პარალელურად იღწვით რეგიონის და არა მარტო, კეთილდღეობისთვის.

მე, როგორც ემიგრანტი პოეტი, მადლობას ვუხდი ქალბატონ მაია ქუქჩიშვილს რომელმაც გადო „ხიდი“ უურნალ „არავსა“ და ემიგრანტ- შემოქმედებს შორის.

ასევე უღრმეს მადლობას გიხდით ნდობისათვის, ვყოფილიყავი უურნალის სარედაქციო საბჭოს წევრი ათენში. ჩემთვის დიდი ჯილდოა თქვენგან დაკისრებული ეს მოვალეობა, უფალმა შემაძლებინოს, ღირსეულად ვზიდო იგი.

მადლობა თქვენ, ყველას რომ მიიღეთ და უპატრონეთ ჩვენს პოეზიას ტკივილით, მომავლის რწმენით, სამშობლოში დაბრუნების იმედით გაჯერებულს. უურნალი „არავი“ ამ შემთხვევაში ამართლებს თავის სახელს, თბილად დაპერა ემიგრანტთა გულებში სამხრეთის ქარმა და სითბო ჩაგვილვარა.

**მანანა ბრაჭული, თბილისი:** „რაჭა-ლეჩესუმ-ჯავახეთი და მესხეთი სასახელო“... ამ სტრიქონის გარეშე ვიცოდი, მავანს უფიქრია, ცოდოა „პატარა ქართველი“, ამდენ ტოპონიმს ვერ დამიახსოვრებსო, ანუ პატარა ქართველს სამშობლოც პატარა მოუხდებაო.

სიმართლეს ვერავინ დამალავს თუ მისი მაძიებელი ჯილტად ითხოვს მასთან შეხვედრას. ასე შეგვედი მეცხრამეტე საუკუნის მოლვანის - ალექსანდრე ფრონელის „დიდებულ მესხეთს“, რომელიც წერს: „დღეს მესხეთს ველარ იცნობ, ნარსულის აჩრდილი და ნატამალია. ჩონჩხი რა არის, ჩონჩხისთვისაც კი ვერ შეგვიდარებია რუსთველის, ბექას და აღბუღას სამშობლო... დღევანდელი მესხეთი ერთი შემზარავი, თვალგადაუწვდენელი და უსაზღვრო სასაფლაოა...“ რამდენჯერ მიტირია ამის წამკითხველს.

დღეს ბედნიერი ვარ! ვიცი, ის „სასაფლაო“ ლაზარესავით მკვდრეთით აღმდგარი საქართველო, სადაც „ქართულითა ენითა

ჟამი შეიწირვის და ლოცვად ყოველი აღესრულების“. დღეს ვიცი, რომ იქ სახელმწიფო უნივერსიტეტი ფუნქციონირებს, გამოდის ყოველთვიური ჟურნალი „არავი“, რომლის ფურცლებიდანაც შემიძლია ჩემი ფიქრი და სიყვარული გავუზიარო ჩემს დიდ სამშობლოს, მადლობა ვუთხრა იმ ადამიანებს, ვინც მესხეთის დღევანდელობა შექმნა და იღწვის უკეთესისათვის მადლობა ყველას, ვინც მომეცით საშუალება, მივმართო ჩემს მესხეთს:

**მალლდები, გულს უხარია შენი მზე, შენი არავი,**

**უშენოდ დიდო მესხეთო, არც ქართლელი ვარ, არავინ!**

**სპარტაკ ბენიძე, მსახობი, ათენი:** რამდენიმე თვის წინ, სრულიად შემთხვევით ხელში ჩამივარდა ჟურნალ „არავის“ ერთი ნომერი. კითხვის მოყვარული კაცისთვის საჩუქრად მივიჩნიე ის გარემოება, რომ გავცნობოდი ახალ სახეებს პროზასა თუ პოეზიაში.

ორიგინალური ვერ ვიქენები ნამდვილად თუ ვიტყვი, რომ რამდენად საჭიროა არსებობდეს ცოცხალი ლიტერატურული ჟურნალი, დღევანდელ ინტერნეტის ეპოქაში.

გამოგიტყდებით, ძირითადად მეც ინტერნეტ ბიბლიოთეკის მომხმარებელი ვარ.

ამის მთავარი მიზეზი, ჩემი ემიგრაციაში ყოფნის ათ წლიანი ცხოვრებაა და ასე უფრო მიადვილდება გავეცნო ახალ და საინტერსო ავტორებს.

თუმცა, როგორც მოგახსენეთ, წიგნთან თუ ჟურნალთან რეალურად შეხება სულ სხვა ეში აქვს.

ბედნიერი შემთხვევის წყალობით ჩემი რამდენიმე ისტორია-ჩანახატიც „არავის“ ახალ ნომერში მოხვდა.

ჯერ სახელი ვერ მოვუძებნე და გამიძნელდება გადმოვცე ის, რა-საც ახლა ვგრძნობ.

წარმატება მინდა გისურვოთ ჟურნალ „არავის“ სარედაქციო კოლეგიას, დაბეჭდილ თუ დასაბეჭდად გამზადებულ ავტორებს.

მიგულეთ თქვენს მეგობრად, გულშემატკივრად და ერთგულ მკითხველად.

**ნუნუ ლურჭუმალიძე:** მოგესალმებით კანადიდან ყველას, ვინც ახლა იმყოფება ჟურნალ „არავის“ პრეზენტაციაზე. მე გახლავართ საბერძნეთის ქართველ ქალთა კავშირის თავჯდომარე, ჟურნალ „ემიგრანტი ქალის“ დამფუძნებელი და ემიგრანტი.

მინდა დიდი მადლობა გადავუხადო „არავის“ რედაქოლეგიის ყველა წევრს, პირადად მაია ქუქჩიშვილს, რომელმაც შეძლო საბერძ-

ნეთის ქართული ემიგრაციის შემოქმედებითი ნაწილი დაეხლოვებინა საქართველოში მცხოვრებ შემოქმედებთან და მათი ნაწერები კითხვადი გამხდარიყო საქართველოს მოსახლეობისათვის და ასევე საქართველოში მკითხველთათვის შემოქმედება კითხვადი გაეხადა ემიგრაციაში მყოფი ქართველთათვის. მე პირადად დიდი პატივი მხვდა წილად, რომ ჩემი ნაწარმოებები დაიბეჭდა უურნალში და გაცნობდა მათ ქართველი მკითხველი. ვუსურვებ უურნალ „არავს“ წინსვლას, წარმატებას და, რომ, ის გამხდარიყოს სამაგიდო უურნალი მსოფლიოში მცხოვრები ყველა ემიგრანტისთვის და ასევე ნებისმიერი ქართველისთვის საქართველოში.

მინდა ყველას მადლობა გადავუხადო, ვინც იღწვის ამ უურნალისთვის და ასევე თქვენც, ვინც აქ მობრძანდით. ვუსურვებ კიდევ უფრო მეტ წარმატებებს „არავს“. მე ყველანაირად შეცუნცყობ ხელს ამ უურნალის გავრცელებას.

**მარინა ყიფიანი:** მოგესალმებით საბერძნეთიდან, კუნძულ სანტორინიდან, დღეს ახალციხეში ულამაზესი დღეა, სამცხე-ჯავახეთის სახელმწიფო უნივერსიტეტში ტარდება უურნალ „არავის“ პრეზენტაცია. მინდა მოგილოცოთ ეს დღე, მივულოცო რედკოლეგის წევრებს და, ასევე, ყველას, ვინც წვლილი შეიტანა ამ უურნალის დაარსებასა და გამოცემაში. დღესდღეობით გამოცემულია 6 ნომერი. მინდა მადლობა გადავუხადო კერძოდ ქ-ნ მაია ქუქჩიშვილს, რომელიც არის საზღვარგარეთთან ურთიერთობის ბიუროს წევრი. იგი აშუქებს ემიგრანტთა ყოფა-ცხოვრებას. დიდი მადლობა მინდა გადაგიხადოთ იმისთვის, რომ უურნალის პირველივე ნომერში გამოიცა ჩემი ლექსები. მინდა ეს დღე მოგილოცოთ ექსპრომტად დაწერილი ლექსით:

„სულიერ შვილის დაბადებას გილოცავთ ყველას,  
დაგბედებოდეთ ასპარეზზე ლალად შემოსვლა,  
ჩვენი „არავი“ არწივების მაგონებს ფრენას,  
მან მწვერვალების დასაპყრობად ფრთა ფრთას შემოჰკრა.  
იფრინეთ თქვენი მკითხველების გულიდან გულში,  
უხვად არიგეთ სიყვარული, სითბო გულისა.  
თქვენი უურნალით მეც ვიპოვვე სიმშვიდე სულის  
და უცხოეთში მკურნალია მწვავე წყლულისა.  
დღეს ბედნიერი საღამოა, გლოცავთ აქედან,  
ულამაზესი კუნძულიდან - სანტორინიდან.  
გიგზავნით გულით ამოხეთქილ სიტყვა საქებარს

**ამ დღეს თქვენს გვერდით ვყოფილიყავ, ბევრად მიღირდა.**

**ემიგრანტების გააშუქეთ ყოფა-ცხოვრება.**

**არვის ეგონოს დალხენილი დღე გვაქვს ყოველი,**

**ჩვენი „არავი“ საბერძნეთშიც გვემახსოვრება**

**და მოუთმენლად დაპრუნების წუთებს მოველით“.**

**ზაზა თამარაშვილი:** მოგესალმებით ყველას. როდესაც უნივერსიტეტში ვიმყოფები ხოლმე, ყოველთვის განსაკუთრებული ემოცია მაქვს. 21 წელი მქონდა პატივი, მემუშავა უნივერსიტეტში როგორც მათემატიკის კათედრზე, ისე შემოქმედებითი კუთხით. უნივერსიტეტი ერთ-ერთი უმთავრესი საგანმანათლებლო კერაა არა მხოლოდ ჩვენი ქალაქის და ჩვენი კუთხის, არამედ ზოგადად ჩვენი ქვეყნისა. უნივერსიტეტი ყოველთვის გამოიჩინდა ხოლმე არა მხოლოდ განსაკუთრებული ინიციატივებით, არამედ ამ ინიციატივების საქმეში გადაზრდით და ბოლომდე მიყანით. მე ვიტიქობ, რომ ეს ერთ-ერთი გამორჩეული საქმეა, რასაც ამ ჟურნალის დაარსება ჰქვია. მინდა მივულოცო უნივერსიტეტს ასეთი მნიშვნელოვანი საქმე და შემოქმედებით კოლექტივს ვუსურვო შემოქმედებითი წარმატება. თუმცა წარმატება უკვე სახეზეა.

**გურამ მელიქიძე, ახალციხის მუნიციპალიტეტის გამგებლის პირველი მოადგილე:** მოგესალმებით ქალბატონებო და ბატონებო, ძვირფასო სტუდენტებო, პირველ როგორი, მადლობა მინდა მოვახსენო უნივერსიტეტის ხელმძღვანელობას ამ მშვენიერ პრეზენტაციაზე მოწვევისათვის. დღევანდელ დღეს კიდევ ერთი საამაყო ფურცელი ჩაიწერება სამცხე-ჯავახეთის სახელმწიფო უნივერსიტეტის ისტორიაში, დაარსდა ყოველთვიური ლიტერატურული, სამეცნიერო პოპულარული და საზოგადოებრივი ჟურნალი „არავი“ ეს მნიშვნელოვანი ნაბიჯია ჩვენი უნივერსიტეტისათვის.

ალბათ არ მიწყენენ მოწვეული სტუმრები და დამსწრე საზოგადოება თუ, ვიტყვი, რომ განსაკუთრებით ამაყო ვარ ამ მნიშვნელოვან დღეს რადგან მე, პირადად, ბატონი მერაბის ხელმძღვანელობით მონაწილე ვარ ჩვენს კუთხეში უნივერსიტეტის დაარსების და მისი მშენებლობისა.

გახსნის დღიდან მთელი 15 წლის განმავლობაში თავდაუზოგავად ვმუშაობდი ბატონ მერაბთან ერთად, რომ მას ღისრეული და გამორჩეული ადგილი დაემკვიდრებინა თანამედროვე უნივერსიტეტებს შორის როგორც საქართველოში ისე მეზობელი სახელმწიფოთა შორის. ამიტომაც ძალზე მახარებს მისი ყველა წარმატება. მე მახსოვს

პირველი სამეცნიერო ბროშურის გამოშვება. პირველი ალმანახი. აქ დამსწრეთაგან ბევრს ემახსოვრება თუ რამდენ პრობლემასთან იყო დაკავშირებული ასეთი გამოცემების გამოშვება 90-იანი წლების და-საწყისში.

მინდა სამცხე-ჯავახეთის სახელმწიფო უნივერსიტეტს ახლად-დაარსებულ უურნალ „არავის“ მის სარედაქციო საბჭოს და პირადად მის რედაქტორს ბატონ მერაბს ვუსურვო შემოქმედებითი წარმატე-ბები, მყითხველთა ფართო წრე და ჩვენი ქვეყნის საზოგადოებრივ ცხოვრებაში ღირსეული ადგილის დამკვიდრება.

**ვასილ კვინცხაძე, სახალხო მთქმელი:** მეგობრებო! ბატონი მერაბ! როცა ადამიანი ასაკში შედის, ხშირად გადაავლებს ხოლმე თვალს განვლილ გზას, იხსენებს მისთვის სასურველ თუ არასასურველ დღეებს და ასკვნის, ბედნიერი არის თუ არა!

ამ შემთხვევაში, რადგან უნივერსიტეტის ეზოში უურნალ „არა-ვის“ პრეზენტაციაა, დიახ, ბედნიერი ვარ, გავიხსენებ რამდენიმე მომენტს.

ბატონ მერაბ ბერიძესთან, ავთანდილ ბერიძესთან და სხვებთან ერთად, მონაწილე ვარ 1966 წელს შოთა რუსთაველის 800 წლის-თავის ალსანიშნავი იუბილესი ვარძიაში, სადაც ვიყავი ახალციხის სიმღერისა და ცეკვის ანსამბლის ერთ-ერთი ხელმძღვანელი და მო-ცეკვავე, ჩემს ტექსტსა და რევაზ ლალიძის მუსიკაზე პირველად შესრულდა „სიმღერა ვარძიაზე“ და დღესაც სრულდება. მონაწილე ვარ იმ მღელვრე დღეებისა, როდესაც მერაბ ბერიძის ხელმძღვა-ნელობით ახალციხეში გაიხსნა თბილისის დედა უნივერსიტეტის ფილიალი. შემდეგში დაარსდა გაზეთი „მესხეთის უნივერსიტეტი“ და აი, დღეს ახალი ყოველთვიური უურნალი „არავი“.

## სარჩევი

|   |    |
|---|----|
| პომიდირი<br>ემზარ კვიტაიშვილი   | 3  |
| პროგრამა<br>კლარა გელაშვილი<br>საბეჭისცერო ჯვრისცერა  | 12 |
| თბრთმერი<br>ქემალ ბილბაშარი<br>ნერილუმილის აათრონი  | 23 |
| მიმიტრატული პომიდირ<br>ხათუნა შავგულიძე, ინგლისი, ლონდონი   | 33 |
| მიმიტრატული პომიდირ<br>მარიამ (ფარო) ხიტალიშვილი, საბერძნეთი, ათენი   | 40 |
| თბრთმერი<br>ბელ კაუჭმანი<br>პარტში  | 42 |
| თბრთმერი<br>ფრედერიკ ბრაუნი<br>სოლიცისტი  | 47 |
| ლიტერატურული ურთიერთობების<br>ისტორიიდრო<br>ირინა ჭიშკარიანი<br>გორის აასტერნაცი და საქართველო                      | 49 |
| სახელმწიფო მნის სტატუატისათვის<br>ნათელა ნაცვლიშვილი-ბერიძე<br>აირისა და აირის ნიშანისა სხავლების<br>თანხმობდევრობა | 59 |
| კულტურის ძირითადი<br>თინა იველაშვილი<br>შალიერაშვილების ჯვარიამაღალების ეპლესია<br>ახალციხეში                       | 65 |

|  |            |
|--|------------|
| <b>ინტერვიუ</b><br>კითხვები ეალაპის მერს   | <b>76</b>  |
| <b>ტრიტობ</b><br><b>ანდრო ბედუკაძე</b><br>დედა და „ქართველის დედა“   | <b>81</b>  |
| <b>ტრიტობ</b><br><b>ვახტანგ ინაური</b><br>გიორგი სოსიაშვილის პროზის მნათვრული<br>საენტიცია   | <b>86</b>  |
| <b>ტრიტობ</b><br><b>დალი ბეთოშვილი</b><br>სიყვარულის საკითხი თანამედროვე პოეტთა<br>შემოქმედებაში   | <b>90</b>  |
| <b>ტრიტობ</b><br><b>ნესტან სულავა</b><br>XX საუკუნის II წარვითისა და XXI საუკუნის<br>დამდეგის ქართული ლიტერატურის ძირითადი<br>ტენდენციები      | <b>106</b> |
| <b>ლ ა ნ ბ რ ი ი</b><br><b>ტრიტობ (აუსტავილი 850)</b><br>გულიკო ბექაური<br>„ვეფხისტყაოსნის“ ზეანრად მცოდნეობა მესამე<br>კონცერსი უნივერსიტეტში | <b>134</b> |
| <b>ბ ა მ ი ხ ე ბ უ რ ი ბ რ</b><br><b>სერგო ნურწუმია</b><br>„არავი“ – ახალი ურნალი ქვეყნის სამხრეთ<br>კარიბზედან                                | <b>140</b> |
| <b>ბ ა მ ი ხ ე ბ უ რ ი ბ რ</b><br><b>ავთანდილ მესხი (ავთანდილ ბერიძე)</b><br>„არავი არს ქარი სამხრეთითა“                                       | <b>144</b> |
| <b>პ რ ი ზ ე ნ ტ ბ რ ი ბ რ</b> და მიუროცხვი  | <b>146</b> |

ბამომცემლობა  
„ახალციხის უნივერსიტეტი“

ქ. ახალციხე, რუსთაველის ქ. №106,  
ტელ.: 0(365)22-19-90, 595-94-02-26, 591-41-12-88  
ელ. ფოსტა: [jurnaliaravi@gmail.com](mailto:jurnaliaravi@gmail.com)